



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.


We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>















IOANNIS AVGVSTI ERNESTI  
-INSTITVTIO  
INTERPRETIS  
NOVI TESTAMENTI

---

EDITIONEM QVINTAM

SVIS OBSERVATIONIBVS AVCTAM

C V R A V I T

CHRISTOPH. FRIDER. AMMON

---

L I P S I A E

I N L I B R A R I A W E I D M A N N I A

C I D I D C C C I X .

BS476

ET

1829

28259

V I R O

SVMME VENERABILI

IOANNI IACOBO  
GRIESBACH

THEOLOGIAE DOCTORI  
EIVSDEMQUE IN ACADEMIA IENENSI  
PROFESSORI PRIMARIO, SERENISSI-  
MO DVCI VINARIENSI A CONSILIIS  
ECCLESIAE INTIMIS, PRAELAT. IENENS.

DEPVT. REL.



**T**IBI, Vir bonorum laudibus Celebra-  
tissime, hunc librum inscribi, duplici  
causa permotus curavi, cum ut meae  
erga TE pietati, qua nulli cedo,  
satisficeret, tum quod Ernestium, vel  
post fata immortalem, suam interpre-  
tis N. T. institutionem sponte sua ad TE  
delaturum fuisse existimo. Tanta enim  
sunt merita TVA de liberali noui foede-  
ris explicatione; tanta remotissimos fon-  
tes adiisti solertia et sagacitate, inspectos  
aperuisti, apertos in latissimum crifcos  
N. T. campum deriuasti; tanta denique  
eruditione pariter ac assiduitate praece-  
ptis hermeneuticis lucem vel ipse accen-  
disti, vel accensam propagasti; ut haec  
omnia



omnia ingrato silentio premere nemo possit, nisi qui ipse literis male cupiat. Quae cum ita sint, patiaris quaeso, Vir summe Venerabilis, me publice nunc nominis TVI studium ardentissimum profiteri, TIBIque persuadeas velim, me nusquam mihi magis placere, quam in vera meritorum TVORVM admiratione. Vale mihiq; faue.

**PRAE-**

---

# PRAEFATIO

## EDITIONIS QUINTAE.

---

*De interpretatione narrationum mirabilium N. T.*

**D**istractis quartae editionis libri *Ernestiani* exemplis, nouae descriptionis curandae provinciam iterum ad me detulit librarius, vir honestissimus, qui negotiis suis haud semel de bonis literis bene meruit. Nolui detrectare laborem et officium, non, quod alios eo non longe melius fungi posse putarem, sed ne conferendi symbolam ad idoneam interpretationem N. T. qualemcunque occasionem praetermitterem. Limaui itaque ea, quae ad priorem editionem obseruata erant, nonnulla ex aduersariis adieci, hic illic praecepta auctoris, in notis scilicet, ingenio temporis attemperavi, reliqua exemplis illustravi. Hac enim ratione facillime effici posse iudicaui, vt futurus librorum factorum interpres assiduo huius libri studio rite gubernetur et in rectam viam deducatur,

catur, quamvis institutio ipsa, qualis ab *Ernestio* profecta est, propter auctas inde a triginta annis subsidiorum criticorum copias, nonnullis laboret incommodis nunc aegerrime remouendis. Multa enim cum maxime in scholis hermeneuticis praecipui possunt debentque de origine librorum N. T., de interpretibus et compositoribus eorum (v. c. in euangeliiis Matthaei et Iohannis), de fontibus institutionis Iesu Christi (v. c. in oratione dominica et parabolis), de Christologia et re mythica Iudaeorum (v. c. 1. Petr. III, 19. f.), de gnosi biblica, de plantis et animalibus in N. T. obuiis, aliisque argumentis ab auctore nostro siue plane praetermissis, siue leuissimo tantum penicillo tactis. His autem de rebus quam in obseruationibus a nobis adpersis omnino disputari non potuerit, adiiciemus saltem nonnulla *de idonea narrationum mirabilium in N. T. obuiarum interpretatione*, ne editoris officio omnino defuisse videamur.

Videlicet multa occurrunt in prima religionis Christianae historia, quae a communium rerum ordine recessisse putantur proptereaque in miraculorum numero habentur. In-

fita

fita enim est animo humano summi cupido communesque rerum causas praeteruolandi facilitas, quae, ut a rectis intellectus legibus semper improbetur, rationi tamen non ubique aduersatur, sed fidem potius interdum alit, qua scientia, ceu summo fundamento, innititur. Proclive itaque est ad intelligendum, homines pios probosque, qui omnia, quae fiunt, ad Deum referre soleant, si animum ad scribendum adpulerint, nouae inprimis religionis initia ita literis consignaturos esse, ut numinis voluntatem, opera, decreta ubique sibi habeant praesentissima; quod quam verè dictum sit, omnis N. T. historia loquitur. Eiusmodi narrationes dum explicandas sibi sumit interpres, hoc sibi imponit simul officii, ut non auctoris verba solum in suam linguam transferat, sed dicta eius etiam in sensum clarum resoluat, effectus ad causas suas reuocet, euenta legibus idoneis adliget, hacque nota insigni traditiones a narrationibus, somnia a factis distinguat. Non sufficit, animaduvertere ad Matth. III, 17., vocem coelitus emissam fuisse, quum Iesus baptismo prolueretur: adde potius e loco parallelo Ioh.

XII,

XII, 29., *βροντὴν γεγενῆσθαι* de liquido, cui suam quivis sententiam, ceu oraculo diuino, subternere solebat. Non satis est, obseruare ad Act. IX, 4. ff., Paulum verba miscuisse cum Iesu Christo e nubibus eum compellente: interpres enim idoneus prouocabit ad locum similis plane argumenti XXII, 17., quo diserte scribitur, apostolum *γεγόμενον ἐν ἐκστάσει* cum Iesu collocutum esse. Hoc enim iuris si nobis denegatum esset in illuminandis libris sacris, quorum eos nobis explicandos sumeremus; quidni quemuis potius in iis legendis per arbitrium sapere, vel desipere pateremur; quare non cuiuis eos figmentis, allegoriis, fanaticisque opinionibus implendos relinqueremus? Magna debetur verecundia animis hominum, concedo; cauendum est, ne conscientiam aegrotam vulneremus, non refugio; quid, quod parcendum est etiam superstitioni, e qua fides haud raro subnascitur, non contra dico. Videant modo, qui in hac meticolositate sibi placent, haec omnia pertinere magis ad prudentiam, pastorem vocant, quam ad prouinciam interpretis, qui de euentu et efficacia sanae explicationis securus sensum auctoris sui inda-

gat

gat eumque aequalibus suis ita propinat; ut non verbis solum verba adnumeret vel adpingat, sed suum etiam de veritate huius sensus iudicium interponat. Qua in re dum sedulo versatur, summam *primum* adhibebit ἀκριβειαν grammaticam in serie orationis rite explicanda, ne singulis vocibus, vel loquendi formulis falsum, siue ambiguum sensum substernens miracula fingat a mente et sensu scriptoris plane aliena. Sic Matth. VII, 3. καθαρῶσαι non est purum *reddere*, sed purum *declarare*; Iesu enim tempore non sacerdotibus solum, sed doctoribus etiam virisque sapientibus ius erat, leprae causas atque indolem explorandi, aegrotosque in societatem, e qua eiecti erant, reducendi. <sup>1)</sup> Alio loco eiusdem euangelistae XIV, 26. περιπατεῖν ἐπὶ τὴν θάλασσαν non est fluctibus *insistere* ceu contingenti, ut ipse somniat *Hieronymus*, sed

am-

1) Mischn. ur. חכמים משהרים cap. VII. sapientes leprosum purum *iudicant*. Addit tamen idem tractatus, magnas inter חכמים atque רבים de lepra ortas esse lites; sacerdotes enim aqua et igne saepius interdicebant leprosis, qui a sapientibus puri erant iudicati. Vide, quam bene haec omnia conueniant loco nostro.

*ambulare per undas* in regione vadosa, deinde *natare* (v. 29.); Iesus enim discipulis, qui propter venti impotentiam nauim remis adpellere non poterant, cum meando, tum natando obuiam venit, Capernaumum cum illis rediturus. <sup>2)</sup> Eadem sedulitate *etiam* curabit sanus interpretes, ne, aliorum auctoritate fretus, opinionibus seruiat praeiudicatis et errores inueteratos suo iudicio confirmet. Notum est in vulgus, vel erectiones de plebe offendi daemonibus in gregem porcorum effusis Matth. VIII, 28. ff.: docet autem natura morbi, quam euangelista describit, doloribus non a spiritu impuro, sed ab *idea* diaboli oriundis excruciatum fuisse aegrotum, qui pristinam sanitatem non tam medicis, quam psychologicis remediis usus recuperavit. Verba Ioh. XIX, 34. λόγῳ ἔνυξε τὴν πλευρὰν αὐτοῦ a nonnullis de vulnere

- 2) Περιπατεῖν ἐπὶ τῆς θαλάσσης idem est, quod ἐπιβαίνειν τῆς θαλάσσης (v. vitam Gregorii Nazianz., opp. Colon. 1690. t. I. p. 5.), *ambulare per undas*: deinde respondet hebraico כִּי־נָחַל בַּיָּם, Gen. VII, 18. Pf. CIV, 26., quod de manibus usurpatur. Sap. Sal. V, 10. ναῦς διερχομένη κυμαίνόμενον ὕδωρ.

nere pericardii explicantur; confundunt itaque *νόσσειν* et *καταβάλλειν*, *ferire* et *traicere*, sensu a mente euangelistae plane alieno. Ad locum Luc. XXIV, 40. videbis observationes interpretum de manibus *pedibusque* Iesu Christi in cruce perforatis; docent tamen scriptores fide digni, pedes maleficorum raro clavis, saepius restibus, interdum etiam manus pedesque eorum sparto, vel funibus cruci adligatos fuisse. <sup>3)</sup> *Eodem* iure autem temperabit sibi interpret a coniecturis audacibus friuolisque, quibus narrationes auctorum sacrorum deformantur et in fabulas aniles conuertuntur, quod post *Woolstonium* imprimis a *Bahrdtio* factum esse legimus; Lazarum enim Iesumque ipsum non vere vita defunctos, sed animi deli-

- 3) Vide post *Lipsum* et *Bynaeum* doctam *Pauli*, viri nobis amicissimi, dissertationem (Memorabil. Lips. 1793. Part. IV. p. 36. f.). Addimus locum, qui hucusque interpretum diligentiam effugit, e *Xenophontis* Ephesiensis l. IV. de Abrocema a praefecto Aegypti in crucem sublato: καὶ ἀναστήσαντες τὸν σαυρὸν προσαρτῶσι, σπάρτοις τὰς χεῖρας σφίγγαντες καὶ τοὺς πόδας τοῦτο γὰρ τῆς ἀνασταυρώσεως ἴσος τοῖς ἐκεῖ. Edit. *Mitscherlichii*. Biperu 1794. p. 282.



deliquium tantum passos fuisse, deinde Iesum non in coelum, sed in montem oliuarum adscendisse volunt, vt fati iniuriam effugiens in desideratam solitudinem se reciperet. Vereor autem, ne duumviro-  
rum istorum vestigia prementes modesta interpretationis libertate abutamur; quamvis enim de hominibus rediuiuis atque δευτεροπότοις res satis expedita sit <sup>4)</sup>, certum est tamen, Iohannem de Lazari, euangelistas autem omnes de vera Iesu Christi morte non dubitauisse. <sup>5)</sup> Malim itaque in his, tironibus praesertim, commendare tum prudentiam, quae grauissima N. T. miracula a studiis suspicionibusque praeproperis seruet intacta,

4) Nec minore fama, cum occurrisset ignoto funeri, relato homine atque seruato. *Plin. H. N. XXVI, 8. de Asclepiade. Cf. Philostratum vit. Apoll. C. IV, 45.* Exemplum longe illustrius memoriae mandauit *Plutarchus* de Thespasio Solensi: κατενεχθεῖς γὰρ ἐξ ὕψους τινὸς, εἰς τράχηλον, οὐ γενομένου τραύματος, ἀλλὰ πληγῆς μόνον, ἐξέθανε, καὶ τριταῖος ἤδη πρὶν τὰς ταφὰς αὐτὰς ἀνήνεγκε, ταχὺ ῥωσθεῖς καὶ παρ' αὐτῷ γενόμενος κ. τ. λ. *De fera numinis vindicta opp. ed. Reiskii t. VIII. p. 230.*

5) Vide comment. nostr. *de vera Iesu Christi publice fato functi reuiuiscencia. Erlangae 1808.*

intacta, tum sapientiam, quae non arbitretur, nos bene scire ea, quae nesciamus. In aliam *contra* abimus sententiam, si in ipsa scriptoris narratione occurrant nonnulla, quae coniecturae locum faciant nexumque causarum naturalem portendant. Noli itaque praetermittere admonitionem Mariae in nuptiis Canensibus, *οἶνον οὐκ ἔχουσι* Ioh. II, 3.: probat enim, suboluisse matri Iesu Christi de liberalitate filii erga novos coniuges, quam antea iam animo conceperat. Neque verba *ἀντλήσατε νῦν* v. 8. potestate carent singulari; non aqua enim, qua hydriae repletae erant, sed aqua inde in vrceolos hausta vini naturam induebat, quo non nisi mixto et temperato vti solebant convivae. Adde locum Ioh. V, 14., quo hominem in thermis Bethesdae sanatum graviter admonet Iesus, ne ad pristina facinora redeat. Docet autem v. 5., illum iam eo aetatis progressum fuisse, ut exhortatio de vitanda impuritate venerea locum haberet nullum; suspicari itaque fas est, hominem mendicitati, e qua vitae alimenta et quaestum petierat, inuitum licet, ereptum et auctoritate Iesu Christi ad meliorem frugem reuo-

reuocatum esse. 6) *Neque* alienum est ab interpretis officio, hic illic interserere causas medias ab auctore sacro praetermissas; constat enim, feruida ingenia ad finem narrationum properare saepiusque omittere ea, e quibus euentus mirabilis proxime pependit. Sic recte obseruatur ad Matth. XIV, 15., non omnem populum caruisse cibo, sed magnam partem eius; prope enim erat Pascha Iudaeorum Ioh. VI, 4., quod Hierosolymis comedere solebant, iter non sine amplo commeatu suscepturi. Absolum igitur non est, statuere, Iesum paucos panes piscesque coenae suae destinatos distribuisse proximis v. 19., vt exemplo suo reliquos ad similem humanitatem excitaret. Diserte enim testatur euangelista, Iesum ipsum fregisse panes plebi aequis portionibus diribendos, quod, nisi nouum finxeris

pro-

6) Noli immorari iis, quae *Cyrillus Hierosolymitanus* (homil. in h. l. opp. ed. Paris. 1720. p. 336.), *Hieronymus* (loc. Hebr. opp. ed. Francof. 1684. t. III. p. 181.) et *Chrysostomus* (hom. in h. l.) de piscina probatica, vel pecuali tradunt. Abeunt enim inter se in diuersa, neque conueniunt cum Iohanne, qui de porta huius nominis agit, non de piscina, vel lacu.

prodigium, tam exiguo temporis spatio omnino fieri non potuit. Apostoli saltem de miraculo non cogitauerunt Marc. VI, 52.; neque populus, qui in coenae societatem abierat, Ioh. VI, 50.; quid, quod Iesus ipse saturitatem plebis opponit τοῖς σημείοις v. 26. in sanatione aegrotorum conspicuis v. 2. Multo maioris *adhuc* momenti est, potestati singularum verbum et formularum grammaticae iungere sensum historicum, qui praeter linguae usum etiam religionem, philosophiam, superstitionem, institutionem populi civilem et domesticam habet fontes. Videtis, quam multa commenti sint interpretes de γλώσσαις καιναῖς καὶ ἑτέροις Marc. XVI, 17. Act. II, 4., quarum notitiam quasi agmine facto animis apostolorum coelitus illapsam esse volunt; probauimus autem alio loco, Iesum euangelii institutionem precesque secundum praecepta eius fundendas, non Iudaeorum more linguae hebraicae adligauisse, sed *alias* etiam adeoque *nouas* linguas hunc in usum admisisse. Quare nouo idiomate vtuntur apostoli eorumque discipuli non in coetibus Iudaeorum Palaestinenis, sed in conuenticulis

\*\*

ticulis mixtis Hierosolymae, Caesareae, Ephesi, Corinthi, quibus praeter Hellenistas etiam Romani alique, exteri interfuerunt. Paulus certe collegas omnes linguarum, hebraicae puta, hierosolymitanae, chaldaicae, syriacae et hellenisticae cognitione longe antecit 1. Cor. XIV, 18., lyconicae tamen siue graeco-barbarae Act. XIV, 11. s. atticaeque puritatis imperitus fuit, ib. XVII, 18. Plane similis est locus Act. II, 3. ὡφθησαν αὐτοῖς γλῶσσαι ὡς εἰ πῦρ, quem de flammulis *quasi* igneis bene interpretantur prouocantes ad Ies. V, 24.: sed docet adhuc historia festi pentecostalis, Iudaeos studio legis vacantes flammam et fulgura igneamque legis coronam animis obseruantem habuisse, qua obseruatione narrationi Lucae clarissima lux adfunditur. Neque desunt *etiam* euentus mirabiles et manifesta aegrotorum superstitione, verecundia et meticulositate deriuandi, quales de Vespasiano memoriae tradiderunt Suetonius atque Tacitus. Mulier fluxu sanguinis laborans, quae turba medicorum antea fere perierat, pallii Iesu laciniam tangens se morbo leuatam sensit: induerat enim per sua-

suasione plane singularem, à qua ipse Lucas non longe abfuisse videtur, corpori servatoris inesse vim ἀλεξίκακον, cuius tactu malacia quævis continuo pellatur, Luc. VIII, 44. f. Alio tempore Hierosolymis tanta erat Petri auctoritas, vt aegroti vel umbra apostoli praetereuntis recreati se melius haberent, Act. V, 15.; Philippis ancilla ecstasica, quæ Apollinis instinctum mentita erat, obtestatione Pauli liberatur furore suo XVI, 18.; Ephesi autem vel sudariis et semicinctiis apostoli compescuntur morbi daemonesque animis infidentes deturbantur XIX, 12., quæ omnia ab ingenti animorum, opinionibus fanaticis excitatorum, commotione originem duxisse videntur. Neque dubitaue-  
rim, ipsam Bariesu ἀμαύρωσιν breui transi-  
turam a metu Iudaico numinis vehementi-  
busque animi male sibi consciū adfectibus re-  
petendam esse Act. XIII, 12. f. 7) *Postre-*  
*mus,*

- 7) Quid timor valeat vel in causa iurissima, docet ex-  
emplum Agrippæ a Caio increpati (*Philo de virtut. opp. ed. Mangey t. II, p. 585.*): ἀμαυρῶν καὶ ἀχλὺν  
δεσσεῖ ταῖς ὄψεσι τοὺς ἐν κύκλῳ παρεστηῶτο. De  
Theodecte tragico, qui in eo erat, vt librum sacrum  
Iudaeorum dramate profanaret, Iosephus scribit: τὰς  
ὄψεις

*nium*, ne aliquid dissimulemus, etiam rei et narrationis subinde discrimen statuendum esse, argumentis haud spernendis contendere potest. Apostoli enim opinionibus Iudaeorum atque commentis innutriti erant; nonnulli, ut Marcus atque Lucas, in commentariis de vita Iesu Christi aliorum auctoritatem sequi debebant; actus apostolorum certe de triplici fonte manauerunt, traditionibus *ἐγχωρίοις*, narrationibus Pauli et *αὐτοψίας* auctoris; mirum itaque non est, in nonnullis famam creuisse eundo, in aliis autem ornatum orationis facto cuidam memorabili speciem induisse *σημειώδη*. Iesum ante ingressum muneris in varia adductum fuisse opinionum discrimina, vel sine euangelistarum testimonio probabile est: Matthaeus autem, qui in discipulorum numerum tunc temporis nondum adscitus erat, ea tentationes adpellat a diabolo excitatas; Lucas contra, qui ubique Matthaeum emendaturus est, ordinem earum inuertit; Iohannes denique, rationes temporis sedulo indicans, iis post bapti-

*ὅψεις ἐγλαυκώθη, καὶ συνιδὼν τὴν αἰτίαν ἀπηλλάγη τοῦ πόνου, ἐξευμενισάμενος τὸν θεόν. Conf. 2. Maccab. III, 27. et Act. IX, 9. f.*

baptismum Iesu Christi locum relinquit nullum. Patet igitur, nisi omnes historiae le-  
ges migrare malis, multa hac in re exposi-  
tioni et ornatui auctoris tribuenda esse.  
Thermae Bethesdenses, a Βεζέθαι Iosephi  
plane diuersae, in vetere Hierosolyma non  
exstiterunt; historia adulterae, qualis a Io-  
hanne describitur, a consuetudine Hebrae-  
orum forensi abhorret; statuimus itaque,  
hanc quidem propter argumenta critica ge-  
nuinam, sed vtramque compositor euange-  
lii, forte Iohanni presbytero, quod ad or-  
natum et expositionem, tribuendam esse. \*)  
Ananiam in conuentu apostolorum metu  
exanimatum post interuallum aliquod ad in-  
feros secuta est vxor Sapphira \*); mox or-  
tus est rumor ad Essenorum notiones com-  
positus, vtrumque coniugem terribili apo-  
stoli iudicio repentinae mortis damnatum  
esse. Monendi tamen sunt tirones, vt hanc  
viam

8) Vide not. 5. De probabili euangelii Iohannei auctore  
et ordinatore alio tempore differemus.

9) Vt dubitationem, quae forte suboriatur, euellas  
animo, confer similem narrationem in libro: *Die  
Geschichte der alten und neuen Herrenhäuser*, aus dem  
Holländischen von Scholl. Tubing. 1805. p. 179. f.



viam prudenter et haud sine urgente necessitate ingrediantur; aspera enim est atque salebrosa scopulorumque plena, ad quos vel cautissimus interpret facile offendat.

Sed quominus longius procedamus in tramite ambiguo et spinis tribulisque obfeto, praefationis angustiae prohibent. Sufficit, animos eorum, qui, quid sibi velint verba poetae, *rerum cognoscere causas*, in comperito habeant, ad eas meditationes erexisse, quibus veritas vel in profundo demersa e latebris suis protrahatur. Nolumus enim cum iis concertare, qui diuinam euangelii originem propugnaturi, veritatem historiae Iesu Christi siue negligant, siue commentis Iudaicis inuoluant. Non itaque possum, quin vel hoc loco honorificentissime sentiam de venerabilis *Augustii*, theologi Ienensis, *ὁμολογία*, qua litem de syncretismo nobis fere inuitis orituram, amicis a me literis compellatus, ea, qua solet, humanitate suppressi. brevis enim vita est, ars longa. D. Erlangae, id. Iul. 1809.

AMMON D.

PRAE

---

# PRAEFATIO

EDITIONIS QUARTAE.

---

Quid in noua huius libelli editione, ex ornatissimi redemptoris desiderio a me curata, praestitum omissumue sit, paucis exponi consilium et res ipsa suadent. Iam ex eo tempore, quo scholis *Hufnagelii* hermeneuticis interesse mihi licuit, virtutes libri Ernestiaui, quem aureolum vocare exteri non dubitauerunt, \*) accuratius inspexeram. Postea, vbi vir egregius et mea laude superior, potestate literas sacras et humaniores docendi mihi publice oblata, scientiam hermeneuticam proponendi munus ad me detulit, occasio saltem non deerat, in repetitis praelectionibus, iisque in exterorum gratiam latine etiam habitis, ad arcem causae penetrandi. Congerebam igitur, quae ad auctorem illustrandum facerent; nonnulla rescindebam, quae  
nunc,

\*) Vid. *Ernestii* elogium in *Opuscul. Orat. Nou.*  
*Vol. Lips. 1791. pag. 268.*

nunc, vbi scientia tironibus ad notitiam N. T. historicam et criticam viam sternens, in molem singularem eamque satis vastam excreuit, in hac felicius et aptius explicari possunt; multa addebam a beato *Ernestio* praetermissa, \*) potissimum ex *Semleri* et *Griesbachii* thesauris criticis; reliqua exemplis illustrabam. Quo quidem in labore, licet virium exiguitati attemperando, nunquam tamen praecepti oblitus sum, boni esse viri, non iurare in verba magistri et intra limites semel praescriptos subsistere, sed potius veri regnum propagare, seueraeque auctoritatis priorum temporum iugum excutere. Quorsum enim institutae essent profundae virorum nostri aevi doctissimorum meditationes de librorum sacrorum origine et argumento; quorsum expolita literarum humaniorum studia; quorsum philosophiae fax accensa et verae religionis tradendae ratio emendata esset, nisi maiorum praesidiis uti et ulterius progredi liceret? Dabunt igitur veniam magni nominis *Ernestiani* cultores, inter quos etiam ego referri velim, si me hic illic ab auctoris longe eruditissimi sententia modeste discessisse invene-

\*) Qua de re iam monuerunt S. R. *Tellerus* in libello: *Des Herrn I. A. Ernesti Verdienste um die Theologie und Religion*. Berlin 1783. p. 9. seq. et *Semler* ὁ μακαρίτης, in addisamentis ad h. l. Halae 1783. p. 23. seqq.

venerint: neque enim mihi propositum erat, viro immortalī laudibus meis monumentum exstruere perituro, sed potius in notis, siue largius, ut ab initio, siue parcius, ut sub finem in sectione argumenti plena, adspersis, ea persequi, quae commemoratu digna adhuc videbantur. \*) Multa fortasse refingi, multa aliter disponi, quaedam circumscriptius addi, nonnulla etiam rescindi poterant, sine ullo scientiae detrimento. Quis enim nesciat in institutione hermeneutica nostris diebus singulares adhuc disputationes *de interpretatione historica, de cri-seos sacrae theoria, de ingenio et caractere scriptorum N. T.* desiderari? Ego quidem lubens fateor, bonum scripturae sacrae interpretem sine adcurata harum rerum notitia formari vix posse. At enimvero praecipua huius dissertationis momenta vel iam in observationibus, licet suspenso calamo, tacta sunt, vel propter ipsam libri *Ernestiani* rationem exponi non poterant. Non enim hoc mihi iuris datum erat, ut stilo et falce in librum optimae frugis plenum grassarer, sed ut illum, quoad eius fieri

\*) Propterea etiam factum est, ut in toto libro Ernestiano nihil corrigeretur, praeter vitia typographica et prolegomenorum paragraphum ultimum, quo interpretis institutio melius in tres partes describi videbatur.

fieri poterat, nostris temporibus adcommo-  
darem, quae firma sibi interpretandi prae-  
cepta deposcunt, tum ad compescendam  
multorum in explicanda S. S. licentiam,  
tum ad coercendam aliorum inconstantiam,  
qui pro sua literarum humaniorum inscien-  
tia, omnia vaticiniis complent, ex plurimis  
locis dogmata seuera eliciunt atque hac ni-  
mia et molesta sedulitate optimam et diui-  
nam religionis doctrinam aduersariorum li-  
bilis exponunt. Scribebam in literarum  
vniuersitate Erlangensi, ipsis idibus Ianua-  
riis 1792.

---

LECTO-

---

LECTORI  
DOCTO ET S. LITERARUM  
AMANTI

S. D.

Io. Augustus Ernesti.

*Ante multos annos, cum interpretatus  
essem lectionibus academicis Epistolas Apo-  
stolicas, rogatus sum a multis, qui eas le-  
ctiones sibi ad bene intelligendum profuisse  
putarent, ut etiam praecepta interpretandi  
traderem, quibus ad usum adiungendis, fa-  
cilis dirigerentur in indagando sensu et ra-  
tionibus firmando. Cum iis demonstrarem,  
interpretationem esse ex eo genere rerum,  
quae prope totae observatione et usu tene-  
rentur, paucis admonitionibus contentam,  
quas etiam melius et efficacius inter inter-  
pretandum et quasi in ipso actu rerum pra-  
poni: interpretandorum scriptorum grae-  
corum et latinorum nullam propriam disci-  
plinam esse, quae praeceptis in certum cor-  
pus*

*pus redactis constaret, sed in iis interpretandis omnia ad usum et exercitationem referri, et tamen eorum interpretes omnino tempore egregios fuisse: proclives esse homines, imprimis iuvenes, ad fraudem hanc, ut se facere posse putarent, cuius faciendi praecepta didicissent, remissioresque praeceptis discendis fierent in exercendo et agendo: tum vero ita illi instabant, ut sibi tamen iucundum fore dicerent, si, quicquid esset illarum observationum et admonitionum, in certum ordinem redactum cognoscerent, praesertim cum non facile in paucorum librorum interpretatione omnium proponendarum facultas et occasio daretur. Promisi me facturum, quae vellent, coepique colligere, quae vel memineram mihi in interpretando profuisse, vel repereram aliis in videndo vero obfuisse. Ea primum brevibus thesibus comprehensa, et utcumque digesta tradidi: post auxi paulatim, inter interpretandum et legendum admonitus. Neque enim statim, cum volumus, occurrunt omnia, nec facile est, longe lateque dispersa in unum locum ita contrahere, ut nihil relinquatur, nihil elabatur, praesertim in tali genere, quod tam multis, saepe parvis*

*paruis observationibus constat. Ita natum est modicum corpusculum praeceptorum, quod nunc, ut laborem scribendi studiosis demerem, et tempus, quod dictando in lectionibus absumitur, lucrarer, diligentius structum et excultum, literarum formulis exprimendum tradidi.*

*Cum ipsum opusculum sit ad cognoscendum ita breue, ut ordo rerum et modus tractandi ab unoquoque facile cognosci possit, superuacuum foret, de eo separatim dicere. Nec meum est, homines docere, quid noui, quid boni insit huic libello, quod noui semper scriptores in praefationibus solent, etiam modestiam praefati, vanissime facere, credulos lectores se nacturos sperantes.\*). Hoc scio, et vere dicere possum, me primum cavere voluisse, ne absoluta decreta, quos vulgo etiam Canones vocant, scriberem, deinde laborasse, ut ab veris observationibus praecepta ducerem, eaque eiusmodi, quae certam et perspicuam notam et quasi ansam veri tenendi haberent, et usum certum ac facilem redderent. An consecutus sim, quod*

\*) Caeterum, si quis summam libelli et rerum breviter expressam legere cupiat, Bibliothecam nostram theol. adcat  
Vol. III. p. 3. sqq.



*parte aliqua, argumentum est, magna a nobis suppeditata est. Impudentia est, libros, qui scholis habendis servire debeant, ita scribere, ut omnia mansa lectoribus, ut nutrices pueris infantibus, in os ingeras.*

*De vniuersa interpretatione habebam, quae partim monerem studiosos, partim quererem cum his, qui, per speciem reuerentiae aduersus Scripturam sacram et verba diuina, fanaticam quandam barbariem, et artem somniandi ac ludendi in Scripturis inducere tentant: sed nec temporis angustiae siuerunt eam orationem suscipere, et alio tempore ac loco utrumque exequi latius dabitur. Itaque finem faciam praefandi, cum verissimo voto, ut per hunc libellum quamplurimis Scripturarum sacrarum recte atque ordine cognoscendarum et scrutandarum studium incendatur, iisque haec qualiscunque opera mea ad bene intelligendum et cognoscendum quamplurimum profit. Scripsi Lipsiae in mercatu autumnali a. 1767.*

ADMO-

# ADMONITIO

## DE EDITIONE SECVNDA.

*In hac altera libelli nostri editione, (nam repetitionem eam, quae nobis insciis facta est in Batauis, Lugduni, non numeramus) acta fere sunt haec.*

*Primum, quoniam libellum bis lectionibus Academicis tractauimus, et, dum explicare studiosis et illustrare tentabamus singula, cum mora considerauimus omnia; animaduertimus, quaedam esse, non ita vel plane, vel accurate, et circumscripte expressa, ut nihil ambiguitatis aut dubitationis relinqueretur, nec, lectorem, diligenter et cogitate expendentem omnia, morarentur. Itaque ante omnia hoc egimus, ut talia loca plura efficeremus et pleniora, conseruata tamen breuitate ea, quae praeceptis est propria. Nam etsi libellum hunc maxime destinauimus lectionibus Academicis, per quas facultas datur magistro explicandi singula, et addendi, quae necessaria ad bene intelligendum videantur: tamen nolui-*

\*\*\*

mus

*mus lectionem eius vel moleſtam eſſe vel minus frugiferam iis, qui legendo potius quam audiendo cognoſcere rationem interpretandi a nobis traditam, ſi velint, poſſint.*

*Atque his ipsis comparatum eſt alterum totum, quod vel admoniti, vel rogati fecimus, ut praeceptis exempla adicere-  
mus iis, quae a nobis nude poſita fuiſſent, exemplorum conquirendorum cura his re-  
lictis, qui libello noſtro uti in lectionibus Academicis vellent.*

*Praeter haec duo igitur non multum nouae vel obſervationis vel praeceptionis acceſſit: nec tamen nihil. Ex quo genere ſunt, ſi quis volet inſpicere, quae acceſſere P. I. S. I. C. I. §. 19. 26. Sect. II. Cap. I. §. 3. Cap. III. §. 8. 10. 13. 14. Cap. VII. §. 8. et alia pluribus locis: quibus ſperamus effectum eſſe, ut quaedam magis vel explicata ſint, vel firmata, vel denique ad uſum facilius et ſecurius transferri poſſint. Scripſi a. 1765.*

---

# ADMONITIO

## DE EDITIONE TERTIA.

*Cum repetendus iterum esset libellus hic noster, diuenditis editionis secundae exemplis, nos ad eum diligenter recognoscendum, et, ubi opus videretur, vel castigandum, vel etiam augendum dedimus. Nec defuit occasio utriusque generis. Nec id mirum cuiquam videri aut mihi pudori esse potest. Nam nemo ita est acutus ingenio, ita exercitatus ad subtilitatem scribendi, ut nihil sibi relinquat emendandum et limandum, denique etiam addendum, etiam si omnia faciat diligentissime, ut aliquid omni ex parte perfecti et absoluti efficiat. Itaque etiam in hoc libello per nouae recensionis curam reperi, quae vel limanda, vel augenda viderentur. Non possum omnia hic commemorare, in quibus utroque genere emendationis usus sum; sunt enim permulta: sed inprimis altero genere saepius usus sum in Capp. de Versionibus condendis, iisque, quae ad rem Criticam pertinent,*

*tinent, in quibus nouae obseruationes tum aliorum virorum doctorum libris proditae, tum a nobismet ipsis repertae, augendi copiam suppeditauere. In quibus omnibus tamen breuitatem eam seruauimus, qua in praeceptis tradendis utendum est, cuiusque ipse semper studiosus in scribendo ac docendo fui. Gaudebo vehementer, si hic libellus noster porro pluribus ad comparandam recte interpretandi N. Test. scientiam, facultatemque profuerit. Scripsi d. XVI, Dec. a. 1774.*

Io. Aug. Ernesti.

---

INSTE

**INSTITVTIO**  
**INTERPRETIS**  
**NOVI TESTAMENTI**

**A**

adumbrata fuisset, vltro patet, ad fontes, hoc est, ad libros N. T. esse recurrendum. Vid. b. *Doederlinii* christl. Religionsunterricht t. II. ed. 2. p. I ff. *Mori* Epitomen Theol. Christ. §. 30. de scriptura s. et librum nostrum: *Ausführlicher Unterricht in der christl. Glaubenslehre*. Norimbergae 1807. t. I. p. 232 ff.

b) Adde et hoc. Maior cogitandi et scribendi libertas, nostris praesertim diebus, inuexit quandam, non solum dubitandi, sed etiam iudicandi licentiam. Huius α) frena iadicere, aliosque meliora docere, deinde β) nostris ipsorummet dubitationibus consulere, illasque conuellere, diluere et reprimere vix poterimus, nisi firmis interpretandi praesidiis instructi. Vid. b. *Noesselti* Anleitung zur Bildung angehender Theologen, p. 295. sqq.

Atque haec quidem de necessitate interpretationis N. T. Sed constabit etiam de illius utilitate, si consideremus,

- 1) Diuinam religionis christianae veritatem, ipsa Iesu Christi doctrina suffultam non nisi e scriptis discipulorum eius defendi posse contra adversariorum insultus. Theologus literarum diuinarum imperitus, aliorumque vehementia et impetu in angustias redactus, inimicum nullis aliis armis arcere conatur, quam libris dogmaticis et symbolicis, in quorum verba iurare satagit.
- 2) Certum est, doctrinam christianam ab initio fuisse puriorem vsque ad sec. VI, postea vero corruptam et peruersis philosophorum opinionibus commaculatam, propter neglectum interpretandae s. f. studium. Vbi tempore reformationis reuiuiscere coeperunt literae sacrae, emerit etiam doctrina christi-

christiana et aitori pristino restitui coepit. Eadem ratione ius ciuile literarum Graecarum et Romanarum, medicina Celsi studio, caput extulit. De meritis *Reuchlini*, *Erasmi*, *Melanchthonis*, *Lutheri*, nota res est. Vid. *Ernestij* Opusc. Theol. p. 585. *seqq.* Sic e recentioribus theologis principes semper existimati sunt ii, qui interpretationi studerent.

§ 2.

Cum autem omnis interpretatio sit difficilis, quod plurimum doctrinae, iudicii, diligentiaeque, saepe etiam quandam ingenii felicitatem desiderat, tum vero multo difficilior, multis de causis, est interpretatio librorum sacrorum, vt viri doctissimi iudicant, et mira paucitas bonorum interpretum arguit. v. *Huetiana* p. 181.<sup>c</sup>)

c) Difficultates studii exegetici quamuis ita sint comparatae, vt tironem facile detertere possint, ne-  
tquam tamen celari, aut dissimulari debent: aperta enim  
impedimenta facilius superantur. Obseruetur itaque,

- 1) post inlitam laeti ingenii indolem requiri adhuc  
assiduitatem et diligentiam, sine qua, licet refu-  
gere illam soleant ingenia faceta et mollia, nihil  
magni in exegeti praestiteris.
- 2) Multis hac in re opus est subsidiis literariis, prae-  
sertim nostris diebus, vbi librorum numerus nimis  
multiplicatur.
- 3) Multae oriuntur difficultates ab antiquitate libro-  
rum diuinorum, qui lingua prorsus singulari an-  
te multa secula, et ab hominibus scripti sunt,  
qui



qui vixerunt in populo, cuius mores, , vita' et lingua quam maxime a nostris moribus, vita et lingua dissentirent. Viderant hoc inter veteres in *rómois* suis *Origenes*, vt et in libro *de principiis*, *Hieronimus*, *Chrysostomus* et *Theodoretus*: inter retentiores *Luthetus* in praefat. comment. in Psalmos, et post alios viros doctos immortalis *Ernestius* in diff. de Difficultatibus N. T. recte interpretandi, recusa in Opusc. Phil. et Crit. p. 198.

- 4) Multae praeiudicatae opiniones quibusdam in locis adhuc obstant studio exegetico N. T. v. c. non nisi precibus et pia animi simplicitate s. l. explicari debere: omnem eruditionem profanam, h. e. humanam, cane peius et angue fugiendam esse (qua de re commentum satis lepidum exstat in vita *Hieronimi*); contextum N. T. esse plane incorruptum, eiusque libros idiomate graece puro conscriptos. Videatur *Herderus* haec et alia huius farraginis commenta profligans in libro: *Briefe das Studium der Theologie betr.* Br. I.
- 5) Opus est ingenio auctorum Graeciae Latine lectione subacto ad vsum in interpretando acquirendum.
- 6) Difficile est in arte critica suppeditare praecepta firma, iusta et vera, cuius rei causam in ipsa huius scientiae natura deprehendimus, quippe quae intra probabilitatis leges contineatur. Vid. *Clerici Ars Critica* et *Beckii Commentatio* de interpretatione veterum scriptorum, Lips. 1790. § 2. et 3. Maioribus adhuc difficultatibus laborat scientia critica N. T., quae vel nostris diebus ultra doctae probabilitatis limites haud adsurgit.
- 7) Multa adhuc obscura sunt in historia temporum, auctorum

auctorum et librorum N. T.; multa in Geographia et Historia naturali, post egregia etiam recentiorum peregrinatorum studia clariorem lucem sibi deponunt.

- 8) In interpretatione N. T. praeter verba etiam ad singularem cuiusvis scriptoris characterem respici debet, sine cuius notitia parum videris. Sic in Paulo notanda est eruditio rabbinica et philosophia Iudaica, cum ingenuo animi candore et calore: in Iohanne lactea ingenii vbertas et profunditas cum tenera animi simplicitate: in Matthaeo ingenii ad euenta miraculosa procliuitas, animique bonitas etc. Quaedam hanc in partem hauriri possunt ex Niemeyeri libro: *Charact. d. B. Vitae Iesu Christi, Iohannis et Pauli* acute et ingeniose scriptae, vel post Langii, Witfii, Paleyii aliorumque pericula, adhuc desiderantur.

Omnes istae difficultates studii exegetici metum iniicient iis tantum animis, qui sunt

*nil magnae laudis egentes:*

erectiores, ad maiorem diligentiam excitabit. Conf. Doederlinii *Instit. Theol. Christ. t. I. pag. 174. s. ed. 5.*

### § 3.

Est autem *interpretatio* facultas docendi, quae cuiusque orationi sententia subiecta fit, seu, efficiendi, ut alter cogitet eadem cum scriptore quoque.<sup>d)</sup>

d) Interpretatio est vel cursoria, vel stataria: vel vniuersalis, vel historica. Haec in N. T. imprimis commendanda videtur. Conf. b. Storr. de sensu historico, Tubing. 1788. Keil. de Interpretatione librorum

brorum sacrorum historica. Lips. 1788. Bratschneider historisch-dogmatische Auslegung des N. T. nach ihren Principien, Quellen und Hülfsmitteln. Lips. 1806. De reliquis interpretandi generibus vid. Beckii Commentatio de interpr. v. f. pag. 40. sqq.

## § 4.

Interpretatio igitur omnis duabus rebus continetur, sententiarum (idearum) verbis subiectarum intellectu, earumque idonea explicatione. Vnde in bono interprete esse debet *subtilitas intelligendi*, et *subtilitas explicandi*.

## § 5.

*Subtilitas intelligendi* et ipsa duabus rebus cernitur: quarum altera est, videre, quid intelligas, nec ne, et difficultates intelligendi, earumque causas, ex arte animaduvertere: altera autem, sensum eorum, quae difficilia sunt, rite indagando inuenire.\*)

e) Duplex itaque in interprete esse debet subtilitas, *dialectica* et *grammatica*. Virtus ipsa, quam sagacitatem critici et interpretes vocant, celebratur imprimis in *Salmasio*, *Hemsterhusio*, *Valckenavio*, *Bentleio*, *Rubynkenio*, *Eichbornio*, aliisque.

## § 6.

Ac *primum* quidem *genus* existit partim ab ingenii solertia, et *subtilitate*; quod, ut quisque tardior est ingenio, ita non modo magis temere

temere assentitur iis, quae traduntur, sed etiam intelligere sibi videtur, quod non intelligit; partim ab diligentia et consuetudine distinguendi ideas rerum ab ideis sonorum,<sup>f)</sup> cum consideramus in omnibus verbis, an aliquid praeter verbum cogitemus: *alterum* autem, primum a cognitione iusta et accurata linguarum et varia doctrina; deinde ab scientia praeceptorum de modo interpretandi: non quod sine eorum subtili scientia interpretandi facultas contingere non possit, sed quod mediocria ingenia adiuvant, et velut in viam deducunt, ne casu potius, quam ratione nitantur, suppeditantque normam communem iudicandi in controuersis; denique ab usu et exercitatione, sine qua cetera omnia non multum profuerint.

f) Quamuis vulgare vitium sit fere in omni literarum studio, ut multa intelligere nobis videamur, quae reuera neutiquam intelligimus, maximam tamen ab illo in interpretationem N. T. perniciem illatam esse videmus propter *ideas sonorum*, quibus non rem, sed superficiem literae percipimus. Exempla sunt, Ἀδὰμ ἀρχαῖος, ἀμαρτίαν λούσασθαι αἵματι, δαιμονιζόμενος etc.

## § 7.

Et linguarum quidem scientia quae iusta et accurata sit, dicetur alio loco commodius: exercitatio autem, acuens ingenium ad videndum sensum verum, continetur primum audien-

audiendis bonis interpretibus, deinde etiam legendis pōnderandisque eorum scriptis; quibus rebus paullatim ingenium ad imitationem conformatur, persequendis illorum veluti vestigiis: denique illis ipsis libris, quorum interpretandorum facultatem appetimus, assidue et continenter legendis. <sup>g)</sup>

g) Inter criticos auctorum veterum editores commendandi videntur imprimis *Valckenaer*, *Ruhnken*, *Brunck*, *Schütz*, *Wolf*, etc.; ex interpretibus illorum prae reliquis adeundos esse putem *Gesnerum*, *Heynium*, *Morum*, *Beckium* etc. In addiscenda critice N. T. duces sibi eligat tiro *Wetsteinium*, *Semlerum*, *Griessbachium*, *Matthaeum*, *Hugium*; in interpretatione *Grotium*, *Noesseltum*, *Morum*, *Koppium*, *Eichbornium*, *Gablerum* et alios. Antequam iudicium ferat de libris exegeticis, inspiciat quales *Gesneri* praefationes ad *Liuium* et scriptores rusticos, *Burmanni* praef. in *Phaedrum* et *Ernestii* dedicationem opp. *Cicer.* In vniuersum autem notandum est, scriptorem, quem intelligere cupimus, primum cursorie, deinde lento gradu emetiendum et perlegendum esse, quod praecipuum est interpretandi artificium.

## § 8.

*Explicandi* autem *subtilitas* est facultas sensum verborum scriptorisque, eiusdem linguae aliis facilioribus, aliusue cuiuscunque verbis vel conuertendo exprimendi, vel enarrando demonstrandi et illustrandi: <sup>h)</sup> ab eaque *interpretes* proprie dicuntur.

h) Quod

b) Quod quidem fit, 1) si sensum verborum illustramus ex usu loquendi et contextu, ut subiectum ex praedicato et praedicatum ex subiecto explicetur, v. c. *σὰρξ ἐστὶν ἀπώλεια*, 2) si interpretamur sensum formularum et propositionum α) partim adferendis exemplis, β) partim locis parallelis, γ) partim resolvenda tota orationis compage, quod v. c. a beato *Koppio* factum videmus in epistolis Paulinis, δ) partim autem rebus ipsis illustrandis.

## § 9.

Ea venit a facultate linguae eius, qua in interpretando utimur, cerniturque in vertendo quidem, puritate sermonis, quo utimur, coniuncta cum characteris, quoad fieri potest, conservatione, ne pereat ratio argumentandi, quae interdum nititur figura verborum; in enarrando autem cum puritate, tum brevitatem. Sed haec planius explicabimus in loco de Versionibus et Commentariis.

## § 10.

*Hermeneutice* igitur est scientia, adducens ad subtilitatem tum intelligendi, tum explicandi auctoris cuiusque sententias, siue, tradens rationem sententiae quorumque verborum subtiliter et inveniendae et explicandae. <sup>1)</sup>

i) Errant itaque, qui hermeneuticen singulis praecceptis, aut canonibus undique excerptis et congestis consistere

confare putant, quorum periculum faciet, qui *Opitii* tabellas inspexerit.

Ad historiam hermeneutices, diuersam ab historia interpretationis infra proponendae, quod attinet, iam primae lineae ductae inueniuntur a *Pfeiffero* (instit. hermeneut. sacr. Erlangae 1771.) pag. 30. sqq., quas qui vltius sit persecuturus, praeter libros *Toellneri* (Grundriss der Hermeneutik) et *Zachariae* (kurze Einleitung in die Auslegungskunst der heil. Schrift,) inprimis recenset scripta *Semleri*, viri post fata celebratissimi: Vorbereitung zur theologischen Hermeneutik. Halae 1760. f. Apparatum ad liberalem N. T. interpretationem. Halae 1767. Dess. Neuen Versuch die gemeinnützige Auslegung des N. T. zu befördern. Halae 1786. Zur Revision der kirchlichen Hermeneutik. 1788. etc. Adde *Mori* acroases academicas super Hermeneutica N. T. ed. *Eichstaedt*. Lips. 1797. et insignes *Meyeri*, theologi Altorfini, libros: Versuch einer Hermeneutik des A. T. Lübeck 1799. t. I. Geschichte der Schrifterklärung seit der Wiederherstellung der Wissenschaften. Göttingen 1802. t. I. p. 33. ff.

### § 11.

*Inuentio*, qua est subiecta praeceptis, habet partes duas: quarum altera est *contemplatiua*, altera *praeceptiua*. Illa continet generales observationes de *sensu* et *generibus verborum*, a quibus vel praecepta interpretandi ipsa, vel eorum rationes ducuntur; haec autem praecepta de modo sensus indagandi. Nam nec vniuersae illae obserua-

seruationes, de generibus et sensu verborum eorumque natura, sufficiunt ad intelligendum eius, quouis loco, reperiendi modum, nec praecepta de modo sensus indagandi aut certa esse aut perspicua possunt, nisi natura verborum et sensus, huiusque origo cognita sit.

### § 12.

Atque etiam quaedam est veluti materia, quam tractet interpret, in qua versetur eius solertia, qua denique vtatur persequens scriptoris alicuius sententias. Ea est in libris ipsis, quos interpretatur, et in apparatu doctrinae, cuius est aliqua in ea re vis. Itaque de hac quoque in hac arte videndum.<sup>1)</sup>

1) Post praecepta hermeneutica plura adhuc sunt notatu digna, priusquam ad ipsam N. T. interpretationem nos accingamus: disquisitiones nimirum 1) de historia contextus et auctorum N. T. 2) de Canone N. T. 3) de libris N. T. manuscriptis et impressis, 4) de versionibus N. T. Ista quidem disputationes nostris temporibus in tantam vastitatem excreuerunt, vt singularem formarent disciplinam, *introductionem in N. T.*, cuius promulsis etiam hic dabitur.

### § 13.

Erit igitur nobis haec interpretis institutio in tres descripta partes: quarum *prima* sit



fit bipartita, contemplatiua, vt diximus, et praeceptiua: *secunda* breuiter agat de versionibus et commentariis: *tertia* autem de omni apparatu hermeneutico, eiusque legitimo ad interpretandum vsu.

---

PARTIS

PARTIS PRIMAE  
SECTIO I.  
CONTEMPLATIVA.

---

CAP. I.

*De sensu verborum.*

§ 1.

Omni verbo respondere debet, in sacris quidem libris semper et haud dubie respondet, idea, seu notio rei, quem *sensum* dicimus, <sup>m)</sup> quod eius rei, quae verbo exprimitur, sensus audiendo verbo instaurari in animo utcumque debet.

m) Verba sunt signa cogitationum nostrarum. In signo sunt duo: α) signum ipsum, (formale signi) β) res, quae signo notatur (materiale signi). Ergo in quolibet etiam verbo esse debet α) sonus verbi, β) notio, quae signo notatur. Vid. *Federi instit. Logic.* §. 28.

§ 2. Eum

## § 2.

Eum sensum consuetudo doctorum *literalem* appellavit, quod ita consuetudine coniunctus est cum verbo; ut verbo audiendo in animum primus seuocetur: neque differt apud veteres et bonos scriptores a *sensu literae*, quem incitior recentior aliter et inepte dicere coepit, cum veteres, etiam Erasmus et aequales, promiscue dicant. <sup>n)</sup> Est enim *litera* nihil aliud, quam quod Graeci τὸ γεγραμμένον vel τὸ γράμμα dicunt, Cicero et alii bene Latini *scriptum*: unde *scriptum sequi*, et *scripti interpretatio*.

n) Vulgo sensum *literae* et *literalem* ita distinguunt, ut ille comprehenderet omnes significationes, quas verbum habere potest, hic autem illam tantum, quae est in contextu. Sed repudiandum esse hoc discrimen, iam vidit Morus in epistola de ratione s. s. interpretandae p. 60. Confer diss. b. Mori de discrimine sensus et significationis in interpretando, in opuscul. theol. t. I. p. 61. s. Vterque sensus nihil aliud est, quem primitiva vocabuli significatio, quae verbo pronuntiato statim animum subit.

## § 3.

Eum sensum verba non habent per se: sunt enim non naturalia, aut necessaria rerum signa: sed ab institutione humana et consuetudine, per quam inter verba et ideas rerum copulatio quaedam inducta est.<sup>o)</sup>

o) Res

o) Res adcuratius illustranda est ex disquisitione de origine linguae, qua de re vid. *Roussseau* sur l'origine des langues. Opp. Tom. XVI. pag. 153. sqq. ed. Bipont. *Herderi* Preisschrift über den Ursprung der Sprache. Berol. 1789: *Eiusd.* Ideen zur Philosophie der Gesch. der Menschheit, T. II. p. 269. ed. min. *Dorfb.* philosophische Geschichte der Sprache und Schrift. Mainz 1791. Coniunctio, quae inter verbum et notionem intercedit, arbitraria quidem est, ita tamen, ut homines primaeui naturam sibi imitandam et exprimendam sumerent. Quo antiquior itaque est populus, eo simplicior erit lingua eius, eo magis referta onomatopoeticis, quod maxime quadrat in linguam Hebraeorum primaeuam. Hoc autem tantum valet de rebus sensibus subiectis: notiones enim abstrusiores varia ratione cum rerum natura comparari possunt, quapropter etiam illorum signa magis sunt arbitraria et diuersa: v. c. in vocc. אלהים, Θεός, Gott.

## § 4.

Sed ea cum esset ab initio, et institutione, arbitraria, semel constituta per consuetudinem facta est necessaria. Quod non hanc vim habet, ut vnum verbum vnam tantum significationem habeat vel habere possit: aliter enim esse, res ipsa docet: sed ut non liberum sit, verbo tribuere sensum, quem velis, nec in usurpando, nec in interpretando; nec eodem tempore, vel eodem in loco ac modo loquendi, varius aut multiplex esse sensus possit.

B

§ 5.

## § 5.

Itaque etsi consuetudo paullatim plures significationes tribuit eidem verbo, ne verbis in infinitum multiplicandis difficultas linguae discendae nimis augeretur: tamen in vtendo, singulis in rebus, singulisque modis loquendi ac locis, vnam tantum adiungit verbo cuique; omninoque ita rem totam moderatur, vt, quae quoque loco adiuncta sit, ex vniuerso loquendi modo, aut vicinis verbis intelligi possit. <sup>p)</sup> In quo tamen, fatendum est, existere interdum quandam *ambiguitatem*, vel scribentium culpa,<sup>q)</sup> cum nec constructione verborum, nec adiunctionibus necessariis (determinationes Philosophi vocant) cauetur, ne lector, sensum quaerens, incertus erret, sed perspicuam ansam habeat, per quam tenere verum sensum possit: vel ipsius consuetudinis,<sup>r)</sup> quae, quia non est in potestate Philosophorum, nec ab eorum subtilitate orta, summam ἀκριβειαν non habet. Ex quo etiam intelligi potest, quae ambiguitas innoxia, quae in vitio sit.

p) Vocabula πολυσήμαντα plerumque expediri possunt constructione, v. c. λόγος, ratio, *Vernunft*, ratio, *Rechnung*, oratio, Christus. In hac voce significationes figuntur constructione: λόγον ὑπέχειν, λόγον ποιῆσθαι, ὁ λόγος αὐτὸς ἐγένετο. Alia exempla videbis Matth. XIV, 25. περιπατῶν ἐπὶ τῆς θαλάσσης et 1. Cor. XV, 29. βαπτίζόμενοι ὑπὲρ τῶν νεκρῶν; ambiguus

ambiguus praepositionum ἐπὶ et ὑπὲρ significatus non nisi a naturali verborum compage constituitur.

q) Talis ambiguitas oritur v. c. cum duo accusativi iunguntur infinitivo: Ἰησοῦν εἶναι ἀνδρα, *patrem esse filium*. Adde locum Ephes. V, 26. τοῦ λουτρῶ τ. ὑ. ἐν ῥήματι, quo loco tertius casus iterum obuius orationis claritatem offuscat, nisi ἐν ῥήματι resolvetur in διὰ τοῦ ῥήματος ex hebraismo. In epistolis Pauli, cui artis grammaticae imperitiam obicere propterea non dubitavit *Hieronymus* (ad Coloss. II, 23), eiusmodi δυσνόητα (2. Petr. III, 16) saepissime occurrunt.

r) Consuetudine, quae non a philosophis, sed ab hominibus indoctis orta est, a quibus quae proficiuntur, semper aliquid labis habent. Huius consuetudinis, quae foecunda est mater errorum, vestigia etiam in N. T. inveniuntur, et in his ambiguitatibus optimi interpretes haerent, v. c. Hebr. IV, 12. ζῶν γὰρ ὁ λόγος Θεοῦ. Rom. VIII, 19. ἀπαπαροδοκία τῆς κτίσεως. Act. VIII, 23. σύνδεσμος ἀδικίας, quas quidem voces, non nisi ex Iudaeorum consuetudine illustrandas, infra explicaturi sumus.

## § 6.

Atque in his insunt causae omnis certitudinis, quae esse in interpretando potest. Neque enim vilo modo certum esse aliquid in interpretando posset, nisi primum aliqua necessitas<sup>s)</sup> in sensus cum verbis copulatione intelligeretur, deinde vnus tantum verbi cuiusque, loco quoque, sensus, idemque literalis esset.

- s) Non absoluta necessitas, sed hypothetica, quae plerumque fundamenti loco subiacet in disciplinis. Ipsa enim veri natura absoluitur *necessitate* cogitandi, quae, alia in creaturis, alia esse debet in creatore.

## § 7.

Quo magis repudiandus est error eorum, qui, auctore *Augustino*, *Confess.* XII, 30. 31. vnius loci in libris sacris plures sensus, etiam literales, esse posse, contenderunt, natus ille a varietate interpretationum in locis ambiguis, cum plures probabilitatis aliquam speciem haberent, et reuerentia auctorum probarentur. Efficit enim interpretationem incertam: quo nihil induci perniciosius potest. <sup>t)</sup>

r) Offendant itaque in hoc praecepto illi, qui vaticiniis V. T. inprimis autem Psalmis duplicem sensum inesse statuunt. Quod quidem non ita accipiendum est, ut eundem Psalmi locum de Dauide et Messia simul agere posse negemus: nobis quidem hac de re persuasum est; sed distingui debet inter sensum primitium, et sensum ab aevo sequiore determinatum. Vid. *Ernesti* de interpr. prophet. Mess. in Opusc. Theol. p. 495. Constat autem inter melioris notae interpretes, loca V. T. in N. excitata ubique fere duplicem sensum fundere, alterum in Hebraicis, alterum in Graecis; quae observatio maximi momenti est in doctrina de vaticiniis.

## § 8.

Nec magis probari potest opinio, e Iudaeorum

daeorum scholis orta,<sup>u)</sup> et ad Christianos inde propagata, quae tantum significare verba librorum sacrorum vult, quantum possint: a qua facilis transitus est ad libidinem omnia allegoriis, vaticiniis, et mysteriis replendi, vt experientia in Iudaeis, veteris Ecclesiae doctoribus, Scholasticis, et Cocceianis docuit.<sup>uu)</sup>

u) A quouis apice S. S. pendent montes sapientiae. Ita Iudaei. In Talmude tract. Sanhedrin fol. 34. col. 1. notatur ad Ierem. XXIII, 29. „Sicuti malleus in multas diuidit scintillas, ita locus S. S. multos habet sensus.“ Tract. Sopherin c. 16. fol. 13. col. 3. docetur: „Deum ita dedisse legem Moisaicam, vt 49 vicibus res pro munda, vel immunda declarari possit. Hoc probari ex Cantic. II, 4. וְרַגְלִי quod est 49. numero ad literas computato.“ Alius hoc dictum inficetum amplexus est pro lege hermeneutica, Pshiktha rabbtha fol. 23. col. 1. Plures Iudaeorum ineptias in sensu multiplicando recenset *Eisenmenger* in libro: *Entdecktes Judenthum* T. I. p. 454. sqq. A Iudaeis insulsus hoc interpretandi genus, מדרש vocant, transit ad Origenem et Augustinum. Hodienum infirma manu a quibusdam Cocceii adseclis adhuc defenditur. Vid. *Deyling* observatt. sacr. (t. III. ed. 2. p. 140 ff.), et qui latius rem tractauit, *Turretinus* de interpretatione s. s. ad h. l.

uu) Adde *Kantianis* et *Fichtianis* (Anweisung zum seligen Leben. Berlin 1806. p. 157. ff.); quorum sententias postquam *Rosenmüllerus*, *Eichhornius*, *Eptaisgiov* cet. argumentis idoneis refutauerunt, non est, quod



quod vulnus istud recrudescere iubeamus. Est enim res longe alia, *interpretari* auctorem et de veritate sensus *philosophari*. Ne tamen, ut Grammatici solent, iusto iniquius hac de re sentiamus, monere iuvat, scriptis antiquitate claris nonnum subinde sensum subterni per ignorantiam et superstitionem, quod *Platarchi* interpretationes et *Heraclidæ* allegoriarum Homericæ docent. Deinde libri, qui pro diuinis habentur, huic inde sensum fundunt tam ieiunum et vero *ἀθεόλογον*, ut alia simpliciter dici, alia *τροπολογικῶς* innui facile credamus propter diuinum auctoris, quo actus fuisse creditur, impetum et instinctum. Quapropter *Paulus* post *Philonem* (allegor. I. III. ed. opp. Pfeiffer. t. I. p. 385) interpretationem allegoricam diserte propugnat Gal. IV, 24 ff. Vide *Koppii* commentarium ad h. l. Praeterea historiam et experientiam habemus testes, explicationem allegoricam librorum sacrorum inde ab Origene ad nostra vsque tempora sensus piis et moralibus in animis populi excitandis longe aptiorem fuisse interpretatione simplici et grammatica. Vide *Noesselti* dissert. de sensu morali recusam in exercitatt. b. v. postremis. At enimvero haec omnia magis pertinent ad historiam interpretationis popularis, a *Schulero* libro singulari illustratae, quam ad explicationem N. T. stricte et proprie dictam.

### § 9.

Enimvero *allegoriae* ne sensus quidem loco numerandae sunt. Sunt enim potius sensus, qui proprie dicitur, et rerum ad aliquod caput doctrinae illustrandum accommodationes:\*) quae, si aptae sint et moderatae,

ratae, vsum aliquem, nec illum contemnendum, habere possunt: fin ab hominibus inductis, et ingenio, literarum disciplinis non subacto, indulgentibus tractentur, plerumque in lusus inanes, saepe etiam ridiculos, abeunt.

v) Allegoria nititur similitudine; quae cum perfecta esse nequeat, patet, comparisonem perfectam locum habere non posse. Opus vero est ad allegorias bene tractandas ingenio literis subacto, imprimis arte dicendi, sine qua ab istis allegoriis ad ineptias lususque pueriles facilis est transitus. His artibus ante omnia instructus esse debet idoneus epistolae ad Hebraeos interpres. Vide egregias hanc in rem observationes suppeditantes b. *Morav* dissertat. t. I. p. 370. ff. *Zieglerum* in libro: *Einleitung in den Brief an die Hebräer*, §. 16. et *Eichbornium* in *Allgem. Bibl. d. bibl. Litterat.* T. III. p. 740. sq.

### § 10.

Ipse ille *typicus sensus*, quem vocant, proprie non est sensus, quem in arte vocamus. \*) Est enim non verborum, sed rerum, quas Deus voluit esse signa rerum futurarum. Nec in eo quaerendo opus est interpretis cura et ingenio. Ipsius enim Spiritus S. indicio ac testimonio patefit; ultra cuius admonitum sapere velle in hoc genere non debemus. Qui consilium modo (intentionem vocant) Spiritus S. commemorant, parum subtiliter faciunt, aperiuntque viam libidini typos

pos vbique comminiscendi. Nam consilium Spiritus S. intelligi a nobis, nisi ipsius indicio, non potest. Legatur noster *Lutherus* de Papatu *T. I. Altenb.* p. 461. 462.

x) Ab allegoria ita differt typus, vt illa exhibeat comparationem rei vniuersalis, hic singularis: quapropter typus imaginem suppeditat, non sensum. Tenenda sunt tria

- 1) Typi sunt comparationes ductae a personis et ritibus V. T. antiquitate, doctrina, fatiis et religione insignibus, Iudaeis potissimum familiares. Quo magis itaque scriptores N. T. Iudaicum scribendi genus sequuntur, vt v. c. Matthaeus et Paulus, eo frequentius cumulant typos: quo magis ab ingenio Iudaico recedunt, eo parciores sunt in illis adhibendis, v. c. Iohannes.
- 2) Typi non sunt multiplicandi, neque pro his agnoscendi, nisi qui expressis verbis in N. T. nominantur, v. c. *Adam*, Rom. V, 14. *Ionas*, Matth. XII, 39. *Melchisedek*, Hebr. V, 7.
- 3) Typi vltra fines comparationis non sunt extendendi, sed ita explicandi, vt exinde pateat, illos non ad essentiam religionis christianae, sed ad externum illius habitum pertinere. Vid. beat. *Rau* freimüthige Untersuchung über die Typologie. Erlangae 1784.

## § 11.

Illud vero supra, quam dici potest, periculosum est, quod quibusdam veteris Ecclesiae doctoribus, siue per inscitiam, siue per impru-

imprudentiam, excidit, auctore *Augustino Ciu. D. XV*, 27. probatumque est quibusdam Ecclesiae Romanae doctoribus, cum nonnullorum locorum, h. e. quos explicare non possent, nullum literalem sensum esse dicerent,<sup>y)</sup> quod nuper quidam *Wittius* de Prouerbiis Salomonis ausus est pronunciare: vnde natus est *Thom. Woolstoni* furor, miraculorum Christi narrationes ad meras allegorias detorquentis.

y) Notandum tamen est, libros V. T. antiquiores praesertim, continere loca plane allegorica: cuius rei causa quaerenda est in priscae linguae simplicitate, quae historicam dicendi exilitatem planumque scribendi genus nondum admittere poterat. Vide notam secundam §. 8.

### § 12.

Sed quoniam coniunctio, quae inter verba et ideas intercedit, orta est ab institutione humana, contineturque consuetudine: facile intelligitur, sensum verborum pendere ab usu loquendi, et hoc cognito, illum cognosci.

### § 13.

*Vsus* autem loquendi multis rebus definitur, tempore, religione, secta et disciplina, vita communi, reipublicae denique constitutione: quae fere efficiunt characterem orationis,

z) Exempla rem optime illustrant. Καθαρισμὸς alium habet sensum in vita communi, alium in religione gentili, alium in Iudaica, alium in Christiana, alium in dogmate de iustificatione, alium in theologia morali, alium denique in philosophia Pythagorica (καθαρισμὸς τῶν ψυχῶν). Adde כְּרִיחַ, כְּבִיא, כֶּהֱן, πίσις, δαίμων, auctoritas (vid. Ernestii clavis Cicer. sub h. v.), libertas (Attica, Spartana, Romana), sacramentum.

§ 14.

Eius porro observatio propria est Grammaticorum, quorum artis maxima et praecipua pars in eo versatur, ut, quid verbum quodque, tempore quoque, apud scriptorem quemque, in disciplina et forma denique loquendi quaque, sonuerit, diligenter exquirant.\*) Vnde sensus literalis idem *grammaticus* dicitur; immo verbum *literalis* est latina interpretatio *grammatici*: nec minus recte *historicus* vocatur, quod, ut caetera, quae sunt in facto, testimoniis et auctoritatibus continetur.

a) Quum vsus loquendi sit res facti, Grammaticus

cus curam suam intentam habere debet in historiam significationum. Sunt nimirum distinguendi significatus primitiui, deriuati, poetici, prosaici; quod veteres etiam fecerunt in glossis. Homericis, Platoniceis, tragicis. Eiusmodi autem laborem in lingua emortua esse difficillimum, iam exinde potest colligi, quod *Lexico N. T.* omnium desiderijs adcommodato hucusque caruimus. Conf. *Fischeri* prelationes de vitijs *Lexicorum N. T.* Lips. 1791. prelaf. XVI-XXXI. *Schleusneri* thesaurus linguae Graecae - N. T., cuius editio tertia cum maxime prodiit, nostris demum diebus eruditorum votis satisfecit.

§ 15.

Itaque nullus alius verborum sensus est, nisi grammaticus, eumque Grammatici tradunt. Nam qui alium grammaticum, alium logicum sensum faciunt, vim sensus grammatici non assequuntur; nec sensus ab usu aliquo qualicunque alicuius disciplinae aut rerum in indagando sensu variatur. Foret enim non minus multiplex, quam res ipsae sunt.

§ 16.

Et quoniam haec omnia communia sunt libris diuinis et humanis; patet, non alio modo vel quaeri vel reperiri sensum verborum in libris sacris, quoad humana opera intercedit, quam quo in humanis vel solet vel debet, nec vlllo modo audiendos esse Fanaticos,

ticos, qui, contemtis studiis linguarum et doctrinae, omnia ad vim diuinam Spiritus S. referunt: <sup>b)</sup> quamquam non est dubitandum, viros pios et veritatis diuinæ cupidos adiunari à Spiritu Dei in scrutando Scripturae sensu, <sup>c)</sup> in iis quidem rebus, quæ proprie ad fidem et mores pertineant.

b) Iam Valdenses omnia tribuerunt πνεύματι, linguas autem contemserunt. Simili ratione Fanatici feruidæ imaginationis vim securi, quæ in religione admodum est perniciofa, hoc solum interpretandi nituntur praesidio: ζητεῖτε καὶ εὐρήσετε. \*

c) Qui verum bona mente indagare student, adiuuantur certe a S. S., qui est πνεῦμα τῆς ἀληθείας Ioh. XV, 26. Quapropter neutiquam opus est quaestione, num diuina institutio interpretis pertineat ad actus gratiae?

### § 17.

Sed his non multum dissimiles, et fortasse magis perniciosi sunt ii, qui a pari contemtu et inscitia linguarum, a qua fere contemtus ille nascitur, in interpretando rebus potius quam verbis nituntur. Efficitur enim interpretatio incerta, et ad iudicium humanum reuocatur veritas, cum primum a verbis disceditur, et aliunde sensus iudicium, quam a verbis ducitur: nec ea ratio valet vlllo modo ad coarguendos aduersarios doctrinae: qui et ipsi e rebus se interpretari iactant, hoc est, vel e suis decretis et opinionibus

nibus ante susceptis, vel e sententiis philosophicis; unde rationis in interpretandis literis sacris abusus nascitur.

### § 18.

Omnino lubrica et fallacissima est ratio, sensum verborum e rebus colligendi, cum res potius e verbis eorumque sensu, legitima ratione indagato, cognosci debeant.<sup>d)</sup> Potest enim aliquid verum esse, quod tamen non inest verbis: et quid de rebus statuendum sit, e verbis Spiritus sancti intelligi et iudicari debere, in promptu est. *Non potest Scriptura intelligi theologice*, verissimum Melanchthonis dictum est, *nisi ante intellecta sit grammaticae*: vereque noster Lutherus iudicat, certam sensus intelligentiam esse ab sola scientia verborum. v. Epist. ad Magistratus Germ. de Scholis constit. T. II. Altenb. p. 804.

d) Historia docet, conturbato usu linguae etiam conturbari res et disciplinas. Optime Plutarchus; τοὺς μὴ μανθάνοντας ὁρθῶς ἀκούειν ὀνομάτων, πακῶς χρῆσθαι καὶ τοῖς πράγμασι. Vid. Tarnquius exercitt. bibl. p. 258. Vitringa in Iesaiam pag. 5. et ante omnes Ernestii programma de interpr. librorum sacrorum in Opusc. Phil. p. 219. seqq.

### § 19.

Itaque res et analogia doctrinae, quam dicunt, hactenus modo prodest in interpretan-



tando, vt in verbis vél a multitudine significationis, vél a structura, vel alia qua causa, ambiguus, ducat nos ad definiendam verborum significationem, siue ad delectum significationis. e) In quo tamen et ipso cautio est, vt res, quibus ad definiendum vtimur, ductae sint ex verbis planis et perspicuis et certo cognitis aliorum locorum, nec aduersentur verba, quorum sensum quaerimus. Cum autem aliter, aut per eam solum, siue grammatica ratione, sensus quaeritur, nihil aliud efficitur, nisi, vt sensus repertus in se fortasse non absurdus sit, non vt in verbis lateat, sitque menti scriptoris consentaneus.

e) Analogia doctrinae consulenda est 1) in constructionibus ambiguus, v. c. Ioh. III, 15. 2) in verbis ex ingenio vniuersae Iesu Christi doctrinae illustrandis, v. c. σωτηρία, ἀπώλεια, βασιλεία τῶν οὐρανῶν, ζωή. Vid. *Morus* de notionibus vniuersis in theologia, Opp. tom. I. p. 248. sqq. Analogia rei interpretem adiuuat in locis N. T. ex historia et moribus illius temporis illustrandis, v. c. Act. XXVII. tot. I. Cor. IX, 24. βραβεῖον, Act. XXVIII, 16. στρατοπεδάρχης.

## § 20.

Quae cum ita sint, illud quoque intelligitur, rationem sensus verborum in libris sacris indagandi non magis esse arbitram, quam in caeteris libris, sed pariter adstrictam certis a natura linguarum ductis legibus;

gibus; eaque de caussa perabsurde facere, qui librorum diuinorum interpretationem, deque sensu verborum diuinorum iudicium, humano, vt pontificis Romani, iudicio subiiciant <sup>f)</sup>).

f) Etiam libri Symbolici ingenuam interpretationis libertatem coercere nequeunt. Vid. *Doederleinii observationes morales de LL. SS. Ienae 1789. §.* In longe alia abit *Bossuet*, magnum olim Galliae decus, in libro: *Histoire des variations des eglises Protestantes* I. V. ch. 23. f.

### § 21.

Qui sensus igitur clare per grammaticas leges tribuendus est verbis, non debet reïici propter rationes a rebus ductas: fieret enim interpretatio incerta: sed in libris humanis, si res et ratio manifesta repugnat, agnoscitur vel vitium scripturae, vel error scriptoris: in libris diuinis, si non consentit vulgatis hominum notionibus, ingenii humani et rationis imbecillitas: sin historiae clare aduersatur, conciliatio quaerenda, nec facile, sine bonis libris, correctio tentanda. In quo admirandum est, plus reuerentiae tribui libris humanis, quam diuinis. Nam in illis, de antiquis loquimur, cum aliquid eiusmodi incidit, correctio aut conciliatio quaeritur, velut ἀναμάστιγτοι fuerint: in his occasio arripitur carpendi aut peruertendi vel Scriptores, vel doctrinam ipsam.

### § 22.

## § 22.

Atque etiam comparatio rationum debet esse eiusmodi, ut maior vis tribuatur grammaticis, quam dogmaticis: propterea, quod aliquid potest esse verum, ac veritati maxime consentaneum, quod tamen non inest verbis: suntque in libris Theologorum multae tales interpretationes, quae plane consentiunt doctrinae christianae, nec tamen a verbis ductae sunt, verae dogmatice, sed non grammatice et ἐξηγητικῶς.<sup>g)</sup>

g) Illa itaque N. T. loca, quae tractant non praecepta, sed subtiliora dogmata religionis, hac ratione sunt explicanda, ut plane nihil de tuo admisceas, sed puram S. S. doctrinam sequare: quod quidem hucusque non semper factum est, neque etiam fieri poterat. Hic omnes ingenii sui vires intendat interpres, hic ultro videat et profiteatur circumscriptos eius limites. Vid. *Ernesti* de vanitate philosophantium in N. T. Opp. Phil. p. 233.

## § 25.

Quoniam autem libri sacri scripti sunt a viris θεοπνεύστοις, facile intelligitur, veram dictorum repugnantiam in iis esse non posse. Neque enim Deus aut non videt, quid sit consequens aut consentaneum cuique, aut ita obliuiscitur sui, ut non satis memor sit eorum, quae ante dixerit.<sup>h)</sup> Itaque si talis repugnantiae species offeratur, conciliationis.

nis aptae ratio indaganda est: de cuius modo locus proprius erit praecipendi.

h) Malit fortasse aliquis, ita scriptum fuisse ab auctore: *Neque enim vivi a providentia divina electi ita labi poterant, ut non satis memores essent eorum, quae ante dixerant.* Iohannes enim a Luca, Paulus a Petro (Gal. II, 11. 2. Petr. III, 16), et uterque a primo scriptore satis longe discedunt. Θεοπνευσίας notio itaque non antecedere debet rectam firmamque S. S. interpretationem, sed sensus potius inde elicitū riteque probati veritatem.

#### § 24

Eandemque ob causam omnis interpretatio, ut in libris humanis, sic multo magis in diuinis, debet consentire consilio scribentis, et orationi reliquae, contextum vocant. Nam homines possunt negligentia aut inscitia ponere, quae consilio non conveniant: Spiritus sanctus nullo modo. Atque hinc pendet certitudo interpretationis e consilio orationis et serie, quae tamen non vnam cautionem habet: quas suo loco trademus.

## CAP. II.

*De Verborum generibus et vario usu.*

## § 1.

**S**ed ad reperiendum sensum plurimum valet, etiam nosse discrimina verborum, quae sensum adficiunt, et eorum vim vel mutant, vel augent.

## § 2.

Prima autem distributio, quae maximum momentum facit in interpretatione sacrorum imprimis librorum, est in *propria* et *tropica* vocabula.<sup>1)</sup>

i) Interdum notari vix potest propriae significationis transitus ad tropicam, v. c. in רוח, אור.

## § 3.

Et prima quidem institutione, dubitari vix potest, verba propria fuisse omnia, et ad certas res indicandas facta et excogitata,<sup>1)</sup> ut per eas discerni facile et sine ambiguitate possent. Et tamen sufficiebant non ita multa verba, propterea, quod in illa prisca vitae simplicitate paucae res in sermonem cadebant.

1) Vt

l) Vt et maximam partem monosyllaba. Vid. b.  
Hafse ebr. Sprachlehre t. 1. p. 2.

## § 4.

Sed mox orta est primum necessitas verborum varie vsurpandorum, aucta rerum copia, de quibus conferre sermones cuperent homines: cum partim de rebus iis cogitare et loqui coepissent, quas olim non curassent, vel cogitatione complecti, vel sermonibus celebrare: partim nouae res inuentae essent, ad quas appellandas opus esset certis verbis. In quo duplex erat ratio huic necessitati seruiendi. Nam aut noua vocabula excogitanda erant, aut vetera erant cum pluribus rebus communicanda. Et in linguis quidem iis, quae aut vsurparentur a populis ingeniosioribus, et studiis doctrinarum deditis, aut sua natura vel arte essent flexibiles, et nouis verbis effingendis aptiores, in iis igitur, noua verba plurima reperta et in vsum inuenta sunt.<sup>m)</sup> Et tamen ne in his quidem rebus omnibus noua verba imposita sunt, ne numerus verborum in infinitum augeretur. In caeteris maior necessitas fuit verborum eorundem cum pluribus rebus communicandorum. Vnde fit, vt quo quaeque lingua et vniuersa, et in quibusdam partibus orationis, pauperior sit, et numero verborum tenuior, ita frequentior esse debeat verbis,

C 2

quae

quae sint pluribus rebus communia.<sup>n)</sup> Dignus est in hanc rem, qui legatur, locus Ciceronis pro Caecina c. 18. item c. 20. init.

m) V. c. in graeca et latina, quarum vtrique unus vocabuli plures habet formas, v. c. *φαίω, φαίω, φαίνομαι, φανερόω*: facio, faceſſo, factito: *edo, eſto, eſurio*. Vid. Varro de lingua lat. l. VI — VIII. Scheidii prolegomena ad Lennepii etymol. linguae graecae. Traiecti ad Rhen. 1790.

n) Plurima exempla ſuppeditare poteſt lingua hebraica, v. c. *הלל*. Vid. Herder Geiſt d. Hebr. Poëſie. T. I. p. 17.

### § 5.

Sed horum verborum diuerſa et multiplex ratio eſt. Nam primum in quibusdam illa prima, et, ſubtiliter accepto verbo, propria ſignificatio obſoleuit, et a multo tempore deſiit uſurpari. In quibus planum eſt, alteram, quae olim tropica videri potuit, propriam factam eſſe: quod maxime locum habet in nominibus rerum: multa quae adeo ſunt vocabula, quae propriam ſignificationem, i. e. eam, quam ab initio habuere aut per etymologiam habere debuere, nunquam habent; unde eam, quam ſecundum illam obtinuerunt vim, propriam dicere nemo dubitet.<sup>o)</sup>

o) Exempla ſunt *ברך* genua flectere, *benedicere* (vid.

(vid. Michaelis suppl. ad h. v.), ἡμε, διάβολος, ὀρδοτομεῖν, καινοτομεῖν, hostis, refutare (vocabulum olim in culina usitatum, si aqua feruens et ebulliens aqua frigida, ex vase, futum dicto, effusa reprimebatur. Vid. Vossii Etymol. ad h. v.). Consule Lennepii etymologicon paulo ante excitatum.

§ 6.

Deinde, quod illi simillimum est, verborum quorundam tropicus sensus ita usu tritus est, ut magis vulgo etiam notus sit usurpeturque, quam proprius. Quod genus verborum quin proprium recte dicatur, etiam si, si ad viuum rem refices, tropicum sit, dubitari nullo modo potest. Neque enim, qui in testamento alicui bibliothecam legauit, ut hoc utamur, tropice scripsisse existimatur, quamquam, si subtiliter rem exsequamur, metonymia est in bibliothecae verbo.

§ 7.

Atque etiam, cum verba transferuntur ad res, quae proprium verbum non habent, ea propriis paria sunt, et proprie de iis dicuntur: ut cum *luxuriem* de segete dicimus. Nam etsi per translationem de segete dicitur, tamen propter eam, quam diximus causam, proprium de segete verbum est. Eademque ratio est v. c. *perceptionis* et *libertatis* de mente et animo humano, et aliorum.<sup>p)</sup>

p) V.



p) V. c. praetor, a praecundo, de magistratu: gemma vitis, sitiunt segetes. Vid. *Aristotel. rhetor.* l. III. c. 4 — 10. *Quinctiliani Instit. Orat. L. VIII.* c. 6. tot.

## § 8.

Verum translatio verborum etiam facta saepe est, nulla necessitate iubente, quam rei nouitas attulisset. Neque enim necessitati tantum in rebus humanis seruitur, sed etiam, et multo adeo magis, suauitati et delectationi, et pro ingenii aut morum indole magis minusue. Itaque tropi quaesiti sunt primum, vt variari posset oratio, ne saepe aut semper eodem verbo esset vtendum, ex quo genere sunt metonymiae, synecdochae, et tenuiores metaphorae: quod in omni re varietas desideratur, et sine ea celeriter taedium venit, nec quisquam eleganter et suauiter dicendi studiosus non in varianda oratione magnam partem bene dicendi ponit.<sup>q)</sup>

q) Etiam in S. S. ponuntur tropi, vt orationi color adfundatur, v. c. מור, ערלה pro gentilibus: מכל Mal. III, 3. de locusta: ὄσμος orbis Iudaicus pro vniuerso et v. v., αἵμα Ἰησοῦ Χριστοῦ, pro passione et morte Iesu. Exemplorum nubem dabit *Glossus* philolog. sacra l. V. tot. edit. *Dath.*

## § 9.

Sed tropica verba etiam ad ornandam orationem collata sunt, praesertim metaphorae.

phoræ. Nam quod in his, quae maxime sunt frequentes, inest similitudo ad vnius verbi angustias redacta, animus iis delectatur, propterea, quod natura similitudinibus et imaginibus capitur, praesertim iis, quae a rebus ducantur, aliquid splendoris aut suauitatis sensibilis habentibus.<sup>r)</sup>

r) Vetus est praeceptum: usurpatur metaphora

1) si vacantem locum occupare potest, 2) si venit in alienum et plus valet expulso. Vid. *Dionysius Halicarnass.* de compositione verborum sect. 21—23. ed. Schaeferi Lips. 1808. p. 287. ff.

### § 10.

Itaque ut quisque magis est studiosus ordinandae orationis, ita est tropis frequentior, ut poetarum et oratorum consuetudine patet; quibus vel hanc ipsam ob causam maxime conceditur frequentior troporum usus, quod iis maxime ornata oratio efficitur.

### § 11.

Quamquam in eo etiam ingenium et res ipsa, de qua dicendum est, valet plurimum.<sup>s)</sup> Nam ingenia calidiora et viuidentiora frequentant magis tropos, et quidem audaciores, atque, ut aliis videtur, duriores,<sup>t)</sup> quod facilius similitudines coniungunt atque intelligunt, et natura sua ad eas comparandas feruntur: unde fit, ut etiam leui et qualicunque

que similitudine contenti sint. Res autem ipsae sua magnitudine in utroque genere incitant animos, ut ad tropos in dicendo, eosque illustriores, ferantur.

s) Quilibet coeli tractus, quilibet populus tropos habet singulares, inprimis comparationes. Hanc ob rem orientis scriptores amant visiones, parabolas, paroemias, gnomas. Exempla sunt: לבש כנף, פרש כנף, לבש כנף, λῦσαι ὑποδήματα.

t) V. c. poetae Arabum (vid. Hamasa) et tragici graeci, inprimis Aeschylus. Ut hi conferantur ad literaturam orientalem, iam Alb. Schultensius auctor est. Magnopere tamen cauendum est, ne tropi unius linguae temere misceantur cum imaginibus idiomatis longe diuersi. Poterat v. c. Michaelis in supplementis ad lexica Hebraica v. כנף, cui *pungendi* notionem inesse voluit, adferre locum Hamasae, quo *somnus* dicitur *oculos compungere*. Sed abuti non debebat vir olim doctissimus ad explicandum locum Rom. XI, 8. πνεῦμα κατανύξεως. Κατάνυξις enim non descendit a νύσσω, pungo, sed a νυστάζω, dormito, quod a νύω, nuto, repetendum est. Vide Lennepii etymolog. ed. Scheid. p. 620.

## § 12.

Ex quibus intelligitur id, quod est in omni, tum inprimis librorum sacrorum interpretatione maxime tenendum, longe aliam esse rationem transferendi verbi propter necessitatem, quam propter caeteras causas. Nam illa fit, ut res aliqua habeat certum nomen, quo appellari possit, haec delectatio-  
nis

nis et ornatus causa. Itaque illa est grammatica modo, haec autem rhetorica. In illa, transferendi causa est in analogia naturalium, in hac, in qualicunque sensibili similitudine. Et quoniam unaquaeque res debet habere nomen, siue suum, siue commune, idque ei grammaticae proprium est, sequitur, grammatica translatione non tolli proprietatem verborum, sed modo rhetorica.<sup>u)</sup>

u) De hoc discrimine circumscriptius agendum est. Si inter duas res, quarum utraque iam habet verbum proprium, intercedit similitudo quaedam specialis, vel arbitraria, illarumque nomina delectationis causa inter se commutantur; tunc hoc fit per translationem rhetoricam, v. c. *generare epistolam*. Sin autem inter duas res intercedit naturae quaedam similitudo generalis, potest ab una re, quae nomen habet proprium, verbum ad alteram, quae id non habet, transferri per translationem grammaticam. Hanc denominationem propriam esse voluerunt interpretes in *υἱὸς Θεοῦ* et *γεννην*, de modo essentiae, quam Iesus habet a patre: in *ἐξέχουσθαι* de S. S. Qua tamen in re monendi sunt interpretes, *בני אליהו* et *τέκνα Θεοῦ* (I. Ioh. III, 2.) dici de hominibus (vid. b. Koppii Exc. II. in Epist. ad Galat. Ed. 2. quo sensu *υἱὸς Θεοῦ* apud Paulum dicatur): homines pios vocari *γεννημένους ἐκ τοῦ Θεοῦ* (I. Ioh. III, 9.): *ἐξέχουσθαι παρὰ πατρὸς* (Ioh. XVII. 8.) dici de proclivitate discipulorum Iesu Christi ad veritatem religionis divinae et de Iesu ipso (conf. b. Doederleinii diss. de vi et usu formulae: *Christum de coelo venisse*, in Opusc. Theol. p. 59. seq.). Haec omnia docent, caute tractandum esse discrimen translationis

tionis grammaticae et rhetoricae, imprimis in iis doctrinis, quae allegoriarum umbris propter communem ingenii humani imbecillitatem vix carere possunt.

## § 13.

Caeterum, quoniam vis verborum tropicorum omnium, id quod facile intelligitur ex iis, quae diximus, ut priorum, ducitur ab instituto eorum et arbitrio, qui ea certis rebus significandis accommodauere, idque ipsum obseruatione constat, hunc quoque sensum grammaticum et literalem esse apparet, vehementerque errasse, qui secus cum *Hieronymo* aliisque (ap. Amamam pag. 161.) statuerent. Nec alia est interpretatio tropicorum, quam priorum. v)

v). Omnes tropi ad sensum literalem reduci debent, quod facilius fit in iis, qui ex translatione grammatica oriuntur, v. c. הכמה Es. XI, 2. *profunda sapientia*, *μυσήριον*, *sublimis religionis doctrina*. Difficilius expediuntur tropi ex translatione rhetorica orti, v. c.

διάβολος, *ἔσθ' ἄρ' ἐκ*, comedens carnem.

## § 14.

Atque ab hoc maxime fonte fluunt verba *synonyma*, in quibus ipsis diligentia quaedam interpretis desideratur, ne diuersitatem sententiae exquirat alieno loco: quod fit non raro. Nam proprie, in vna eademque saltem linguae eiusdem dialecto, aut eadem gente, eademque aetate, non sunt synonyma verborum

rum propriorum <sup>x</sup>); sed si talia sunt in lingua aliqua, vt sunt profecto, velut in graeca inprimis, ea sunt diuersarum vel dialectorum vel aetatum. Maximus autem numerus est e tropica ratione, quae vel ornandi vel variandi causa easdem sententias cum pluribus verbis communicat <sup>y</sup>).

x) V. c. rex: apud Graecos βασιλεύς. Reliqua vocabula, τύραννος, κοίρανος, πριών, sunt dialectorum: Atticus certe ἀνάξ non adhibebit, nisi in carmine. Adde πορεύσθαι et βαδίζειν, ληΐης et ποριΐης: ροδοδάκτυλος, φοινικοδάκτυλος et ἐρυθροδάκτυλος, quae postremae voces tropicae sunt et tamen potestate differunt: vide Aristoteles rhetoric. l. III. c. 2. et Grammaticorum principes, v. c. Ammonium, Pollucem, Harpocracionem, Thomam M. Neque negligendae sunt Girardi et Eberhardi obseruat, in libris satis illustribus de Synonymis linguae Gallicae et Teutonicae.

y) Atque his optimi scriptores vtuntur: profani, v. c. Cicero Off. L. I, c. 6. inquisitio et indagatio veri: sacri, v. c. David Ps. CXIX. צדק, חיים, חן, רח, pro lege diuina: Ies. c. I. חסד, שם, נחם pro peccato: Paulus, ζωή, δόξα, τιμή pro felicitate. Synonymia occurrens in phrasibus adpellatur exergasia, et apud scriptores V. T. poeticos parallelismus, cuius leges cognoscere debet hymnorum Lucae et Apocalypseos interpres. Vid. Schleusner diff. de parallelismo membrorum egregio interpretationis subsidio. Lips. 1781. 4.

## § 15.

Interdum autem ad ordinariam verbi significationem accedit aliquod, vt ita dicam, auctarium. Id est duplex. Alterum pertinet ad verbi dignitatem, alterum ad significationis amplitudinem et grauitatem. In illo genere verbum accipit quandam vel honestatem vel turpitudinem vsu et opinione hominum, vnde εὐφημα alia, alia δύσφημα sunt: quo de genere in hac interpretis institutione dicere nihil attinet <sup>z</sup>): in hoc autem eam, quam *emphasin* appellamus. Est ergo *emphasis* quaedam ad solitam verbi significationem accessio, augendi vim habens in vtramque partem <sup>a</sup>).

z) Notandum tamen esse videtur, εὐφημα esse vocabula, quae ab hominibus honestis vsurpantur: δύσφημα, quae sine offensione audiri nequeunt, et quibus nullae, nisi dignae et nobiles notiones substernuntur. Nullum autem vocabulum natura sua honestum et turpe est, sed ex opinione hominum. Quod itaque in S. S. obscenum videri posset, v. c. Ezech. c. XVI. tor. I Cor. VII, 18. ἐπισπᾶσθαι, illis temporibus neutiquam erat turpe. Quo cultior enim est lingua, eo plures habebit ambiguitates: qua de re iam conqueritur Cicero ep. IX, 22.

a) *Emphasis*, ab ἐμφαίνειν, est, qua plus significatur, quam dicitur. Quod enim in vultu est nutus, *emphasis* est in oratione, v. c. *viram te esse oportet: demissum lapsi per funem.*

## § 16.

§ 16.

Ex quo primum illud intelligitur, quod maxime in hoc loco est tenendum, nullum verbum habere emphasin per se: propterea, quod vnumquodque verbum habet per se certam vim, indicatque certam quandam ideam rei, per se vel paruae vel magnae, in qua emphasis esse non potest; nec quia verbum aliquod rem valde magnam aut valde paruam significat, propterea ei statim emphasis inest, aut inesse putatur <sup>b)</sup>. Consequeretur enim, ut nomina *Dei*, *mundi*, *solis*, *regis* essent valde emphatica; quod nemini in mentem venit, aut venire potest.

b) Sic v. c. Matth. VI, 31. *μεριμνῶν* vix de curae magnitudine explicari potest, uti putauerunt nonnulli.

§ 17.

Sunt autem emphases vel *temporariae*, vel *constantes*. Temporarias dicimus, quae certo loco ac tempore verbis accedunt. Eae solent nasci; vel ex affectu dicentis, vel e gravitate rei, quam verbum supra usum ordinarium exprimit. Constantes autem sunt, cum verbum accipit a consuetudine significationem maiorem, quam per se habebat, eamque in certis modis loquendi semper obtinet <sup>c)</sup>.

c) Pro-



c) Proprie omnes emphases sunt temporariae, magis tamen minusue. Priorae oriuntur α) vel ex affectu, ut v. c. in Medea apud poëtam, quae in ultimas angustias redacta, quum interrogaretur, quid tibi restat? respondit, ego. Sic Sulpicius Ep. ad Diu. IV, 5. dicit: *noli oblinisci, te Ciceronem esse.* β) vel ex magnitudine et gravitate rei, v. c. Iob. II, II. *πιστεύειν* indicat firmitatem fidei. Posteriores oriuntur ex usu linguae, v. c. *ἡνῶ*, *ἄδης*, *incedere*, *βαδίζειν*, de Deo, Deaue: *schlummern*, *schauen*.

## § 18.

Eae quomodo agnoscantur, ex ipsis definitionibus clarum est. Temporarias enim contextus orationis indicat et rei natura: constantes vsus loquendi.

## § 19.

Est etiam alia emphasium apud magistros artis partitio in *verbales* et *reales*. *Reales* esse aiunt iu rerum magnitudine et sublimitate, eiusque generis aiunt esse illud *Gen. I, 3.* a *Longino* celebratum; *verbales* autem ponunt in verbis ad exprimendam rei magnitudinem aptis. Sed illa distributio inanis et vitiosa est. Emphasis enim est verborum modo, non rerum: quarum est sublimitas, *ὑψος*, magnitudo, *δυνάμεις*, non *ἐμφασις*; nec, ut verbum quodque exprimit rem magnam, id quod antea diximus, aut aptum est rei magnitudini exprimendae, ita statim

empha-

emphasin habet: nisi vero et in illo Nepotis emphasis est: *militēs flagrabant cupiditate pugnandi*: quod nemini perito vnquam in mentem venit existimare.

Vid. *Dionysius Halicarnassensis de verborum compositione*, f. XVI, ed. Schaeferi p. 191. ff.

§ 20.

Itaque etiam hi errant, et imperitiam artis produnt, qui quodlibet verbum tropicum, imprimis metaphoricum, etiam emphaticum faciunt <sup>d)</sup>. Nam, in tropis necessariis, aut variandae tantum orationis causa positis, emphasin non esse, per se clarum est: in iis autem, quae ornant orationem, nihil aliud est, quam similitudo, seruiens adiungendae sententiis orationis suauitati: nec *flagrare cupiditate* plus est, quam *vehementer cupere*: nec quisquam plus cogitat. Itaque si in hoc nulla est emphasis, nemo autem esse dixerit, nec in illo esse potest. Sed error est hic, quod putant, *flagrare cupiditate* positum esse pro *cupere* simpliciter. Ex quo fit, ut tropicorum verborum emphasis non aliter iudicetur, quam priorum.

d) Emphasis itaque non est tropus, (tropum emphaticum tamen forte inuenias Matth. XXIV, 28. ubi respici

respici potest ad aquilas Romanas) sed figura. Permutatio troporum cum emphasibus compendia dogmatica quidem olim ditauit, sanae autem interpretationi nocuit, v. c. in βασιλεὺς, προφήτης, ἀρχιερεὺς de Iesu Christo. Vid. *Ernesti* de officio Christi triplici in *Opp. Theol.* p. 413. sqq. Conf. adhuc *Fischeri* prolationes de vitiis Lexicorum N. T. prolus. V. IX.

## § 21.

Illā quoque vt nota, ita magna et inprimis necessaria observatio est, omnem linguam habere verba et loquendi genera, quibus nullum in alia lingua, aut, saltem eā, qua in interpretando vtimur, satis respondeat<sup>e</sup>): cuius generis plura sunt in hebraico et graeco, etiam proprio Noui Testamenti sermone. Eius rei causa est non modo in rebus: quod natio quaeque habet quaedam sibi propria in disciplina religionis, in legibus, vitaeque quotidianae consuetudine, aliisque: sed etiam in ipsa ingeniorum varietate, quae non eodem modo a rebus afficiuntur, in arbitraria denique conformatione idearum in iis, quae non ad substantias aut essentiam rerum pertineant. add. *Lock.* de intell. hum. III, 5. 6. *Clericus* Art. Crit. P. II. S. I. c. 2.

e) Cicero de Orat. L. II. init. dicit, Graecos non vno vocabulo exprimere posse, quid sit Latinorum ineptus, cui certe *Casauboni* ἀπειρόκαλος non plane

plane responder. Idem de Leg. I, 1. ait, Graecos non posse exprimere Lat. *ultus*, quod *πρόσωπον* saltem non adsequitur. Addimus: משה לחם, יהוה, צר, ὁδηγεῖν Iob. XIV, 13. οἱ περὶ Παῦλον Act. XIII, 15. φεύγειν, διώκειν.

§ 22.

Vt denique notiones sunt vel *disiunctorum*, vel *generis et formarum*, sic verba pariter distribuuntur. Quare, vt, in notionibus repugnantibus, vna cognita, intelligitur altera, sic, vt, quod altera ponit, idem tollat altera: ita etiam in verbis disiunctorum, siue subiecti siue praedicati locum teneant, haec lex debet valere, vt vnus interpretatio ad sensum alterius recte vel ex usu loquendi, vel, vbi ille varius est, e contextu cognitum, accuratè dirigatur <sup>f</sup>). Vt cum *multi* et *pauci* in eadem sententia occurrant, constetque *multos* esse *omnes*, iubente contextu et natura rei, consequatur, vt *pauci* non sint, quos vulgo consuetudo loquendi appellet, sed *non omnes*, siue respectu aliquo ad eam, quae proprie dicitur, paucitatem <sup>ff</sup>). Ex eodemque genere sunt *σὰρξ* et *πνεῦμα*, item *γράμμα* et *πνεῦμα*, in quibus alterius ad alterum accommodanda est interpretatio.

f) Opposita enim iuxta se posita magis illucescunt.

D

Exempla

Exempla sunt  $\chi\eta$  et  $\mu\eta\mu$ ,  $\chi\rho\iota\varsigma$  et  $\beta\epsilon\lambda\acute{\iota}\alpha\lambda$ ,  $\sigma\acute{\upsilon}\zeta\epsilon\sigma\theta\alpha\iota$  et  $\kappa\alpha\tau\alpha\chi\rho\iota\nu\epsilon\sigma\theta\alpha\iota$ .

ff) Multos pro omnibus in N. T. saepius poni, communis est interpretum sententia, qui promocant ad Matth. XX, 16. 26. XXVI, 28. Videtis tamen, ne aliquid licentiae insit huic praecepto, collaturus Rom. V, 15. 16. 19. cum v. 18.

### § 23.

Nec illa negligenda est interpreti verborum distributio, quae alia *abstracta*, alia *concreta*, appellat<sup>g)</sup>. Nam in his linguae omnes, praesertim veteres, hoc commune habent, ut abstractis utantur pro concretis, omninoque libenter frequentent abstracta, sed non eadem aut omnes aut ubique de causa.

g) Nimirum ex ratione veterum, quae verba *concreta* sunt, quae indicant subiectum cum attributis: *abstracta*, quae indicant, quod in subiecto certe reperitur. Conf. *Glossii philol. f. ed. recent. l. V. tr. de met. et synecd.*

### § 24.

Habetur autem in eo vel necessitatis ratio, vel perspicuitatis et ornatus. *Necessitas* est in linguis iis, in quibus est penuria concretorum, (adiectivorum imprimis) velut in lingua hebraica similibusque; in quibus propterea saepe abstracta coguntur vicem subire con-

concretorum: unde orta rei consuetudine, idem fit etiam, vbi nulla necessitas cogebat.

§ 25.

At perspicuitati seruiunt; cum pro subiecto cum pronomine aut subiecto ipso ponuntur: quod dirigunt mentem ad videndum id, propter quod ei praedicatum attribuitur. In quo esse aliquam efficaciam dicendi, nemo abnuerit. v. Initia rhetor. § 299. *Ornatum* autem siue *suauitatem* fere efficiunt, non modo illa ipsa perspicuitate, sed etiam magnitudine sua et orto inde sono grandiori.

§ 26.

Sunt denique alia verba communia et veluti publica, alia priuata, saepe non tam literis et sono, quam sensu, aliterque idem verbum populo dicitur de rebus communibus loquenti, aliter doctis et in explicanda disciplina sua; <sup>b)</sup> nec modo sic, vt aliud significant in vita communi, aliud in arte, sed etiam vt crassius in illa, in hac subtilius et ἀκριβέστερος dicantur: quae qui in interpretando confundunt, res ipsas pervertunt. conf. P. II. c. 10. § 31.

b) Sic παχυλῶς ex usu publico explicandum est, ἀδύνατον, vix, Ebr. VI, 4. πάντα, multa, Ioh. IV,

29. δαίμων, δαιμονίζομενος. Vsum prius contrahunt πῖσις, de religione theoretica et practica (conf. b. Koppe Exc. VI. Ep. ad Galat.): percipere, proprie capere, apud Ciceronem est, sibi repraesentare, apud Stoicos, de aliqua re certum esse.

---

PARTIS PRIMAE

SECTIO II.

PRAECEPTIVA.

*De sensu recte quaerendo*

I.

*De Regulis interpretandi*

§ 1.

**E**xplicatis sensus verborumque generibus atque natura, de regulis interpretandi deinceps est agendum. Sunt autem *regulae interpretandi* propriae formulae, exprimentes ac definientes modum sensus verborum in scriptore et contextu quoque, et recte reperiendi et perspicue declarandi.

§ 2.

Eae ducuntur et firmanur ex decretis de natura sensus, verborum et interpretationis,  
sed



sed ductis illis ex obseruationibus, non e dialecticis argutiis.

### § 3.

Neque modo seruiunt inueniendo sensui, sed etiam iudicando, verus falsusue repertus fit: nec modo per eas intelligi debet, quare alienus repertus fit, sed etiam, quare verus reperiri nequeat.

### § 4.

Quia autem sensus verborum, vt supra vidimus, pendet ab vsu loquendi; regulae de sensu vel reperiendo vel iudicando, maxime debent definire modum reperiendi vsum loquendi, et ad quemque locum intelligendum conferendi.

### § 5.

Vsus loquendi porro est vel certae linguae vniuerse, vel certi scriptoris proprie. Nam ad communem linguae cuiusque vsum fere addit aliquid scriptoris cuiusque ingenium; vnde oriuntur ea, quae idiomatica scriptorum dicuntur.<sup>i)</sup> Praecipiendum igitur videtur, primum vniuerse de reperiendo vsu loquendi in linguis mortuis, deinde de certi scriptoris, tali lingua vfi, consuetudine cognoscenda, et ad interpretandum conferenda,

da, inprimisque Noui Testamenti, de cuius interpretatione nobis proprie institutum est praecipere.

i) H. e. modi vsurpandorum verborum et phrasium, quae vnicuius scriptori propriae sunt: vnde v. c. Dionysius Halicarn. scripsit de idiomatibus Thucydidis. Eiusmodi characteristica philologica singulorum N. T. auctorum vtinam aliquando ditemur.

---

**CAP.**

## CAP. I.

*De Vsu loquendi reperiundo in linguis mortuis et scriptore quolibet vniuerse.*

## § 1.

Vsus loquendi, quia est arbitrarius; et in facto positus, in linguis mortuis cognoscitur testimoniis eorum, qui vixere tum, cum eae adhuc viuae essent versarenturque in vsu communi, et eas satis cognitae habuere.<sup>1)</sup> Ea autem sunt, vel quae proprie dicuntur et *directa*, vel improprie et *indirecta*: quibus hic non vtimur.

1) Significationes verborum itaque non per rationationes, vti olim factum esse miramur, theologicas, sed per testimonia reperiri debent.

## § 2.

*Directa* petuntur primum e scriptoribus, quibus lingua quaeque tempore quoque vernacula fuit, imprimis illis ipsis, quorum in interpretatione versamur, aut aequalibus:<sup>m)</sup> tum ex his, quibus ea lingua vernacula quidem non fuit, sed qui tamen tempore linguae  
adhuc

*in linguis mortuis et script. quolib. vniu. 57*

adhuc viae vixere, eamque bene didicerant: <sup>n)</sup> e Scholiastis porro, Glossographis, versionibus denique, quas lingua adhuc viua a peritis eius factas constat. <sup>o)</sup> De quibus omnibus breuiter praeciendum videtur.

m) Sic v. c. consuetudo loquendi Paulina potest cognosci comparandis Euangelistarum, Iohannis, Petri, scriptis.

n) V. c. in cognoscenda lingua latina possumus conferre Polybium, Dionysium Halic., et alios, qui etsi natione non fuerint Latini, linguae tamen fuerunt peritissimi. Sic in lingua graeca vti possumus testimoniis Ciceronis, Varronis, ex quorum libris multa verba graeca, inprimis in philosophia possunt intelligi.

o) V. c. ex Hesychio in N. T., ex Didymo et Eustathio in Homerum. Hi enim diligenter et ex vsu scholae didicerant linguam.

### § 3.

Principatum haud dubie tenent *scriptores* primi generis, eorumque testimonia maxime sunt idonea. Sed hi testimonium edunt fere tripliciter: primum *verbis* ipsis *definendis*: deinde *exemplis et rebus*: denique *locis parallelis*.

### § 4.

Et in *definitionibus* quidem, *rebus et exem-*

*exemplis*, unde significationes verborum dari possunt, nulla difficultas est; <sup>p)</sup> nisi quod in exemplis quaedam facultas requiritur in singularibus videndi notiones generum et formarum, quæ exercitationem aliquam desiderat: at in locorum similibus (parallelorum) comparatione ad indagandam sententiam multiplex cautio est, et in ipsis accurate iudicandis, et inter se ad reperiendam obscurioris loci sententiam comparandis: quæ nisi teneatur, res ipsa bene procedere non potest. Quo etiam diligentius hæc ratio debet cognosci: præsertim cum consentiant, quicunque aliquid in hoc genere intelligunt, hanc rationem inuestigandi sensus latissime patere, nec modo in libris sacris, quorum clauem esse ait *Danhauerus* in collatione (in Hermen. S. pag. 342.), sed etiam in cæteris omnibus pariter.

p) *Definitionis* exemplum habes Ebr. XI, 1. de fide. Sic Liuius definit v. c. quid sit interregnum, formula, patres, auctores etc. Cicero explicat, quid sit maiestas: Tacitus, quid sit tribunitia potestas sub imperatoribus. *Exemplis* et *rebus* testimonia, proferunt auctores, v. c. Paulus Rom. IV, 1 — 8. vbi δικαιούνην illustrat Abrahami exemplo: Iohannes XIV, 6. vbi v. παράκλητος illustratur. Sic in Cio. Orat. pro Muraena oritur quaestio, quid sint *notae*? Ex iis, quæ sequuntur, exemplis patet, esse formulas iuris, quibus vsi sunt in causis agendis. Vid. *Ernestii* Clau. ad h. v.

§ 5.

Sed locorum talium duo maxime genera sunt. Primum est, cum verba, quorum in aliquo loco sensus liquido perspicui non potest, propter ambiguitatem aliquam, cuius tollendae nullam ansam dat res et contextus, occurrunt vel *ipsa*, vel eorum *coniugata*, simili intexta orationi (contextui) cum attributis iis, ex quibus definiri sententia potest, aut cum adiunctione synonymi, vel exergasiae perspicuae, <sup>q)</sup> vt *συνείδησις*, 1 *Cor.* 10, 20. *coll.* 29. 2 *Cor.* 4, 11. *Act.* 9, 31. *coll.* 20, 12.

q) Quodsi itaque vocabulum *πολυσημαντον* sine determinatione ponitur, explicandum est ex contextu locorum parallelorum, v. c. *ἐν γνώσει* 2 *Cor.* VI, 6. illustratur alio loco 2 *Petr.* I, 6. vbi *γνώσις* est modestia et moderatio cupiditatum. *Act.* IX, 31. *παράκλησις* *ἀγ. πν.* illustratur *Act.* XX, 12. vbi est confirmatio in fide. Apud Cic. Oratore I, 7. *enucleate* et eleganter. Confer de *Fin.* IV, 3. vbi ita: qui grandia *ornate* velint, *enucleate* minora dicere. His testimoniis etiam falsi significatus alicui vocabulo tributi refelli possunt, v. c. in v. negotiator. Vid. *Ernestii* *diff. de negotiatoribus* in *Opp. Phil.* p. 3.

§ 6.

Alterum genus est, cum eadem res et sententia aliis magis perspicuis aut plenioribus et pluribus verbis exprimitur, et de quorum

vi

60 *P. I. S. II. C. I. de usu loquendi rep.*

vi ambigi non potest: <sup>r)</sup> cuius generis maxime promptum illud est, cum post parenthesin intextam praecedens sententia cum variatione aliqua verborum repetitur, vt *Rom.* 1, 17. *coll.* 3, 22.

r) Sic 2 Cor. V, 21. illustrat significationem v. *δικαιοῦσθαι* in N. T. (conf. b. *Koppii* Exc. IV. Ep. ad Galat.). Xenoph. Mem. Socr. I, 1. in v. *ἐπιψηφίζεν* locum non habet recepta significatio, *calculos addere*, sed conferendus est L. IV, 4, 2. vbi *ψηφισασθαι* in eodem contextu aptiorem potestatem monstrat: *populum in suffragium mittere*. Vid. *Ernesti* et *Zenne* ad h. l.

§ 7.

Oportet igitur bonum interpretem, in legendo scriptore, cuius interpres esse cupit, attendere ad loca similia iis, in quorum sensu reperiendo, ob ambiguitatem verborum, haeret. In quo erit felicior, si eum saepe legat vno tenore, aut breuibus interpositis intervallis <sup>s)</sup>. Nam ita facilitas dabiturprehendendi similia, recentibus in animo vestigiis locorum, in quibus laborarit, vel quibuscum comparari praesentia possint <sup>ss)</sup>.

s) Requiritur itaque ad bonum interpretem, 1) observatio accurata, per quam videamus loca similia, 2) iudicium similitudinis, 3) collatio locorum similium.

ss) Haeres

ss) Haeres v. c. in ἀποκόψονται Gal. V, 12. Succurrit locus Phil. III, 2. κατατομή, qui apostolum de mutilatione genitalium verba facere satis clare testatur. Dubia videtur sententia v. 3. in I. ep. ad Cor. c. XIII. ἵνα καυδήσωμαι. Sed mentem subit locus parallelus Gal. VI, 17. σήματα Ἰησοῦ βασάζειν ἐν σώματι, qui docet, apostolum verba facere de nominis Thracijs, quae servis inurebantur fronte literatis. Vide *Wetstein* ad I. Cor. XIII, 3.

### § 8.

Vbi animum tetigit aliqua talis similitudo, proximum erit, considerare, an vera similitudo sit, satisque similia sint loca, h. e. an sit in utroque eadem res, non modo verbum idem, ut iudicium tuto fieri possit: tum constituendum, vter sit clarior altero, ut ad eum accommodari alterius interpretatio possit; quod saepe sua sponte incurrit in oculos <sup>t)</sup>).

t) Tenendum itaque, 1) similitudinem rei, non verbi, parere parallelismum. Sic λόγος Ioh. I, 1, male conferretur cum I. Petr. I, 19. 2) Locus obscurus ex perspicuo est interpretandus. Sic v. c. in historia passionis dominicae Marc. XV, 16. occurrit πραιτώριον, de quo magna disputatio fuit inter *Hubertum* et *Perizonium*. Frustra hic confertur Phil. I, 13. quia praetorium Romanum, in quo erat Paulus, differt a praetoriis in prouincia. Melius comparatur Cicero in Verrem IV, 24. vbi de praetorio Siciliano loquitur: quo ex loco patet, praetorium fuisse domum praetoris. Quemadmodum Syracusis praetorium fuerat



## 62 P. I. S. II. C. I. de usu loquendi rep.

fuera regia Hieronis, sic Hierosolymis erat domus Pilati. Eadem ratione illustrandus est locus Iac. II, 24. ex Gal. V, 5.

### § 9.

Haec igitur et talia circumspectiendi et agenda sunt, consuetudineque exercitatione capiendi, ut facile animadvertere similia, eaque recte inter se comparare et iudicare possimus. In quo proderit futuro interpreti, consulere bonos interpretes, non modo sacrorum, sed etiam humanorum librorum <sup>u)</sup>, et ubi hoc artificio utuntur, praesertim, ubi ita, ut eo recte uti in promptu sit, attendere, ut videat viam, qua progrediantur, ut ad intellectum obscurorum et ambiguum perveniant, et saepe videndo et considerando ad imitandi facultatem acuatur.

u) V. c. Gesnerum, Ernestium, Heynium. In N. T. commendari possunt Kypkius, Krebsius et Loesnerus, qui loca parallela diligenter collegerunt in libris observationum; deinde Wetstenius et Koppius in commentariis.

### § 10.

Nec unus semper locus ad comparandum cum fructu suffecerit, nec in hoc, nec in superiori genere, quod potestates verborum ab exemplis et rebus petit, praesertim cum  
notio-

notiones verborum complexas et pluribus partibus conflatas quaerimus <sup>v)</sup>), sed plura sunt notanda et comparanda, donec plene ac perfecte, quod quaerimus, repertum sentiamus.

v) V. c. quid sit *πρῶτον αἰώνιον*. In hoc vocabulo illustrando diligentiae et delectus specimen in excitandis locis [parallelis dedit Noesselt in Opusc. Fasc. I. Ed. 2. pag. 333. sqq. Notandum est contra vulgare interpretum vitium, qui incredibili diligentia vndique exempla congerunt, quibus auctores non illustrantur, sed obruuntur et obscurantur. Videtis Praef. nostr. ad Hecubam et Beckii Comment. de interpr. p. 24. f.

## § 11.

*Scholiastarum* testimonium vel suum est, vel alienum: vtrumque tanto locupletius, quanto minus vel ipsi, vel ii, e quibus sua hausere, ab aetate scriptoris abfuere, cuius se interpretes professi sunt, aut quanto magis, calluisse linguam, idoneis indicis constat: quod est sane iudicis docti et exercitati, sed tamen non nimis difficile <sup>x)</sup>).

x) *Scholiastarum* in auctores Graecos optimi existimantur in Homerum, Aristophanem, Apollonium Rhodium, Thucydidem, Sophoclem: *Scholiastarum* in N. T. praecipui, Origenes, Damascenus, Theodoretus, de quibus infra.

## § 12. Nec

## § 12.

Nec multo aliter iudicanda est auctoritas *Glossographorum* veterum graecorum, quorum usum in interpretando et testimonium nemo facile repudiat. Nam et aetate nititur, et multo magis doctrina vel sua, vel eorum, quorum testimoniis utuntur <sup>y</sup>).

y) Glossae, vel verborum insolentium per clariora explicationes, colligi primum coeperunt in singulos auctores, v. c. *Timaei* glossae Platonicae; deinde in vniuersum, ut fecerunt *Hesychius*, *Cyrillus*, *Philoxenus*, *Pollux*, *Photius*, *Suidas*, qui medium tenet inter scholia et glossas. *Hesychii*, *Suidae* et *Phanorini* glossas sacras nunc separatim edidit Ioh. Chr. Gottlieb *Ernesti* Lips. 1785. et 1786. 8. cum praepositis dissertatiunculis, quas vide. Adde glossaria ab *Albertio* et *Matthaeo* congesta, cum *Photii* et *Zonarae* thesauris nuperrime (1809) in lucem editis. Simili ratione utinam et reliquae ἐν διασπορᾷ glossae s. mox colligantur!

## § 13.

Sed in his magna cautio est, ne Glossaria graeca Lexicis nostris similia putemus, sed existimemus, ea in interpretandis verbis fere ad certa certorum scriptorum loca respicere, praesertim ubi nomina non in casu recto, aut verba non in praesentis prima persona aut infinitiuo reperiuntur. Cuius rei vel ignoratio, vel negligentia, ridiculis saepe

saepe erroribus locum fecit. v. Prolus. nostra  
de *Vsu glossar. in interpretatione* <sup>2)</sup>).

2) Recusa ante *Hesychium* Ed. Albert, quae glos-  
sariorum vsum egregiis canonibus regit, v. c. 1) glos-  
sae sacrae saepe ad vnum scriptoris locum respiciunt:  
*τετραχλησμένα, φανερά.* *Hes.* Vid. *Ebr.* IV, 13.  
2) nomen per attributum et versa vice, genus per  
speciem et v. v. illustrant: *ἄμητος, καιρός.*

#### § 14.

*Versio*num testimonium aestimatur pa-  
riter aetate, et multo magis vtriusque lin-  
guae scientia, quae quanta fuerit, compa-  
randis versionibus cum archetypo in locis,  
de quorum sensu non ambigitur, intelli-  
gi debet. In quo tamen diligenter cauendum,  
ne illius ipsius linguae, qua interpret vsum  
est, inscitia labamur, quod multis et in  
graeca Alexandrina, et in versione N. T.  
vulgata, accidisse satis constat, eamque aut  
a vero sensu aberrasse temere iudicemus, aut  
verba ipsius exquisitius dicta e vulgaribus et  
minutis Vocabulariis intelligamus: in quo  
etiam doctos labi posse, Erasmi et Bezae  
exemplo docet Boisius <sup>a)</sup>), vt alios mitta-  
mus.

a) In libro: *Collatio versionis antiquae latinae  
N. T. cum versione Bezae et aliorum recentiorum.*  
*Conf. Reinhardi opusc. acad. Vol. I. Lips. 1808. p.*  
*1. ff. de vers. Alex. auctoritate etc.*

E

§ 15. His

## § 15.

His similes sunt hi, similiterque iudicantur, qui vel obiter alterius linguae verba et genera dicendi obscuriora, praesertim iis, quibus ipsi scriberent, explicarunt, ut Cicero graeca multa, Dionysius Halic. latina, vel sua ex alterius linguae scriptoribus sumere, ut poetae et historici latini e graecis, ut scriptores N. T. e textu V. T. hebraico.

## § 16.

Et haec fere sunt communia scriptorum omnium. Propria autem quaedam sunt certis scriptoribus, certae vel aetatis <sup>b)</sup>, vel nationis, vel disciplinae <sup>c)</sup>. Singulorum igitur vel ipsis, vel aetati, vel sectae etc. suae propria consuetudo loquendi cognoscitur, primum, suo cuiusque testimonio vel diserto vel implicito, ut in superiori genere: deinde e more et decretis sectae, siue philosophicae siue religiosae, cui additum fuisse constet; quae cognoscuntur testimonio eorum, qui eidem addicti sectae fuerunt, aut eius opiniones explicant: porro e ritibus aetatis cuiusque et moribus, ad quae allusio fit: in quo pariter res redit ad testimonia eorum, qui de his rebus tradidere: denique omnino e scriptoribus eiusdem aetatis ac generis.

b) Ob-

*in linguis mortuis et script. quolib. vniu. 67*

b) Observatum est v. c. Platonem multa innovasse in verbis, quae quidem apud alios scriptores etiam occurrunt, sed alio sensu. Vide *Plutarchi* quaest. Platon. (opp. ed. Reiske vol. X. p. 159 ff.).

c) Sic v. c. Stoici apud Ciceronem dicuntur innovatores verborum, quia in philosophia utebantur verbis longe alio sensu, quam olim essent usurpata, et saepius inepte, quod etiam Epicureis accidit. Exempla sunt ὀρθὸς λόγος, κατόρθωμα, καθῆκον, μέσον, quae verba alium sensum fundunt in praeceptis Zenonis (apud Diog. Laert.), alium in Stobaeo, Antonino et Plutarcho de Stoic. repugn. (l. c. p. 275 ff.).

## § 17.

Ac de aetate quidem res expedita est: genus autem iudicatur argumento (nam alius character est historicorum, alius poetarum, oratorum etc.) et caractere maxime orationis, quem vocare solemus: qui est vel certae aetati aut genti <sup>d)</sup> communis, aut a certi scriptoris imitatione <sup>e)</sup> ortus: quod in latinis et graecis frequens est.

d) Sic v. c. Ionici et Macedonici scriptores longe aliter loquuntur, quam Attici et caeteri Graeci.

e) Sic *Aelianus* in V. H. veteres historicos feliciter est imitatus: *Chrysostomus* Xenophontem, *Philo* Demosthenem et Platonem. Sed omnes istae observationes magis spectant ad auctores profanos, quam N. T.

## CAP. II.

*De sensus reperiendi rationibus vsus subsidiariis.*

## § 1.

Vsus loquendi non potest semper iis, quibus diximus, viis reperiri, saltem non satis certo, propter defectum testimoniorum idoneorum,<sup>f)</sup> vsus loquendi eadem aetate, eodemque in scriptore, inconstantiam seu varietatem,<sup>g)</sup> verborum et formarum dicendi ambiguitatem, rerum obscuritatem, aut nouitatem, et vsus loquendi negligentiam,<sup>h)</sup> quae interdum etiam diligentissimo scriptori obrepit. Itaque assumendae et quasi in subsidium vocandae sunt aliae quaedam rationes, per quas elici verus verborum sensus, sine vsu, per testimonia cognito, possit. De quibus nunc est praecipiendum.

f) Praecipue in ἀπᾶς λεγομένοις, v. c. ἐπιούσιος. Quam multi perierunt libri vel in tristissimo bibliothecae Alexandrinae incendio, ex quibus multae idiomatis graeci lacunae expleri possent. Vid. Herder in libro: Ideen zur Philos. der G. d. M. Tom. III. p. 244. ed. min.

g) V.

g) V. c. in ἀνάπιστος, ἄζυλος, infucatus.

h) Inprimis apud Hellenistas, vt v. c. ὅς ponatur pro ὅ, vt in Iohanne, qui in vniuersum grata orationis negligentia vsus est. Vid. *Ernesti de grata negligentia orationis.* Lipf. 1743.

§ 2.

Prima est, quae *orationis contextum* adhibet ad indagandum verborum sensum, idque facit multipliciter. Primum comparando orationis vniuersae consilio, quem vulgo *scopum* dicunt; quod scriptorem bonum et prudentem non credibile est aliter dixisse, quam consilium dicendi pateretur. In quo tamen non semper ea est euidentia, quae certam interpretationem efficiat; quod interdum plures interpretationes consilio orationis satis consentaneae reperiri possunt: vnde saepe hinc tantum probabilitas aliqua, interdum ne haec quidem existit.<sup>1)</sup>

i) Aurea quidem est regula, sensum loci ex toto scriptoris consilio elici. Ex hoc v. c. illustrandus est Iohannes V, 39. I, I. Paulus Rom. VIII, I. quo loco consuli debet scopus auctoris, qui septem capitibus antecedentibus de iustificatione hominis agit. Adde Gal. VI, II. quo loco series orationis docet, v. *πᾶσι τοῖς γράμμασι* non ad ductum et magnitudinem literarum, quas vocant quadratas, sed ad longitudinem epistolae referendum esse ab apostolo manu sua scriptae. Notandum est tamen, hoc subsidio sensum vniuersalem, non specialem et determinatum inveniri



## CAP. II.

*De sensus reperiendi rationibus vsus subsidiariis.*

## § 1.

Vsus loquendi non potest semper iis, quibus diximus, viis reperiri, saltem non satis certo, propter defectum testimoniorum idoneorum,<sup>f)</sup> vsus loquendi eadem aetate, eodemque in scriptore, inconstantiam seu varietatem,<sup>g)</sup> verborum et formarum dicendi ambiguitatem, rerum obscuritatem, aut nouitatem, et vsus loquendi negligentiam,<sup>h)</sup> quae interdum etiam diligentissimo scriptori obrepit. Itaque assumendae et quasi in subsidium vocandae sunt aliae quaedam rationes, per quas elici verus verborum sensus, sine vsu, per testimonia cognito, possit. De quibus nunc est praecipendum.

f) Praecipue in ἀπὸ λεγομένων, v. c. ἐπιούσιος. Quam multi perierunt libri vel in tristissimo bibliothecae Alexandrinae incendio, ex quibus multae idiomatis graeci lacunae expleri possent. Vid. Herder in libro: Ideen zur Philos. der G. d. M. Tom. III. p. 244. ed. min.

g) V.

g) V. c. in ἀνάπνοσ, ἄξυλος, infucatus.

h) Inprimis apud Hellenistas, vt v. c. ὅς ponatur pro ὁ, vt in Iohanne, qui in vniuersum grata orationis negligentia vsus est. Vid. *Ernesti de grata negligentia orationis.* Lips. 1743.

§ 2.

Prima est, quae *orationis contextum* adhibet ad indagandum verborum sensum, idque facit multipliciter. Primum comparando orationis vniuersae consilio, quem vulgo *scopum* dicunt; quod scriptorem bonum et prudentem non credibile est aliter dixisse, quam consilium dicendi pateretur. In quo tamen non semper ea est euidentia, quae certam interpretationem efficiat; quod interdum plures interpretationes consilio orationis satis consentaneae reperiri possunt: vnde saepe hinc tantum probabilitas aliqua, interdum ne haec quidem existit.<sup>1)</sup>

i) Aurea quidem est regula, sensum loci ex toto scriptoris consilio elici. Ex hoc v. c. illustrandus est Iohannes V, 39. I, I. Paulus Rom. VIII, I. quo loco consuli debet scopus auctoris, qui septem capitibus antecedentibus de iustificatione hominis agit. Adde Gal. VI, II. quo loco series orationis docet, v. πηλίκαις γράμμασιν non ad ductum et magnitudinem literarum, quas vocant quadratas, sed ad longitudinem epistolae referendum esse ab apostolo manu sua scriptae. Notandum est tamen, hoc subsidio sensum vniuersalem, non specialem et determinatum inveniri

inveniri posse, v. c. Matth. XVI, 19. vbi ex contextu quidem patet, Iesum dedisse Petro potestatem, sed non qualem, num coercendi? docendi? castigandi?

### § 3.

Habet ergo ratio ea cautionem primam hanc, vt ei non nimis, aut soli confidamus, et qualicumque cum consilio conuenientia contenti simus: quod solent facere ii, qui linguarum non satis sunt periti; vnde inanes saepe coniecturae existunt;<sup>1)</sup> sed vt sit euidentis et necessaria cum consilio orationis coniunctio: alteram, vt sensum e consilio orationis repertum comparemus cum vsu loquendi, videamusque, an cum eo in concordiam redigi possit, vel sic, vt verba per consuetudinem loquendi hunc sensum habere possint, quod fit inprimis in *πολυσήμοις*, vel sic saltem, vt ei non repugnent.<sup>m)</sup> Et interdum ille ipse sensus, per consilium orationis repertus, deducit in viam reperiendi consensum cum vsu loquendi. E solo autem consilio illo, sine auxilio et consensu verborum, aut etiam repugnante vsu dicendi, interpretari, id vero est temere coniectantis potius, quam certa ratione interpretantis. Itaque ea non vtemur, nisi vel in ambiguis, vel in iis, quae *ἅπαξ λεγόμενα* dicuntur, omninoque in quibus vsum loquendi idoneis testimoniis satis cognoscere non datur, aut ille non sufficit ad sensum definiendum.<sup>mm)</sup>

1) Va-

l) Vanitate philosophandi (vid. Ernestii Diff. p. 241.) saepe in transuersum abrepti sunt interpretes, v. c. Theophylactus, qui I. Cor. VII, 31. σχῆμα τοῦ κόσμου refert ad speciem inanem huius mundi, quum tamen paraphrasis sit τοῦ κόσμου (conf. Ven. Schulz ad h. l.). Sic Ebr. XI, 11. in formula, καταβολή σπέρματος (muliebris), male argutati sunt interpretes antiquiores.

m) Torfit e. c. interpretes locus Ciceronis de Nat. Deor. I, 1. vbi quaeritur, quid sit *inscientia*? Indagandum est consilium auctoris, qui docet, incertos esse philosophos: Academici enim dicebant, omnia esse incerta. Hoc Academicorum principium dicitur inscientia, vt patet ex Cic. libr. Acad. Vid. Ernestii Clau. Cic. v. *inscientia*.

nn) Sic v. c. male habuit interpretes, imprimis I. D. Michaellem, v. πλεονεξία Ephes. IV, 19., quam Venerem immoderatam, vel ἁμαρτίαν ἀκατάπαυστον esse putat, conferens 2. Petr. II, 14. Neque negari potest, huic sententiae fauere antecedentem ἀκαταργείαν. At enimvero meliora docent Ephes. V, 3. 5. et Col. III, 5., quibus locis aperte docetur, alludi ad rapacitatem lenonum, meretricum et catamitorum, qui amatores quaestu inuerecundo et sordido emungebant.

#### § 4.

Angustius, sed paullo euidentius est genus alterum, quod antecedentia aut consequentia consulit, si possit ex iis, qui sensus esse debeat, perspicue colligi. Quod fit dupliciter: vel, vt e pluribus, ab vsu loquendi non abhorrentibus, delectus fiat,<sup>n)</sup> vel, vt verbum

verbum insolens, nec usu satis cognitum, quid significare debeat, reperiatur.<sup>o)</sup> In quo tamen interdum ultra verisimilitudinem progredi non licet: habetque easdem, quas genus superius, cautiones.<sup>oo)</sup>

n) V. c. Act. III, 21. qui coelum debuit occupare? vel quem coelum debet recipere?

o) Rom. VI, 5. quaeritur, quid sit *σύνφυτος*? Vulgata: *complantandus*. Comparatis antecedentibus reperi-  
mus, sensum esse: quia cum Christo similitudine aliqua in morte sumus coniuncti, debemus etiam cum eo coniuncti esse similitudine in resurrectione. Hic sensus non solum per analogiam elicitur, sed etiam confirmatur ab usu loquendi. Aristoteles enim de animalibus vocem *σύνφυτος* tribuit iis, quae similitudinem aliquam et communionem naturarum habent.

oo) E. c. Matth. XVI, 13. τὸν υἱὸν ἀνθρώπου, quae verba per appositionem iunguntur antec. *με*. Antecedentia et consequentia probant, sermonem misceri de vate, siue legato diuino. Certus autem sensus h. v. e sola oratione contexta finiri non potest.

### § 5.

Eandem vim ad sensum vel ambiguum definiendum, vel obscurorum reperiendum, habet comparatio subiectorum et attributorum,<sup>p)</sup> substantiuorum et adiectiuorum, casus recti et obliqui,<sup>q)</sup> verborum et adiectarum determinationum,<sup>r)</sup> quae vel in aduerbiis sunt, vel in nominibus, quae per prae-

posi-

positionem verbo adiunguntur, suntque fere aduerbiorum *περιφράσεις*, denique etiam disiunctorum.

p) V. c. 2. Petr. I, 10. *κλήσις καὶ ἐκλογή* est felicitas, ad quam per religionem Christianam inuitamur et ex qua excidere possumus (vid. *Petr* ad h. l.).

q) V. c. Ephes. I, 23. ubi *πλήρωμα* illustrat sequens *πληρουμένου*.

r) V. c. in λόγῳ προφητικῷ 2. Petr. I, 19.

## § 6.

Et in his quidem disiunctorum comparatio habet hanc vim, ut semper certam interpretationem gignat, ut primum alterutrum perspicue intellectum est.<sup>s)</sup> In caeteris saepe est euidencia non minor, sed interdum tamen tantum species veri existit, propterea, quod earum, veluti subiecti et attributi, substantiui et adiectiui coniunctio non semper habet eam necessitatem, ut necessaria, h. e. certa concludendi ratio detur. Caeterum in his omnibus admonitio supra §. 3. posita, de usu loquendi comparando vel indagando, teneri debet, ne, quae per ingenii acumen et felicitatem hoc modo reperta sint, minus valeant: idque saepe in interpretibus non contemnendis desideratur.

s) V. c. Hebr. XII, 11. *καρπὸς εἰρηνικὸς* est fructus laetus, quia opponitur *λύπη*, moerori. Ephes. IV,

IV, 9. κατώτερα μέρη τῆς γῆς sunt inferna (vid. Koppe ὁ μακαρίτης ad h. l.), non terra, siue vterus matris, de quo b. Tellerus cogitauit: non enim sermo est de κάτω regionibus oppositis coelo simpliciter; sed de domicilio inferorum, רחמינות הארץ, per antithesin perfectam.

## § 7.

Plurimum etiam prodesse potest ad intelligendum et iudicandum ea, quae dicitur *Analogia linguarum*.<sup>t)</sup> Sed ea est non eiusdem generis. Primum est linguarum singularum, quae continetur praeceptis Grammaticorum de vsu recte loquendi, quo hic non valde vtimur. Nam haec analogia est capitis superioris, praebetque perspicua de vsu loquendi testimonia.

t) Nimirum cognatio et conuenientia linguarum vniuersalis. Sic v. c. Apocal. XV, 2. νικᾶν ἐκ τοῦ θηρίου non potest significare: *vincere ex animali*, h. e. vincere animal, quia haec constructio omnium linguarum analogiae repugnat. Est potius, *purum esse ab animali*, vt patet e versione Syriaca, ܠܐ ܡܝܢ ܕܗܝܘܬܐ

ܠܐ ܡܝܢ ܕܗܝܘܬܐ et ex LXX. ad Pl. LI, 6.

## § 8.

Est tamen, vbi haec quoque in dubiis et obscuris lucem aliquam praefert: vt, cum in verbo aliquo de genere significationis constat, comparandis aliis eiusdem generis verbis, et modo ei linguae proprio de talibus rebus

rebus loquendi, iudicamus de vera verbi similis vi. Si v. c. quid sit ἐγκομβώσασθαι, (1. Petr. V, 5.) quaeratur, in quo magnam emphasin quaerit vulgus interpretum, comparabimus caeteras formas loquendi graecas, quae vestiendi vim habeant. Ita videhimus, in iis praepositiones περὶ, ἀμφὶ, ἐν vsurpari, sine accessione aliqua sententiae ad simplicem vestiendi significationem, idque adeo verbum nil aliud aut plus esse, quam ἐνδύσασθαι, quod verbum cum eo permutat *Clemens R. Ep. 1. p. m. 39.* Itaque bonus interpres diligenter debet videre, vt hanc analogiam recte teneat, et in promptu habeat.

### § 9.

Alia analogia est linguarum similiarum, et vel a communi veluti stirpe natarum, vt Hebraicae, Syriacae, Chaldaicae, Arabicae, vel ab se inuicem procreatarum, vt Graecae et Latinae: quam commendauit, et in priori genere inprimis frequentauit *Schultenfus* in *Originibus linguae Hebraicae*, et in *Commentariis* aliis.<sup>u)</sup>

u) In Iobum et Prouerbia, quorum praefationes vide. Conf. etiam *Reiskii* oratio studium Arabicae linguae commendans, post coniect. in Iobum. Lips. 1779.

### § 10.



## § 10.

Haec analogia prodest interpreti non modo hactenus, vt radices verborum, quae in aliqua lingua, vel Dialecto, periire, ex altera reperire possit, et sic aditum sibi ad significationem verborum patefaciat, sed etiam, et prope plus, vt illustrandarum significationum, vtcunque per contextum orationis cognitarum, et firmandarum facultas fiat. v)

v) Imo etiam, vt totae formulae N. T. exinde illustrentur. Quod quidem subsidium quum a multis N. T. interpretibus neglectum videamus (conf. tamen Schulz, Erinnerungen und Zweifel gegen Michaelis Uebersetzung des N. T. I. 2. Stück), excerpta quaedam Arabica et Syriaca dare licebit. In Elmacini historia Saracenica (Ed. Erpenii, Lugd. Bat. 1625. fol.) exstat pag. 277. egregius locus:

جدي بيني وانا فابي, *annus meus in filio est, et ego in patre.* Hoc iam vsus est ad illustrandum v.

II. cap. XIV. Ioh. Hufnagel, in libro: Handbuch der bibl. Theologie p. II. pag. 77. Perfidum amicum ad iusiurandum prouocat Chalisa p. 109. his

verbis: احلف براسي, *iura per caput meum:* quo loco lucem adfundas Matth. V, 36. Pag. 193. salut

lutat Muctadir fratrem Cahirum, قبل جيهته, *osculatus frontem eius,* quod explicat καταφλεξ

Matth. XXVI, 49. et ασπάζεσθαι in N. T. Pag. 135. legas Almamonis colloquium de μετανοια. Pag. 236.

et 256. adlatum videas caput decollati in disco, quod notari potest Matth. XIV, 12. Claudant agmen bina

Bar-

*Barhebraei* loca *Kirschii* diligentiae debita. *Matth.* VIII, 20. legitur: οὐκ ἔχει, ποῦ τὴν κεφαλὴν κλίνει. Ad hunc locum *Rosenmüller*: „adeo se remotum a diuitiore fortuna Christus ostendit, vt ne domum quidem habeat propriam.“ Maiorem lucem commodabit loco *Barhebraeus* p. 406, l. §. vbi *Saladin*, prouocatis ad expugnationem Tyri militibus, ita:

١٠٨٦ بلا هذا لجة يسا انا يستلح نس  
 دهم مكا مكن ط ٥٠ :

*Francis in litore maris nullum amplius locum restitisse, ubi caput ponerent, quam Tyrum. Pag. 591. l. 6. narratur, Arabes urbem Accam expugnauisse,*

١٠٨٧ دهم لجة يسا دهم مكا انا نس  
 دهم نس :

*neque Francis in litore magni huius maris reliquisse, ubi caput ponerent. Ex utroque loco patet, sensum Matthaei esse, Iesum nuspiam tutum fixumque domicilii locum habuisse.*

# § 11.

Nam inconstantia loquendi, quae in omnibus linguis dominatur, facit, vt significationes verborum facile ac saepe mutantur; in omnique lingua non admodum multa sunt verba, quae primam radice vim retineant. Itaque magna diligentia est adhibenda, ne ea ratione abutamur in interpretando, et etymologias tales temere sequamur, quibus

quibus nihil est in sensu quaerendo fallacius, existimandumque, radicibus talibus indagandis magis historiae verborum consuli, quam interpretationem adiuuari, saltem raro plus, quam tenuem aliquam veri speciem teneri<sup>s</sup>).

s) Vid. Ernestii Antimuratorius p. 25. sqq. Valckenarii opuscula ed. Lips. Vol. I. 1808. p. 103. ff. diff. de Byrsa, nomine Phoenicio arcis Carthaginiensium, quocum βαργις et בִּירָה non satis feliciter comparantur.

§ 12.

Maxime autem utilis ad interpretandum est analogia ea, quae inest in comparatione non modo similium vocum et phrasium, ut altera lucem accipiat ab altera, sed etiam modorum loquendi, quae dissimilitudinem habent, verba spectantibus ex etymologia, caeterum manifeste de eadem re dicuntur; propter quam causam alter per alterum explicari potest. Ex illo genere est, si περιπαρμένους ὑπὸ τὴν ἀμαρτίαν, Rom. 7, 14. et ὡς διὰ πυγὸς, 1. Cor. 3, 15. compares cum *addictus* et *ambustus*, cum tropice dicuntur<sup>t</sup>): ex hoc, si מבֿן־רגלים cum Graeco ἐκποδῶν. Nam, quia clarum est, quibus locis Graeci dicant ἐκποδῶν, iis Latinos eodem sensu dicere, *e medio*: ἐκποδῶν porro et מבֿן־רגלים ita sunt similia, ut graecum

ex

ex hebraico factum videatur; inde fit, vt nihil videamus aliud esse מִבְּרִיגְלִים quam e medio <sup>u</sup>).

t) πεπραμμένος, Cicero: vino vendita fides, h. e. addicta, ὡς διὰ πύρρος, Liu. XXXII, 36. et 40. ambustus, semustus euasit h. e. cum summo vitae periculo euasit.

u) Copiosius hoc exposuit Ernestius Opp. Phil. p. 173. seqq. et 277. Quae contra monuit S. V. Teller (Ernesti's Verdienste. Berl. 1783. p. 53.), Gen. XLIX, 10. cum Samaritano legendum esse מִבְּרִיגְלִים e vexillis eius, dubitatione nondum carere videntur.

### § 13.

Nemo profecto dubitare potest, quin homines iisdem rebus eodem fere modo adficiantur, praesertim iis, quae in sensus incurrant. Vnde fit, vt, qui de iisdem rebus, eodem modo spectatis aut perceptis, dicant, etsi modis loquendi, qua etymologias verborum, valde dissimilibus, vtantur, tamen idem sensisse iudicentur, eamque ob causam alterum ex altero rite intelligatur.

### § 14.

Omnino latissime patet haec ratio, valetque ad bene interpretandum, ad troporum vim iudicandam, ad emphases fictas cauendas, plurimum. Itaque etiam subinde eam a doctioribus interpretibus cum fructu

fructu vsurpatam reperimus. Sed desiderat plurimum linguarum accuratam et copiosam scientiam: unde non mirum est, eius usum esse minus inter interpretes frequentem<sup>un</sup>).

uu) Adeant quaeso tirones scripta Scaligeri, Casauboni, Salmasii, Bocharti, Celsii, Aurivillii, ut vim eorum percipiant, quae b. Ernesti praecepit. Addere iuvat Schultensii et Menagii origines linguarum Arabicae, Italicae et Gallicae, quas assidua manu versauisse nunquam poenitebit.

## § 15.

Est etiam interdum consulenda communis rerum natura<sup>v</sup>) et analogia doctrinae<sup>x</sup>), de qua scriptor quisque tradit, ut verum verborum sensum reperiamus, nec plus minusue in verbis videamus, quam ipse voluit. Nam quia eam vel sua sponte, vel e disciplina superiori, notam esse omnibus putabat, ut in ea error intercedere non posset, propterea fieri potuit, ut vteretur interdum formis loquendi minus accuratis, si ad ἀκριβειαν dialecticam subtiliter exigas verba: cuius generis sunt catachreses, hyperbolae, hypallagae, item, quae vniuersae et simpliciter pronunciant, quod de parte aut certo genere valet: quas, cum aliis similibus, etiam usus loquendi vulgaris in omnibus linguis, praesertim orientalibus, et scri-

scribendi genere poetico et oratorio, frequentauit, ut nulla esset causa vitandi.

v) Quae docet, non omnia κατὰ τὸ ἑνὸν esse intelligenda, v. c. in formulis: *Deum nasci, Deum obdurasse animum Pharaonis*. Quodsi Cicero ait, *Romanis insitam fuisse fortitudinem*, hoc non ita est intelligendum, ut illos nunquam ignauos fuisse credamus, quod vel Marius refutaret.

x) V. c. Col. I, 15. s. *πρωτότοκος πάσης κτίσεως* non de principe rerum creatarum explicari debet; sed *περὶ τοῦ πρώτου κτισθέντος* conuenienter locis I. Cor. III, 23. XI, 3. Phil. II, 6. s. Iterum *ἐξουσίαι, δυνάμεις* et *κυριότητες* Ephes. I, 21. non ad magistratus politicos transferendae sunt; certum enim est, eos in epistolis Paulinis ubique (VI, 12.) habere significatum *dignitatum angelicarum*, quod alio loco probabimus.

## § 16.

Itaque necessarium est, in his interpretationem referre ad rerum naturam, notitias infitas, sensumque communem, et elementa doctrinae perspicua, cauendumque, ne verba nimis teneamus et per etymologias s. etymologicum sensum torqueamus, aut etiam vitiosam orationem iudicemus; cum linguae constent usu et consuetudine, quae in iis dominatur, nec possit iure vitiosum in dicendo putari, quod constans usus etiam peritorum bene dicendi probauit. Itaque etiam anomaliae Grammaticae, quae sunt

F

for-

## 82 P. I. & II. C. II. de sensus reperiendi etc.

formae recedentes ab lege dicendi, non modo in vitio non habentur, sed etiam ita necessario, propter consuetudinem, vsurpantur, vt qui ab iis in dicendo aberret, peccasse iudicetur.

### § 17.

Patet autem hoc vitium, quod in etymologia premenda esse diximus, latius, quam vulgo existimant. Neque enim ii modo sunt in hoc vitio, qui interpretationem accommodant ad notationem, siue primam originem verbi; quo nihil est vulgatius, (§. 11.) sed etiam, qui ordinariam verbi vim et grammaticam ἀκριβειαν nimis tenent <sup>y</sup>), vnde cum aliae pravae interpretationes, tum emphases commentitiae existunt. Sed de hoc capite proximo distinctius, et ad N. T. interpretationem accommodate praecipiemus.

y) V. c. in ἐπισκιάζειν Luc. I, 35. σκιάζειν εἰς τὴν σάρκα Gal. VI, 8. quem locum illustravit Mornac in Opp. Theol. t. I. p. 150.

### § 18.

His igitur vniuersis de ratione inueniendi sensus traditis, sequitur, vt proprie ad Noui Test. interpretationem de inueniendo sensu verborum dicamus.

CAP.

### CAP. III.

#### *De reperiendo vsu loquendi N. T.*

##### § 1.

**P**rimum autem videndum est de genere orationis vniuerso, quo scriptores Noui Testamenti vsi sunt, quod in eo permagnum saepenumero momentum est ad inueniendum et iudicandum, vt res ipsa declarabit.

##### § 2.

Redit autem res vniuersa ad quaestionem, a multis saepe agitatam, purene graeca sit oratio et in verbis phrasibusque singulis, et in forma vniuersa, an ad hebraicae linguae rationem facta: illud probantibus ac defendentibus *Pfochenio, Stolbergio, Erasmo Schmidio, Blakwallo, Georgio,*<sup>2)</sup> et paucis aliis, non admodum claris literarum graecarum scientia, hoc *Erasmo, Luthero, Melanchthone, Camerario, Beza, Drusio, Casaubono, Glassio, Gatakerio, Solano, Oleario, Vorstio,*<sup>3)</sup> aliisque permultis, literarum graecarum et hebraicarum doctissimis: a quorum partibus etiam inter Veteres stant

F 2

*Origenes*



*Origenes Philoc. I, 4. 15. et Chrysostomus ad 1. Cor. 1, 17.*

2) In Hierocritico N. T. Vitemb. 1733. 4. Confer *Rhenferdi* syntagma disputationum Theolog. Philol. de filo N. T. Leouardiae 1702. 4. et *Honevt* Syntagma Dissertat. de filo N. T. Amstelod. 1703. 4.

a) Adde *Leusdenium* de Hebraïsmis N. T. *Maldonatum* in Commentario in IV Euangelia et *Hemsterhusium* ad *Lucianum* T. II. p. 361. Ed. Bip. qui ita: eorum, qui orationem N. F. graecam esse castigatissimam contendunt, opinio mihi semper ridicula fuit visa. Praeter *Vorssium* cum *Solano* princeps est inter viros modo nominatos *Gatakerus*, qui *Pföchenium* per singulas partes refutauit.

### § 5.

Ea quaestio vt recte intelligatur et iudicari possit, tenendum est ante omnia, non quaeri, an quaedam pro non bene graecis, sed hebraïsmis habita sint a nonnullis, aut etiamnum habeantur, quae sint in bene graecis numeranda: quod facile concedimus. Potuit enim in hoc errari, et erratum interdum est: et sunt quaedam etiam genera dicendi omnibus linguis communia.

### § 4.

Nec sic hanc quaestionem intelligi volumus, vt quaeramus, an ipsae voces et phras  
ses

Ies graecae N. T. apud bene Graecos occurrant, quod ipsum conceditur ab omnibus plerisque, aut an phrasis aliqua, hebraicam consuetudinem referens, apud poetam aliquem, inprimis sublimiorem, tragicum, ut *Aeschylum* et *Sophoclem*, eodem sensu occurrat, nec ne: veluti *ἕρκα* de terra continente.<sup>b)</sup> Nam poetae, inprimis hi, et Lyrici, quaedam insolentius dicunt, non illa in exemplum trahenda: et iis licet etiam peregrina vsurpare: denique quaedam e prisco orientis sermone traxere: qualia multa in Aeschylo potauit Stanleius, et in Pindaro vidit Zwmglius, cuius praefatio in Pindarum videnda est, denique etiam apud Sophoclem reperimus.

b) Quae quidem loca singula nihil probant pro N. T. puritate; v. c. סור מבין רגלים, Platonī est *ἐκ τῶν ποδῶν διαχωρεῖν*, Ciceroni, e medio discedere. In vnuersum ambiguus labor est, arguments pro similitudine sermonis ex poetis desumere.

## § 5.

Nec illud obesse puritati sermonis concedimus, quod verba quaedam reperiuntur, quae res exprimunt Graecis ignotas, alioque adeo, quam graeca consuetudo fert, sensu dicuntur, etsi ex hebraico more loquendi ducta sunt: ex quo genere sunt *πίσις*, *μετάνοια*, et alia.<sup>c)</sup>

c) Neque

c) Itaque nec singula verba barbara in N. T. probare possunt hebraizantem illius dictionem. Occurrunt enim etiam voces latinae in N. T. v. c. μάλλον, κουσώδεις, neque tamen propterea eius dictionem latinizantem dicas.

## § 6.

Sed quaeritur de verbis et phrasibus, res exprimentibus eas, de quibus etiam Graeci vulgo locuti sunt, et an, primum, verba illa singula dicantur sensu eodem, quo Graeci dixerunt, deinde phrasēs non modo habeant σύνταξιν Graecorum, sed etiam sensum, quem iis graeca consuetudo attribuit: nam haec sunt ad puritatem necessaria. Veluti cum δικαιοσύνη de liberalitate, εὐλογία de copia, κοινὸν de profano dicuntur, et δίκαιος ἐνώπιον Θεῶ, ἄρτον φαγεῖν, de conuiuiο, παρασηῆναι ἐνώπιόν τινος, etc.

## § 7.

Atque etiam de scriptoribus, quorum auctoritate puritas verborum et phrasium defenditur, videndum est, ut ipsi satis sint puri, h. e. antiquiores, et prosaici, nec traxerint aliquid vel e versione graeca V. T., vel ex ipso N. T., utque historici cum historicis, dogmatici cum dogmaticis conferantur. Comicis quoque locus esse potest, praeterquam in Choris.<sup>d)</sup>

d) Vin-

## *de reperiendo usu loquendi N. T.* 87

d) Vindicanda itaque erat puritas N. T. comparandis 1) verbis singulis et 2) phrasibus cum auctoribus graecis, 3) adferendis scriptoribus N. T. antiquioribus, 4) comparando v. c. Matthaeum cum Xenophonte, Paulum cum Platone, Apocalypsin cum Pindaro et Aeschilo, hymnos N. T. cum choris Tragicorum.

### § 8.

Atque ita constituta ac definita quaestione, negamus sine dubitatione, dictionem N. T. esse pure graecam, hebraicamque consuetudinem imitari defendimus, nec modo in singulis verbis ac phrasibus et figuris dicendi, sed etiam vniuersa forma orationis, idque exemplis perspicuis constare, quorum numerus etiam maior sit, quam vulgo credant illi ipsi, qui a nobis non dissentiunt, ut bene monet *Werenfelsius* (de Sulo N. T.), cum etiam Lucas, qui magis purus caeteris putatur, innumerabilia habeat hebraica, sitque initium Euangelii, c. 1. post praefationunculam pure graecam, v. 5. 6. 7. ita hebraicum, ut ad verbum ex hebraico versum videri possit. e)

e) Eruditiores etiam inter Iudaeos non sine summo labore mediocritatem orationis graecae adsecuti sunt, ut Iosephus et Philo. Scriptores N. T. lingua hebraizante uti debebant, 1) quia multa desumebantur ex V. T. graeco, 2) quia Iudaei, qui Iosephum propter puritatis graecae studium odio Vatiniano persecuti sunt.

tersam

terfam linguam vix capturi fuissent, 3) quia N. T. in locum veteris graeci succedere debebat.

## § 9.

Haec omnia exemplis proferendis docere, supernacuum fortasse fit, eaque e libris *Olearii*, *Leusdenii*, *Vorstii*, *Glassii*, aliorumque peti, et proferri a doctoribus possunt. Illud admonendum videtur, phrasas quasdam, etsi eodem sensu in Graecis reperiuntur, tamen hebraicas esse posse; f) quod casu accidere potest, ut, quae quis e vernacula in aliam linguam ad verbum transtulit, in aliquo bono illius linguae scriptore reperiuntur: quae est scita *Gatakeri* (c. Pfochen. p. 61. etc.) *Hemsterhusio*, *Raphelio*, et aliis merito probata observatio.

f) V. c. *καρὰν χαίρειν*, metum metuere, quod bene graecum est et latinum. Ex hebraismo tamen prius occurrit Matth. II, 10.

## § 10.

Argumentum autem non leue ducitur primum ex eo, quod multa graeca in N. T. non modo in nullam linguam facilius ad verbum verti possunt, quam in hebraicam, ut ipse *Erasmus Schmidius*, magnus alias puritatis defensor, fatetur (ad Matth. 4, 4. 21, 42. etc.), sed ne explicari quidem bene, nisi ex hebraicis possunt: quippe etiam, in multis,

multis, si quis e consuetudine bene graece loquentium interpretari velit, sententiae falsae, mirabiles et ridiculae existunt, ut exemplis patet iis, quae a *Werenfelsio* prolatae sunt l. c. p. 358. et a nobis de Difficult. Interpret. Gramm. N. T. §. 12. quibus alia facile addi possunt, vid. v. c. *Eunomii* Apolog. c. 24. Multis profecto erroribus caruisset omni tempore Theologia, carerentque etiam nunc libri multorum, si non hebraica graece explicata essent:<sup>8</sup>) ut passim etiam noster *Melanchthon* in Commentariis monet.

g) Sensum plane falsum e. c. dedit formula ἀδελφὴ γυνή I. Cor. IX, 5. graece explicita, (v. c. ἀδελφὴν καὶ γυναῖκα *Plutarchi* Alexandro c. 30. Darii sororem et uxorem) quum ex Hebraismo simpliciter sit vxor Christiana. Graeci autem ex suo sensu linguae sororis nomine abusi sunt ad libidines suas regendas in consuetudine συννεσ-ἀκτων, quam Chrysostomus adhuc grauer reprehendit et cui repetita conciliorum decreta mederi vix poterant. Vid. Clem. Alexandr. Strom. III. p. 448. et *Ernestii* Op. Phil. p. 171. sqq.

# § 11.

Nec illud non magnum argumentum est, quod interpretes N. T. graeci et latini, qui quidem hebraismi imperiti fuerunt, et in interpretando graecum sensum secuti sunt, in multis misere torquentur et plane ineptiunt, utin συνδέσμῳ τελειότητος, (Coloss. III, 14.)  
monente

monente *Melanchthone*, (in *Comm. T. IV. Opp. p. 330.*) quod nunc etiam accidit parum peritis: cum ex hebraica consuetudine verba aestimantibus in iisdem locis plana sint omnia.<sup>b)</sup> Hoc enim fieri nullo modo posset, si pure graeca esset Apostolorum oratio. v. *Erasmus* ad 2. Cor. 11, 6.

b) Quam multi errores orti sunt in ecclesia ex linguae hebraicae ignorantia! Doctrina de purgatorio, poenitentia, fide, bonis operibus et aliis ex Augustino et versione vulgata proferri quidem, sed adferri et defendi non possunt contra interpretem linguae hebraicae gnarum.

### § 12.

Haec porro res cum propterea nihil ad dignitatem librorum diuinorum incommodi habet, quod a veritate nihil incommodi proficisci ad res diuinas potest, tum quod multa commemorari possunt, propter quae tale genus orationis in libris sacris adhiberi consentaneum ac necessarium fuit.

### § 13.

Nam primo scriptores N. T. sua sponte non poterant bene graece scribere, nati et educati inter Hebraeos, nec graece ad scholae legem docti, nec adsueta lectioni librorum graecorum,<sup>1)</sup> quod et de Paulo, quamquam Tarfi nato, dicendum videtur. Neque

que enim consequens est, ut qui Tarfi natus sit, ubi scholae Rhetorum et Philosophorum essent, iis etiam magistris usus sit, aut legerit scriptores eos, e quibus verficulum aliquem usurpat. A pharisaicae quidem sectae homine *ἑλληνισμός* tum plane alienus fuit.

i) Hanc potius sapientiam summo odio prosequantur, ipse Paulus I. Cor. I, 17.

§ 14.

Nec vero consentaneum erat, spiritum s. inspirare Apostolis orationem pure graecam. Nam ut omittam, neminem eos pro auctoribus illorum librorum habiturum fuisse, ipsi non intellexissent eam orationem, nisi alia inspiratione<sup>1)</sup>, multo minus plebei et Iudaeis, quibus maxime scribebatur, qui ne probaturi quidem erant hoc genus dicendi, odio Graecorum, et eloquentiae graecanicae, cum essent contra hebraizanti dictioni et lectione vel ipsius hebraei Codicis, vel versionis graecae Alexandrinae adfueti<sup>m</sup>). Denique cum doctrina N. T. niteretur fundamentis V. T. phrasin eius quoque seruari conueniebat.

1) Quum Paulus fuisset Athenis, ibique Act. XVII, 17. concionaretur coram Stoicis et Epicureis, *σπερμολόγον* illum vocabant, propter linguae diuer-



diuersitatem: nam oratio ipsa erat egregia et plane diuina.

m) Adde et hoc: non scribebant philosophis et grammaticis graecis, sed maximam partem Iudaeis. Quae ad Christianos e gentibus scripta sunt, meliorem graecitatem spirare videntur.

### § 15.

Neque porro hoc dicendi genus officit perspicuitati ei, quae a scriptore postulari potest. Nam scriptor quisque sua maxime tempora et eos, quibus proxime scribit, spectare debet, non tempora futura, cum neglectu suorum. Et obscuritas, quae hinc subinde nata est, non est necessaria, sed a temporibus orta, quae est communis omnibus quamuis bonis scriptoribus, et causa eius est in lectoribus, non in scriptoribus.

### § 16.

Ex quibus fit, vt *Stilus N. T.* recte dicatur *hebraeo-graecus*. Qui *hellenisticum* malit appellare cum *Scaligero* (*Animadu. ad Euseb.* p. 134.) *Drusio*que, a quo primo hanc appellationem vsurpatam putabat *Salmasius* (*Offileg. L. H.* p. 387.), caueat, ne cum *Dan. Heinsio* peculiarem Dialectum intelligat (*Diss. de Hellenistis et L. Hellenistica*, et praef. ad Nonn. et Exercit. in N. T.) quam explofit idoneis argumentis

Sal-

*Salmasius* multis locis et libris <sup>a</sup>). Nec *Dialectum Alexandrinam* cum nonnullis appellem (v. praef. ad Biblia Grab. T. II. c. 1. §. 40.), cum et aliis locis similiter locutos Iudaeos constet <sup>o</sup>): nam illa Dialectus Alexandrina, de qua *Irenaei*, Grammatici Alexandrini, libellus extat, pertinet ad ea, quae sermo Alexandrinorum, quamquam pure graecus, habuit propria et diuersa a sermone aliorum Graecorum: qualia et alii Graeci, vt Attici, habuere. Sunt et, qui *dialectum Macedonicam* memorent, quod in N. T. esse videantur plura Macedonibus propria, cum eius oratio magis cum Polybii <sup>p</sup>), Diodori, etc. quam aliorum antiquiorum dictione consentiat.

n) Primum enim vniuersa antiquitas sequentes tantum agnoscit dialectos cum *Gregorio* p. 3. Ed. Koen.: Ἰαῖς, Ἀρῆις, Δωρεῖς, Αἰολίς, κοινή: deinde dialectus non quaerenda est in phrasibus, sed in flexione verborum.

o) V. c. Antiochiae, Caesareae et alibi. Sed de hac et sequenti egregie exposuit *Starz* de dialecto Alexandrina. Lips. 1786. 4. ed. 2da 1809. 8.

p) Vnde aliquis dixit, Spiritum S. admirabiliter delectatum fuisse dictione Polybiana. Rationem similitudinis ostendit *Ernesti* Opp. Phil. pag. 212. sqq. De dialecto Macedonica notum est, illam per totam Asiam inualuisse. Videantur in vniuersum adhuc *Fabricius* Bibl. Gr. Vol. III. L. IV. §. 22. b. *Michaelis* Introductio

Introd. in N. T. §. 18. sqq. *Leusdenius de dialectis*  
N. T. Ed. Fischer. Lips. 1753.

## § 17.

Nec tamen omnia, quae non bene graeca esse constat, sunt eadem ex hebraismo ducta: sed insunt quaedam etiam latina, e consuetudine cum Latinis inuenta, quae facile deprehendi a quolibet possunt, et alia: item Syriaca, Chaldaica et Rabbinica: quorum exempla dabunt *Olearius* de Stilo N. T. Sect. didact. membr. II. III. et alii, vt *Wetstenius* ad N. T. v. c. Act. XIII, 48.

## § 18.

His constitutis de vniuerso genere orationis, de vsu loquendi cognoscendo, et singulis locis indagando, et ad interpretationem conferendo, proclue erit perspicue praecipere.

## § 19.

Primum igitur oportet interpretem bene peritum esse graecae et hebraicae consuetudinis loquendi, vt bene graeca agnoscere, et ab modis loquendi ex alia lingua ductis discernere, et vtrumque genus recte explicare possit <sup>pp</sup>). In graeca autem cognoscenda studium maxime referri debet ad scriptores non modo populari oratione vsos, sed

sed etiam aetatis non remotioris, qui quidem non dedita opera imitati sint veterem Atticorum dictionem. In quo genere *Polybium* imprimis posuerim, *Diodorum* etiam *Siculum* et *Artemidorum* <sup>1)</sup>: in quibus sunt plura cum N. T. communia, veteribus Graecis aut omnino non, aut alio sensu usurpata.

pp) Quam egregie haec praecipiantur, b. *Ernesti* suomet ipsius exemplo comprobavit, praesertim in praelectionibus de epistola ad Hebraeos nunc a *Dindorfio* editis, quibus graeca maximam partem bene explicantur, graeca hebraico colore tincta non aequè. Neque veremur eandem fere sententiam pronuntiare de *Mori*, viri immortalis nobisque imprimis cari, commentariis, hic illic quidem auditorum socordia deprauatis, ceterum Hebraismi ἀπειρία non raro laborantibus. Quae non nisi propterea monemus, ut temporis parcant tirones et summorum virorum exemplis discant, quanta eruditionis farragine opus sit interpreti N. T. idoneo et omnibus numeris absoluto.

q) Cum *Arriano*. Vocabula βασιλίσσα, γενήσια non sunt bene graeca: tamen utrumque habet *Polybius*.

## § 20.

Deinde omnibus in locis diligentiam adhibebit hanc, ut decernat, bene graece dictum aliquid sit nec ne: in quo est difficultas maior, quam quis credat <sup>1)</sup>. (v. nos de difficult. interpret. Gr. N. T. §. 13.)  
Vbi

Vbi a graeca ratione abhorreere verba senserit, proximum erit, auxilium petere ab hebraico sermone. Id vt rectius possit, non modo ipsum, indolem inprimis eius, in formis verborum, temporibus, construendorum verborum et copulandorum membrorum modo, tenere debet, quod sane saepe solum suffecerit, sed etiam quibus verbis graecis hebraica exprimere consueverint Iudaei, graece de rebus sacris, sed vulgariter, non ad elegantiam graccam, vt *Philo* et *Iosephus*, dicentes ac scribentes, vt hebraicis recte comparandis sensum verum reperire possit <sup>rr</sup>).

r) V. c. κόσμος, εἰρήνη, φόβος, σὰρξ, πνεῦμα, ἐκλογή.

rr) Quaeritur v. c. quid sit ἐξουσία ἐν τῇ κεφαλῇ I. Cor. XI, 10. De imperio non agi, res ipsa docet; τριχώματος ἐξουσία occurrit quidem in auctore profano (*Callistrati* expos. stat. in opp. *Philostrati*. Paris. 1608. t. I. p. 871.) *capillorum velamen* indicans, et in ipsis *Digestis* (l. XXIII. tit. 10.) *impetrivium* continet notionem supellectilis et quidem προσκεφαλαίου. Legunt tamen codd. nonn. *impilia*: et in *Callistrato* etiam sermo esse potest de *capillitii licentia*. Confugimus itaque ad linguae vsum Hebraicum: Ps. LX, 9. וַיַּעַן Alexandrinis est κραταίωσις: verba תַּיִסַּס et תַּיִרַר, quorum radicibus protegendum et dommandum notiones insunt, apud eisdem interpretes habent potestatem περιβολαίου Gen. XX, 6. et Cant. V, 2. Verbum ἐξουσία itaque non solum continet signi-

significationem potestatis, sed etiam velaminis et capitalis. Hoc autem Pauli praecepto nititur decretum concilii Gangraensis (a. 324.), si qua mulier tondeat comam, anathema esto: apud Mans. t. II, 1103.

§ 21.

Igitur interdum nihil melius fuerit, quam graeca ad verbum hebraice vertere, quod saepe mediocriter hebraice doctis proclive est, cum in verbis singulis, tum in formulis verborum. Verum id non semper sua sponte quis fecerit commode, ut in iis, quae rariora sunt, aut duriora, et etymologia dispari. Itaque consulenda est versio graeca V. T. Alexandrina; quae etiam ita cognita et interpreti N. T. tractata esse debet, ut rationes hebraicorum graece vertendorum teneat, habeatque in promptu. Nam profecto, cum prima origo de sacris graece dicendi ac scribendi ex ea versione ducta sit, facile apparet, in ea versione esse basin illius sermonis hebraeo - graeci bene cognoscendi. Sed de hac re nobis proprius destinatus est locus praecipendi in Parte altera et capite de usu versionum V. T. graecarum. Profuerit etiam cognouisse scriptores de hebraïsmis cum vniuersis, tum N. T. proprie, Vorstium imprimis, Leusdenium \*), et eruditissimum omnium Gatakerum.

\*) Vtrumque nunc ex Ed. Fischeri, cuius supple-

menta adhuc recentissima exstant. Adde *Sturzii* librum de dialecto Alexandrina paulo ante excitatum, quo de recto et idoneo interpretum Alexandrinorum usu multa egregie praecipiuntur.

## § 22.

Nec ad id consilium inutile fuerit, cognoscere reliquias *Aquilae*, qui simili genere interpretandi est usus, nec longe absuit ab aetate Apostolorum, habetque nonnulla etiam ad usum hunc nostrum praecipua: itemque *Symmachi*, qui hebraica pure graece exprimendo fecit etiam hebraicorum intelligentiam faciliorem<sup>s)</sup>. Sed de his quoque, et eorum in hoc genere usu, suo loco plura dicemus.

s) Ex omnibus V. T. versionibus graecis, iis imprimis, quae archetypo sunt propiores, multum discere poterit idoneus interpres N. T., nimirum qua ratione res hebraice cogitatae graece exprimi soleant. Hunc in usum erectioribus forsan adhuc commendari posset *nova versio graeca V. T. Veneta* a *Villoisono* et nobis edita Argentor. et Erlangae 1784 - 1791.

## § 25.

Est hoc etiam praeceptum valde vile, ut, cum idem verbum et genus dicendi hebraicum est, et bene graecum, existitque ex utroque sensus non incommodus, hebraicum potius sensum in interpretando sequa-

quamur. Probabilius enim est, homines hebraei generis illo vsos esse, quam hoc; praesertim si in graeco sit rarior et exquisitior. Veluti καταβολὴν σπέρματος (Hebr. XI, 11.) malim ex hebraico Gen. 4, 25. quam e graeco, itemque ἀποθνήσκειν ἐν ἀμαρτίαις <sup>t)</sup>) explicare.

t) Ioh. VIII, 24. Quae quidem formula graece explicata hunc dabit sensum: vos ad finem vitae perseverabitis in peccando: hebraice: vos damnabimini propter peccata vestra. Adde ἁμαρτίαν πρὸς θάνατον I Ioh. V, 16. non nisi e diuisione peccatorum hebraica explicandam.

#### § 24.

Vniuerse autem hoc tenere debet interpres, vt semper graeca, praesertim, cum de dogmatibus religioni, inprimis Christianae propriis, sermo erit, referat ad hebraica, quod in his maxime verba duci debuerunt e libris sacris V. T. <sup>u)</sup>) In quo eum etiam admonere poterit analogia doctrinae, quae debet esse in promptu, ne in alienum a mente sanctorum virorum et summa religionis sensum verba trahantur.

u) Falluntur v. c. qui in v. προφήτης semper de vate futuri temporis gnaro cogitant. Hebraicum מֵבִינִי monstrat, προφήτην esse doctorem, magistrum. Vid. b. Koppe Excurs. III. in Ep. ad Ephes.



## § 25.

Nec hoc modo, quamquam maxime, debet intelligi de significatione vocabulorum singulorum, generumque dicendi, sed etiam de formis verborum et temporibus, itemque de numeris verborum et nominum, in quibus non raro sermo N. T. aberrat a graeca ratione, et hebraicam sequitur <sup>v)</sup>): quo non animaduerso, in magnas difficultates impeditur interpres, aut ad mirabiles ac paene ridiculas interpretationes delabitur.

<sup>v)</sup> Sic tempora futura N. T. maximam partem sunt aorista ex consuetudine hebraica. Adde οὐρανοὶ שמים, ἡ καὶ, ἡγιασμέναι, facere, ut aliquis triumphare possit, ex Hebr. Hiphil. Vid. *Ernestii Opp. Phil.* p. 175. sqq.

## § 26.

Vbi hebraismus nos in indagando sensu destituit, adeundae sunt caeterae linguae, inprimis Syriaca <sup>x)</sup>), Chaldaica et Rabbinica. Ac de Syriaca et Chaldaica cum omnes concedant, tamen non omnes recte intelligunt, ut facile intelligi potest ex iis, qui Syriaca, inprimis de versione N. T. ad illuminanda Graeca conferre tentarunt <sup>y)</sup>), de quibus suo loco dicemus. Est autem res ita tenenda, ut, quemadmodum ante dixi, a graeca et hebraica deserti, demum ad illa auxilii quaerendi causa veniamus. Quod si  
genus

genus id dicendi e Syriaca v. c. lingua peti-  
tum reperimus, tum vero, quando constite-  
rit, quo id sensu Syri dicant <sup>2)</sup>, poterit nobis  
etiam de sensu graecorum constare. Quod  
erit hoc magis in promptu, si ea lingua est  
adhuc viua; cuius generis cognoscendi fa-  
cillima ratio est: quamquam de eo video  
dubitari. Similiterque de Chaldaicis et  
Rabbinicis erit intelligendum. Qui plus  
quaerit aut sperat, frustra quaerit et sperat,  
facileque aut inutiliter laborauit, congeren-  
dis, quae nihil proprie profint, aut etiam  
in deteriorem partem subsidio alias non con-  
tennendo abutetur: certe nihil aliud conse-  
quetur, quam vt intelligat, recte verterit v.  
c. Syrus, nec ne. Sed de vsu librorum in-  
primis Iudaicorum vniuerso proprius nobis  
locus est descriptus.

x) V. c. *ἡ ἀρχή* Math. V, 22. *Μαγὰρ ἀδὲ*  
I. Cor. XVI, 22. sunt vocabula Syriaca, *ܡܐܕܢܐ*  
*ܡܢ ܐܝܬܝܢ*, et ex hoc idiomate illustranda.

y) Ludouicus de Dieu et Boysen. Opusculum est  
autem, vt aliquis non solum ex versionibus syriacis,  
sed ex aliis etiam auctoribus syriacis, v. c. ex Barhe-  
braeo observationes in N. T. conscribat.

z) Quaeritur, nam lingua syriaca etiamnum vigeat,  
nec ne? Albert. Schultensius quidem inter linguas  
mortuas illam referre non dubitat. Forte in coenobiis  
Maronitarum adhuc floret, dum vulgus arabice loquitur.  
Vid. b. Michaelis Bibl. Orient. Tom. XV. p. 130. f.

## § 27.

Atque ita nobis descripta est ratio legitima cognoscendi, et in singulis locis indagandi et reperiendi vsus loquendi in scriptoribus N. T. per testimonia, quae maxime directa diximus. Sed etiam si ea ratio latissime patet, tamen sola non sufficit, nec sufficere potest. Sunt enim non pauca in his libris noue dicta propter nouitatem rerum: non quo noua religio tradatur, sed quod vetera magis perspicue, et proprie, et distincte traduntur, remotis figurarum et allegoriarum umbris: propter quae etiam nouis verbis et formis dicendi opus erat, in quibus sunt plura propter similitudinem aliquam accommodata rebus tradendis: quae, ut hoc obiter addamus, non profecto ab ipsis Apostolis inuenta sunt, aut inueniri potuerunt: maioris ingenii et scholae artibus subacti hoc est: sed ab ipso spiritu s. iis suppeditata sunt. In quo est permagnum verborum diuinitus inspiratorum argumentum. Ex eo genere sunt, *τέρας, δαιμονίζεσθαι, τάρταρος, αἰὼς, ἀναγενναῖν*, et alia <sup>a</sup>).

a) Veremur, ut immortalis *Ernesti* hac in opinione multos sibi habeat consentientes. Quod enim attinet ad voc. *δαιμονίζεσθαι*, notum est, Iudaeorum doctrinam de angelis post reditum ex captiuitate exornatam fuisse sapientia Chaldaica, quae omnia mala, morbos

morbos imprimis vehementiores, ab angelis malis vel daemonibus repetebat. Deinde vocc. *τάραχος, ἄδης*, manifeste notio hebraici *למ* substrata videtur. Vocabula, *σημεῖον, ἰσχυρ*, et magis graecum *τίρας*, procliuitas et propensio illius aevi ad euenta miraculosa facile peperit et arripuit. Sed tota lis redit ad meliorem *θεοπνευσίας* adumbrationem, quam alio loco satis aptam dedit b. *Ernesti*, melioremque etiam b. *Morins* in epitome et praelectionibus dogmaticis ab *Hempelio* editis.

§ 28.

Haec igitur non possunt intelligi et explicari ex prisco loquendi usu, sed habent interpretationem propriam, nec tamen superiori illa minus certam; quod et ipsa directis ipsorum scriptorum testimoniis nititur. Ea maxime inest in collatione locorum finalium, de cuius vera ratione et cautionibus supra praecipimus. C. I. §. 4. f.

§ 29.

Nec tamen contemnenda sunt testimonia veterum Ecclesiae graecae scriptorum de talibus imprimis loquendi formis, nec modo interpretum, sed etiam caeterorum. Et in interpretibus quidem qui delectus habendus, quid spectandum sit, postea dicemus in Parte tertia: hic vero illud modo teneri volumus, in scriptis Graecorum, proprie non pertinentibus ad sacrarum literarum

rum interpretationem, subinde occurrere loca, in quibus formae loquendi N. T. in eo contextu sint, aut eas adiunctiones habeant, vt perspicue intelligatur, quo sensu illa aetas accepèrit: qualia nos haud pauca apud *Clementem Romanum, Ignatium, Hippolytum, Cyrillum Hieros.* et alios obseruauimus <sup>b)</sup>. Exempla infra posuimus P. III. c. 5. §. 23. Itaque oportet futurum interpretem in his legendis attentum esse ad talia obseruanda.

b) Scriptores enim N. T. multos habuerunt discipulos, quos ipsi literis diuinis imbuebant, v. c. Iohannes, Petrus, Paulus. Hi vsum loquendi apostolicum rursus cum suae disciplinae alumnis communicauerunt, quorum scripta exstant. Sic v. c. *Cyrillus Catech. XXX. ἐρμηνεύει* I. Cor. II, 10. quo loco mirifice argutati sunt interpretes, explicat per γινώσκειν.

### § 30.

In his possunt esse, quae hausta sunt e prima disciplina Apostolica et ad posteros propagata. Certe, si bene consentiant contextui et analogiae doctrinae, non sunt repudianda. Sed erunt hoc probanda magis, quo magis habebunt characterem proprium sermoni apostolico, ad hebraei figuram et indolem formato et composito. <sup>bb)</sup>

bb) V. c. *ἐν εἶναι μετὰ τοῦ πατρὸς* Ioh. XVII, 21. cf. *Clementis Rom. ep. 2. p. 27. ed. syr. post Wesselenii N. T. Lugd. Batav. 1752.*

### § 31.

§ 31.

Vfurpari etiam, praesertim in talibus, poterunt *Glossae* veteres *Hesychii*, in quibus, satis constat, multas esse ad certa N. T. loca pertinentes et ex antiquissimis N. T. interpretibus ductas, minimeque contemnendas, item *Suidae*, quae sunt tamen pauciores, et *Photianae*, ex Onomastico inedito, c) quod ei tribui solet: verum cum cautione ea, ut e forma verbi iudicemus, ad quem locum, siue an ad locum eum, in quo laboratur, pertineant. Et in his quoque iudicium adhibendum est non paruum, ut bona a pravis et inutilibus discernamus, quod fiet fere eodem, quo in superiori genere diximus, modo.

c) Cuius particulas iam decerpserat *Albertius* ad *Hesychium*: nunc integrum habemus opera *Tittmanni* et *Hermanni*. Vid. *Iohannis Zonarae* et *Photii* lexica ex codd. manuscr. nunc primum edita, observant, et indice. instructa. III tom. Lips. 1808. Neque glossae Scholiastarum auctorum Graecorum sunt negligendae. Ioh. V, 13. ἐξέρευσεγ egregie illustratur ab Euripidis Schol. ad Phoeniss. v. 921. qui habet ἐκρυβει, ἀναχωρεῖ. Interpres Venetus Deut. XXXI, 18. כַּהֵן vertit, ἐξέρευσεγ.

§ 32.

Atque etiam glossae, quae in textum interdum pro vera lectione irrepsere in codicibus

cibus nonnullis, possunt vel aditum facere ad intelligendum, vel copiam illustrandi et firmandi veras interpretationes; ut *Io. 7, 52.* ubi apud *Chrysoft. hom. 51.* pro ἐρευνήσον est ἐρώτησον, ubi *Chrysostomus*: μάθε, τὸτο γὰρ ἐστὶν ἐρώτησον.<sup>cc)</sup> Eae possunt e Scholiis antiquis in N. T. ab *Origene* ortis fluxisse: quamquam et ex aliis Commentariis, etiam latinis.

cc) *Chrysostomus* ceterum in glossis rebus magis inhaeret, quam verbis, proptereaque sedulitate interpretandi longe inferior est Hieronymo. Exempli loco esse potest τὸ σῶμά μου, ἵνα καυδήσωμαι *I. Cor. XIII, 3.* *Chrys.* addit, τ. ἱ. ζῶντα κατακαῆναι, quod longe abest a sententia *Pauli*.

### § 33.

In his omnibus ubi nihil aut non satis auxilii reperiri potest, in consilium adhibebimus contextum, et rerum ipsarum antecognitam indolem. Itaque etiam analogia scripturae et doctrinae Christianae in scripturis traditae semper esse debet ante oculos, ut ad eam dirigatur interpretatio: hoc est sic, ut primum nulla interpretatio probetur, quae sensum efficiat ei contrarium,<sup>d)</sup> deinde, ut in phrasibus durioribus, quaeque ei videantur repugnare, ad illam accomodemus interpretationem.

d) Exem-

d) Exemplum illustre existat Matth. XII, 32. *εἰπὼν κατὰ τοῦ πνεύματος τοῦ ἁγίου*, quae verba proprie sumpta peccatum indicare videntur nunquam remittendum. Plane autem aduersatur haec sententia doctrinae N. T. de peccatorum remissione, inprimis locis Act. XIII, 38 s. I. Ioh. II, 2. Nil itaque praecipere videtur I. C. praeter hoc: confectaria peccati, quo ipsa notio Dei in animo profligatur et repellitur, hominem vel post fata sequi. Vide eandem fere sententiam in *Maimonidis tract. de poenitentia*. Oxonii 1705. p. 93.

§ 34.

Nec id praeceptum Theologorum mirum debebat videri cuiquam, etsi non esset traditum in ipsis libris sacris (nam *Rom.* 12, 6. quidem longe aliud sonat κατ' ἀναλογίαν πίστεως, vt alio loco docuimus)<sup>e)</sup> cum id sensus ipse communis sanxerit, sitque commune etiam humanorum librorum interpretationi; qui omnes interpretandi sunt non modo vniuersi, sed etiam in singulis locis, ad ἀναλογίαν eius doctrinae, ad quam pertinent.

e) Non: pro ratione fidei; sed: pro mensura et magnitudine fidei. Vid. b. Koppe, Rosenmüller ad h. I. et Summa nostra theolog. Christ. ed. 2. Erlangae 1808. §. 26. de regula fidei.

§ 35.

Est autem *Analogia doctrinae* s. *fidei*, quae nec accurate satis nec constanter vulgo defini-



definitur, non in ipsa doctrina vniuersa, coe-  
tui alicui probata, vt vel iniuri vel imperiti  
calumniantur: foret enim multiplex: nec in  
eius nexu: sicut nec Iuris analogia est in ip-  
so iure, aut legibus, aut earum nexu, nec  
Analogia Grammatica in ipsis verbis: sed,  
sicut Analogia Grammatica est lex dicendi et  
forma lege constituta, cui ἀνωμαλία opponi-  
tur, quae est in consuetudine aberrante a le-  
gitima forma: sic doctrinae sacrae et fidei  
analogia est in summa religionis formula et  
lege, euidenter in scripturis tradita, vnde  
Latinae Ecclesiae doctoribus *Regula fidei*  
dicitur; ad quam omnia referenda sunt, ne  
cum ea pugnet quidquam, sed cum ea con-  
sentiant omnia; quod cum sit, analogia di-  
citur esse seruata.<sup>f)</sup> Nec Scripturae, quoad  
credenda et agenda tradit, Analogia ab do-  
ctrinae Analogia differt. Exempla Anal-  
ogiae, et iudicii secundum analogiam sunt  
*Gal.* 6, 15. 16. et *1. Cor.* 15, 3. 4-11. seqq.  
vbi illam Analogiam cum Graecis aliis τὰ  
πρῶτα vocat: quae in omnibus disciplinis  
habent vim normae et in iudicando, et in  
interpretando.

f) Neque veritas ipsa, neque nexus dogmatum, vt  
*Baumgarten* voluerat, est analogia fidei. Analogia iu-  
risscientiae est ingenium legum: sic analogia fidei est  
ingenium religionis reuelatae: *Geist und Ebenmass der*  
*christlichen Lehre*. Haec analogia interpretem saepius  
liberat iugo, quo premitur. Sic v. c. quaestio, num  
gentiles

gentiles post mortem damnentur? merito negatur ex analogia doctrinae et dicti Ioh. III, 16. Cf. Diss. an ratio et Script. S. gentiles probos damnent ad supplicia aeterna? auct. Ioh. Godofr. Gurlitt. Lips. 1775. 4. Interim negari nequit, aliam esse analogiam fidei exegeticam, aliam dogmaticam. Illa diuersa et multiplex est pro ingeniis auctorum N. T. singulorum, qui v. c. doctrinas de Christo, de iustificatione et resurrectione mortuorum πολυτρόπως illustrant. Haec vna eaque firma esse debet, notionibus euangelicis vniuersis, quae ab ideis proxime absunt, insistens. Dubium autem esse non videtur, quin analogia exegetica rite semel ab interpretibus constituta viam aliquando sternere possit ad analogiam vere dogmaticam, cuius autem cummaxime nonnisi umbra conspicitur in corpusculis theologicis.

§ 36.

Sed maxime ad eam rationem confugere oportet in locis iis, qui sonant aliquid abhorrens ab veritate perspicue tradita alibi, atque a sensu adeo communi de rebus diuinis et humanis. Commune autem est hoc omnium scriptorum etiam humanorum, quamuis disertorum et acute subtiliterque et sentientium et scribentium, vt, cum non compendium doctrinae ipsius et elementa componant, nec agant ex instituto de aliquo capite doctrinae, notitias communes, et elementa doctrinae nota e disciplina et institutione sumant, nec ita semper de rebus loquantur, vt subtilis institutionis elementaris et scholasticae ratio requirit; voluntque mo-  
dos

dos loquendi crassiores et populares ad illam  
exigi atque intelligi.<sup>g)</sup> Itaque idem etiam  
concedendum est scriptoribus diuinis, qui in  
omnibus humano more loqui et voluerunt et  
debuerunt, ita moderante spiritu sancto, vt  
quam minime a naturae ingeniique humani  
indole innoxia recederet. Et est hoc minus  
mirandum, si saepius talibus et durioribus  
sunt vsi, cum id orientalis ingenii et sermo-  
nis indoles maxime ferret.

g) V. c. ἀπελθεῖν εἰς τὴν ἀγέλην τῶν χοίρων Matth.  
VIII, 31. Vid. Doederlein de redemptione a potestate  
diaboli, in Opusc. Theol. p. 96. sqq.

### § 37.

Erit autem tironis, ad facultatem hanc  
interpretandi adspirantis, notatas et percurfas  
habere formas ipsas loquendi sacrorum scri-  
ptorum duriores, hoc est, ab indole nostrae  
linguae abhorrentes, nec satis accommoda-  
tas ad simplicitatem et subtilitatem doctrinae,  
earumque intelligendarum rationem tenere,  
ne ab iis se impediri aut perturbari sinat: vel-  
vti, multa dici vniuerse aut simpliciter, quae  
sint accipienda particulariter et πρὸς τὸ, prae-  
sertim in rebus moralibus:<sup>h)</sup> actiua verba  
non semper propriam actionem aut efficien-  
tiam indicare, et similia, quae etiam ab aliis  
notata reperiet, v. c. apud *Glassium* in  
*Gramm. S.* quaedam etiam apud *Calouium*,  
de

de Persona Christi v. c. pag. 527. *Turretinum*, de Interpretatione S. liter.<sup>i)</sup> et alios.

h) V. c. πάντα Ioh. I, 9. I. Cor. X, 23. Idem praeceptum tenendum est in interpretanda oratione montana. Vid. *Pottii* Diss. de natura et indole orationis montanae. Helmst. 1788. 4. b. *Rau* in libello: *Ueber die Bergpredigt*. Erl. 1806.

i) Nunc ex Ed. *Telleri* Francof. 1776. 8.

### § 38.

In his proderit etiam attendere in scriptis humanis ad tales formas dicendi. Neque enim vlla fere est in diuinis, cui non similia exempla reperiantur in humanis. Nec dubitari potest, quin minus difficultatis in talibus intelligendis ac iudicandis habituri fuerint interpretes, si illorum lectione satis triti ad interpretationem diuinorum accessissent. Atque etiam, quae sunt in forma et structura orationis, praesertim Paullinae, duriora et impeditiora, minus mirabitur aut offensionis aliquid habere putabit, qui a lectione *Thucydidis* ad interpretandum accesserit, aut tanquam vitia, abhorrentia a dignitate et sanctitate librorum sacrorum, transpositiones, ἀνακολouthiαν constructionis, enallagas, et similia timebit, vt quibusdam viris bonis, sed non satis peritis linguarum accidit: in quo est potius indocta superstitio, quam sapiens verbi diuini reuerentia. Vidit hoc et bene monuit

monuit noster *Melanchthon* in Dedic. Dispos. Epist. ad Roman. extr.

## § 59.

Ita explicata ratione yniuersa reperiendi sensus per vsum loquendi, aut alia artificia subsidia, de quibusdam capitibus separatim dicemus, in quibus se non satis vulgo, nec in praeceptis, nec in vfu, expediunt. Sunt autem inprimis tria: primum de tropis, alterum de emphasibus, tertium de *ἐνστυλιζέμεναι* iudicandis.

CAP.

## CAP. IV.

### *De Dictione tropica iudicanda et interpretanda.*

#### § 1.

In tropico genere verborum duplex est interpretis officium: primum, ut tropos agnoscere et recte iudicare possit, ne aut propria putet quae tropica sunt, ut olim discipuli Christi et Iudaei interdum fecere, in sermonibus eius,<sup>1)</sup> aut proprietatem verborum tropica interpretatione peruertat; alterum, ut tropos recte interpretetur, et eorum verum sensum tradat. Saepe enim accidit, ut homines putent, se tropicum sensum tenere, quia sensum verbi proprium tenent, ludanturque inani imagine, aut tropum etymologica interpretatione peruertant. Haec igitur vitia ut vitari possint, praecepta de utroque genere e natura tropicae dictionis, supra ex observationibus et usu declarata, ducenda sunt, quibus interpretes in iudicando et interpretando dirigatur.

1) Notum est, discipulos I. C., quae de regno suo, *de βασιλείᾳ τοῦ Θεοῦ, τῶν οὐρανῶν*, praeceperat, proprie semper intellexisse, et Ioh. III. ipse Nicodemus,

mus, Theologus Iudaicus, Iesu institutionem tropicam de regeneratione non capit. Idem accidit multis interpretibus v. c. in Χριστὸν ἐνδύσασθαι, aliisque in formulis.

## § 2.

Et de iudicio quidem, tropica dictio fit an propria, vulgare est præceptum, quod iubet *non facile discedere a proprietate significationis*. Sed id nec simpliciter verum, nec ad vsum aptum, nec perspicuum est.<sup>m)</sup>

m) In vniuersum canonibus male res absoluitur. Melior tamen hæc est regula: *a sensu proprio non recedendum est, nisi existat frigidus, ridiculus, aut contradictorius*. Sic I. Cor. XV, 20. ὑπὲρ τῶν νεκρῶν est eis χάριν νεκρῶν, quemadmodum Rom. V, 8. ὑπὲρ ἡμῶν ἀπέθανε, mortuus est in gratiam nostram. Nolito itaque ab hac sententia discedere propter rationes dogmaticas, vel indiuiduas; vides enim, apostolum ipsum huic argumento non immorari, videlicet ne supertitionem auctoritate sua confirmare videatur.

## § 3.

Nam illud *non facile*, si bene latine intelligas, i. e. *prope nunquam*, aut *rarissime*, falsum est: sunt enim frequentes in sacris libris tropi,<sup>n)</sup> quibus etiam satis magnum librum replere potuit *Glossius*: saltem ambiguum est, nec dat certam notam aut perspicuum characterem, per quem agnosci tropus

pus ac distingui a proprietate possit, aut iudicetur, quando ergo discedendum sit: quod est vitium in regulis maximum.

n) Quia scribendi genus Iudaicum plenum est imaginibus, floribus, allegoriis, gnomis, similitudinibus: quas propter multi inveniuntur tropi, cum in libris N. T. historicis, tum dogmaticis.

§ 4.

Paullo distinctius praecipere videntur, qui non sine evidenti causa aut necessitate proprietatem deferendam dicunt, vt *Danhauerus*, *Tarnovius*, *Calovius* et alii: sed nec definiunt illam necessitatem, nec quae sit evidens causa docent. Atqui nemo est, quin se propter necessariam et evidentem causam a proprietate verborum discedere putet. Nec vero necessitas ea, quam *Danhauerus* (in *Idea boni Interpr.* pag. 91.) explicat, quae sit in manifesta vel rerum vel factorum repugnantia, semper necessaria est: vt in verbo *πυγος*, 1. *Cor.* 3, 13. Caeterum planum est, in eo praecepto sensum proprium, qui tropico opponitur, confundi cum literalis s. historico, qui opponitur allegorico, a veteribusque pariter proprius dicitur; de quo verum est et notum praeceptum, itemque de vsitato verborum significato, a quo recte praecipiunt, non sine grati et idonea causa discedendum esse; sed discedi tamen potest, cum scriptores ipsos ab eo interdum



discessisse, extra dubitationem sit. Enimvero et tropicus sensus suum usum habet etque vlitatus appellandus.

## § 5.

Proprie an tropice aliquid dictum sit, vulgo cognoscimus, re ad sensum vel internum vel externum reuocanda, h. e. repetenda eius vel interna vel externa perceptione;°) quod ubi fieri potest, facile est iudicium; eaque causa est, quare in scriptis humanis, aut rarissime, aut nunquam dubitatio talis incidat, tropice aliquid an proprie dictum sit, quod res ab iis traditae, quia sunt humanae, et sensibus vel internis vel externis subiectae, utcumque revocari ad sensum humanum possunt.

o) H. e. si perceptionem externam et internam subiecti et praedicati comparamus et videmus, num utraque perceptio in hac phrasi locum habeat, v. c. in formulis; *Θύραξ διανοουμένης*, *florere ingenio*, facile videmus, propriam vim in vv. *florere* et *Θύραξ* teneri non posse.

## § 6.

In sacris autem libris dubitationi locum fecit rerum sensibus humanis plane subtractarum natura, quales sunt diuina natura ipsa, operationesque diuinae, ut interdum quaereretur, proprie an improprie aliquid diceretur;

tur: unde magnae et acres controuersiae or-  
tae, quae et nunc durant: per quas etiam de  
tropica dictione vniuerse quaedam ab vtraque  
parte disputata sunt, quae tamen plus meta-  
physicae aut dialecticae subtilitatis habent,  
quam veritatis. P) Eius generis quaedam,  
nisi fallimur, sunt apud *Calouium* de Perso-  
na Christi, p. 547. et *Petr. Martyrem* in  
*Locis*, de *Sacr. Euchar.*

p) Cognitio humana de Dei natura interna non nisi  
vocalibus tropicis prodi potest, v. c. in Ἰησοῦς Θεοῦ  
υἱός, ἐργὴ Θεοῦ, מלא שמים וארץ, מלהים. Proprie  
Deus non nisi a se ipso cognosci et manifestari potest.  
Dei autem natura externa, vel opera eius, quia sensi-  
bus subiacent, proprie per adspectum cognosci queunt.

## § 7.

Ac primo in tropicorum numero non  
esse habenda verba, quae propriam significa-  
tionem amiserunt, aut quae ita dicuntur de  
rebus iis, ad quas ab aliis traducta sunt, vt  
sola de iis dicantur, nec aliud proprium ex-  
tet atque vsurpetur, supra demonstratum  
est. Itaque etsi v. c. *generandi* verbum ab  
humanis ad diuina translatus est, tamen,  
quia actui diuinæ naturae exprimendo desti-  
natum vnum est, vt alia quaedam verba, quae  
ab humanis ad diuina traducta sunt, velut  
amor, misericordia, decretum etc. proprie  
de filio Dei, vt hoc ipsum *filii* nomen, dici-  
tur.

tur. Nec eorum verborum de diuinis vsurpandorum causa tam aliqua similiudo externa est aut remotior, quae in rhetoricis metaphorae locum facit, sed analogia quaedam ipsius naturae rerum: ut in eo, quod exempli causa posuimus, actus communicandae eiusdem naturae; qui quia in diuinis et humanis genere vniuerso idem est, etsi specie et modo differt, tamen eodem verbo recte exprimitur, et generandi verbum non minus proprie in diuinis quam humanis dicitur: quod in dogmaticis diligentius edisseri debet.<sup>q)</sup>

q) In doctrina de filio Dei, Arii praesertim et Aetii sagacitate dudum agitata, quaestio de iis, quae proprie vel improprie intelligenda sint, obscuritate quadam semper laborabit: vide Summam nostr. theol. Christ. §. 52 s. ed. 2. Verba enim קנה, ללח, ילד, κτίζειν, γεννᾶν, quae de sublimiori I. C. natura in s. s. vsurpantur, allegorici quid trahere, negari vix poterit, coll. II. Ioh. III, 3 s. et I. Ioh. V, 1. Tantas autem componere lites, interpretis non est, sed theologi, cui hoc datum est muneris, ἵνα φιλοσοφῇ περὶ τοῦ Θείου, ut cum Iustino M. loquamur.

## § 8.

Illud autem dubitationem non habet, tropum esse agnoscendum in enunciatis iis, quorum subiecta et praedicata sunt heterogenea; cuius generis sunt disiuncta omnia, corporeum et incorporeum, animatum et non animatum,

matum, rationale et expers rationis et similia, item species eiusdem generis diuersae.<sup>r)</sup> Nam quae in eodem subiecto esse non possunt, propter naturalem repugnantiam, cuius generis sunt ea, quae diximus, ea de se dialectice, adeoque propriè praedicari non possunt: quod dialectica veritas est fundamentum proprietatis. Itaque si praedicantur tamen; sequitur id fieri improprie.

r) V. c. ἀπελούσασθε ἐν πνεύματι τοῦ Θεοῦ I. Cor. VI, II. quod more suo h. e. egregie explicuit Griesbachius Progr. ad h. l. Ienae 1783. Adde κέρως σωτηρίας Luc. I, 69. quod illustratum voluit b. Noesseltus Opusc. Fasc. I. p. 31. sqq. ratione tamen nobis haud probanda. Hic notauisse sufficiet, κέρως σωτηρίας nihil aliud esse, quam κραταῖον σωτήρη.

### § 9.

Huic autem regulae non magis subiiciuntur enunciata N. T. in quibus subiecto Iesu tribuuntur diuina et infinita, quam ea, in quibus homini tribuuntur praedicata mentis humanae. Nam vt in his attributa mentis et corporis propriè attribuuntur homini, propter coniunctionem vtriusque in vnam personam; sic in illis attributa diuina Iesu Messiae, propter vnitatem personae ex ytraque natura, pariter propriè tribuantur necesse est.<sup>s)</sup>

s) Noli miscere, quae hic per saturam offeruntur, alia

alia enim hac de re docentur in N. T. alia in compendiis theoreticis. Vnde *Summam theol. Christ.* §. 96. f.

## § 10.

Atque ut id usus loquendi linguarum omnium firmat; sic pariter hoc docet, legislatores in edictis suis, historicos in narrationibus factorum, in quibus nihil spectatur, nisi ut, quid actum sit, appareat (sunt enim etiam narrationes ornatae, in quibus delectatio legentium et laus ingenii quaeritur) denique doctores alicuius disciplinae in tradendis ad intelligendum dogmatis, h. e. cum agunt hoc, ut doceant, ut explicent aliquid, non obiter et aliud agentes attingunt modo, propria dictione uti solere, nec tropis, nisi qui priorum naturam usu induerint, atque omnium minime durioribus, uti solere. Vnde fit, ut in talibus non sit agnoscendus tropus, nisi clare doceri potest, eum usu vel omnium, vel scriptoris certe illius, ei rei exprimendae paene proprium factum esse: cuius generis quaedam esse in libris sacris, ut illuminandi, regenerandi verba, dubio caret. \*) In hac autem observatione consentientes habemus etiam eos, qui in tali disputatione in singulis causis aliter, ut fit, sentiunt, ut *Bochart. Hieroz.* 2, 56. *Placaeum* T. II. Opp. p. 255. *Periz. Orig. B.* p. 300. Itaque, sicut *Matth.* 28, 19. capimus *βαπτίζου* proprie, cum et dicatur tropice; ita

ita pariter 26, 27. 28. *edere corpus Christi et bibere sanguinem eius* accipiendum erit proprie,<sup>u)</sup> cum Io. 6. sit translatc.

t) Quae hic praecepta sunt, valent quidem in lingua perpolita et exculpta, in hellenistica autem N. T. plures admittunt exceptiones, et quidem in libris historicis, v. c. in narratione tentationis Iesu (vid. III, *Eichhornii Bibl. Lit. Bibl. Vniu. T. III. p. 283. f.*) et in historia vitae Iesu priuatae: in libris dogmaticis iis, quorum auctores philosophiae Iudaicae commentorum et imaginum plenissimae dediti fuerunt, v. c. auctor anonymus epistolae ad Hebraeos.

u) Quae tamen adsertio argumentis nititur, non hermeneuticis, sed dogmaticis. Quod enim I. c. Matthaeo est *σῶμα* et *αἷμα*, Paulus appellat *ἄστρον* et *ποτήριον* I. Cor. XI, 26. sqq. Neque adsunt argumenta satis firma, quibus probari queat, Matthaeum aliam praeire doctrinam de corpore et sanguine I. C., quam Iohannem.

## § 11.

Ex quo fit, vt in rebus diuinis, quae sola reuelatione cognoscuntur, adeoque ad sensum reuocari non possunt, non aliter nisi e consuetudine loquendi scriptorum sacrorum intelligi et liquido iudicari possit, an proprie aliquid tropiceue dictum sit.

## § 12.

Ea autem consuetudo non aliter cognoscitur,

scitur, nisi collatione locorum similium: quae fit multipliciter. Nam cum de eadem re aliis locis alia verba vsurpantur, facilis est distinctio priorum et tropicorum, veluti, *regenerari ex aqua et spiritu*, Io. 3, 5. tropice dici patet, quia res eadem proprie est *Marc. 16, 16.* cum autem perpetuum est idem in omnibus de eadem re verbum, vt *filii* et γενναῖν, vbi eius cum Deo coniunctionis (relationis) modus exprimitur, proprietates agnoscitur: denique cum de diuersis, at similibus tamen rebus, aut coniunctionem aliquam habentibus, idem modus loquendi vsurpatur, proprie intelligendum patet. Veluti *Matth. 26, 28.* coll. *Ebr. 9, 20.* utroque proprie dici τὸ ἐν τῷ αἵματι τῆς διαθήκης, ex hac ratione in promptu est. Nam *Ebr. 9, 20.* proprie esse, nemo dubitat: multo ergo magis in antitypo *Matth. 26, 28.* nec, illam formulam aliter intelligendam, venire in mentem poterat discipulis Christi, ei proprie accipiendae adfuetis.<sup>uu)</sup>

uu) Veremur, vt loca excitata vere sint parallela. Iesum enim sanguine suo pepigisse foedus, idque sensu proprio, dubitatione caret; panem autem corpus esse, σκληρός ἐστὶ λόγος Ioh. VI, 60. Noli et hoc praetermittere, copulam ἐστὶ, e qua sensus proprius pendere debet, in institutione coenae sacrae a I. C. vsurpatam non fuisse.

§ 13.

Indicium etiam sit ex epithetis, aduerbiis, aliisque determinationibus, modum rerum et naturam exprimentibus: vt, cum Iesus dicitur *filius Dei* ἰδιος, μονογενής, quia ea verba non dicuntur nisi proprie, sequitur et filium sic dici: v) at fideles dici tropice *filios Dei* et *generatos a Deo*, patet, quod dicuntur *generati per λόγον ἀληθείας*, *filii facti per filium*, Gal. 3, 26. denique alibi υἱοθεσία iis tribuitur.

v) Loca hac et superiori §. prolata ad rationem tropicam facile reuocari posse, iam supra vidimus. Μονογενής, γηγι de se et vita sua, ηγηγι, quae est Homeri φίλον ἦτορ, saepius adhibet Dauides.

§ 14.

Interdum etiam contextus prodest ad iudicandum. Nam cum est allegoricus totus, in singulis partibus, aliquam cum vniuersa allegoria coniunctionem habentibus, agnosci tropus debet, vt in verbo πυρός, 1. Cor. 3, 13. quod manifeste refertur ad ξύλα et χόρτον. Itemque cum oratio praecessit ex eodem genere propria, ab eaque manifeste transitus factus est ad allegoriam, vt Io. 6, 27. 33. 35. 51. quod secus est, vbi nil tale praecessit: idque agnouit ipse *Zwinglius*, nec ex eo se potuit expedire. Vid. *Chemnitius*



tius in Annotat. hist. ad *Fundamenta S. Coenae*, §. 14. Et haec de discernendis propriis et tropicis.

## § 15.

Intelligentia autem tropicorum duos fontes habet: quorum alter est in rebus ipsis, alter in usu loquendi. Ex rebus intellectus ducitur, cum nituntur perspicua similitudine, quae sit in promptu, ut *Φωτισμός*: ex usu autem loquendi, primum cognoscenda universa consuetudine linguae hebraicae in tropicis verbis, ut *ζωῆς, θανάτου, x) τιμῆς, δόξης* etc. itemque graecae; deinde per comparisonem locorum, y) in quibus eadem res proprio verbo exprimitur, aut in quibus idem verbum est in contextu eiusmodi, ut sensus sit in promptu: quo pertinet etiam analogia linguae in coniugatis et similibus verbis: cuius exemplum mox ponemus.

x) *Mors, calamitas*, inde ἀποθνήσκειν, poenas minari.

y) V. c. Gal. III, 27. Χριστὸν ἐνδύσασθαι comparatur cum Rom. XIII, 14. ubi ex oppositione patet, sensum esse, *virtute Christo dignum fieri*.

## § 16.

In ea re autem nihil magis cauendum est, quam ne ex etymologia tropos iudicemus, quae est fallacissima ratio: ut in verbo  
Paullino

Paullino ὁρθοτομεῖν, (2. Tim. II, 15.) qui etymologiam secuti sunt, distinctionem legis et Euangelii commenti sunt; quod est nugatorium. Nam λόγος ἀληθείας est Euangelium ipsum: nec de lege hic cogitari potest. Analogia linguae docere poterat, id esse rectum Euangelii sensum tenere et aliis tradere, ut accepere veteres, et e recentioribus Gerhardus, quod coniugatum ὁρθοτομία antiquis dicitur pro ὁρθοδοξία, ap. *Clementem Alex.*, *Eusebium*, et alios (v. *Valles.* ad *Euseb.* Hist. Eccl. IV, 3.) et καινοτομεῖν novas opiniones de religione suscipere et spargere.

§ 17.

Nota porro tropicae orationis utcumque intellectae est, si possis verba propria tropicis substituere. Non statim recte intelligit, qui hoc potest: at certe non intelligit, qui non potest. Scriptores sacri ipsi interdum tropicis verbis subiungunt propria, quae interpretentur tropica, ut *Col.* 2, 7. idemque saepe faciunt optimi quique Graeci et Latini scriptores. Proderit etiam videre, an, sublata imagine, quam tropicum verbum proprie habet, et quasi e mente et cogitatione semota, aliquid ideae remaneat in animo, quae sit ab imagine illa diuersa, quamque possis verbo proprio exprimere. Idque faciendum imprimis tum, cum tropi  
sen-

sensibilium rerum verba ad intelligibiles transferunt, vt θάνατος, ζωή, διαθήκη etc. in quo genere facile est decipi <sup>z</sup>).

z) Qui v. c. I. Ioh. I, 7. in verbis αἷμα Ἰησοῦ Χριστοῦ, sublato sanguine, nullam superstitem habet notionem, locum certe non intelligit. Qui sensum reperturus est, substituet vocabulum proprium, *mors* Iesu Christi.

### § 18.

Et quoniam in libris sacris frequentes sunt *allegoriae*, in quibus ipsis tropica est oratio, harum bene interpretandarum ratio est tradenda <sup>a</sup>). Est igitur primum omnium consilium allegoriae vniuersae indagandum, quod facillime reperitur tum, cum ea inseritur orationi, ex qua consilium intelligi potest. Quamquam plerumque etiam discrete declaratur.

a) Vid. supra S. I. c. I. §. 9. not. et *Morus* Diss. de causis, quibus allego-  
rariarum interpretatio nititur, in Opp. t. I. pag. 370.

### § 18.

Hoc igitur cognito, videndum est, quod sit verbum primum, eiusque vis quo verbo proprio exprimi possit. Ad eius porro sensum caetera eiusdem verba tropica omnia referenda et ei conuenienter explicanda. Ita et facilius erit explicatio singulorum,

lorum, et errores caueamus. Velut 1. Cor. 5, 6. s. e contextu patet consilium esse allegoricae cohortationis, ut Corinthii puri sint ab vitiis et inde natis peccatis: ζύμη ergo est vitium quodlibet, ἄζυμος purus a vitiis, qualis esse debet verus Christianus. Ἐορτάζεσθαι igitur non est diem festum celebrare; haec enim est propria significatio, cum requiratur tropica; sed Deo seruire, Deum colere, Christianum esse, ita scilicet, ut ab omnibus pristinis vitiis puri simus et eum vera sanctitate colamus: nisi quis malit simpliciter *viuere*. Est autem non consentaneum, alias partes proprie, alias tropice in allegoria interpretari, ut faciunt, qui 1. Cor. 3, 15. verbum πυρὸς vnum proprie capiunt, cum caetera sint omnia tropica ducta ab aedificandi ratione: (cf. §. 14.) quod ibi etiam est durius, cum in verbis ὡς διὰ πυρὸς particula ὡς perspicuum tropi indicium faciat <sup>b</sup>).

b) Totus locus 1. Cor. III, 9—16. exempli loco adhiberi potest ad interpretationem allegoricam recte instituendam.

## § 20.

Nec dissimilis ratio est interpretandarum *Parabolarum*, in quibus ipsis est plerumque mera allegoria <sup>c</sup>). Est autem videndum imprimis, ne omnes partes parabolicae nar-

narrationis nimis vrgeamus, et ad consilium vniuersum referamus singulas, easque argutius explicemus, vt omnes sint ad consilium vniuersum accommodatae, quod est vitium interpretum, vt magnum, ita vulgatissimum. Itaque non quaeremus, quid *Luc.* 15, 11. s. significant *σήλη, μόσχος, δακτύλιος* etc. Nam eae fere adsumtae sunt in vniuersum quidem necessario, ac singulae libere, vt narratio quaedam integra fieret, et esset ad consuetudinem vitae humanae aptior: quod etiam humanis talibus narrationibus, apologis, consuetudo fert.

c) Est enim parabola ipsa nihil, quam allegoria historica, in qua praeter consilium scriptoris explorandum etiam de hoc videndum est, ne imagines ultra punctum comparisonis extendantur. Conf. *Storr* commentatio hermeneutica de parabolis Christi, *Tubingae* 1788. cum *Ewaldi* et *Krummackeri* libellis de eodem argumento theodisce scriptis.



succi exprimi potest, et inde fingunt, quorum nihil viris sanctis in mentem venit. Fingunt etiam Canones de emphasibus, nulla ratione reddita e natura rerum et verborum, aut vsu loquendi. Atque haec fiunt maxime in lingua hebraica, et formis loquendi in N. T. quae ex hebraismo ductae sunt, propter dissimilitudinem earum ab linguis occidentalibus, imprimisque vernacula cuiusque.

d) Pertinet ad doctores veteris ecclesiae graecos et latinos, qui propter imperitiam linguae saepius hallucinati sunt. Sed idem etiam accidit auctoribus recentioribus, v. g. *Lütkenio* in Collegio emphasiologico, et aliis.

### § 3.

Quo magis opus est certis praeceptis, quae ducta sint e natura sermonis humani et rerum natura, vt de emphasibus recte iudicare possimus, ne emphases aut veras non videamus, aut fictas persequamur, quod, vt *Erasmus* (ad 1 Cor. 7, 1.) bene ait, in concionando, h. e. in hortando, consolando, ferri potest: quamquam ibi quoque vera omnia esse malim, nihil commentitii, quo nec opus est: in seria disputatione nullo modo <sup>e</sup>): estque profecto nihil aliud, quam in re sancta et seria ludere.

e) In orationibus sacris Ioh. XIX, 24. et Dan. XII,

XII, 2. de resurrectione mortuorum, ἐμφαιτικῶς explicari, intermixtis hinc inde hymnorum ecclesiasticorum fragmentis, nemo facile aegre tulerit. E dictorum probantium numero autem eiusmodi loca iure meritoque eximuntur.

§ 4.

Et vulgares quidem canones, qui iubent cauere, ne vel emphases fictas probemus, vel veras repudiemus, etsi veri sunt, tamen non sunt proprie canones, nec villo modo dirigere mentem in iudicio possunt. Et nemo est, qui se fingere emphases putet. Sed sunt et alia non satis acute de emphasibus praecepta, quae refellere non est necesse.

§ 5.

Ac primum illud clarum est, in rebus subtiliter explicandis, in tradendis perspicue praeceptis doctrinae, in legibus, narrationibus rerum gestarum simplicibus, emphases vix locum habere. Est enim in iis tropus et figura orationis, quod genus, praesertim quod efficacius sit, ab illo genere orationis abhorrere, antea ostensum est, C. IV. §. 10. et defendunt omnes <sup>f)</sup>).

f) Emphases tantum locum habent in oratione, qua grauitur adhortari, admonere, castigare, polliceri, minari, obiurgare, refellere, terrere, consolari,



admirari volumus. Oratio sine emphasibus ieiuna est et vix ferenda.

## § 6.

Est porro cauendum hoc, ne in verbo ipso et eius vel propria vel tropica significatione emphasin quaeramus <sup>g)</sup>, propterea, quod supra demonstratum est, nullum verbum, neque proprium, neque tropicum, per se habere emphasin, sed in ea esse accessionem ad ordinariam significationem extrinsecus adiunctam. v. Sect. I. c. 2. §. 15. 16. 20.

g) Hoc vitium commisit Beza ad Matth. V, 5. ubi voluit, κληρονομεῖν esse, *beatitatem seu hereditatem accipere*: sed hebr. וְשָׂרָה denotat tantum possessionem certam.

## § 7.

Nec adeo quaerenda est ex etymologia verbi, quae ne proprium quidem sensum facile docet, ut supra dictum, aut, quod eodem redit, in tropicis, e propria verbi significatione, ut fit v. c. in verbo ἐρευνᾶν <sup>h)</sup>. Nam in eo tropice dicto per se non esse emphasin, indicantem aliquam contentionem et diligentiam quaerendi, patet ex eo, quod et spiritus s. dicitur ἐρευνᾶν τὰ βάθη τῆς θεότητος, a quo illa emphasis est alienissima. Itaque Veteres in eo ipso loco permu-  
tant

tant cum γινώσκειν, v. infr. P. II. c. 5. §. 23.  
In vtroque genere frequenter peccatur.

h) Sic v. c. *Chrysostomus* σχολάζειν I. Cor. VII, 5. explicat: ita ieiunare, vt ab omnibus negotiis sumus liberi. Sed σχολή non semper est otium a negotiis, sed tantum a negotiis cum curis et labore coniunctis. Vid. *Ammonius* pag. 255. Σχολάζειν itaque h. l. est, operam dare adfiduam.

### § 8.

In Graecis porro verbis videndum primo, ne accessionem aliquam significationis ad vim verbi simplicis necessario fieri putemus a praepositionibus, praesertim ἀνά, ἀπό, πρό, σύν, ἐκ, περί, vt in ἀνασταυρῆν, ἀνανήθειν, συμμαρτυρεῖν, προγινώσκειν etc. et in iis argutemur, quod est plerisque solenne, fitque saepissime alieno loco; cum satis-vsu et obseruatione constet, eas praepositiones non semper significationem simplicis mutare, immo vero saepissime redundare,<sup>1)</sup> in primis apud *Polybium*. Itaque consuetudo loquendi consulenda.

i) V. c. ἀνασταυροῦν Ebr. VI, 6. simpliciter est cruci adfigere, 2. Tim. II, 26. ἀνανήθειν, vigilare. Idem utinam semper obseruatum fuisset in verbis προορίζειν, προγινώσκειν, Eph. I, 5. Vid. *Ernesti* ad Hom. II. I, 3.

### § 9.

## § 9.

Illa deinde cautio est, ne a numeris emphasin temere ducamus, existimemusque pluralem pro singulari positum talem aliquam vim, singulari maiorem habere; quae opinio nullum fundamentum habet in consuetudine loquendi hebraica, aut graeca. In quo Origenem bene notat noster *Melanchthon* (T. II. Opp. p. 130.): *inepte*, inquit, *Origenes distinguit ἑρᾶνον et ἑρᾶνός*, in quo genere idem peccavit in *οὐκ ἰσχυροῖς*, *Rom. 12, 1.* multis etiam nunc stulte sequacibus, in illo quidem, *Bengelio*.

## § 10.

Nec minus cauendum, ne abstracti pro concreto positi talem aliquam vim putemus, quam legem etiam doctissimi viri, ut *Glasius* p. m. 594. et post hunc alii, male probarunt <sup>1)</sup>, nulla ratione reddita, aut origine et causa istius emphaseos demonstrata, quod est optantis potius, quam bene et perspicue docentis. Abstractorum quidem usurpandorum causae sunt vel necessitatis, vel perspicuitatis, non emphaseos. v. Sect. I. c. 3. §. 24. 25. In libris autem sacris necessitas fere ex hebraismo obtinet. Origo erroris est ex insolentia rei in lingua latina et vernacula. Sed dissimilitudo linguarum non statim facit emphasin. Caeterum clara  
res

res est vel ex eo, quod in iisdem formis abstracta et concreta permutantur, vt *Col.* 1, 13. coll. *Matth.* 5. *extr. Eph.* 5, 8. coll. 4, 18. etc.

1) Vid. nunc b. *Datbe* h. I.

### § 11.

In sacris imprimis libris et hebraïsmis cauendum, ne dissimilitudine modorum loquendi ab nostra lingua ad emphasin quaerendam aut comminiscendam impellamur, quo nimis inclinant plerorumque animi, etiam hebraice doctorum. Sed eo nihil est fallacius. In orientalibus linguis multa videntur etiam hyperbolica, si ad verbum, h. e. e Lexicis vulgaribus, et etymologice verantur, cum sint nihil minus. In illo v. c. *Threnorum*: *tribulatio mea magna sicut mare*, scriptor nil aliud cogitabat, quam quod latine scribens dixisset, *mala mea sunt maxima* <sup>m</sup>).

m) Adde *הר אלהים*, *ἄνεργος θεοῦ*, aliasque formulas hebraicas, quae magis hyperbolicae sunt, quam emphaticae.

### § 12.

Si cuius vocis aut phraseos constantem emphasin (Sect. I. c. 2. §. 17.) esse, nullo diserto testimonio constet, vsus consulendus est

est sic, ut videamus, primo, an omnibus in locis ei emphasis conueniat, deinde an ei substituatur in eodem aut simili contextu alia, quae adiunctam habeat significationem aliquam praecipuae magnitudinis. Nam si neutrum est, sed cum aliis, quae manifeste sine emphasi sunt, permutantur, aut aliis in locis magnitudinis significatio iis diserte addita est, emphasis agnosci non potest. Velut in ἀποκαταδοκίας verbo, *Rom.* 8, 19. non esse emphasin constantem, patet, quod ea ipsi non conuenit *Phil.* 1, 20. ubi etiam ut synonymum cum ἐλπίδι coniungitur, et apud τὰς ὁ, itemque illo ipso loco v. 21. cum hac permutatur <sup>n</sup>). Nec emphasis talis agnosci potest in phrasibus, quae sunt e coniugatis, ut χαρὰν χαίρειν etc. quod eae saepe reperiuntur cum diserta magnitudinis significatione, ut *Matth.* 2, 10. quod erat superuacuum, si eae per se emphasin magnitudinis alicuius haberent.

n) Ἀποκαταδοχεῖν est capite attendere, et vsurpatur de nautis et militibus, qui capite in obliquum verso attendunt ad signum, quomodo nauis sit remis appellenda. Sed emphasin vocabulo non inesse monstrat, 1) hebr. נִרְדּוּ, quodd LXX. per ἐλπίς, εὐδοκία, et ἀποκαταδοκία vertunt, 2) contextus v. 21. ubi synonymum est vocis ἐπ' ἐλπίδι. Vid. Naesseltus *Commentat. in Opp. Fasc. I. p. 115. sqq.* et Kopp's epist. ad Romanos ed. 2. ad h. l.

§ 13.

Emphases temporariae ab effectu loquentis, aut alia causa, agnoscuntur hac nota, si ordinaria verbi significatio est longe inferior manifesta affectus magnitudine, aut re ipsa °). Nam ita, sine emphasi, frigida foret oratio: quod est a scriptoribus diuinis alienissimum.

o) Exemplum est Matth. IX, 24. vbi καθεύδεις est, *obdormiuit somnum mortis*, id quod contextus prodit.

§ 14.

Caeteras item agnoscimus ex eo, si verbi aut phraeos vsitata vis sensum frigidum aut ineptum efficit, cum aptus contra fiat rei, si aliqua adiunctio alicuius qualitatibus in utramque partem aut magnitudinis intelligatur. Nam in tali loco quaedam necessitas emphaseos intelligitur, in qua est signum veritatis certissimum. Veluti 1. Cor. 4, 3. 4. ἀνανήveis semper est in emphasi. Nam primum ἀνανήveis est, iudicio alicuius probari, deinde ἀνανήveis est sibi ius iudicandi, probandi sumere, tertio ius iudicandi habere, seu recte iudicare posse. Ita si simpliciter intelligas *iudicare*, sensus frigidus, nec contextui vniuerso aptus existit. Similiter πῶς cum emphasi constantiae, magnitudinis, vbertatis fructuum dici Col. 1, 4.

1, 4. res et contextus indicat. Nec enim opus erat Paulo, fama cognoscere de fide Colossensium simpliciter, quam ipse coram cognorat, cum Ecclesiam illam fundaret. Item *Rom.* 1, 8. ubi fidei, sine magnitudinis sensu, non conueniret illa laudis magnitudo, quod ea vbique celebretur. Sic et *Matth.* 4, 2. ἐπείνασε est, vehementius et intolerabilius esuriebat.

## § 15.

In quo tamen non negligendus est vsus loquendi, sed hactenus saltem consulendus, vt nihil sit in illa emphasi, quod ei repugnet. Vt in illo fert hoc vsus s. analogia linguarum omnium, vt *iudicium* simpliciter in alterutram partem dici possit. Nam Latini quidem *iudicium facere de aliquo*, et de honore et de contumelia dicunt.

---

## CAP. VI.

*De Compositione 'Εὐαγγελιῶνων.*

## § 1.

Si euidenter demonstrari posset, loca duo librorum diuinorum inter se ita pugnare, vt conciliandi ratio nulla relinqueretur, confitendum esset necessario, alterutrum in libris vulgatis mendosum esse, et de emendatione legitima cogitandum <sup>p</sup>). v. Sect. I. c. 1. §. 23. De quo genere fortasse est locus *Io.* 19, 14. coll. *Matth.* 29, 9. et *Marc.* 15, 25. item, vt permultis videtur, *Luc.* 3, 36. coll. *Gen.* 10, 24. mihi non liquet.

p) Dubitare licebit Critico de praecepti huius veritate. Repugnantiae enim in numero, vel nomine nondum tollunt diuinam originem librorum sacrorum, quorum auctores homines fuere, et memoria labi poterant, v. c. *Marcus* II, 26. *ἐν τῷ Ἀβιάδαρ* coll. *I. Sam.* XXI, 2, vbi *אחיהלך* adpellatur sacerdos Nobensis. Neque etiam apertae et maioris momenti repugnantiae, v. c. duplex genealogia Iesu in Matthaeo et Luca, legitime semper emendari possunt, sed idonea interpretatione componendae sunt. Vid. b. *Michaelis* ad h. l.

## § 2.



## § 2.

Quod si ita constet de integritate lectionis vtriusque, ut in dubium vocari non possit, intelligitur speciem esse meram repugnantiae, quae debeat idonea ratione tolli, ut ea loca commoda interpretatione ad consensum reuocentur <sup>pp</sup>).

pp) In libris sacris N. T. multa obuenire *ἐναντιώματα*, siue chronologica et historica, siue dogmatica et didactica, iam dubitatione caret. Ad primam classem referenda erunt loca Matth. I, 18—25. coll. Luc. II, 1—7. Matth. II, 13—23. coll. Luc. II, 21—40. Matth. IV, 1—8. coll. Ioh. I, 35—II, 11. Matth. XXIII, 35. coll. diss. nostra in h. l. in nouis opusc. theol. Gotting. 1803. Matth. XXVIII, 16 ff. coll. Act. I, 1—8. Praeterimus silentio c. VII. actuum apostolorum, anachronismis plenum, et loca epistolarum Pauli bene multa, quae cum actibus apostolorum vix componi queant. Ad alteram classem pertinent Ioh. I, 1. coll. cum Col. I, 15. (conf. Iuliani imperatoris hac de re iudicium apud Cyrillum Alexandrinum ed. Auberti t. VI. p. 327.) Rom. IV, 9. coll. Iacob. II, 21. cet. Falluntur itaque misere interpretes, qui hisce multisque aliis repugnantibus observationibus grammaticis, siue calumniis potius exgeticis mederi student, ut suas de inspiratione auctorum sacrorum hypotheses stabiliant. Qua enim quaeso fide dignus existimari debet *ἐρμηνευτής*, qui genuinum sensum scripturae indagare veretur, hoc est, qui veritatem offendit, ut commenta sustineat, vel defendat! Patet itaque, in hermeneutice N. T. nostris diebus

diebus accommodata non de specie Ἐναντιοφανῶν agi debere, sed de repugnantibus in vniuersum.

§ 3.

Repugnantiae autem species existit in locis vel dogmaticis vel historicis. Pugnare porro videntur interdum scriptores N. T. secummetipsis, interdum cum aliis vel N. vel V. T. scriptoribus <sup>q)</sup>. Vnde multiplex genus scriptorum, qui in componendis locis, dissensus speciem habentibus, laborarunt, aliis certum genus, aliis omnia complexis. Catalogus talium scriptorum *le Long*, *Pfaffius* et *Fabricius* dedere. Nos, pro instituto nostro, N. T. finibus nos continebimus.

q) Interdum etiam cum auctoribus profanis, v. c. *Lucas* II, 2. qui Iosepho aliisque historicis aperte contradicit. Certum enim est, Cyrenium tum, quum Christus nasceretur, nondum fuisse praesidem Syriae. Functus est hoc munere tum temporis Sentius Saturninus: Saturnino autem Quinctilius Varus successit et huic denique Sulpit. Quirinus. Census autem a Quirino institutus cadit in annum LI. vel LII. periodi Iulianae, cuius celeberrima erat memoria Act. V, 37. Vid. *Rosenmüller* ad h. l. et *Papst*, qui et ipse nouam explicationem tentaturus erat, Hist. eccles. T. I. p. 104. not. Simile mendum inuenieris Luc. III, 1. et Act. XVI, 12.

§ 4.

## § 4.

In locis dogmaticis τὸ ἐναντιοφάνες, quod interpretando tolli debeat, existere solet maxime ex alterius modo loquendi non ad ἀκριβείαν dogmaticam subtiliter facto, aut ingenio linguae orientalis nimis ab occidentalium linguarum ingenio abhorrente <sup>1)</sup>. Nam repugnantia dogmatum perspicue traditorum, quae doctrinae Christianae obiicitur ab impiis et profanis hominibus, velut a Iuliano apud Cyrillum, quod, cum vnus Deus diserte tradatur, *Matth. ult.* tribus diuinitas tribuatur, a Theologis, rebus potius ipsis explicandis, quam interpretandis verbis, tollitur.

1) Aut ex errore interpretum, v. c. Hebr. XII, 2. vbi μετάνοια est irrevocabilis benedictio Iacobi.

## § 5.

In historicis autem oritur primum e diverso in eadem re narranda consilio ac modo, vt saepe in Euangelis. Nam diuersitas consilii variat delectum περιστάσεων, et quaedam περιστάσεις ipsae vi ad cognoscendum nil differunt, possuntque vel permutteri, vel omitti: et interdum nihil refert, vtrum genere an specie exprimantur <sup>2)</sup>. Ex quibus omnibus facile species dissensus nascitur.

2) Sic

s) Sic v. c. Matthaeus, ostensurus, Iesum fuisse verum Messiam a Deo promissum, ad suum consilium adhibet crebram miraculorum enarrationem: Iohannes contra multa tradit a reliquis praeterita, et isprimis sermones Christi maiori copia literis mandat. Interdum etiam corrigit antecessores, v. c. Lucam, qui Simonem Cyrenaeum crucem Christi portauisse refert, quum ipse per αὐτοψίαν melius scire posset, Iesum eam portauisse. Vid. Mori defensio narrationum N. T. in Opp. p. 23. sqq.

### § 6.

Sed longe etiam saepius suspicionem dissensus iniicit modus loquendi, rerum diuersitatem prae se ferens, cum sit modo verborum. Etenim satis constat, scriptores etiam optimos ac diligentissimos, in nominibus rerum, personarum, locorum, in numeris, in tempore definiendo, omninoque in attributis rerum, non eandem semper aut rationem aut ἀκριβείαν adhibere, nec in eo peccati alicuius reos argui aut solere aut posse <sup>γ</sup>). Itaque e pluribus eiusdem subiecti nominibus varie deligunt unum, sequunturque modum nominandi, temporis, loci, numeri definiendi mox crassiolem, mox subtiliorem, in terminis temporum constituendis variant, genus pro specie et contra, speciemque pro indiuiduo exprimunt. Quorum omnium exempla, vt in aliis historicis, ita in Euangeliorum scriptoribus occurrunt.

c) Ex-

c) Exemplum memorabilis hanc ob causam repugnantiae adparentis monstrat *Ernesti* ad Mem. Socr. L. III. c. V, §. I. coll. cum *Drakenborchii* nota ad Lit. L. XXXIX. c. 49. Aliud *ἐναντιοφάνες* vide in *B. Michaelis* Adnot. ad Ioh. VII, 8. siue Gal. II, I. f. coll. Act. IX, 26. XI, 30. et XV, 2. Paulum enim in epistola de postremo itinere Hierosolymitano, quod tertium fuisse putatur, verba facere, Gal. 1, 9. docere videtur. Potest tamen in hac narratione magis verborum esse diuersitas, quam rerum: Act. XI, 30. enim de itinere Pauli tantum Palaestinenſi, non Hierosolymitano agit. Quae monemus, non controuersiae causa, sed vt libere profiteamur sententiam, repugnantias epistolarum Pauli historicas cum actibus apostolorum componi vix posse, nisi fontes huius libri aperiantur, de quibus alio loco differemus.

§ 7.

Haec igitur consuetudo et narrandi et loquendi diligenter cognoscenda, vel vsu nostro, legendis historicis graecis et latinis, vel ex observationibus peritorum <sup>u)</sup>, vt *Perizonii* in *Animaduers. hist.* et aliis libris, *Dukeri* ad Liv. *Wesselingii* ad Herodotum et Diodorum, quo sit illa in promptu, et tempore necessario nobis opportune succurrat, atque ad componenda loca, quae dissentire videantur, conferri possit. Etenim non est dubitandum, quin difficultas tamen dissensus componendi plerumque ex ignorantia istius consuetudinis oriatur.

u) Po-

u) Potissimum Xenophonte, Polybio, Liviō Tacito.

§ 8.

Modus autem compositionis tentandae ac quaerendae in locis primum dogmaticis hic est, ut obscurior, h. e. in quo sit genus dicendi, quod vel ambiguam interpretationem habere videatur, vel habeat aliquid insolentiae, conformetur interpretando ad clariorem, qui omnem ambiguitatem et dubitationem excludat<sup>v)</sup>: item, ut, in quo obiter dogma attingatur, cuius rei facile iudicium est, explicetur ex eo, qui est in eo argumento classicus. In quo tamen hoc tenendum, ut causam ἐναντιοφάνειας, explicando usu loquendi, aperire et tollere tentemus, ut omnis obloquendi aut dubitandi occasio praecidatur: propterea, quod iure desiderari hoc potest, ut verba illum sensum, quem e clariori et classico loco assumimus, habere posse, et in usu loquendi habuisse, ostendamus.

v) Locus obscurior in dogmate de decreto absolute videtur Rom. IX, 18. ὃν θέλει, σκληρύνει, cui lux adfunditur alio clariori I. Sam. VI, 6. פָּרַעַה כִּבְרָ לֵבָו. Sic locus classicus de modo consequendae salutis est Ioh. III, 16. et Rom. III. quia hoc dogma ibi ex instituto explicatur.

K

§ 9.

## § 9.

Proderit etiam plurimum, tenere, multa in dogmaticis simpliciter et absolute dici, de consuetudine loquendi omnium linguarum, quae referenda sint ad certa principia; quae, quod nota essent vulgo de disciplina religionis, intelligique adeo in omnibus deberent, non commemoranda in omnibus videbantur. Veluti, cum in primis religionis principiis esset, salutem esse a fide, eaque nos Deo gratos et probatos fieri, non curabant id commemorare in omni officiorum commendatione, idque sua sponte intelligi putabant \*). Itaque interdum eleemosynas nos Deo gratos reddere et similia dicebant, sed volebant intelligi, si proficiscerentur ab iis, in quibus caput omnis gratiae divinae sperandae, h. e. fides esset. Ita facilius et componentur inter se talia, et compositio ratione reddenda probabilior fiet. Legent hic et considerabunt studiosi cum fructu initium et priora exempla responsionis ad obiectiones Pontificiorum in Apol. Aug. Conf. art. IV.

x) Si itaque a Iacobo beatitatem consequi possetur se dicimur per virtutes et bona opera, exinde non sequitur, excludi fidem, quae omnes virtutes frustratur sine illa exercitas, quia fides est religio Christiana ipsa.

## § 10.

§ 10.

In genere historico autem primum caue-  
bimus, ne res diuersae propter similitudi-  
nem pro iisdem habeantur, et hinc dissen-  
sus temere fingatur; quod etiam humano-  
rum scriptorum interpretibus accidit: neue  
contra, ob leuem narrationum diuersitatem,  
facta temere multiplicemus γ). In quo usus  
ex lectione aliorum historicorum, et obser-  
uationum, ab eorum interpretibus conge-  
starum, valde nos adiuuabit.

γ). Sic Matth. XXVII, 44. latrones maledixisse  
Iesu tradit, Lucas XXIII, 39. vnum tantum e latro-  
nibus. Prior itaque speciem posuerat pro indiuiduo:  
de duplici enim maledictione cogitari nequit. Conf.  
Matth. XXI, 12 — 27. cum Ioh. II, 12 — 22. et ad  
h. l. *Michaelis*.

§ 11.

In compositione porro ipsa tentanda,  
ante omnia videndum, vter locus ad alte-  
rum sit interpretatione accommodandus.  
Cuius rei certa debet esse lex, ne temere  
vagemur atque erremus. Norma igitur dis-  
sensus componendi erit in loco eo, cuius  
verba omni ambiguitate carent, suntque pla-  
nissima et ita determinata ad ἀκριβέως, vt  
nulla interpretatione ad alium accommo-  
dari possint. Accommodari autem ad alium  
debebit is, cuius verba habent manifestam

K 2

ambi-



ambiguitatem, aut sensum non constanter definitum. Velut *Act.* 7, 14. sunt LXXV, apud Moſen LXX. In illo nulla ambiguitas intelligi poteſt: at in hoc, ex eo, quod conſtat, plenas decadas et centurias poni conſuetudine loquendi vulgari pro non plenis, aut exceſſu omiſſo. Ergo Moſis numerus ad illum eſt conformandus ſic, vt Lucas numerum ſubtiliter, Moſes craſſe expreſſerit <sup>2</sup>). Hanc legem agnoſcit *Perizonius Origg. Aegypt. p. 410.*

2) *Act.* VII, 6. Deus ipſe dicit, Iſraelitas ſervire debere Aegypto *τετρακισία ἔτη*, quum tamen conſtet ex *Exod.* XII, 17. et *Gal.* III, 17. illos per 430 annos ibi commoratos eſſe, termino nimirum a promiſſione diuina Abrahamo facta conſtituto. Negari tamen nequit, ex hac explicatione alias emicare difficultates, quemadmodum *Koppe* docet ſingulari programmate et *Dindorf* in *Mori* commentario ad h. l. Quidni potius fatemur, chronologicas huius aevi rationes in vniuerſum ad liquidum nondum eſſe conſtitutas?

### § 12.

Caeterum haud abnuerim, verum eſſe, quod *Pfaffius* putabat (*Hiſtor. Lit. Theol. T. I. p. 140.*), vix fieri poſſe, vt v. c. *Harmonia Euangelica* condatur omnibus numeris perfecta: coniecturis interdum vtendum, tum in canonibus harmonicis, tum in iis ad rem quamque conferendis. In quo bene agitur,

agitur, quod id tantum ad historicas narrationes pertinet, in quibus aliquid ignorari, salua fidei integritate, potest, immo in quibus etiam ignorare potius aliquid velle, quam ingenium frustra torquere debemus \*).

a) Addimus haec: 1.) non omnia sibi repugnauerunt ex ingenio auctorum sacrorum et illorum temporum, quae nostro aeuo sibi conuenire minus videntur, 2.) discessionem et varietatem, praesertim in rebus historicis, deuitari non poterant, quia homines, non autem instrumenta machinis similia, fuerunt scriptores sacri, 3.) adeoque harmonia perfecta librorum historicorum V. et N. T. vix expectari potest, post inanes tam multorum virorum conatus. Vide *Michaelis Einleitung in die göttl. Schriften des N. B.* ed. 4. t. II. p. 877. *Marsh Anmerk. und Zusätze, deutsch von Rosenmüller, Gött. 1803. t. II. p. 5. ff.*

---

## P A R S   S E C U N D A.

## CAP. I.

*De Versionibus et Commentariis scribendis et iudicandis.*

## § 1.

Quoniam in interprete non modo debet esse subtilitas intelligendi, sed etiam bene intellecta explicandi, vel vertendo, vel commentando: de hac quoque praecipendum videtur.

## § 2.

Et eius quidem interpretationis, quae vertendo in aliam linguam cernitur, cum sit finis hic, ut sensus auctoris sine ulla aut detractione, aut adiunctione, aut immutatione denique, exprimatur, sitque versio quasi perfecta imago exempli archetypi, in qua nihil nec maius aut minus, nec melius aut deterius factum sit, sed quam archetypum possit alterum se agnoscere <sup>b)</sup>): efficitur, ut verbis omnibus utatur iis, quibus clare *omnes sensus* auctoris *eodem modo* referantur. Quae sunt explicanda distinctius.

b) Con-

b) Conseruetur itaque, quoad eius fieri potest, in Liuiio stili Patavinitas, in Iohanne dictionis simplicitas et breuitas, in Paulo verborum stribligo. Hanc autem virtutem in omnium ecclesiarum versionibus publicis adhuc desideres. Conf. *Morus* t. I. Opp. p. 83. sqq.

### § 3.

Primum igitur vt iidem sensus sint, diligenda sunt verba, quae *vi sua* plane respondeant iis, quae sunt in archetypo, et sint minime ambiguae, sed certae et perspicuae significationis apud eos, quibus versio paratur <sup>c</sup>). Ea cum suppetunt eiusmodi, quae verbis auctoris etiam etymologia, tro-po, figura, constructione conueniant, haud dubie praeferenda sunt. Sed in eo magna cautio est, vt etiam vsus linguae consentiat. Nam alias non fit versio, quae intelligi perspicue possit ab iis, qui verba auctoris nesciant, sed quaedam auctoris obscuratio, saepe et peruersio, cum homines aut verba versionis, v. c. latinae, e consuetudine linguae latinae, aut germanicae ex vsu Germanorum intelligant, quae debebant intelligi e consuetudine graeca aut hebraica, aut omnino non intelligant, cum etiam per consuetudinem audiendi et vsurpandi putent se intelligere: quo nihil est non modo apud populum, sed etiam apud ipsos populi doctores vsitatus <sup>cc</sup>).

c Ita-

c) Itaque non anxie et κατὰ πόδα, vt Valla fecit in Homero, Reiske in Demosthene. Male itaque vertitur in N. T. βίβλος γενέσεως, liber generationis, pro, genealogiae: πατήρ ἡμῶν, Vater unfer, [pro, Du, unfer Vater: male in Homero μέτρον θαλάσσης, mensura maris.

cc) Exemplo sit locus Matth. VIII, 20. ὁ υἱὸς τοῦ ἀνθρώπου οὐκ ἔχει, ποῦ τὴν κεφαλὴν κλίνῃ. B. Bolten (Bericht des Matth. Altona 1792.) vertit: „ein Anderer hat keine Stelle, wo sein Haupt ruhen könnte.“ Contulerat enim v. υἱὸς ἀνθρώπου cum Syr.

ܐܢܫܐ, hoc autem idem esse cum v. ܐܢܫܐ contenderat, qua in re errauit vir alias syriace doctus. Vid. not. eius ad Matth. V, 19. Plura huius saraginis occurrunt in tota N. T. versione Bolteniana.

## § 4.

Quod si ea facultas non datur, quae sane datur non nimis saepe, propter dissensum linguarum, quae res easdem diuersis saepe verbis, nec sibi etymologia et propria significatione respondentibus, exprimunt, in primis orientalium et occidentalium, quae saepe ita de eadem re loquuntur, vt, si hebraica ad verbum s. etymologice, secundum Lexica vulgaria, veritas, longe aliud de consuetudine latina aut germanica existat: relinquemus illam similitudinem in vertendo, et satis habebimus, expressisse sensum archetypi verbis quibuscunque, modo idem significant ex indole linguae <sup>d</sup>).

d) Com-

d) Commutentur itaque idiotismi cum aliis verbis eandem rem exprimentibus, v. c. ὁρισθέντος νόμου Θεοῦ Rom. I, 4. declarati filii Dei, ex Act. XVII, 31. τέκνα ὀργῆς, homines poena digni, τέκνα σοφίας, discipuli, cultores sapientiae. Aliud exemplum, quo periclitari queas iudicii dexteritatem, vides in *Stolaei* versione theodisca N. T. ad Col. I, 15. ff.

### § 5.

Sed quoniam hoc, nisi qui utramque linguam accurate calleat, praestare non potest; intelligitur, hoc genus interpretandi attingere in N. T. libris non debere, nisi qui sit trium linguarum, hebraicae, bene graecae, denique eius, qua vsurus est in vertendo, v. c. latinae, non ad puerilem et vulgarem modum, sed bene penitus peritus<sup>e</sup>), non modo ut omnia recte intelligere, sed etiam, ut quid cuique linguae proprium sit iudicare, et pro suae linguae modo exprimere possit.

e) Ita nimirum, ut ingentium linguae, quod sine multo acumine vix cognoscitur, familiare sibi reddat. Peccant autem hoc loco inprimis feruida ingenia, quae propter lectionis statariae taedium totas statim auctorum sectiones peruolant, scilicet ut sensum scriptoris vniuersalem capiant, qua in re haud raro suauiter decipiuntur. Vide *Bahratii* vers. N. T.

### § 6.

Sed ab illa lege (§. 4.) interdum recedere

re cogit res et necessitas, eaque multiplex. Prima est, cum forma modusque verborum graecorum habet cum rebus ipsis, cum genere argumentandi, eam coniunctionem, ut illae intelligi, hoc consistere et recte procedere non possit, nisi ab ea discedatur, fiatque versio verborum ad etymologiam, neglecta linguae eius qua utimur, lege,<sup>f)</sup> quod frequens est in demonstrationibus Paulinis, v. g. 2. *Cor.* 3. in verbis *γράμματος* et *πνεύματος*, item *δόξης*: adde *Gal.* 5, 16. item in allegoriis, ut *Io.* 10.

f) Sic verba Iohannea, *λόγος*, *φῶς*, *ζωή*, *κόσμος*, quibus, nisi Sabiorum, Gnosticorum tamen doctrina impugnatur, in ipsa versione retinenda sunt. Has voces tollendo in versione valde peccauerunt *Bahrdt* et alii. Conf. *Ziegler* in nouae versionis vernac. *Prouerb. Salom.* Lips. 1791. praef. p. VI.

### § 7.

Secundam afferunt acumina antithetorum, *πλοκῆς*, ut *Matth.* 8, 22. *Io.* 1, 10. *παρωνομασίας*, *Phil.* 3, 2. 3. similibusque figurarum;<sup>g)</sup> quibus sublatis, tollitur orationis gratia et venustas: cuius generis rursus multa habet idem Paulus. Sed tamen et hae figurae non semper seruari possunt: nam lingua altera eas interdum non capit.<sup>h)</sup>

g) V. c. *ἀντανάγκη* Rom. III, 27. In his omnibus

omnibus conseruetur idem vocabulum propter vim oppositionis.

h) V. c. Ioh. III, 6. 8. vbi πνεῦμα primum est ventus, deinde spiritus. Adde Matth. XVI, 18. Πέτρος et πέτρα, quae paronomasia ex Palaestinensi idiomate profecta in Graecis et Latinis retineri poterat, in Teutonicis euanescit.

### § 8.

Tertium genus talis necessitatis adferunt verba ea, quibus nullum in altera lingua ita respondet, vt sensum eorum satis et sine ambiguitate exprimat: quale est interdum verbum ζῶνς, hebraice dictum, et alia:¹) vt bene monet *Rich. Simon Hist. Crit. Vers. p. 280.*

i) Potissimum verba doctrinalia, v. c. πίσις, μετάνοια. Idem animaduertit *Erasmus*, qui verbo *Ioanne* substituit sermonem, et *Seb. Castellio*, qui in secunda editione versionis N. T. latinae pro lotionē baptismum, pro genio angelum, pro republica ecclesiam reposuit. Notum autem est, quantas turbas hac re excitauerint, quot conuiciorum plaustra solus *Beza* in eos congefferit.

### § 9.

Quarta est in locis δυσνόητοις et obscuris,¹) vbi certa interpretatio vix datur, sed plures sunt interpretationes, quae aliquam ac prope parem speciem habent. Nam in his bene latine aut germanice vertere, id est sibi ius decernendi arrogare; quod in Commentario forte



forte feratur, in versione nullo modo. Bene *Castellio* ad 1. *Pet.* 4, 6. *Haec non intelligo, itaque ad verbum verti.*

1) H. e. plane obscuris et inextricabilibus, quorum numerus tamen interpretum diligentia et sagacitate in dies minuitur. Adde locum *Gal.* III, 20. interpretum naufragiis vel ex *Wolffii*, *Bonitzii* et *Zeuneri* catalogis notum atque insignem. *Lutherus* certe sensum non adsecutus est, vertendo *ein Mittler*: Paulus enim, obscure licet et per parenthesin, nil nisi hoc voluisse videtur, internuntium vnius legis non esse, sed plures (*Act.* VII, 25-35.), Deum autem esse vnum et vnicum.

### § 10.

Haec tenenti facile erit et in vertendo recte versari, siquidem sit in vertendo bene exercitatus disciplina boni magistri, et de versionibus iudicare, vtrum in conseruanda puritate sermonis, an in negligenda, et forma orationis ἀρετὴν retinenda modum excedant: quod iudicium temere sibi arrogat, qui non ipsi linguarum et idiomatum cuiusque sunt periti. Caeterum, cum versiones fiant non eruditis, qui ipsi intelligere auctorum orationem possint, sed aliis, imprimisque populo, tolerabilius est, ab his legibus recedere in hanc partem, vt sensus verborum in promptu sit, etsi necesse non erat, deferere formam phraseos auctoris. Bene *Hieronymus* in epist. ad *Pammachium*, de optimo genere interpretandi pag. m. 994. *alii syllabas*

*tabas accupentur et literas: tu quaere sententias.* Sed totus ille locus legatur.<sup>m)</sup>

m) Sensus bonae versionis optime formatur exercitatione et usu translationum idonearum auctorum profanorum, v. c. *Luciani* et *Homeri* ex conuersione *Wielandii* et *Vossii* prima. Vid. *Lutheri opp.* ed. Hal. t. XXII. p. 5. ff.

### § 11.

Sed cum praecepta illa sint eiusmodi, ut nemiſe non imperito penitus improbentur, aut recte improbari possint: sunt enim euidentia et certa: fit tamen plerumque, ut, quae vniuerſe probentur, ea repudientur in exemplis et in iudicio versionum, in hanc maxime partem, ut, ubi puritas recte conſeruari poteſt, ac conſeruari debet, tamen repudietur et non feratur. *Caſtellio* quidem, etſi interdum puritatis conſeruandae ſtudio lapſus eſt, tamen etiam ubi bene rem geſſit, durius acceptus eſt, praefertim a *Beza*, aemulo ſuo et inimico, quam meruerat: nec id aliam magis ob cauſam factum, quam quod bene latine vertendo praedeſtinatio *Zuingliana* et connexae opiniones, ex etymologica illae verſione ortaе, euanuerant, ut ipſe *Beza* non obſcure indicauit. Omnino difficile eſt, ac potius ἀδύνατον, in vertendis libris ſacris omnibus ſatisfacere, hac maxime de cauſa, quod ſaepe opiniones hominum de rebus, et argumenta

menta opinionum, ex versione ad verbum facta pendent, recteque vertendo tolluntur: unde et illi *Emseri* adv. *Lutheri* versionem clamores, et *Stunicae* *Leique* aduersus *Erasmum*, vt alia exempla mittamus. Super his cum fructu legentur libri super *Erasmi*, ab *Stunica*, *Leo* et ipso scripti, *Lutheri* defensio versionis suae aduersus *Emserum*, denique *Castellionis* inprimis Defensio translationum suarum inprimis N. T.<sup>n</sup>)

n) Conf. *Panzer* in libro: Entwurf einer vollständigen Geschichte der deutschen Bibelübersetzung Martin Luthers von 1517 — 1581 mit Zusätzen. Nürnberg 1791. *Meyeri* Geschichte der Schrifterklärung seit der Wiederherstellung der Wissenschaften. Götting. 1803. t. II. p. 262. ff. De variis autem versionum inprimis theodiscarum generibus iudicare qui voluerit, is carere nequit praesclara *Griesbachii* commentatione: Veber die verschiedenen Arten deutscher Bibelübersetzungen, in Repertorio Lit. Bibl. et Orient. *Eichhorniano* T. VI. p. 262. sqq. Versione N. T. in vsum publicum confecta nostrisque temporibus admodum data in summa privatarum versionum adfluentia adhuc caremus: imo desideramus adhuc, si quid sentio, bonam et fidam N. T. conuersionem singulos scriptorum sacrorum characteres referentem, qua impofterum etiam vix ditabimur, nisi singuli viri eruditi singulos N. T. libros sibi transferendos sumserint. Certe miramur, in tanta virorum doctorum, quibus Germania nostra abundat, multitudine hucusque inuentum esse neminem, qui nouam curaret versionis Lutheri teutonicae editionem, hoc nimirum consilio, vt vitia eius cum orationis, tum sensus, quae

quae bene multa sunt, in notis emendarentur. Incurrit enim in oculos, versionem Lutheri, quae egregia erat seculo XVI<sup>mo</sup>, nostris temporibus non satisfacere iamque multis in locis noua interpretatione opus habere. Sed in rebus ecclesiasticis tanta est saepius inertia hominum, ut paratis frui malint, de futuris conuersionibus securi, dummodo dulces quietis sacrae fructus non intercipientur. Neque vnius viri opus est, quod desideramus.

§ 12.

Versionibus similes sunt *paraphrases*: in quibus ut minor est difficultas, quod sensum solum perspicue exprimere debent, ita aptiores sunt vlibus popularibus.<sup>o)</sup> Eae igitur, ut recte fiant, primo difficilia et ambigua debent circumscribendo, deinde res et notiones rerum, definitionibus et rationibus admiscendis explicare: denique nexum orationis apte exprimere. In quibus omnibus tamen breuitas adhibenda est, ne in Commentarii magnitudinem excedant: ut in plerisque factum videmus. Nec denique illa libertas recedendi a verbis textus per synonyma, periphrases, definitiones etc. debet ad licentiam trahi, ut id faciamus, ubi non erat opus, aut nostras notiones et opiniones immisceamus pro Apostolicis sensibus.

o) Vid. Herder *Briefe, das Studium der Theologie betr.* t. II. p. 350. Boni paraphraetae est, 1) notiones intermedias addere, 2) cuiusuis auctoris rationem habere, ita,

ita, ut v. c. multa addat in Iohanne et Paulo, pauca in Matthæo et Luca. Docet tamen vel *Erasmi* exemplum, paraphrases et periphraſes ſaepe abire in pãrerga et perierga, quibũ melius caruiſſemus. Magni æſtimamus *Semleri* commentarios N. T. propter eruditionem in notis effatim congeſtam, paraphraſes in pretio non habemus; exhibent enim ſæpiſſime ſenſum interpretis, non auctoris.

## § 13.

Interpretatio autem ea, quæ cernitur in explicando ſenſu ſcriptorum, duplex eſt. Nam vel brevis eſt, ad Scholiorum modum, ex quo genere *Origenis* *συνειρώσεις* fuere, vel vberior ad Commentariorum formam. Et *Scholiorum* quidem facilis et brevis præceptio eſt. Cum enim nihil aliud agere debeant, quam ſenſum verborum et hiftorias breuiter explicare, intelligitur, in iis videndum eſſe, ut verba difficilia faciliſſimis, rariora obuiis, tropica propriis, ſed omnibus puris explicentur, ne ambiguitas aliqua exiſtat: nomina porro perſonarum locorumque non nimis notorum, et ſimilia, illuſtrentur breuiter, ut quaerendi neceſſitas tollatur. Commemoranda eſt etiam varietas lectionis, quæ alicuius momenti videatur, et in locis difficiliſſimis varietas interpretationis. Et hoc genus interpretandi, ſi recte tractetur, et propter breuitatem et propter ſimplicitatem,

tem, haud dubie ad intelligendum est utilissimum. <sup>p)</sup>

p) Adeoque nostrae aetati gratissimum. *Rosenmüller* scholia in N. T. iam quintam editionem viderunt, quae ultima non erit, dummodo bonae literae florent, sacris arctissimo vinculo iunctae. *Σημειώσεις* teutonicas continet libellus: *Exegetisches Handbuch des N. T.* Lips. 1788. ff. ante hos viginti annos non contemnendus. Nunc longo intervallo antecedit *Paulus* *Commentar über das N. T.* Lübeck 1800 f. t. I-III. cuius iam secunda editio in lucem prodit.

#### § 14.

Maius opus et maioris praeceptionis et cautionis est in *Commentario*, qui rerum verborumque explicationem amplecti debet. Et in verbis quidem prima cura esse debet lectionis, ut veritas eius stabiliatur, et a corruptelis vel librorum vel coniectorum vindicetur: varietates lectionis, quae aliquid momenti habeant, commemorentur et examinentur. Nec omnino coniecturalis Critica negligenda, (vid. c. 6. §. 1.) qua doctissimi et rectissime sentientes Theologi interdum uti non dubitauere:<sup>q)</sup> sed temeritas cauenda, et modesta diligentia adhibenda. Eius autem rei vniuersae quae praecepta, quae subsidia sint, altera parte commodius dicetur.

q) Vid. G. A. Telleri Ep. ad Kennicotum de critica coniecturali in libris ebraicis V. T. Lips. 1765. et

L

*Bewyeri*

*Bowyeri Coniecturae in N. T. theodiscae factae a Schalzio P. I. cuius supplementa nunc ex editione tertia, Londini 1782. dari possunt. Vide Michaelis Einleitung in die Schriften des N. B. ed. 4. Gött. 1788. p. 722 ff.*

### § 15.

Altera cura erit, sensum verborum, in quibus aliquid difficultatis sit, explicare, et explicationes ex usu loquendi, ad eum, quem supra descripsimus, modum (c. 3.) confirmare atque illustrare. Nec tamen non licebit interdum etiam ea, quae non habent magnam difficultatem, aut dubitationem, observationibus idoneis illustrare, quae alibi, vel his libris, vel Patrum Ecclesiae veteris intelligendis possint prodesse. Atque etiam profuerit versionem latinam veterem<sup>r)</sup> comparare, ut et ipsa recte intelligatur, et inde consuetudo loquendi Ecclesiae veteris cognoscatur.

r) Cum glossis *Hieronimi* orationi contextae subiectis, v. c. Gal. V, 12. ἀποκόψονται, abscindantur vers. vet. Addit *Hieronymus*: si enim exspoliatio membri proficit, quanto magis abscissio.

### § 16.

Verbis explicatis, etiam res attingere convenit, cum historicas, tum dogmaticas: sed ita, ut missis iis, quae nota sunt et explicatione non indigent, aut in libris vulgaribus repe-

reperiuntur, amplectamur difficilia, exquisita, ab aduersariis religionis verae impugnata aut deprauata. Licebit etiam inferere subinde latiores de rebus difficilibus disputationes,<sup>s)</sup> sed in quibus aliquid aut plane nouum sit, aut nouis rationibus et melioribus firmetur ac noua luce perfundatur.

s) Excursus vocauerunt Heyne ad *Virgilium*, *Tibulum* et *Homerum*; quem secutus est b. Koppe in sua Ed. N. T.

§ 17.

Haec omnia in vtroque genere ita Interpreter aget, vt variis sententiis, quae aliquam speciem habeant, prolatis et ponderatis, suam subiiciat, eam rationibus idoneis firmet, dubitationes denique, quas ea habere possit, diluat.

t) Peccatur tamen magno sententiarum numero commemorando, quo lectores facile obruantur, dum verus ipsius auctoris sensus oculos et mentem effugit. Vtut enim facile concedamus, in extricandis locis difficilioribus opinionum recensensus dari posse in supplementis, vel excursibus, sensus tamen auctoris nequit esse nisi vnus; hunc indagare et verbis disertis repraesentare debet bonus interpres, de aliorum commentis securus.

§ 18.

In quo tamen excludet primo latiores de  
verbis disputationes, et ad Lexicon potius

**L 2**

angen-



augendum, quam ad scriptoris sensum percipiendum, valituras, Locos communes dogmatum, Lectionibus Scholasticis aut Concionibus aptiores, quam Commentario.<sup>u)</sup> Nam vt in Commentariis scriptorum humanorum, graecorum et latinorum, non probantur, qui vbique adlinunt, de historiis et antiquitatibus, quae peti e Corporibus historiarum et antiquitatum possunt; sic nec in Commentariis scriptorum sacrorum illa ratio feretur. Ac sunt hoc nomine saepe a recentioribus reprehensi commentarii maiorum nostrorum, vt Lutheri, Melanchthonis, P. Martyris et aliorum, nominatim a Simone; sed his excusatio est ab illorum temporum ratione, vt illis, qui in principio literarum restitutarum commentarios in scriptores latinos veteres scripsere plenos talibus rebus, quas hodie nemo facile addiderit.

u) Inani hac et falsa eruditione ex antiquioribus laborant plurimi patrum ecclesiae commentarii, deinde Scholasticorum, qui interpretationi nugae metaphysicas inferebant, postremum Grammaticorum, qui nimii fuerunt in digressionibus etymologicis. Exempla vel in Criticis Anglicanis sunt obuia. Neque eorum praetermittendum erit vitium, qui, si in locum obscurum inciderint, titularum et inscriptionum librorum plaustra conuehant, lectores ad scripta excitata ablegaturi. *Quin tu appone ea, quae locum illustrare poterunt; haec enim si aliunde repetere voluisseni, tuam operam non desiderabam.* Verba Heynii praef. ad Homerum

rum Lips. 1802. ed. maj. t. I. §. XVII. Laudamus eiusmodi diligentiam in compendiis, *Wolffii* curis et *Thieffii* libro bonae frugis pleno; *Neuer kritischer Kommentar über das N. T.* t. I. Halae 1804. In commentariis autem *proprie* sic dictis merito impro-  
batur,

§ 19.

Omnino cauenda est affectatio in iactanda doctrina, abususque omnis literaturae profanae, in quem facillime incidunt, qui, cum eam vix attigerint, tamen eius periti videri cupiunt, et ab ea ornamentum disputationum petunt: vt a multis huius seculi principio factum est, recenti literaturae vsu in hoc genere.<sup>v)</sup>

v) Ipse *Wetstein* non immunis est ab hoc vitio. Eandem inanem doctrinae ostentationis inuidiam constat esse videas multis V. T. interpretibus, qui in adpin-  
gendis auctorum arabicorum et syrorum locis sibi in-  
dulgent.

§ 20.

Oportet etiam tenere, libros N. T. non esse ad dialecticam methodum subtiliter scri-  
ptos. Itaque nec membrorum omnium con-  
iunctio dialectica quaerenda erit, nec verba  
ad subtiles philosophiae notiones exigenda.  
Itaque dispositiones et analyses dialecticae  
non admodum sunt probandae: nec eae mul-  
tum vtilitatis habere possunt.

§ 21.

## § 21.

Illud quoque permagnum et diligenter vitandum vitium est, in quod incidunt ii, qui per meras, vt ita dicam, possibilitates e natura rerum, siue e notionibus philosophiae suae, vtcunque ductas explicant,<sup>x)</sup> res inprimis historicas, nulla veritate grammatica aut historica nixi.

x) Sic *Hammondus* omnia reducit ad Gnosticos, *Heinsius* ad LXX. *Schultensius* ad Arabismum. Simile vitium reprehenditur in *Lampio* et disciplinae *Cocceianae* alumnis. Magis excusari poterit haec sedulitas in rebus historicis, in quibus, licet vltra doctam ignorantiam saepius vix progrediamur, literas tamen haud mediocriter adiuuat, quod in recentissima controversia de Epistolae ad Hebraeos auctore et consilio accidisse videmus. Confer bonae fragis plenas *Storrii* notitias historicas Epistolarum ad Corinth. interpret. seruientes. Tubingae 1788.

## § 22.

Et non dissimile illud est, quod cernitur in argutiori et difficultatem aliquam inueniendi et explicandi redolente ratione, quo plerumque inclinant ingenia non mala, sed subtilibus philosophorum disputationibus adfue-  
ta, nec literarum elegantiorum vsu subacta et exulta. Sed oritur id vitium interdum ab ingenii quadam naturali prauitate, etiam in eruditissimis alias hominibus, praesertim  
cui

cum aliquas opiniones et aliquod genus literarum adamarunt; et ad ea dirigunt interpretandi rationem. Boni interpretis virtus maxima est in simplicitate, et interpretatio quaeque, ut magis habet facilitatis notam, et est eiusmodi, ut cuilibet sua sponte in mentem venire debuisse videatur, ita magis plerumque vera est.<sup>y)</sup> *Ῥαδίον τὸ ἀληθές*, inquit *Lycurgus*, et vere *Schultensius*: Simplex et perenne simul, sigillum veritatis, praef. *Comm. in Iobum*.

y) Exceptionem tamen admittit haec regula in Epistolis Paulinis, ubi explicatio difficilior haud raro praef. ferenda est facilliori. Caeterum vix diffitearis, in explanationibus contortis et impeditioribus agnosci ingenia mediocria. Vid. *Frommannus* de facilitate bonae interpretationis, in Opuscul. philoll. p. 268. *Ἀπλὰ γὰρ ἐστὶ τῆς ἀληθείας ἔπη* *Aeschylus* in fragmentis ed. *Bethe*, Lips. 1805. p. 580.

§ 25.

In rebus porro omnibus tractandis adhibenda est breuitas, quantum res patitur et perspicuitatis lex. Nam latis illis et nimis enucleatis disputationibus, ut *Vitranganis* in *Esaïam*, *Lampianis* in *Ioannem*, res obscurantur potius quam illustrantur, ingenia confunduntur, certe fatigantur.

§ 24.

Cui rei plurimum proderit etiam facultas bene

bene scribendi. Nam ut quisque minus exercitatus est in artibus dicendi, eo esse solet verbosior, etiam cum breuitate uti se putat, Sed ea res habebit etiam hoc commodi, ut possit interpret puritate uti, quae et ipsa ad perspicuitatem est necessaria: cum sub eius negligentia plerumque lateat inscitia. Ommino bene interpretari vix discat, qui non idem bene scribere didicerit.

## § 25.

Adhibenda est etiam bono interpreti constantia quaedam in usu praeceptorum atque etiam subsidiorum hermeneuticorum: ne aut vniuerse probet, quod in singulis causis repudiet, aut idem, cum commodum est, probet, cum secus est, improbet: quod est vitium interpretibus valde frequens.<sup>2)</sup>

2) Praesertim dogmaticis in vv. *πίσις, πνεῦμα, υἱὸς Θεοῦ, διχαιοσύνη*, aliisque. Meliora docent Teller et Lang in libro: *Wörterbuch des N. T. cum supplementis*.

## § 26.

Quae inconstantia etiam cernitur in eo, quod nonnulli antiquitatem nimis extollunt, et paene omnem in interpretando nouitatem sententiae repudiant, praesertim cum a suis partibus stat antiquitas; contra cum ipsi aliquid noui attulere, antiquitatem depri-  
munt.<sup>3)</sup>

munt. a) Nam nec standum est vna antiquitate, nec ea est temere contemnenda: cum profecto non admodum multa proferantur, quae non ab antiquitate hausta sint, nec tamen antiquitas ἀναμάτητος, aut in omnibus acuta in interpretando fuerit, praesertim, quae plerumque hebraismi imperita fuerit.

a) Sic Calouius contenderat, nullam interpretationem esse veram, nisi ex patribus ecclesiae haustam. Nostri contra temporibus contemptus veterum interpretum inualefcere coepit, de quibus idem valet, quod de theologis antiquioribus praedicat Marus praef. ad Epit. Rel. Christ. p. XVIII.

## § 27.

Ex his quae virtutes, quae vitia Commentariorum sint, quibusque quasi notis boni et probandi ab malis et futilibus discernantur, in promptu erit iudicare. Sed sunt etiam quaedam signa externa Interpretum, e quibus minime dubiam coniecturam facere possimus in vtramque partem. Bene igitur sperabimus de interprete N. T. si constet 1. in eo esse hebraicae, graecaeque linguae accuratam, h. e. non e Lexicis, sed ex usu et lectione assidua haustam scientiam, 2. antiquitatis, historiae, chronologiae  
omni.

omninoque doctrinae liberalis et criticae  
artis praeclaram scientiam et vsum, 3. ex-  
ercitationem multam et curiosam in inter-  
pretando.

## FINIS PARTIS II.

---

PARS

## P A R S   I I I.

DE

INSTRUMENTO HERMENEV-  
TICO EIVSQVE LEGITIMO  
VSU.

## C A P. I.

*De libris N. T. eorumque αὐθεντίας, integri-  
tate, distinctionibus etc.*

## § 1.

**L**ibros N. T. auctores habere eos, quorum nomina praeferunt, de plerisque ita consentientis antiquitatis auctoritate traditum tenemus, ut de nullius alius libri antiqui auctore certius constet. Nec habent, quod iustam suspicionem faciat, alia, quam qua creduntur, aetate, aut ab aliis, aut saltem non θεοπνεύστοις hominibus scriptos esse.<sup>b)</sup>

b) Atque de hac θεοπνευσία utinam et ipse hic breviter egisset auctor! Neque enim huius notitia bonus interpret carere potest. Quam ipse hac de re proposuit



fuit sententiam (Nov. Bibl. Theol. T. III. p. 468.), confirmatam videas ab *Hegelmaiero* Comment. de Θεοπνευσία, Tubing. 1784. Sed conferendi sunt nostris diebus: *Griesbachii* V Commentt. de theopneustia librorum sacrorum, Ienae 1784 — 1788. *Semleri* Beitrag zur Revision der kirchlichen Hermeneutik und Dogmatik p. 24. *Doederleinii* Instit. Theol. Christ. §. 30. tot. Ad sinceritatem librorum quod attinet, vindicatur 1) argumentis historicis patrum antiquissimorum, v. c. Barnabae, Clementis Romani, Ignatii, Polycarpi, 2) vsu ecclesiae antiquissimae. Vid. *Spanhemius* de Script. hist. ev. Opp. T. II. p. 266. 3) argumentis internis ex lingua et tenore horum librorum ductis, Vid. *Michaelis* Introd. in N. T. §. 2 - 12. *Lessius* Wahrh. der Christl. Rel. p. I - 125. Gesch. d. Rel. §. 28 - 34. *Doederlein* Instit. Theol. Christ. Theod. P. II. p. 29. sqq.

## § 2.

Nam quod de quibusdam ab initio dubitatum est, ea dubitatio vel non pertinuit ad Θεοπνευσίαν, vt in Epistola ad Hebraeos, vel paucorum, nec satis cognita caussa iudicantium fuit.<sup>c)</sup>

c) Rem aliter se habere, nemo ignorat. Si enim Apocalypsis Iohanni abiudicetur, Epistola ad Hebraeos Iudaeo Alexandrino (v. *Ziegleri* Einleitung p. 256.), Epistola autem Iohannis secunda et tertia Iohanni Presbytero vindicentur, tunc etiam Θεοπνευσία horum librorum tollitur, quorum γνησιότης, cum sinceritate Epistolae Iacobi, Iudae et secunda Petri, antea euinci debet.

## § 3.

§ 5.

Nec vero, aut haereticorum veterum, libros eos Apostolis abiudicantium, contra valet criminatio, cum clarum sit, in ea nihil nisi impietatis perfugium quaesitum fuisse, aut recentiorum Deistarum, frequentiam piarum fraudum in prima Ecclesia et similia iactantium: in quo, non quid factum sit, historicis argumentis legitime colligunt, sed quid fieri potuerit, temere coniiciunt: quod est potius cupide optantis, quam recte et subtiliter docentis. <sup>d)</sup>

d) Notandum est in vniuersum de libris ἀντιλεγόμεναι modo nominatis, 1) neque theologiam dogmaticam, neque moralem aliquid detrimenti esse capturam, si vel omnes pro spuris declarari possent, quia illis solis nulla veritas christiana nititur: 2) dubitationes de iis coortas esse temporis serioris. Origenes omnes pro genuinis agnoscit: Eusebius autem H. E. L. III, 25. de quibusdam iam sententiam fert ancipitem, vnde distributio in δημολογούμενα, ἀντιλεγόμενα et ἰόθα in-  
valuit: 3) nullum aduersarium demonstrare posse, vnum, vel alterum horum librorum esse falsum: omnes potius illos sedulo ab apocryphis distinguunt, quia minori tantum prae reliquis euidentia illorum ἀνθεγγία probari potest. Vid. Clar. Weberi symbolas ad canonem N. T. Tub. 1791. p. 158. sqq. Qui adcuratius rem persequi vult, adeat Semleri Freie Untersuchung des Canons, Halae 1771 — 1775. Roesleri Bibl. der Kirchenväter, T. IV. p. 394. sqq. Haenleinii Handbuch der Einleitung in die Schriften des N. T. ed. 2. Erl.

Erl. 1801. p. I. p. 39. ff. et *Hugii*, qui nouam straturus est viam, libro: *Einleitung in die Schriften des N. T.* Tübing. 1808. p. I. pag. I. ff.

## § 4.

Graecum potro textum esse authenticum, non minus liquido constat. Nam *Matthaeum* hebraice scripsisse, est illa quidem veterum quorundam traditio: caeterum eadem traditio vel ab ipso *Matthaeo*, vel ab alio *Θεοπνεύσω* viro, graece conuersum *Euangelium* docet, nec certi quid habet, quo nitatur <sup>e</sup>). De *Marci* autem latino <sup>f</sup>), et *Iohannis* syriaco textu recentior et inanis vel traditio vel coniectura est <sup>g</sup>). De *Epistola* denique *ad Hebraeos* hebraice primum scripta, *Clementis* illa quidem apud *Eusebium* H. E. VI, 14. ipsiusque *Eusebii*, sed nullis certis argumentis nixa opinio est <sup>h</sup>).

e) Vide hebraici *Matthaei* textus vindicem in b. *Michaelis* introd. in N. T. T. II. p. 950. sqq. Ed. 4. Contra pugnavit *Masch*, von der Grundsprache des Evang. *Matthaei*. Hal. 1755. Adde *Wahl* (Magazin T. II. p. 57.). Nunc de hebraico *Matthaei* autographo vix dubitatur; neque videmus, quomodo post *Origenis*, *Eusebii* et *Hieronymi*, qui fere *αὐτόπληγς* fuit, testimonia disertâ hac de re dubitari possit.

f) Latinum textum adferere volebat *Baronius* Anal. Chr. ad an. 45. Sed iam refutatus est *Baumgartenii*; Vindiciis textus graeci et *Dobrowskii* Fragm. Prag. Evang. *Marci*, Pragae 1778. Aequae incerta est Cel. *Wahl*ii

son-

coniectura in libro: Magazin für alte, besonders bibl. und morgenl. Litteratur. 3. Lief. p. 8. sqq. proposita, Marcum coptice scripsisse.

g) *Salmasii* de Hellen. p. 251. f. Aequae infirma est *Harenbergii* sententia de dictione apocalypsis syriaca. Alia est quaestio de vero euangelii Iohannei *Μαρκου*, a *Grotio*, et *Westenio* instructa, a *Vogelio*, *Bertholdio* et *Weysscheiden* praeparata, plane ad liquidum nondum perducta.

h) Conf. *Semleri* diff. quod graece Epistolam ad Hebraeos Paulus exaraverit. Hal. 1761. *Ziegleri* Einleit. p. 188. sqq. et *Heinrichsi* prolegomena in hanc epistolam.

## § 5.

Nec aut alia Graeci textus exempla hodie habemus, quam prima aetas ab Apostolis acceperat, aut ita corrupta et interpolata, ut genuini textus graeci copia non sit, sed ei latinus debeat praeferrī. Nam *Ios. Blanchini* ratio, in *Vindiciis Canon. Script.* latina veterrimae versionis exempla graecis praeferebat, cum aliis argumentis, tum consensu veterrimorum Graecorum, etiam saepe Latinorum, in interpretandis et commemorandis verbis graecis refellitur. Atque etiam si in nonnullis dissentiunt a Graeco nostro textu et consentiunt Latino; tamen id fit rarissime, nec ab universis. Interpolatio autem textus graeci e latino, de qua post dicetur, quorundam librorum veterum, non omnium, sit,

est, et multis cum manuscriptis exemplis, tum veterum scriptorum auctoritatibus agnoscitur et repudiatur <sup>hh</sup>).

hh) V. c. Act. III. εὐσέβεια pro ἔξοναία et Phil. II, 30. παραβουλευσάμενος pro παραβουλεύσάμενος, de quibus locis etiamnum in utramque partem disputatur.

### § 6.

Inanis etiam, vndecunque orta, fabula est *Victoris Tununensis* de Euangeliis ab Anastasio Imperatore emendatis, vel potius corruptis <sup>i)</sup>, vt planissime demonstrat *Wesselingius*, V. C. Disp. de Euang. sub Anastas. emend.

i) *Victor* in chronico edito a *Sirmondo* et repetito a *Scaligero* de emend. temp. Sed omni probabilitate hanc opinionem esse destitutam patet, 1) quia omnes Anastasio inimici hac de re tacent, 2) quia *Victor* ab Anastasio remotus in Africa vivebat, vbi male procul dubio rem intellexerat. Vide aliam hac de re praeter *Wesselingii* opinionem in *Bentleii* libro: *Friponnerie laique* p. 36.

### § 7.

Nullo profecto modo credi potest, providentiam diuinam passam esse, eos libros, in quibus fidei et vitae vnam et certam normam esse vellet, ita corrumpi, vt hunc vsum praestare amplius non possent. Nec fieri

po-

potuit, ut, qui libri in manibus tot hominum essent, tam sancti haberentur, quorum tot exempla extarent pluribus ac diversis locis, quorum tot versiones essent, per quas corruptio aperiretur et refelleretur, pro quorum etiam integritate tot Ecclesiae doctores excubarent <sup>l)</sup>, ii tamen ab haereticis ita corrumperebuntur, ut eae corruptelae omnia exempla contaminarent. *Marcionis* quidem, *Tatiani*, *Theodoti*, *Artemonis*, aliorumque tales ab *Irenaeo* (I, 28.) et *Eusebio* (H. E. IV, 29. VI, 28.) commemorati conatus ad nihilum reciderunt <sup>m)</sup>, et quicunque simile quid ausus est, multorum vetustiorum Codicum auctoritate confutatus est, ut ait *Augustinus* c. *Faustum* XXXII, 6.

l) Quorum opera ne iusto nimis extollatur, post *Frickium* legas *Griesbachii* curas in historiam textus graeci Epistolarum Paulinarum. Ien. 1777.

m) Vid. *Millii* prolegomena p. 62. Totam enim b. *Ernestii* argumentationem, a tutq, ut aiunt, ductam, vacillare et fluctuare, vix est, quod moneas. Vid. *Moshemii* diss. de causis suppositorum (et interpolatorum) librorum inter Christianos seculi primi et secundi, in dissertat. ad histor. eccles. pertinentibus, ed. 2. Altonaviae 1733. Vol. I. p. 217. ff.

## § 8.

Itaque Doctorum veterum quorundam, ut *Origenis*, *Epiphani*i, *Hieronimi* <sup>mm)</sup>,  
M que-

querelae de corruptelis Codicum, aut rem augent verbis, nec sunt ad viuum rescandae, aut de vitiiis scripturae, multis, praesertim priuatis, libris illatis, quod saepe, a multis, vel non satis peritis, vel quæstus studio minis festinantibus, describerentur, intelligi debent. Nec illa frequentia vitiorum in singulis exemplis magis valet eo, vt vere ac proprie corruptos libros sacros suspicemur, quam valet in libris humanis Graecorum et Latinorum, quorum etiam integerimi quique, in libris scriptis, saepe innumerable vitia habent.

mm) Adde et *Augustinum*, qui tamen latinis tantum codd. vsus fuisse videtur. At enimvero si eandem tibiam a *Chrysostomo*, *Basilio M.*, *Gregorio Nazianzeno* et aliis inflari audieris, verendum est, vt in auctoris nostri sententia acquiescas.

### § 9.

Nam profecto, si ea vitia, et inde orta varietas lectionis obessent integritati, nihil vspiam integri et incorrupti ex vniuersa antiquitate restaret. Nec tam est mirandum, talia in omnibus N. T. codicibus vitia esse, quam mirandum foret, si nulla essent; cum id non aliter fieri potuisset, quam, vt Deus lapsus librariorum singulos vi sua impediret: quod nec factum esse, res ipsa loquitur, nec necessariam ad integritatem librorum

rum fuisse, omnium intelligentium iudicio constat <sup>n</sup>).

n) In libris humanæ auctoritatis singulos librariorum lapsus exigui momenti esse, facile concedas. Sed longe aliter se res habet in scriptis, e quorum punctis et apicibus doctrinae θεόπνευστοι ideoque salutares pendere dicuntur, v. c. Act. XX, 28. θεῶν ἢ κυρίου: Rom. IX, 5. a commate post σάρκα vel πάντων posito: I. Tim. III, 16. OC I. ΘC. Profliganda itaque ante omnia erit superstitio Iudaica, quæ τὸ θεῶν siue literis in vniuersum, siue singulis libris adligat, et a religione Christiana plane aliena est: Ioh. VI, 63. 2. Cor. III, 6. 17.

### § 10.

Etenim non modo non tollitur iis peccatis, et inde orta varietate lectionis integritas, quam nos dicimus, librorum, sed etiam in libris inprimis his firmatur, vt post frequentes de ea re admonitiones *Erasmi* °), in libris contra *Stunicam* et alios aduersarios, itemque in praefatione ad editionem N. T. tertiam, ex instituto demonstratum est a *Bentleio* et aliis.

o) Praef. ad N. T. Ed. a. 1522. Adde *Glasfium* de puritate N. T. Quo maior enim est lectionum variantium seges, eo difficilius quidem, sed eo certius etiam constitui potest contextus N. T.

### § 11.

Est enim illa integritas non sic iudican-



da, vt imperiti et rudes rei criticae vulgo putant, vt vnus aliquis liber vel scriptus vel editus omnibus partibus rectus et sine vitio sit; nam talis integritas nullius libri veteris nec est, nec esse potuit, sed vt ex vniuersis Codicibus graecis, scriptis et editis, aliisque versionum et Commentariorum veterum libris, textus integer et incorruptus confici possit, in iisque lectiones genuinae conseruatae sunt, opera doctorum et artis criticae peritorum virorum eruendae, vt bene *Glasius* Phil. S. L. I. Tr. II. docet, *Calouius* Crit. S. p. 492. et alii.

## § 12.

Quod si maxime fatendum esset, in vna et altera voce alicubi veram lectionem in libris cognitis non extare, aut adeo periisse, quod maximi quidam omni aetate Theologi et Critici videntur concessisse, proponendis certe de lectione coniecturis, vt alio loco docebimus: tamen vera integritas non tolleretur; cum et de perpauca locis ea opinio sit, et in iis sententiis, quae vel nullam coniunctionem cum summa fidei habent, vt in rebus historicis, vel non tantam, vt vitium lectionis fidei vitium asferre possi<sup>oo</sup>).

oo) Euolue v. c. I. Cor. III, 4., quo loco non *σαρξιν* cum vulgatis, sed *ἀνθρώπων* exhibent codd. ACDEFG cum vulg. Orig. et Aethiopica versione.

Iure

Iure questus est *Gablerus* (diar. lit. theol. sel. t. III, p. 183. ff.), hanc lectionem a summis Criticis negligi, eamque restitui iubet praeferens: οὐχὶ ἄνθρωποι εἰσὶ; videlicet Paulus et Apollos. Credimus, futuros esse paucos, qui non adsentiant, cum propter consensum codd. antiquissimorum et lectionem difficiliorem, tum propter nimiam frequentiam v. σαρκικοί in versf. antec. auribus fere intolerabilem. Ἄνθρωποι itaque explicat antec. κατὰ ἄνθρωπον v. 3. hoc sensu: 'nonne homines estis et humanam imbecillitatem proditis?' Hactenus sentio cum *Gablere*, viro doctissimo et optimo: v. ἐστὶ contra retinendum puto propter sequens οὖν, quod mutationem subiecti indicat. Patet interim, fidei puritatem ab hac disputatione non pendere; pertinet enim ad res historicas, quas b. *Ernesti* cum fide connecti negat.

§ 13.

Nam integritatem librorum sanctorum cum defendimus, maxime profecto eam ad integritatem et certitudinem doctrinae referri volumus. Ac nescimus, an nimis in hac parte simus timidi; cum etiam Apostoli dicta Veteris Testamenti commemorent non semper ad ἀκριβείαν hebraici textus, sed interdum etiam e versione graeca, ubi ab hebraico dissentit, nec iisdem adeo verbis, etiam cum eadem bis commemorant, sed satis habeant, sensum verum retulisse, et tamen verum, integrum et incorruptum Dei verbum commemorent \*).

\*) Ne-

\*) Neque hic erunt, qui obfrepant immortalī auctori hic illic egregie *παρασησιαζομένην*; verbum enim Dei est aeternum (Ps. CXIX, 89.) adeoque humanis vocibus non includendum. Quid enim impedit, quo minus posteros mente prospiciamus, Hebraica et Graeca haud magis callentes, quam nos linguam protoplastorum? Sed aliena sunt haec ab arte hermeneutica.

## § 14.

Hos porro libros vna continuatione scriptos, nec in partes certas descriptos fuisse, et consuetudo illorum temporum, et ipsa forma orationis, particulis copulantibus aptae et nexae, in epistolis denique etiam genus ipsum scribendi arguit <sup>p</sup>).

p) Vid. *Perizonii* praef. ad Aelianum, Lugd. B. 1701.

## § 15.

Mature autem diuisiones institutas satis constat, vel priuatos in vsus, vel ad lectiones inter sacra publica <sup>q</sup>), et commoditate rei inuitante, et consuetudine Iudaeorum ad imitationem vocante, cuius rei vestigia esse creduntur apud *Iustinum* in Apol. II. §. 87. Statas tamen et fixas, aut vbiuis receptas initio non fuisse, et silentium veterum indicat, et indiciis Codicum veterum, scriptorumque constat, in capitum numeris non consentientium. De Codd. *Alex.* et *Vatic.*

*Vatic.* diuersitate in numeris capitum v.  
*Walton.* App. Bibl. IX, 34. et *Zaccagnium*  
praef. ad Monum. Vet. Eccl. Gr. §. 46.

q) Non autem in Codd. MSS. librorum, sed in  
lectionariis et breuiariis. Vid. *Michaelis* Einleitung  
ed. 4. p. 303. f. et ante omnes *Hug* Einleitung v. I.  
p. 207. ff.

### § 16.

Euangeliorum antiquissima et celeberrima diuifio est, quae ad harmoniam eorum constituendam excogitata ab *Ammonio* primum, deinde ab *Eusebio*, paullatim in Codices venit, praelata tamen Eusebiana, vt exactiore et commodiore <sup>1)</sup>. Ex notis quidem libris solus Vaticanus cum Cantabrigienfi aliam Eusebiana habet. Itaque et in editis antiquioribus expressa est, Canonum Eusebianorum nomine, vt Erasmijs posterioribus, Stephanianis *Roberti*, et *Miliana*. Adeundi de his Canonibus iuprimis *Simon* Hist. Crit. II, 33. III, 9. vt *Millium*, *Marcianaeum* Proleg. Biblioth. diu. Hieronym. et alios taceam.

r) Videlicet *Fabritium* B. Gr. L. IV. c. V. §. 20.  
*Michaelis* p. 898. f.

### § 17.

Post, ad a. CCCXCVI. incerto auctore, (*Theodorum Mopsuestenum* suspicatur  
*Mil-*

*Millius* n. 905.) Epistolae Pauli in capita diuisae sunt, cum titulis et summis rerum; quam induxit deinde in libros *Euthalius*: idemque post, Episcopus Sulcensis factus, Athanasii Archi-Episcopi Alexandrini instinctu, etiam Acta Apostolica et caeteras Epistolas Catholicas, cum Codicibus Caesareenilibus collatas, in lectiones, capita et versus (σ'χ'ς) distinxit, eaque diuisio cum Eusebiana Euangeliorum mox in libros est recepta, vt codices antiqui docent. v. *Euthalii* Epist. ad *Athanas.* et praef. ad Epp. Paull. c. 2. item *Zaccagn.* l. c. §. 55. Quod si Diuisio Actuum (ἐκθεσις κεφαλαίων τῶν πράξεων) sub *Pamphili Martyris* nomine e Cod. Ms. antiquo edita a *Montefalconio* in Bibl. Coisl. p. 76. et a *Fabricio* repetita in Hippol. T. II. p. 205. habet auctorem *Pamphilum*; ἀνωνύμως alias edi solita apud *Oecumenium* et alibi, credibile est, eam ab *Euthalio*, dum in Bibliotheca Caesareensi Codices tractaret, descriptam et pro sua venditam esse <sup>s</sup>).

s) Conf. *Rumpe*: diff. crit. ad N. T. libros. Lips. 1757. pag. 131. seqq. Notanda autem est duplex ratio diuidendi N. T. aevo antiquo. Prima dispescebat libros in τίτλους, sectiones longiores, et in κεφάλαια, sectiones breuiores. Secunda distinguebat ῥήματα, periodos, et σίχους, versus, vel, lineas. Posterior est masorethica quasi librorum N. T. diuisio. Hag l. c. p. 212. f.

§ 18.

Ab his partitionibus diuersa est ea, quae nunc obtinet edita exempla, diuiditque libros in capita: cuius etsi incertus auctor est; quippe incerta argumenta vindicant *Hugoni Carenfi* <sup>1)</sup>: illud tamen certum est, eam parum commode accurateque factam, et primum ad indicum verbalium vsum institutam esse.

1) Quia nimirum primus concordantiam b. e. indicem verborum declinabilium scripsit, ad quam talis distinctio necessario requirebatur. Sed nihil certi constat, quia ea distinctio iam antea facta esse potuit. *Michaelis* p. 870. f.

§ 19.

Diuisio autem in *versus*, i. e. minora segmenta, est ab *Rob. Stephano*, in itinere, dum equo vehitur, inter legendum facta, auctore filio *Henrico* in praef. ad Concord. graec. et primum editioni Geneuensi 1551. 8. inducta; vnde, etsi negligenter, vt in tali tempore, et saepe parum apte ad sententiam facta, tamen paullatim in omnes libros recepta est. Quominus quisquam ei se in interpretando debet adstringere: beneque consultum est a *Bengelio* <sup>2)</sup>, cum eos numeros in marginem emouit, vt opportunitas reperiendi et indicandi singula relinqueretur, cuius causa ab *Stephano* instituta  
vide.

videtur, iam tum fortasse de Concordantiis graecis cogitante, caeterum in legendo et interpretando eorum nulla ratio haberetur.

u) Nunc etiam a *Griesbachio*, *Birchio*, *Altero*, *Knappio*.

### § 20.

*Interpunctionum* signa quocunque tempore inuenta sunt: nihil enim certi est: in libros quidem sero recepta sunt, ab ipsis autem scriptoribus olim nunquam usurpata in scribendo. A quo primo et quo tempore interpunctio N. T. facta sit, id ipsum quoque in obscuro est. *Cyrilli Hieros.* quidem aetate Codices versionis graecae V. T. nondum interpunctos fuisse, clare patet e *Catech. XIII. p. m. 301.* vnde colligitur, nec in N. T. graeco textu fuisse. *Augustini* autem tempore nullam dum interpunctionem in libris latinis fuisse, ipsius perspicuo testimonio, *Ciuit. D. III, 3.* constat. Illud obiter monuisse, non modo tironibus, sed fortasse etiam doctioribus profuerit, quippe et *Lipsium* et *Clericum* (A. C. P. III. S. III. c. 10.) et alios res refellit, ne quis, ubi in libris veterum τὸ διασίζεν et interpunctionis mentionem factam viderit, velut ap. *Aristotelem* in *Rhet.* et in *Comment. Patrum*, imprimis *Theodoretum*, apud quem est crebra admonitio, quomodo sit διασίζεν, κτέον,

κτέον, ne eam ergo intelligendam putet, quam nos dicimus et vsurpamus, sed quae fit voce et legendo, quam a Grammaticis discebant pueri in scholis v).

v) Confer nunc hae de re Celeberr. *Villoisonum* in Prolegomenis ad suam Homeri edit. Venetiis 1788. In Codd. antiquissimis inueniuntur vel nullae distinctiones, vel puncta solum et lacunae. Saeculo VIII. inuentum est comma, IX. semicolon et sequentibus reliqua puncta, siue signa eorum inualuere: rem ipsam enim veteribus satis notam fuisse, docet *Quintilianus*. Post inuentam typographiam *Stephanus* praesertim pro lubitu ponebat signa distinctionis. Vid. *Rogall* diss. de Antiquitate interpunctionis N. T. Regiom. 1734.

## § 21.

Similis ratio est *spirituum et accentuum*, qui omni tempore in lingua graeca pronuntianda vsurpati, (nec enim esse lingua sine iis potest,) tum demum, vt fit, scribi coepere (saeculo, vt placere video plerisque\*), septimo) cum recta et antiqua pronuntiatio interisset, nec vsu disci posset. Codices quidem antiquiores N. T. sine vtrisque sunt, vt alii, nec audiendi viri boni, sed parum acuti, vt *Leusdenus* et *I. Henr. Maius*, qui eos Apostolis vindicare conantur, vt ad integritatem textus et certitudinem sensus necessarios, iudaizantes profecto, et per hoc cauere acceptibus et interpunctionibus hebraicis



braicis cupientes. Sed contra facta philosophari stultum et parum docti hominis est.

x) Montfaucon Palaeogr. gr. L. III. c. 5. Neque enim in vigore et flore linguae opus est accentibus. Vid. *Henninii Hellenismus*, Trai. 1684. *Gesner de genuina accentuum pronuntiatione et Reiz de prosod. gr. accentus inclinatione*. Ed. rep. cura *Wolfii*, Lips. 1791.

§ 22.

Ex quibus fit, ut cum Codices scripti, aut editi, vel diuisione, vel interpunctione, vel accentibus et spiritibus varient, ea non tam lectionis, quam interpretationis varietas sit, nec religio esse debeat, ab iis in interpretando discedere.

## CAP. II.

*De Codicibus scriptis eorumque usu.*

## § 1.

**A**rchetypa librorum sacrorum exempla perisse, constat inter omnes.<sup>y)</sup> Nam quod Veneti *Marci* autographum iactarunt, id, re a peritis inspecta, falsissimum repertum, atque ita cognitum est, esse in eo libro partem alius Codicis latini, vt accurate docet *a Turre* in Epist. ad *Ios. Blanchinum* T. II. Euangelarii Blanchiniani, qui est in primis adeundus iis, qui de re plenius cognoscere velint<sup>z)</sup>.

y) Apostoli enim ipsi literas non scribebant, sed iis tantum subscribebant. 2. Thess. III, 17. *οὐτὼ γρά-  
φω* De Paulo quidem, caeteris tamen apostolis cultiore, constat, illum graeca scribere commode ignorauisse. Vid. *Semleri* adparatus p. 32. *Haenlein* Einleit. r. II. p. 8. ff. ed. 2.

z) Adde *Dobrowskium* in fragmento Pragensi Pragae 1778. p. 7. ff. Idem obseruari debet de libro V. T. ab *Efra* scripto, cuius possessionem Bononienses iactabant.

## § 2.

## § 2.

Diritissime superstes fuisse in Ecclesia Ephesina videtur autographum Euangelii *Io-hannei*, cum id scriptor antiquus e Sec. IV, *Petrus* Alexandrinum Episcopum esse existimant, a se visum testetur, in *Chron. Paschali Cangiano* p. 5. (locus extat et in *Vranolog. Petauii* p. 213.) \*) Sed eius loci ac testimonii *γνησιότης* in dubitationem haud leuibus de causis adducitur a *Scaligero*, *Petauio*, *Tillemontio*, et nuper *Garbello* in *Prolegom. Euangel. Blanch.* p. 42. id opusculum ac testimonium iuniori, de seculo sexto, *Petro* tribuentibus. Ei tamen opem ferre tentat *Frickius* de Cura V. Eccl. circa Canonem p. 130. bene, vt opinamur, disputans contra *Simonis* rationem, sed ipsam *γνησιότητα* idoneis argumentis non defendens.

a) Qua de re tamen vel propterea dubitare licebit, quia Romae circa medium sec. II. ne Epistola quidem Pauli ad Romanos superstes erat. Perisse in vniuersum iam primo seculo, vel secundo, libros apostolorum *αὐτογράφοις*, vsu detritos, iam ex Origenis silentio patet, qui, quum membranarum antiquiorum causa totum Orientem peragraret, certe in vnum, vel alterum *ἀρχέτυπον* incidere debuerat. Sed *αὐτογραφα*, vt sanctorum reliquiae, a posteritate demum celebrantur, a coaeuis negliguntur. De autographo Matthaei vid. Euseb. H. E. V, 10.

## § 3.

§ 5.

*Tertullianum* sua aetate adhuc salua tradidisse archetypha siue librorum siue Epistolarum Apostolicarum apud Ecclesias eas, quas Apostoli constituissent, *Garbelli* l. c. p. 27. opinio est, in nobili loco libri *de Praescript. haeret.* e. 36. ubi in iis *ipsas authenticas Apostolorum literas recitari* ait. Sed dubitat, vtrum *Tertullianus* rem compertam tradat, an famam incertam sequatur. Melius hoc certe est, quam quod *Pameli*us, *R. Simon*, alique indicant, qui de graecis exemplis interpretantur, quae certe et in aliis graecis Ecclesiis recitabantur. Quae res etiam impedit, quo minus de genuinis et incorruptis exemplis capiamus, quae et ipsa authentica dici possunt <sup>c)</sup>: praesertim cum dicat, *ipsas authenticas recitari*, quod ineptum esset, si genuinae intelligerentur: et nominat Ecclesias, ad quas Paulus scripsit; quod non erat necesse, si non de autographis loquebatur, et ante dixerat, *ipsas cathedras Apostolicas*, h. e. Ecclesias ab ipsis Apostolicis ortas, *superesse*.

c) Hanc tamen interpretationem vindicat *Rössler* in libro: *Bibliothek der Kirchenväter*, Tom. III. p. 118. f. Sed non multum interest, vtrum *authenticas literas* de libris genuinis, vel autographis explices: nam in Africa vixerat *Tertullianus*, ubi rem compertam habere vix poterat. Accedit etiam hoc, quod in narratione eius fidem saepius desideres.

§ 4.

## § 4.

Sed quibus de causis factum sit, ut archetypa exempla perirent, non magis attinet quaerere, quam in caeteris libris veterum scriptorum. Non abhorret tamen, faevitiae hostium tribuendum esse <sup>d)</sup>, quod quaedam citius periere. Nam ea Codices sacrorum librorum extortos Ecclesiis et Christianis satis constat. Socordiam quidem Ecclesiarum accusare cum nonnullis, iniquius videtur, ut bene indicat *Frickius*.

d) Multo magis autem temporum iniuriae et fatis primarum ecclesiarum. Actus apostolorum enim, ut rem exemplo illustremus, per tria secula et quod excurrit paucos nacti erant aduersarios; delituerat tamen liber utilissimus ecclesiis fere ignotus, propterea a *Chrysostomo* demum in lucem protrahi debebat; vide homil. eius primam in act. app. ed. opp. Ducaei t. III.

## § 5.

Bene tamen est, quod multi antiqui Codices scripti seruari sunt, paullatimque eruti e bibliothecis, per quos integer ad nos textus authenticus venit. <sup>e)</sup> de quibus qui volet cognoscere, praeter caeteros *Millium*, imprimisque R. *Simonem* Hist. Crit. T. II. c. 29. 30. et T. III. ad calcem, tum de nostris *Jassium* de Var. Lect. N. T. *Bengelium*, *Michaelem* de Var. Lect. N. T. et omnium dili-

diligentissimum *I. I. Wetstenium* itemque *Semlerum* V. C. in praeparatione hermeneut. P. IV. debet adire. f) Et latent nunc quoque plures in bibliothecis, nondum diligenter inspecti et collati, vt Sangallensi, Scorialensi etc. g) Florentinos quidem LXXIII. recenset *Lamius* de Erud. Apost. pag. 218. quos tamen non magni pretii esse plerosque, e. *Bardini* V. C. Catal. Mss. Flor. patet, vt alios mittamus.

e) Nostra aetate Codd. Hispani, Itali, Gallicani, Vindobonenses, Moscouienses, Angli, Manhemensis.

f) Adde: *Griesbachium* in Symbolis criticis, Hae 1785. *Michaellem* in Ed. 4. Introd. in N. T. p. 545. sqq. *Birchium* et *Moldenhauerum* Praef. ad Ed. N. T. Hauniensem 1788. *Matthaeium* in sua N. T. Ed. passim.

g) Fortasse etiam in coenobiis Orientis, potissimum Maronitarum. De Codd. Monasteriorum graecorum in monte Atho parum, vel nihil sperari posse, a *Villoiseno* sumus edocti.

## § 6.

Antiquissimi putantur *Vaticanus* et *Alexandrinus*, literis vncialibus continentibus scripti: in quibus tamen magnus est eruditum dissensus, vtri primae partes debeantur, aliis pro Vaticano pugnantibus, aliis pro Alexandrino. De hoc imprimis videndi editores versionis LXX. Anglicani Proleg.

N

T. II.

T. II. e. I. propos. XV. f. de illo *Zaccagnius* l. c. p. 56. de utroque *Wetstenius* in Proleg. N. T. <sup>h)</sup> Vtrumque e versione latina interpolatum, dubitare non sinunt ea, quae *Wetstenius* tradit, in Alexandrino quidem ipsa lectionum comparatio. Commemoratur Vaticani lectiones interdum *Brugeois* in *Notat. Var. Lect.* qui eius collationem habuit; suntque etiam inter eas, quae a *Caryophilo* editae sunt ad calcem Catenae *Possini*.

<sup>h)</sup> Vid. *Semlerus* de aetate Cod. Alexandrini, Hae-  
lae 1759. et b. *Woide*, cui et ipsam Codd. editionem  
debemus, notitia Cod. Alexandrini, repetita cur.  
*Spohnii* Lips. 1788. Ex latina versione interpolatum  
esse Codicem praeter exempla a Michaele prolata p.  
562. f. probatur etiam Ioh. VII. 3. ubi *δεδομῆτον* ha-  
bet, quod a Macedonianis contra Pneumatomachos  
introducitur esse dicitur. Meliora suppeditat *Gries-  
bachius*, qui ex triplici recensione membranam descri-  
ptam esse docet. De Cod. Vaticano post *Bentleium*  
Prolegg. p. 12. sqq. vid. *Wetstenium*. Hucusque ex-  
sisterunt tantum excerpta Codicis et exiguus variantium  
lectionum numerus, quapropter etiam de editione,  
quam sequitur Codex, iudicium adcuratum ferri non  
potuit. Conf. *Eichbornii* Allgem. Biblioth. T. II. p.  
373. f. Nunc maiorem segetem iam publicavit *Bir-  
chius* in Ed. N. T. Hauniensi, ubi conferenda sunt  
Prolegom. p. XIII. sqq.

### § 7.

Proximi his sunt, *Parisiensis*, <sup>1)</sup> mire ille  
con-

consentiens cum Alexandrino, sed valde lacunofus; cuius literae spongia quidem deletae sunt, superscriptis *Ephrem Syri* opusculis, sed ita, ut literae veteres appareant et legi possint: *Cantabrigiensis*,<sup>l)</sup> et *Claromontanus*, nunc *Regius* Parisiis,<sup>m)</sup> graecolatini, quorum alter Euangelia et Acta Apostolorum, alter Epistolas Paulinas continet, adhibiti, post *Stephanum*, imprimis a *Beza*: *Boernerianus*,<sup>n)</sup> *Augiensis* °), et *Sangermanensis* <sup>p)</sup> Epistolarum Paulinarum graecolatini: sed omnes pariter e latina versione interpolati.

i) Codex rescriptus forte sec. VI. ideoque antiquissimis. Videat. omnino *Griesbachius* Symb. Crit. p. I—54. et prolegomena ad N. T. ed. sec. Halae et Lond. 1796. Vol. I. p. CI.

l) Sec. VII. et accurate nunc collatus, sequitur recensioem occidentalem. Vid. *Griesbach* l. c. p. 55. sqq. Codex ipse typis nunc expressus est cur. *Kiplingio*. Cantabrig. 1793. qui eum cum Alexandrino de aetate certare putat: cf. *Valckenarii* obseruat.

m) No. 107. sec. VII. l. VIII. de cuius acquisitione inique iudicat *Wetstenius*, quem vide. Conf. *Griesbachii* prolegomena in N. T. ed. 2. 1806. Vol. II. p. XXII.

n) Graeco-latinus, vel interlinearis. Sed vid. *Matthaeius* in Praef. ad Ed. huius Cod. Misn. 1791.

o) Sec. IX. l. X. emtus a *Bentleio* et collatus a *Wetstenio*: pertinet ad recensioem occidentalem.



p) Descriptus a Parisiensi et Claromontano C et D apud Wettstenium et Griesbachium. Est sec. X, vel XI<sup>mi</sup>.

## § 8.

Nobiles etiam sunt, quamquam iuniores, *Vindobonenses*<sup>q)</sup>, *Basileenses*<sup>r)</sup>, in primis Codex Epistolarum Paul. quibus *Erasmus* usus est, *Parisini*, fragmenta Euangeliorum *Cottoniana*, collata a *Wetstenio*, et alii, quos longo ordine enarrare non est instituti nostri<sup>rr)</sup>. Magis ad rem nostram facit, tradere breuiter ea, quae ad usum legitimum Codicum, vel lectionum inde excerptarum, prodesse possint.

q) Vid. *Treschow* Tentamen descript. Codd. Vindob. Hauniae 1773. et *Alteri* Ed. N. T.

r) Conf. *Bengelii* Apparatus crit. qui de his codicibus adcurate exposuit.

rr) Cf. *Birchii* var. lect. ad text. act. app. epistol. cathol. et Paulin. Hauniae 1798. varr. lectt. ad textum euangeliorum. Ibid. 1801.

## § 9.

Oportet igitur primum vniuerse tenere: quos Codices scriptos laudamus, eorum paucos complecti totum scriptorum Corpus, ut Vaticanum, ut Alexandrinum<sup>s)</sup> etc. quod nobis signum aetatis non summae videtur: alios vel Euangelia sola, vel Epistolas

stolas Paulinas, vel Catholicas cum Actis, vel Acta sola: paucissimos habere Apocalypsin Ioanneam: deinde multos esse interdum aliquot foliis multatos, vt Alexandrinum, vt Parisinum §. 7. Cantabrigiensem, etc. Ex quo cautio est, ne, vbi alicuius dissensus nullus notatur, statim pro consensu eius interpretemur: in quo multi errauere, silentium tale pro consensu accipiendo <sup>1)</sup>).

s) Vterque tamen omittit Apocalypsin. Vide *Birchii* varr. lectt. ad textum apocalypseos. Hauniae 1800.

t) Agendum hic est de variis recensitionibus contextus graeci N. T. antiquissimis, ne in disquisitione de interpolationibus Codd. graecorum ex versione latina in transuersum abripiamur. Sequentes agnoscit *Semlerus* App. p. 45. *Alexandrinam*, scriptoribus Aegyptiacis et discipulis Origenis, Syris, Coptis, Aethiopicis communem; *orientalem*, quae Antiochiae, Constantinopoli florebat; *occidentalem* et *mixtam*, *Conf. Hermeneut. Vorbereltung* St. III. p. 2. sqq. Alter *Michaelis* Introd. p. 535. qui quatuor N. T. editiones s. recensiones principes fuisse adfirmat: *orientalem*, *Alexandrinam*, *Edessenam* et *occidentalem*. De duplici N. T. editione princeps exponit *Griesbachius*, tum in *Symb. Crit.* p. CXIII. s. tum in *Hist. textus Epist. Paul.*, et quidem de *Alexandrina* et *occidentali*. Recensitioni primae adiudicat in *Euangelis Codd. C. L. K. I. 13. 33. 69. 106. 118.* et *Euangelistaria 18. 19.* in *Epistolis Paul. Codd. A. C. 17. 46. 47.* patres Alexandrinos, Clementem, Origenem, Eusebium, Cyrillum, Damascenum, cum versionibus Syriacis, Copticis, Armenicis et Aethiopicis. Ad secundam

candam refert in Euangeliiis Cod. D. I. 13. 69. in Epistolis D. E. F. G. cum versionibus latinis et patribus lat. antiquissimis. Mixta recensio obtinet apud Chrysostomum et Theodoretum et in Codicibus aliis haud paucis. Conf. Praef. Ed. N. T. *Griesbach*. p. XXV. s. prolegomena ad ed. 2dam, Halae 1796. Vol. I. p. LXXIII. ff. Neque tamen huic adumbrationi acerrimus defuit aduersarius. Vid. *Matthaei* in Praefatt. et excursibus ad suam N. T. editionem maiorem; in prologo galeato editioni N. T. compendiariae praeposito; in prolegomenis et notis ad Euthymium Zigabenum, Lipsi. 1792. 4 Voll. et alibi. Media via incedit doctissimus *Hug*, Einleit. in die Schriften des N. T. Tubing. 1808. t. I. p. 437. ff.

### § 10.

Canendum etiam est, ne, diuersitate nominum decepti: nam mutatis dominis Codicum mutata etiam sunt nomina: ex vno Codice plures faciamus, quod etiam periti interdum commiserunt.<sup>u)</sup> Itaque historiam Codicum, nominum causas nosse, et lectiones inter se comparare oportet, vt consensu perpetuo, praesertim in lectionibus insignioribus, moneamur.

u) Sic v. c. vnus idemque est Codex Stephanianus et Cantabrigiensis, quod tamen *Bezam* et *Simonem* lauit. Vide *Wetstenii* prolegomena ad N. T. Vol. I. p. 28. s.

### § 11.

Nec illud alienum est videre, an diuersi Codices

Codices vel e communi exemplo ducti sint, vel alter alterius apographum fit, vt v. c. in Codice Boerneriano et Augiensi, Sangermanensi et Regio, vbique et in omni etiam levissimo errato consentientibus: v) propterea, quod tales libri non nisi pro vno, in auctoritatibus numerandis et ponderandis, valere possunt.

v) Siue etiam, an Codex ex Editione iam impressa descriptus sit, vt Rauianus ex Edir. Complutensi. Vid. *Pappelbaum* Untersuchung der Ravischen Handschrift des N. T. Berlin 1785.

## § 12.

Sunt etiam diuersa genera Codicum. Nam alii sunt *mere graeci*, alii *graecolatini*, alii *Lectionaria*, in quibus modo sunt pericopae librorum sacrorum, quae inter sacra praelegerentur. In quo tenendum, graecolatinos omnes esse e versione latina interpolatos, x) in Lectionariis autem cauendum, ne aliis in locis, quam quorum pericopas habent, eorum auctoritate utamur. y)

x) De hac re nulla est controuersia: hi enim Codices originem suam repetunt a Graecis vnitis, qui, vt paupertati suae consulerent et bonam gratiam apud Latinos inirent, contextum graecum ad versionem latinam refinxerunt. Quam ob rem Codices isti non plane sunt relinendi, quum antiquae Italiae multas egregias lectiones inuisse constet. Vid. *Semleri* Appar. p. 44. et vers. vet. lat. cod. D, ad Act. III, 12.

y) De

1) De Lectionariis docte et diligenter prae reliquis egit Cel. *Matthaeus* in sua N. T. Ed. passim. Conf. vetustum ecclesiae Graecae Constantinopolitanae euangeliarium ed. C. F. *Matthaei*. Lips. 1791.

### § 13.

In mere autem graecis videndum, vtrum sint puri, an e latina versione correcti, vel potius vitiiati.<sup>2)</sup> Ac puritas quidem intelligitur e dissensu a versione vetere latina, in locis maxime insignioribus, consensuque cum versionibus e pure graeco factis, maximeque cum Patribus graecis antiquioribus, *Origene*, *Chrysostomo*, *Theodoreto* et similibus, praesertim in Commentariis: nam textus biblicus ipse, insertus Commentariis, correctus interdum est ab editoribus, v. c. V, 16.

2) Faciem longe aliam res induit post recentiores *Semleri* imprimis et *Griesbachii* disputationes de recensione varietate. Praecipit enim vir doctissimus *Symb. Crit.* p. CXI, „Vehementer errant, qui e consensu cuiusdam cum versione latina illum ex hac interpolatum esse effici posse putant. Non e latinis libris, sed e graecis libris recensione occidentalis deriuandae sunt eiusmodi lectiones etc.“ Sed vide locum ipsum,

### § 14.

In quo magna, et difficilis, nec facile satis perspicue explicanda, certe nondum satis explicata quaestio oritur, primum, vnde ille tantus dissensus antiquioris latinae versionis  
nis

nis a graeco textu ortus fit; deinde, quare et quomodo ad illam versionem textus graecus correctus sit: <sup>a)</sup> cum satis hodie constet, id antiquioribus omnibus, quos supra memorauimus, Codicibus §. 6. 7. esse commune.

a) Difficilior et impeditior est disputatio de origine diuersarum recensionum: pauca enim sunt, neque satis certa, quae de Codd. MSS. *Origenis, Pierii, Pamphili, Eusebii, Euthalii, Athanasii* literis mandauit antiquitas. *Alexandrina* tamen recensio ab exemplis descriptis ex apographis, *occidentalis* ab exemplis ex Codicibus singulorum librorum, vel tantum priuata opera collectorum, descriptis, repetenda videtur. Vide *Hugii Einleit.* t. I. p. 388 ff.

#### §. 15.

Ac de graecolatini fortasse non mirum fit, si scribae latini, mediocriter graece docti, dissensum graeci textus, itemque verborum graecorum inscitiam, ad corruptionem trahentes, hunc cum latina in concordiam redigere, et notiora verba substituere, ausi sunt; sicut Graeci textum hebraicum a Iudaeis corruptum putabant, ubi a graeca versione dissentiebat: cuius generis multa et perspicua exempla reperiuntur (v. *Michaelis de Var. Lect. N. T.* p. 92. 100.): de mere graecis, in Ecclesia graeca scriptis, difficilior est, aliquid pro certo dicere. Nos coniectura nostra eo duxit, vt Aegyptiis hanc interpolatio-

lationem suspicaremur deberi, adiuuante coniecturam Alexandrino Codice. Etenim satis constat, estque cum ab aliis, tum ab *Edm. Richerio* demonstratum in *Concil. Gen. historia*, Aegyptios Patriarchas, cum inde ab *Athanasii* tempore, hoc est Sec. IV. cuius aetatem nullus graecus Codex attingit, subinde auxilium Romanorum aduersus Conciliorum decreta expeterent, Romanis plus iusto fauisse atque assentatos esse. Quae res facile potuit eo duci, vt Codices suos cum latinis conformare inciperent, vel vt id ad dignitatem et auctoritatem Ecclesiae Rom. pertineret. Latinae autem linguae notitiam non modo a commercio cum Romanis, vt placet *Wetstenio* T. I. p. 19. sed etiam, et multo magis, e vicinia Africae et commercio cum ea hausisse videntur. Sed est tamen res incerta. <sup>b)</sup> Posset fortasse liquidius iudicari, si accuratam collationem Codicis Vaticani haberemus, et vnde ille venerit, sciremus.

- b) Forte etiam probabilitate destituta. Si enim Alexandrini huic Romanorum iugo se subdidissent, aegerrime tamen concipitur, quomodo in reliquis Orientis prouinciis contextus N. T. ad linguam barbaram et inuisam conformatus esse potuisset.

### § 16.

*Origenis* quidem, atque antiquioribus  
tempo-

temporibus, nondum in Aegyptiis libris hanc interpolationem fuisse, et e lectionibus clarum est, quas in Commentariis sequitur, et e contextu, ab ipso e libris antiquioribus formato.<sup>c)</sup> Nam hic est textus librorum Caesareensium, quem crebro descriptum (v. *Euseb. Vit. Const. M. c. 56.*), ad quem libros scriptos conferri solitos, omnis Asia et Graecia secuta est. Ne *Euthalii* quidem, qui seculo quinto medio fuit, temporibus illam interpolationem inuectam, saltem probatam fuisse, intelligitur ex hoc, quod *Athanasii* Ep. Alex. hortatu Caesaream profectus, cum Origenianis Codicibus exemplum suum Epistolarum contulit, et ad eos castigauit. Et ille quidem de frequenti interpolatione Codicum queritur, quam sua διορθώσεις sustulerit, collatis antiquis et bonis exemplis: sed ea interpolatio vnde facta sit, non tradit.

c) Neque etiam existare poterat, quia fontibus adhuc propior erat scriptura N. T. Vid. *Griesbachius* de Codicibus IV. Euangeliorum Origenianis. Halae 1771.

§ 17.

Quod ad latini exempli a pure graeco diuersitatem illam tantam attinet, in ea sunt quaedam, in quibus restant certe vestigia lectionis pure graecae, vt, quomodo ea orta sit, intelligi possit: veluti, *Matth. 6, 24.* ἀνδὲρ ἐστίν, *sustinebit.* 1. *Tim. 6, 20.* καὶ οὐκ ὀφείλεις, *Φωκίας,*



*Φωνίας, nouitates verborum* etc. In caeteris, in quibus nihil habet textus græcus, vnde latina lectio nasci potuerit, et sunt tamen sensu bonæ, vt 1 Io. 4, 3. *qui soluit Iesum*, *λύει*,<sup>d)</sup> pro *μὴ ὁμολογεῖ*, fortasse aliquis suspicetur cum *Hemsterhusio*, viros sanctos ipsos plura exempla sua manu scripsisse, et in aliis aliter quaedam expressisse, salua sententia, saltem hactenus, vt esset vtrique bona et vera: nam eius generis exempla etiam in humanis scriptis quaedam occurrunt.<sup>e)</sup> Quo constituto, vtrique lectio *θεόπνευτος* esset. Sed ei coniecturae fidem detrahit hoc, quod ea diuersitas non est vnins aut paucorum, sed omnium librorum: nisi dicamus, eos libri cuiusque vel epistolae exemplum sibi seruare voluisse, et propterea bis vel ipsos scripsisse, vel aliis dictasse. Omnino variae, vt in aliis libris, interpolationis causae intelligi possunt: de quibus infra dicetur.<sup>ee)</sup>

d) Sic *Socrates* H. E. VII, 32. et Latini nonnulli. Vid. *Griesbachii* Ed. h. l. Quae tamen lectio, licet difficilior, Iohanneae simplicitati conuenire non videtur, neque Codicum et versionum auctoritate sufficitur. *Ὀλύει* scholium est senioris interpretis. Vid. *Matthaeus* ad h. l.

e) De *Aristophane*, *Cicerone* et *Apollonio Rhodio* constat, illos bis edidisse *Nubes*, *Academica*, *Argonautica*. Idem de quibusdam libris N. T. suspicari aegre liceat, cum propter temporum illorum egestatem et inopiam,

opiam, tum propter apostolicam scribendi imperitiam.  
(Gal. VI, II.)

ee.) Vulgata lectio Act. III, 12. est εὐσεβείᾳ,  
Codd. vers. lat. pietate praeferunt et potestate. Poste-  
rior lectio, quam Irenaeus et Syrus commendant, sola  
accommodata esse videtur dicto apostoli; pietate enim  
claudio nunquam restitui poterat vsus membrorum.  
Quidni statuas itaque, nonnullis vulgatae codd. inesse  
ad h. l. vestigia lectionis purae graecae, v. ἐξουσίᾳ au-  
tem et potestate ortam esse siue ex intempestiva corre-  
ctione, siue e compendio scribendi?

### § 18.

Quod si alteruter textus interpolatus est  
humano ingenio, non profecto cum *Morino*  
Exerc. Bibl. I, 2. 3. et aliis statuendum est,  
interpolationem esse in graecis, quos puros  
diximus, libris, sed in latinis; e) propterea,  
quod graecus cum antiquissimis graecae Ec-  
clesiae, doctorumque graecorum primi, se-  
cundi et tertii seculi libris, saltem in pleris-  
que, contra latinos consentit. Caeterum  
bene habet, quod ille dissensus est in verbis  
modo, rem ipsam non attingit, nec analo-  
giae doctrinae vsu repugnat.

e) Etiam Sepulveda defenderat contra Erasimum in-  
tegritatem textus latini aduersus graecum. Sed de cor-  
ruptione versionum latinarum iam conqueritur *Hiero-*  
*nymus* in Commentt. ad Gal. II, 5. vbi *οὐδὲ* omissum  
erat in versione latina.

### § 19.

## § 19.

In Codicibus porro scriptis videnda est et *aetas* et *bonitas*. Et aetas quidem iudicatur maxime e modo scribendi, qua literas, accentus et interpunctiones, tum vero etiam ex aliis quibusdam vestigiis rerum in Codicibus occurrentium <sup>f)</sup>. Veluti, cum in Alexandrino sint Canones Eusebiani, et subscriptiones Epistolarum, in iisque verbum θεοτόκος de Maria, et ἀρχιεπισκόπος, eum Eusebio et Nestoriano aevo iuniorem esse patet. Nec scripturae antiquioris forma satis certum semper iudicium facit, quod satis constat, librarios, vel propter incitiam scribendi, vel ut Codicibus maius pretium esset, veterem scripturam imitatos, et non tam descripsisse veteres libros, quam depinxisse: de quo genere est notabilis, apud *Io. Gersonum* de libris scribendis, locus.

f) Literae vnciales sine accentibus et spiritibus produnt aetatem sec. IX. superantem: postea enim literae minores inualuerunt. Sed notandum est, librarios non semper descripsisse, sed etiam depinxisse Codices, ut maioris aetatis speciem conciliarent exemplis suis. Vide *Woidii* et *Kiplingii* praefationes codicum Alexandrini et Cantabrigiensis editionibus praemissas.

## § 20.

Bonitas autem Codicum iudicatur, non tam aetate, certe non sola: et recentiores  
etiam

etiam boni esse possunt, cum e bonis descripti sunt: quam primo paucitate et leuitate peccatorum et varietatis, deinde conseruatione veteris et bonae lectionis, vnde patet scilicet, et a diligente homine scriptos, et e bono libro ductos esse. Nec tamen viciosi Codices nullius vsus sunt. Nam interdum et ipsi lectiones optimas habent. Itaque ex omnibus optima, e legibus artis criticae, deligenda, de quibus suo loco dicetur <sup>ff)</sup>).

ff) V. c. Luc. II, 22. quo loco veram, vt videtur, lectionem *αὐτοῦ* pauci codices adseruauerunt. Reliqui praeferrunt *αὐτῆς* et *αὐτῶν*, quae a serie orationis contextae aliena sunt.

### § 21.

In iudicio de Codicum aetate et multo magis bonitate cauendum est, ne aliqua cupiditate decepti plus tribuamus, quam res et veritas concedat: quod fit, cum Codicis domini sumus ipsi, aut cum aliqua in re nostris opinionibus consentit. Omninoque totum hoc iudicium non debent sibi arrogare, nisi qui habeant oculos in hoc genere exercitatos, et iudicium rebus criticis recte tractandis adfuefactum <sup>g)</sup>).

g) Hoc est, qui Codices manu exaratos ipsi diligenter inspexerunt. Sine vsu enim et exercitatione non solum ipse parum proficias, sed te ipsum etiam, in iudiciis ferendis praesertim, aliorum sibilis saepius expositum videas.

CAP.

## CAP. III.

*De Editionibus N. T.*

## § 1.

Cum Codices quidam manuscripti e bibliothecis protracti venissent in notitiam hominum manusque, natum est laudabile consilium graeci textus edendi: et ut novi ac plures Codices, qui prodesse corrigendo textui posse viderentur, inuenti sunt, ita plures animum ad nouas editiones concinnandas adiecere <sup>88</sup>).

88) Conf. praefatt. editt. N. T. Complutensis et Erasmi.

## § 2.

Sed quamquam Codices graeci textus principatum in hoc consilio tenebant; tamen docti et usu criticarum rerum praediti viri alia etiam adiumenta requirebant, praesertim cum numerus Codicum talium non magnus suppeditaret, nec essent valde antiqui aut boni. Itaque Versiones veteres, quarum facultas erat, adhiberi coeptae, et Patrum non modo Commentarii in libros singu-

singulos, sed etiam alia scripta, in quibus loca quaedam ex iis libris vel explicarentur, vel per quamcunque occasionem commemorarentur. Nec abstinerebatur omnino a coniecturis, ut satis de Erasmi et Bezae revisionibus constat <sup>h)</sup>.

h) De Erasmi coniecturis res etiam est; sufficit evolvere apocalypsin in editionibus prioribus. Beza autem diserte testatur in epistola ad reginam Elisabetam editioni suae N. T. praefixa, se ex ingenio aut simplici coniectura ne apicem quidem mutasse.

### § 3.

Ad hunc modum igitur primum formatus est textus in editionibus principibus, deinde paulatim magis magisque expolitus, (ita certe voluere) ab aliis, quibus nova huius generis praesidia contigissent, novas semper editiones desiderante usu doctorum, quorum multitudini priorum exempla non sufficerent.

### § 4.

De his igitur ita dicemus, ut familias quasi editionum digeramus, et unde quaeque, et quomodo facta sit, breuiter tradamus, atque ita hanc editionum notitiam ad iudicandum accommodatam reddamus. Nam nuda editionum enumeratio, quae sola edi-

O

torum,

torum, locorum ac temporum notitiam dat, utilitatem nullam habet <sup>1)</sup>).

i) Editiones facilius diuidi possunt 1) in principes seu fundamentales, quae sunt *Complutensis*. et *Erasmi*. cae, 2) in editiones, quae ex aliis fluxerunt, vocatis tamen in subsidium Codd. MSS. recentioribus: huc refer editiones *Colinaei*, *Bogardi*, *Stephani*, *Bezae*, *Harwoodi*, 3) in editiones ex pluribus libris impressis compositas, v. c. *Plantini*, *Raphelengii*, *Elzevirii*, *Er. Schmidii*, *Bengelii*, 4) in editiones ex prioribus sine mutatione fontica repetitas. Sic v. c. Ed. *Erasmi* sequuntur Aldinae: Ed. *Stephani* Edd. *Oporini*, *Waltoni*, *Millii*, *Kusteri* etc. 5) in editiones cum collectionibus criticis, quas continent Edd. *Waltoni*, *Fellii*, *Mastrichtii*, *Millii*, *Kusteri*, *Bengelii*, *Wetstenii*, *Griesbachii*, *Matthaeii*, *Birchii*, *Alteri*.

### § 5.

Principes ergo editiones non nisi ad summum tres sunt, *Complutensis*, *Erasmi*, et quae a *Theod. Beza* curata est: e quibus caeterae omnes fluxere, quaedam cum noua e libris dote, pleraeque ita, vt meram superioris alicuius repetitionem haberent.

### § 6.

Prima *Ximenii* Card. impensis curata et expressa typis est *Compluti* a. 1514. F. sed aliquot demum annis post (a. 1517.) in lucem prolata, toto Bibliorum Polygottorum opere absoluto. In cuius textu con-

cinnando vñ sunt auctores Mñ Codicibus maxime Italicis, sed fere recentioribus, e. Sec. XIV, et XV., quibuscum scilicet saepe contra antiquiores, Patres graecos, et versiones antiquas consentit. Atque etiam contra ipsos saepe graecos libros textus concinnatus est ad latinam versionem, qualis tum extabat in editis exemplis: vt viderunt *Millius* et *Wetstenius* <sup>1)</sup>).

1) Editores vñ sunt Codicibus neque multis, neque antiquis. Vaticanum Cod. certe ad manus non fuisse constar. Quaedam ex versione latina receperunt in contextum, v. I. Ioh. V, 7. (vid. *Griesbachius* ad h. l.) et in locis quibusdam Apocalypseos multa ad illam refinxerunt. Versionum orientalium et patrum praesidio non vñ sunt. Vide in vtramque partem de hac Ed. disputantes, *Goezium* in libro: *Vertheidigung der complutens. Bibel. Hamb. 1765 et 1769.* *Walchium* in libro: *Neueste Religionsgeschichte, Lemgo 1771. 899. P. IV.*

## § 7.

Huius autem textus repetitus est a *R. Stephano* <sup>m)</sup> Paris. 1546. in Euangeliiis et Actis, *Plantino* s. *Ariamontano*, et in *Polyglottis Antuerpiensibus*, et separatim, vt a. 1580. a *Geneuensibus* porro, et in *Bibl. Polygl. Parisinis*: hinc ab ea parte, quam *Stephanus* secutus est, a *Wechelo*, *Waltono*, *Boeclero*, *Millio* <sup>n)</sup> et *Bengelio*. Quod tamen ita intelligendum, vt in nonnullis



nullis desertus sit, siue negligentia, siue consilio.

m) Maiore, patre Henr. et Rob. Stephani.

n) Hic sequitur tertiam Stephanianam. Editio ipsa prodit Oxonii 1707. repetita a Kustero 1710. et Lips. 1723. Multa eruditio profunditur in Prolegomenis lectu dignissimis. Collectio varr. lectt. e multis Codd. ac Patrr. et e versionum orient. interpretatione latina est instituta, quod ansam dedit *Bodenii* Criticæ Pseudo-Millianæ. Halae 1767. f.

### § 8.

*Erasmus* textum graecum primum a. 1516. adiuuante *Oecolampadio*, *Capitone*, *Gerbelio*, edidit, concinnatum ita, vt in Euangelis quidem Mstus Basileensis Sec. XV., in caeteris alius pro basi esset, eius autem textus e *Theophylacto* aliisque Patribus, item versione latina et coniecturis corrigeretur: in Apocalypsi etiam vltima graece de latino verterentur, quod in graeco Ms. deerant. Hic textus per singulas repetitiones a. 1519. 1522. 1527. 1535. factas °), praeterquam in vltimis, in non paucis, e scriptis maxime Patrum, quamquam et vno et altero nouo Codice scripto, in quarta etiam e Complutenfi, mutatus est, quae loca etiam adnumerat *Millius*. In tertia primum locus nobilis Criticorum dissensu 1 Io. 5, 7. insertus est. Causa illius varietatis

tatis et in festinatione viri fuit, tot res difficiles eodem tempore agentis, et librorum ab initio maxime paucitate, denique etiam in iudicando, illis quidem temporibus non admodum miranda, inconstantia.

o) Emendatissimae ex Edd. Erasmi sunt anni 1516. et 1522. proptereaque etiam rarissimae. Vide prolegomena *Wetstenii* in N. T. t. I. p. 120. f.

### § 9.

Erasmici contextus exemplum, etsi non eiusdem anni omnes, secutae maxime sunt *Aldina* <sup>p)</sup>, *Colinaei*, *Bogardi* <sup>q)</sup>, *R. Stephani*, in Epistolis, *Basileenses* aliae, ut *Heruagiana*, *Boecleri* parte altera, sed cum aberratione tamen quadam tali, qualem ante descripsimus (§. 7.). *Aldina* quidem fere non nisi per operarum lapsus aberrat, quos etiam *Erasmus* pro varietate lectionis commemorat. *R. Stephanus* autem in prima 1546. et secunda 1549., quae *mirifica* dicta est <sup>r)</sup>, ab ille quidem interdum, ubi omnes Codd. contra *Erasmum* consentiebant, ut ante in utraque *Colinaei* fecerat, cui ipse praefuit, in tertia anni 1550. f. exemplum anni 1535. prope sine exceptione secutus est, idque et in cacteris servatum. Primi exempli textum secutus est maxime in versione *Lutherus*, cum alius tum copia nulla esset: quamquam nonnulli *Hagenoen-*  
*sem*

*sem* a. 1521. malunt. Ab his quæ fluxerint minus nobiles, commemorare nil attinet.

p) Quæ prodiit 1518. forma maxima et valde rara est. In vniuersum Aldus secutus est Erasmus, sed centum fere locis discrepat. Quod quæ de causa factum sit, dici non potest: nam in caeteris etiam vitia typographica sunt seruata.

q) Quæ prodiit Parisiis 1543. 8. Fundamenti loco subiacet Erasmica, interdum etiam Colinaeum sequitur.

r) Propter initium |praefationis: *O mirificam regis liberalitatem!* Insunt tantum 14. sphalmata, correctæ in tertia a. 1550. quæ nulla continere errata vulgo dicitur. Vid. tamen *Gottfr. Olearius* ad Matth. p. 130. Editio est nitidissima et celeberrima propter collectionem primam varr. lectt. quæ libro inest. Exstat etiam quarta a. 1551. Geneu. 8. et quinta a. 1569. Paris. 12.

### § 10.

*Theod. Beza* primum textum suo modo e *Stephanica* tertia 1550. concinnare coepit, editum a. 1559. et 1565., post magis, adhibitis *Codd. Cantabr. et Claromontano*, *Versione latina, Syriaca et Arabica Actorum et Epistolarum ad Corinthios* a. 1582. maxime 89. 98. in quibus etiam suas aliorumque coniecturas adsciuit, diligens et modesti Critici laudem haud meritis \*). Caeterum id exemplum tum alii, tum *Henr. Ste-*

*Stephanus*, *Er. Schmidius* expressere: hic quidem etiam quaedam temere mutavit in textu, nemine aduersante. Nempe ista tum non curabantur.

s) Conf. *Wetstenius* Proleg. p. 146. seqq. et *Hugii* Einleitung in die Schriften des N. T. t. I. p. 269. f.

### § 11.

Ex *Stephanicae tertiae* porro et *Bezae* textu nouus formatus est, non constat a quo, editus ab *Elzeuiriis* a. 1624. <sup>t)</sup> quem, praeeunte *Curcellaeo* <sup>u)</sup> et *Leusdeno*, certatim secuti sunt postea omnes, *Oxonienſes* <sup>v)</sup>, *Mastrichtus* <sup>x)</sup>, *Wetstenius* <sup>y)</sup>, alique recentiores et vulgares editores, vt *Lipsienſes* <sup>z)</sup>, isque textus per incitiam harum rerum diu tantum auctoritatis habuit, vt, qui ab eo discederet, haud dubie corrumpere Spiritus sancti verba putaretur.

t) Editoris nomen hucusque latet: in fronte libri legitur: ex regiis aliisque optimis editionibus cum cura expressum.

u) Conf. *Calonius* de *Curcellaei* edit, socinizante.

v) Primum curauit *Fell* 1665. quae contextum *Waltonianum* sequitur. Secunda est a. 1702.

x) Cum varr. lectt. ex Cod. *Vindobon.* et *Ed. Fell.* *Canones Critici*, qui praemittuntur, nullius pretii sunt.

y) In

y) In Ed. quae prodit 1751. f. 2. Voll. fol., textum sequitur Elzevirianum, et locupletissimam varr. lectt. segetem ex Cod. Patr. et vers. continet. Prolegomena et libellos criticos recudi curavit Semlerus Halae 1762. et 1764.

z) Rechenbergius et Reineccius.

### § 12.

Similem, vt ita dicam, cinnum plurimum dedit Io. Alb. Bengelius <sup>a)</sup>, Tubingae a. 1734. h. e. Complutenfis, Erasmicae et Stephanicae, nulla syllaba, praeterquam in Apocalypsi, edita, quae non in editis esset, sed primis Rob. Stephano datis: quem delectum tamen in nonnullis et in ipso textu neglexit interdum et mutauit in Gnomone. Eius textus Lipsiae repetitus est a. 1737. et alibi <sup>b)</sup>.

a) Quae continere debet optimarum lectionum medullam nonnisi ex libris editis congestam. Margini additae sunt varr. lectt. cum iudicio editoris: adiectus est post calcem apparatus criticus multa ex Patribus excerpta et additamenta ad edit. Millianam continens. Vid. Wetstenius Proleg. p. 156.

b) V. c. Tubingae a. 1776. Huic adiungenda est Ed. N. T. Griesbachiana 1775. et 1777. qua noua studii critici N. T. epocha constituitur. Editio secunda nouis curis expolita lucem vidit Halae Saxonum et Londini 1796. et 1806. II. Voll. Adde edit. Harwood Lond. 1776. et 1784. 2. Voll. 12. (Marsh Zusätze zu Michaelis I, 450). Ed. Matthaei 1782—1788.

1788. XII. Tomos continens, de qua repetere nolumus, quae b. *Michaelis* Bibl. Or. P. XX. p. 107. seqq. XXI. p. 20. seqq. et *Eichborn* Bibl. Lit. Bibl. Vniu. Tom. II. p. 302. iudicauerunt. Conf: prolegomena *Matthaei* ad editionem N. T. compendiarium Vol. I. Viteberg. 1803. Propter easdem rationes (cf. Allg. Bibl. d. bibl. Lit. T. II. p. 102. sqq.) iudicium de Edit. *Alteri*, Viennae 1786. s. nobis remittitur. Notae interioris est N. T. Editio *Birchiana*, Hauniae 1788. propter varietatem lectionum ex Codd. Vaticanis, Escur. et Haun. vt et ex versionibus *Philoxeniana* et *Hierosolymitana* decerptam. Editio *Knappii* Halae 1797. praefatione egregia insignis, et *Schotti* Lips. 1805. noua versione latina instructa sequuntur recensionem *Griesbachii*.

## § 13.

Magna etiam expectatio fuit editionis a *Rich. Benteio* promissae, cuius specimen a. 1720. 1721. prodierat. Professio Viri de consilio suo indicat, et Codicibus graecis, quos nos e latina versione interpolatos dicimus, et latinis, in quibus *Hieronymi* versionem genuinam esse putaret, quae plane *Origenis* exemplum sequeretur, plus, quam probari potest, tributurum, et ita textum suum pro *Origeniano* venditurum fuisse. In quo non vnus viri magni error fuit. c).

c) Conf. Prolegomena ad N. T. graeci editionem accuratissimam, Amstelae. 1730. 4. et *Westenijs* Proleg. p. 153.

## § 14.

## § 14.

Caeterum haec ipsa editionum recensio; et per eam patefacta textus, quem receptum et vulgatum appellamus, origo, docet, quid de quaque editione sit statuendum, itemque de textu, qui hodie vulgatus et receptus appellatur, et ab imperitis propemodum pro diuinitus curato colitur <sup>d)</sup>). Quae res saltem modestiores homines in iudicando facere debet.

d) Vid. *Hugii* *Einleitung* t. I. p. 270. f. et *Matthaei* praef. ad euang. Matthaei p. 28.

## § 15.

Auctoritas cuiusque textus et editionis nititur auctoritate librorum et veluti fontium, e quo fluxit. Itaque recte vtetur editionibus vulgatis, qui primum, vnde et quomodo concinnatus sit cuiusque textus, cognouerit, deinde in locis variantibus delectum recte facere ex legibus sanioris criticae didicerit. Eae quae sint, proprio loco trademus.

## § 16.

Sed in illo originis iudicio oportet tenere, primum, editoribus non nimis facile esse credendum, cum multitudinem, antiquitatem et bonitatem Codicum commemorant,

rant, quae fuit olim valde frequens editorum, plerumque vana, professio: deinde, quos commemorent Codices, non esse intelligendos solos graecos, quos primi editores habuere perpaucos, sed etiam latinae versionis, Patrum graecorum et latinorum, partim etiam editionum superiorum: cuius rei ignoratio multos, vt in editionibus humanorum scriptorum, sic in Complutensibus, *Erasmo Stephanoque* mirifice decepit parum peritos consuetudinis illorum temporum de talibus rebus loquendi. Caeterum de editionibus, qui accurate volet cognoscere, *Millium, Bengelium, Wetstenium* debet adire \*).

e) Cum Biblioth. saer. post le Longii et Boernerii curas continuata a *Maschio*, Halae 1778. sqq.

---

CAP.



## CAP. IV.

*De Versionibus.*

## § 1.

Cum doctrina christiana breui tempore quaquauerfum propagata ad populos peruenisset, aut omnino expertes graecae linguae, aut saltem alia vernacula vtentes, statim post Apostolorum tempora vertendorum in alias linguas librorum *ἑρπνεύσαν* venit necessitas <sup>f)</sup>, si non tanta, vt sine versionibus Ecclesia, v. c. latina, stare non posset, vt *Waltono*, *Garbello* placet, at haec, vt sine ea multa et magna opportunitate careret.

f) Vbique enim terrarum fere erant profelyti, qui graecam linguam non intelligerent. Conf. in vniuersum de versf. antiqq. agentem *Semlerum* in libro: Versuch, die gemeinnützige Auslegung des N. T. zu befördern, p. 160. sqq.

## § 2.

Itaque antiquissimis temporibus versiones pluribus linguis curatas testantur *Eusebius* in Or. in Laud. Const. M. p. 662. et alii veteris Ecclesiae doctores <sup>g)</sup>, apud *Fabric.*

*bric. B. G. IV*, 5. p. 191. (ed. 1.), quorum tamen testimoniis id satis firmari negat *Ios. Blanchinus*, Proleg. Euangelarii T. I. p. 78. Sane illis testimoniis tantum firmatur, versos esse libros N. T. in alias linguas; temporis autem nulla certa et definita significatio est.

g). V. c. Theodoretus, Chrysostomus. Latina quodam translatione tanquam indubiae auctoritatis libro iam Tertullianus utitur Sec. II. Vid. Semlerus ad Proleg. *Wetstenii* p. 584. sqq.

### § 3.

Antiquissimam putant, quidam etiam ab Apostolo vel Apostolico viro factam, *Syriacam*<sup>h)</sup>, quam per *Mosen* quendam, *Ignatii*, Maronitarum Patriarchae, ad *Leonem X.* et *Iulium III.* Legatum, illatam Europae, primus Vindobonae a. 1555. edidit *Alb. Widmanstadius*, post separatim et in Polyglottis Bibliis *Plantinus* et *Hutterus*, etiam Apocalypsi per *Lud. de Dieu*, et Epistolis Petr. II. Iohannis II. et III, et Iudae per *Pocokium*, auctam, in Polyglottis Paris. et Londin. *Gutbirius*, et *Carolus Schaaf* Lugd. Batav. 1709. 4. (ed. 2. 1717.) *Tremellius* locum 1 Io. 5, 7. a se Syriace e graeco versum addidit, sed in margine, imitante *Gutbirio*, qui et in textum intulit, ut locum de adultera et ipse et Londinenses

in

in Polyglottis e Ms. Vsserii, qui in margine erat ponendus.

h) In *Assmanni* Bibl. Or. T. II. p. 86. provocatur ad Codicem huius versionis Sec. I. ex additamento membranae in fine. His tamen additamentis, subscriptiones vocant, merito detrahitur fides in re critica.

Versio ipsa adpellatur  $\text{I} \Delta \text{A} \text{D}$ , simplex, literalis, et iam ante schisma Eurychianum et Nestorianum, fortè Sec. II. facta est.

#### § 4.

Vtrum e graeco an latino exemplo ducta sit, dubitant; sed e graeco factam docet Cel. *Michaelis* de Var. Lect. N. T. §. 21. etiam *Simone* Hist. Crit. T. IV. c. 13. 14. 15. docente, eam saepius cum graeco textu contra latinum, quam cum latino contra graecum consentire<sup>i)</sup>; quod tamen et ipsum fit interdum: vnde patet, e minus interpolato, sed interpolato tamen Codice factam esse. Caeterum ex ea facta est *Persica* vetus IV. Evangeliorum, quae cum *Sam. Clerici* versione et *Th. Grauii* notis in Bibl. Polygl. Lond. vulgata est. Altera, cuius particula edita est Lond. 1657. post integra per *Whelocum* et *Pierfonum*, de graeco, sed Sec. XIV. demum facta est.

i) E graeco exemplo fluxisse versionem, nunc dubitari nequit: vid. *Michaelis* Introd. in N. T. ed. 4.

p. 382. qui tamen alio loco (cur. in vers. syriacam Acr. Apost.) nobis vix persuaserit, illam ex Itala interpolatam esse. Probabilius hoc viderur, versionem Sec. VIII. vel IX. mutationem ex Codd. graecis recensionis occidentalis esse perpessam, quapropter falsis lectionibus scatet, neque auctoritate critica pollebit, nisi ope vers. arabicae et persicae ad pristinam simplicitatem fuerit reducta. Conf. *Renschius* Syr. Interpr. cum N. T. collar. Lips. 1741. et *Weberus* de Usu vers. syr. hermen. Lips. 1773. ante omnes autem *Storrius* Observatt. super N. T. vers. syriacis, Stuttg. 1772 et *Hag* Einl. I. p. 292. f.

## § 5.

Ab illa vetere Syriaca, quae et simplex dicitur, diuersa est altera recentior *Xenayae Philoxeni*, cuius auctoritate facta, est a *Polycarpo* quodam, etiam *Heracleensis* dicta a *Thoma* Episcopo Heracleensi, qui eam recensuit diligenter <sup>1)</sup>. Item *Barsalibaei*, qui eam Sec. XII. rursus in lucem dedit; de qua qui volet cognoscere, adeat Cl. *Michaelem*, Introd. in N. T. p. 211. Sed multo magis *Ridleii* Diss. ad calcem *Wetstenianorum* libellorum a *Semlero* V. C. editorum.

1) Edita nunc est Oxonii 1773. a *White*. Erudite, ut solet, de hac versione sententiam suam exposuit *Storrius* Repert. Eichhorn. T. VII. p. I. sq. Diuersa ab hac est Hierosolymitana, lingua chaldaizante infra Sec. IV. et VI. Hierosolymis confecta. Vid.

Adler versiones N. T. syriacae simplex, Philox. et Hierosol. denuo examinatae, Hafniae 1789. 4. l. III. p. 137. f.

## § 6.

*Coptica* versio ab *Dan. Wilkinsio* Borussio Oxon. 1716. cum Versione latina, *Crosii* et *Iablonskii* iudicio, parum illa accurata, edita, etsi non est *Origene* antiquior, ut *Wilkinsio* placet, cum Evangelia ad *Eusebii* canones distincta sint, et in Epistolis *σιχοι* numerentur, quod *Secul. V.* redolet, quia ea distinctio est ab *Euthalio*: tamen antiqua est. Vtrum e graeco an latino exemplo fluxerit, ambigitur, illud *Millio* Proleg. n. 1407. hoc *Whitbio* I, 4, 1. defendente <sup>m</sup>). Certe saepe cum latino perspicue contra graecum consentit, vid. v. c. Var. Lect. ad 1 *Cor. VII. init.* et *VI. extr.* quae tamen et ex interpolato iam tum graeco textu esse possunt.

m) Constat nunc, illam *Sec. V.* ex Codd. graecis factam esse. Continet multas bonae frugis variantes lectiones, quae maximam partem cum Patribus Alexandrinis consentiunt. Vide lectiones, quas excerptas dedit b. *Woide* in *Michaelis Bibl. Or. T. X.* pag. 198. et fragmentum Evangelii S. Iohannis graeco-coptico-thebaicum *Sec. IV.* ex Ed. *Georgii*. Romae 1789. 4. *Münter* über das Alter der koptischen Uebersetzungen des N. T. in *Eichbornii bibliotheca literaturae biblicae* vniuers., t. IV. p. I. ff. 385. f.

## § 7.

## § 7.

*Aethiopicam* commemorare creditur *Chrysostomus*, in homil. in *Io.* 2. Itaque ea, quae nunc exstat, ipso antiquior putatur. Sed ex illo loco nihil certi potest colligi. Aethiopes quidem *S. Frumentio* tribuunt, cuius aetas in Constantini M. tempora incidit. Eam e graeco factam, defendit Cel. *Michael.* de Var. Lect. N. T. §. 24. 25. Nam quod pluribus locis cum latino consentit, causa esse potest haec, quod ea a *Tessu Tzione*, monasterii Aethiopici monacho, *Romae* a. 1548. 49. edita est e Codice lacunoso, et a latino suppleta et interpolata <sup>n</sup>), adiuuante *Mariano Victorio Reatino* et alio perito. Repetita in Polyglottis Lond. etiam vitiosior facta est. Versionem autem latinam vtramque vitiosissimam periti iudicant. v. *Michaelis* l. c. §. 54. 55. et in Praef. ad C. A. *Bodii* Collat. Euangel. Matth. cum Vers. Aethiop. *Hal.* 1749. Quo minus haec collatio solum editum exemplar sequi debebat, praesertim, cum et Aethiopes hoc exemplum, vt diuersum a suis, non probent. v. *Ludolphus* in Praef. Lex. Aethiop.

n) Quapropter prudenter admodum ad partes est vocanda. Apocalypsin Iohannis imprimis legi nunc in Abyssinia, auctor est *Bruce*, travels p. II. *Hng* Einleitung I, 349. &

P

§ 8.

## § 8.

*Armenica* versio edita est Amstel. 1668. 8. ab *Vscano*, Episcopo Armeno, illam ipsam ob causam misso publice. Eam *Chrysostomi* aetate factam ferunt a *Miesrobo*, litterarum Armenicarum inuentore (de cuius Vita excerpta sunt apud *Sainjore* i. e. *Simonem*, Bibl. Crit. T. IV. p. 196. f.) adiuvante *Mose* discipulo, e Codice graeco, de Concilio Ephesino allato, auctore *Mose Chorenensi*, Hist. III, 61. p. 313. quamquam ante iam vel factam vel tentatam idem tradit III, 53. p. 299. Interpolata tamen creditur e latino per *Vscanum*, ipso in praefatione fatente °). Certe locus 1 Io. 5, 7. qui est in illo versionis exemplo, in Mssis non reperitur. v. *la Croze* Thes. Epist. T. I. p. 359. Nachricht von einer Hällischen Bibl. Vol. III. p. 189. add. *Simonem* Hist. Crit. IV, 17. inpr. Bibl. Crit. IV. pag. 193. f. et eiusdem Epist. Select. P. IV. n. 24.

o) Neque tamen ista interpolatio ad omnes libros penetrauit. Consentit saepius cum vers. Coptica, cum Origene et recensione Alexandrina. *Hug* l. c. l. 332. ff.

## § 9.

*Arabicae* versiones, alia de Syriaco aut Coptico, aliae de Graeco factae, omnes  
-Mu-

Muhammede iuniores putantur. Quae Romanae 1591. et 1619. edita est IV. Euangeliorum versio, valde consentiens Syriacae, ab eadem tamen in multis discrepans, ad latinam quoque interpolata; ea vero repetita est in Bibl. Polygl. Paris. addita versione reliquorum librorum recentiori, sed stulte interpolata a *Gabriele Sionita*, hinc in Polygl. Londin. sed e Mss. correctae. Altera autem totius N. T. edita ab *Erpenio* Lugd. Bat. 1616. e libro Coptico, sine interpolatione et versione, in Euangelis fere consentit Romanae, in Epistolis Syriacum exemplum, iudice *Erpenio*, in Apocalypsi, Copticum sequitur, ut placet *Michaeli* l. c. §. 29. Criticum usum habent solae haec, quae de Graeco factae sunt Melchitarum, qui lingua Graeca in sacris publicis utuntur<sup>q</sup>).

q) Collectiones adcuratae versionum Arabicarum cum discrimine aetatis institutae nondum exstant. Vid. *Storrus* de Euangelis Arabicis. Tubing. 1775. *Hug* l. c. I, 354. ff.

### § 10.

Seculo quarto etiam Geticam in linguam verisse N. T. traditur *Vlphilas*, Gedarum Episcopus: eiusque creditur esse versio Euangeliorum, quae de Codice argenteo edita est ab *Iunio* et *Marschallo*, Dordr.

P 2

1665.



1665. et Amstelod. 1684. a *Stiernhielm*, Holm. 1671. et nuper ex *Er. Benzeli* apographo ab *Eduardo Lye* Britanno, Oxon. 1750. *Crosius* Thes. Epist. T. III. p. 78. e loco inuenti Codicis, monasterio Werdensi, et literarum genere, Francicam potius quam Geticam facit: sed et in ista regione Getae fuere: e quo genere sunt *Sunila* et *Fretela* apud Hieronymum, ad quem de dissensu graeci et latini textus scripsere. Vtuncque sit, lectiones habet eas, quae non nisi e graeco textu venire potuisse videantur, concedente nuper, post Bengelianam demonstrationem, App. Crit. pag. 408. etiam *Wetstenio* T. I. p. 114. s. quod conuenientius Geticae quam Francicae versionis videtur. add. *Ihrii* V. C. Vlphilam illustratum<sup>r</sup>). Huius versionis aliam particulam in Bibliotheca Guelferbytana repperitam, in lucem nuper, a. 1762. 4. edidit *Knittelius*, Vir doctissimus.

r) Et Comm. de lingua Codicis argentei. Vpsal. 1754.

### § 11.

Latinas primis Seculis plures fuisse, *Augustini* testimonio (Doctr. Chr. II, 11. 14.) persuasum est plerisque<sup>s</sup>): quod quidam, Vulgatae inepto fauore, vt *Sabatierius* (in Praef. general. Bibl. Vers. Ital.) et *Blanchinus*

*nus* (in Prolegom. Euang. T. I. p. 81.) de exemplarium multitudine diuersorum, *Garbellus* de Scholiastis et Interpretibus, frustra intelligi volunt, reclamantibus verbis, quorum perspicuitas nulla interpretatione contraria obscurari potest. Et cum eodem paene tempore tot V. T. versiones graecae diuersis locis factae sint, non profecto de latinis incredibile est, quae etiam facilius et celerius ob Voluminis breuitatem fieri poterant. Est denique antiquorum librorum scriptorum ea diuersitas, quae manifeste diuersas versiones arguit.

s) Adde *Hieronymum* Proleg. in Euangel. *Hug*  
I, 380. ff.

### § 12.

Omnium autem probatissima et usu tristissima fuit ea, quam *Hieronymus* *Communem* et *Vulgatam* vocat, ipso nomine, alias praeter hanc fuisse, indicans, post etiam *Vetus* dicta, ut ipse appellat in Praefat. in Iosuan, posteaquam ipsius castigatione utcumque renouata est.

### § 13.

Eam in Italia factam, ut facile concedi potest, etsi nulla necessitas est, in silentio veterum, et lingua latina multis regionibus  
Euro-

Europae, et Africae magna parte, pro vernacula valente; sic *Italā* vocatam, quod vno *Augustini* (de Doctr. Christ. II, 15.) testimonio creditur vulgo, dubitat *Bentleius*, pro: *in ipsis autem interpretationibus Itala caeteris praeferatur: nam est verborum tenacior, cum perspicuitate sententiae: legendum censens: illa caeteris pr. quae est* etc. sequente *Casleio*, (Catal. Bibl. Cotton.) placetque etiam *Venemae* V. C. Quam sententiam adiuuant sane non pauca: primum, forma orationis et contextus: est enim ibi generale praeceptum de versionibus, cui subiicitur post de latinis separatim et nominatim: deinde quod *Augustinus* graeca ignoravit, saltem hactenus, ut de versione iudicare non posset sine audaciae notā: tertium, variatio Mssorum in illo verbo, in *Casleio* notata. Contra tamen disputat *Sabatierius* in Prolegom. Biblior. veter. Ital. cui addendus *Moshemius* de rebus Christian. ante Constant. M. pag. 224. seqq. qui tamen valde fluctuat <sup>t)</sup>).

t) Hoc certe videtur probabile, hanc versionem sub finem Sec. II. factam esse, 1) quia ecclesiae latinae versione carere vix poterant, 2) quia contextum sequitur antiquitate venerabilem, 3) quia Patres latini Sec. III. cum illa consentiunt. Videtis Fragmenta versionis latinae antehieronymianae in *Pauli* Repert. Lit. Or. et Bibl. nov. p. III. p. 115. sqq.

## § 14.

Quocunque nomine venerit olim, in ea restituenda a longo tempore laboratum est, primum a *Flaminio Nobilio*, iuuantibus aliis viris doctis, imprimis *Ant. Agellio*, e scriptis Patrum Ante-Hieronymianorum eam restituere conato Rom. 1588. deinde a *Io. Marcianaeo*, qui Codicibus versionis *Hieronymo* antiquioribus uti coeperat, nuper autem a *Petro Sabatierio* in Bibliis veteris Versionis Italicae, *Rhemis* a. 1745. editis, et *Ios. Blanchino*, qui e Codd. antiquis Evangelitaria latina edidit a. 1749. ut alios minus claros taceam, quos *Sabatierius* in Prolegom. §. 166. recenset.

## § 15.

Horum opera etsi grata doctis est, ut debet, atque etiam utilis esse potest iis, qui recte uti sciant, tamen, quod voluit, aut debuit, nec perfecit, nec perficere potuit: et illa quamvis speciosa Codicum et scriptorum Ante-Hieronymianorum iactatio, tamen probabilem eius restituendae spem non fecerit: nec crediderim *Fabricio* B. G. IV, 5. p. 198. adfirmanti, eam e *Bezae* Codicibus et Regio secundo, (qui est ipse *Claramontanus Bezae*) restitui posse.

## § 16.

## § 16.

Nam Patres quidem Ante-Hieronymiani et ab librariis et ab editoribus ad Hieronymianam correcti saepissime sunt, ut in *Ambrosio* et *Augustino* deprehenderunt editores Benedictini, in aliis alii, et e diuersis vel versionibus, vel eiusdem versionis exemplis hausere, quidam etiam, qui graece scirent, ipsi verba graeca subinde latina fecere, nec adstringi se passi sunt vulgatae versioni: Codices autem scripti, in quibus est versio discrepans ab Hieronymiana, ita inter se dissentiunt, ut nullo modo ad concordiam redigi possint <sup>u)</sup>. Quod tanto minus mirandum est, cum iam *Damasi* et *Hieronymi* tempore consonantia exempla reperiri non possent. Itaque bene Hieronymus in praefatione in Euangelia: *si latinus interpres contra graecum textum audiendus, quaesierim, quis sit audiendus?*

u) Quia contextus latinus ad Codices graecos iuniores refectus est, quod de Codice Brixienti inprimis constat. Eo magis mireris, recentiores Criticos vers. vulgatae tantam auctoritatem tribuisse I Ioh. V, 7. Vid. *Wetstenius* ad h. l. p. 725.

## § 17.

Non eundem auctorem habuisse, etsi non abnuerim simpliciter, e diuersitate quidem filii, nescio an vere, colligat *Millius*,  
(Pro-

(Proleg. n. 515.) diuersitatem scilicet *Stili* interpretans, cum eadem verba graeca non iisdem latinis vbique exprimuntur. Verborum graecorum plus iusto tenacem fuisse, res ipsa docet, servatis quippe graecis generibus, casibus, numeris, temporibus, et constructionibus contra Grammatica praecepta, vt *Aquila* in versione V. T. graeca fecerat. Vnde clarum est, auctorem aut non satis graece, vel potius latine doctum fuisse, aut, quod fortasse propius fidem est, stulta quadam et Iudaica superstitione laborasse, atque adeo Ex-Iudaenum fuisse. Quem enim tum alium, nisi ista gente ortum, tali superstitione infectum fuisse credibile est? Et tamen interdum exquisitior est latinitas, certe in singulis verbis: versioni graecae V. T. in hoc quoque similis.

## § 18.

Itaque cum etiam mendosiores paulatim facti essent Codices; fortasse et barbaries eius rideri coepisset, essetque periculum, ne ille contemptus etiam sententias, vt fit, contingeret; *Hieronynus*, hortante *Damascō* P. R., correctionem eius et emendationem suscepit, non vt nouam e graeco faceret, sed vt primo vitia linguae tolleret, deinde collatis Codicibus graecis Caesareensibus, quae sensum viderentur omnino mutare,  
cor-

corrigeret e graeco, reliqua relinqueret intacta, ne nimis a lectionis superioris consuetudine discrepans, offenderet imperitos et inuidiosa esset. Vnde fit, vt Commentarii interdum a Versione dissentiant. Neque tamen satis constans in eo fuit. Sed ne licquidem potuit effugere grauem intuidiam suorum, ne *Augustino* quidem latinitatis vitiosae correctionem probante: nec ante octauum seculum per omnem Ecclesiam istius castigationis exempla sunt recepta v).

v) Et quae recepta sunt, his e regione adponi solebat versio Itala, seu antiqua, id quod aeuo sequiori recensio mixtae ex hac et illa conflatae ansam dedit. *Hug I, 389.*

### § 19.

Huius autem exempla recensiois ab se edi professi sunt *Marcianaeus* in *Hieronymi* Bibliotheca diuina, et *Sabatierius*, l. c. Sed nec illa pura sunt. Etenim illud ipsum Hieronymianum exemplum rursus, partim per librarios, partim per correctores, saepe ac multis locis, modo e vetere, modo e libris Patrum, modo ex ingenio ita interpolatum et mutatum est, vt in integrum restitui nulla ope possit. Atque haec ita interpolata Hieronymiana est, quam hodie *Vulgatam* appellamus. Eius editiones meliores et ad veterrimos libros correctae sunt *Stepha-*

phanianae *Roberti*, inprimis anni 1540. 1545. et 1546. *Hentenii* 1547., ac Theologorum Louanienfium a. 1557. 1573. in quibus praecipua opera fuit *Lucae Brugenfis*. Clara est etiam *Sixtina* recensio, Rom. 1590. curata, quam mox excepit a. 1592. *Clementina*, iur multis discors *Sixtinae*, quam plerique post editores secuti sunt; estque *Clementini* exempli textus hodie, qui vulgatus dicitur. Nam editiones primae, vt *Schefferiana*, *Iensoniana* et aliae antiquiores recensione *Stephaniana*, raritatis magis commendationem habent, quam vtilitatis criticae, factae quippe ex libris forte oblatis sine critica diligentia, neque tamen negligendae sunt omnino. Nam etiam si e singulis modo Codicibus, etiam recentioribus, ductae sunt, tamen in iis esse possunt, quae profint ad criticam rationem \*).

x) Porissimum si testes antiquiores versio habeat consentientes. Ad Edd. Clem. et Sixt. confer. *Iamessi* bellum papale, seu concordia discors, Lond. 1600.

## § 20.

Caeterum cum ea versio graecum textum nec satis fideliter, nec satis perspicue vbique exprimeret, multi nouas versiones inde ab initio restituti in lucem graeci textus tentarunt, vt *Erasmus*, *Pagninus*, melior interpres V. quam N. T., *Castellio*, *Beza*: quo-



quorum versiones cum latina vetere contulit, ac frustra pluribus locis ab illa discessisse docuit *Boisius* libro proprio, in quo ille tamen studio suo deceptus modum interdum excessit; multis etiam *Lud. de Dieu* in Critica sacra. De reliquis, et vernaculis dicere hoc loco nil attinet.

### § 21.

Vsum versiones habent duplicem, alterum *hermeneuticum*, alterum *criticum*. *Hermeneuticum* porro habent *communem* veteres et recentiores, quem *historicum* appellemus licet: ut intelligamus, quomodo interpret quisque verba ceperit: unde datur interdum aditus ad veram verborum sententiam.

### § 22.

*Proprium* autem et *dogmaticum* possunt habere antiquae, e graeco factae, et a graecae linguae eius, qua N. T. scriptores utuntur, peritis, hactenus, ut ex iis usus loquendi intelligatur, praesertim cum aliis rationibus indagari non potest <sup>y</sup>).

y) Ex versione latina male ad verbum facta multi errores olim irrepserunt in theologiam dogmaticam, v. c. 2 Cor. VIII, 19. ubi *προθυμία* a vulgata vertitur: *destinata voluntas*: unde Aquinas voluntatem hominis suspensam esse voluit e praedestinatione divina.

Exem-

Exemplum illustrius etiam vide Ephes. V, 32., quo loco *μυστήριον* sacramenti nomine venit in versione vulgata.

## § 23.

Vtrumque autem vsum praestant hoc rarius, quo magis sunt plus iusto tenaces verborum, et, dum characterem orationis graecae nimis diligenter, etiam ubi necesse non erat, seruant, puritatem omittunt, et sic obscurae fiunt: unde etiam docti saepe interpretes ac Theologi in errores inducti sunt: cuius generis exempla, e latina veteri, qui volet cognoscere, adeat *Erasmum* in capite Nou. Test. a. 1522. ab ipso vulgati, C. 6. b. sqq.

## § 24.

Hunc ergo fructum ut tamen ex iis capere possimus, ante omnia erit in vnaquaque videndum id, quod paulo ante posuimus, vtrum e graeco sit nec ne: deinde cavebimus, ne, in orientalibus, confidamus versionibus latinis, quae sunt plerumque vitiosae et obscurae <sup>2)</sup>: et si non est ea facultas linguae cuiusque, ut nobis versione non sit opus, ab earum usu potius abstinemus.

2) Quod vitium admisit Millius. Vid. *Bodii Pseudocritica* Millio - Bengeliana. Halae 1767 — 1769.

1769. Simili negligentia vel a *Wetstenio* ad Syri testimonium prouocatur Act. XI, 20., quo loco ܡܢ ܕܡܢ etiam Hellenistas designare potest, vid. Act. VI, 2., et Philipp. II, 30., quo ܡܢ ܕܡܢ sensum lectionis *παρὰ βουλεύσας* reddit. Sic aliis locis bene multis versio Syriaca lectiones longe alias secuta est, quam eas, quae vel in optimis N. T. editionibus criticis ei adfinguntur.

## § 25.

His duobus igitur obseruatis, primum erit in vniuersum videndum de versionis bonitate, vt sciamus, an operae sit pretium futurum, si eam legamus et consulamus: quae cognoscetur comparatione locorum plurimum, non nimis perspicuorum, de quorum vero sensu nobis constet: cuius generis comparationem in versione syriaca dedit *Simon Hist. Crit. II. c. 15.* De hac vbi idoneis speciminibus confiterit, licebit eam maiori cum spe et fiducia consulere in aliis locis.

## § 26.

In quo erit vitandum vulgare vitium eorum, qui veteres orientalium Ecclesiarum versiones ad illustrandum N. T. conferre instituerunt. Etenim omnes, in his *Lud. de Dieu* in Critica S. saepe inanem operam insumsere in iis verbis comparandis, quae e

lin.

lingua graeca aut hebraica satis intelligi et explicari possunt <sup>22</sup>): qua ratione nil aliud efficere potuere, nisi vt ea verba ab Interprete recte intellecta esse pateret: quod potius valet ad laudem interpretationis, et ad linguae illius intelligentiam, quam ad vsum in interpretando.

22) V. c. Matth. I, 29. *παρὰδειγματισαὶ* illustraturus erat ex syr. *ܡܥܬܐ* *reuelare*, quod rursus contumeliae habet significationem.

### § 27.

Itaque tum demum tales versiones consulamus, cum incidemus in modos loquendi eos, quorum intelligendorum facultatem vsum loquendi graecus et hebraicus non supeditat. Deinde videbimus, vtrum ii ad verbum et secundum etymologiam versi sint; quod genus nihil adiuuat: an proprio illi linguae modo, qui ex eius vsum loquendi noto plane intelligi possit. Hoc si erit, tum demum nos reperisse putabimus, quod, si caetera conueniant, prodesse ad verum sensum reperiendum possit. Idque imprimis valebit de syriaca versione, quae et ea lingua scripta est, quae Apostolis vernacula, vel linguae Apostolorum vernaculae simillima fuit, vt inde, sicut ex hebraica, formari modi loquendi et inferri in graecum sermonem

nem potuerint, et propter bonam syriacorum librorum copiam bene cognosci potest <sup>a</sup>).

a) Matth. VI, II. ἀγρος ἐπιούσιος vertit;  
 ܐܕܪܝܐ ܥܝܘܨܝܐ, panis necessitatis nostrae,  
 h. e. quo nobis opus est.

### § 28.

*Criticum* vsum habent tantum versiones antiquae, et e graeco factae: propterea, quod ex iis fere patet, quid earum auctores in Codicibus suis habuerint, unde vel ad confirmandas, vel ad reperiendas bonas et veras lectiones, et ad origines falsarum lectionum indagandas prodesse possunt. Quae autem e versionibus factae sunt aliis, eae vero versionum potius, quam textus authenticæ lectiones praebent <sup>b</sup>).

b) Versio perſica et arabica vsum criticum habet, non ad emendandum N. T., sed ad emaculandam versionem syriacam, ex qua utraque fluxit.

### § 29.

Nam qui versionibus negant hoc cum *Withbiò*, *Mastrichto* et aliis, rei criticae non peritis, ut varias lectiones praebent, praesertim Noui Test., quae sunt fere ad verbum factae, ii vero primum aduersantem  
 habent

habent vniuersorum Criticorum in aliis libris antiquis vsum, et rem adeo ipsam <sup>c</sup>): deinde hoc ipso textum vulgatum, cuius defensores videri volunt, suspectum faciunt, in quem satis constat plures lectiones a *Complutenfis*, *Erasmo*, *Beza*, e versione latina receptas esse, et nunc quoque locis haud paucis seruari: denique factis suis ipsi refelluntur. Nam omnes, nominatim *Whitbii*, in defendendis lectionibus, saepe, interdum maxime, versionibus vtuntur, vt bene monet *Bengelius* p. 427. Recte vsum hunc versionum agnoscit noster *Glassius* Phil. S. I. Tr. II. P. I. membr. 3. agnouitque Lutherus, non raro latinam lectionem secutus.

c) *Wesselingius* in Praef. ad Herodotum fatetur, se ex latina versione Laurentii Vallae plures lectionis varietates decerpisse. Idem valet de versionibus N. T.

### § 30.

Sed in ea re multiplex cautio est. Nam primo loca excipienda sunt ea, vbi clarum est, interpretem aut vitio Codicis sui, aut incitia graecae vel hebraicae linguae, vel negligentia in praetermittendo, peccasse, aut explicationem suam potius posuisse, quam graeca diligenter expressisse, ambiguae, omninoque sic locutum esse, vt, quid in graeco habuerit, satis intelligi non

Q

possit

possit <sup>cc</sup>): quae saepe facta sunt in latina! Huic ipsi latinae plus auctoritatis tribuerim in omissione, praesertim si aliae consentiant, quam in caeteris. Nam si apta est rebus et contextui, nulla commoda ratio reddi potest, quare facta sit: in his vel inscitia, vel negligentia; vel interpolatio intelligi potest. Deinde, in versionibus orientalibus videbimus, ne vulgatis earum versionibus latinis confidamus, in quo genere plurimum cum aliis peccavit *Millius*. Atque etiam boni et antiqui Codices videndi, non soli editi libri sequendi; propterea, quod versiones et ipsae, ut supra tradidimus de pluribus, vitiosae et per fraudem interpolatae sunt: quod in latina multis exemplis docuere, qui eam correxerunt. <sup>d</sup>)

cc) V. c. Luc. II, 22. quo loco *Wetstenius* scribit, versionem vulgatam exprimere lectionem *αὐτοῦ*; eius autem referri etiam potest ad lectionem *αὐτῆς*.

d) Addimus regulas sequentes. Qui bene uti velit versionibus, videat, 1) num textum illarum habeat critice tractatum et emendatum? 2) num ingenium versionis familiare sibi reddiderit? 3) qualem recensionem sequatur versio? 4) caueat, ne synonyma versionis amplectatur pro varietate; 5) lectiones in una tantum versione obuias non magnam prae se ferre auctoritatem, sciat.

## CAP. V.

*De Libris Doctorum Vet. Ecclesiae uni-  
verse, eorumque usu.*

## § 1.

In instrumento interpretis sunt etiam scripta Doctorum veteris Ecclesiae <sup>e)</sup>). Itaque de his quoque, quoad habent aliquam coniunctionem cum hac institutione, siue cum veritate textus et intelligentia verborum, breviter praecipendum videtur: sed ita, ut complectamur scripta uniuersa, in quibus res diuinae e scripturis tractantur, non Commentarios solos aut proprie, de quibus nobis alius locus descriptus est.

e) Ex allegationibus Patrum cognoscimus variantes lectiones antiquiores iis, quas Codices suppeditant, docemur aetatem nostrae lectionis, patriam lectionis et originem glossarum.

## § 2.

Est autem usus eorum duplex, alter pertinens ad intelligendum, alter ad iudicandum de integritate verborum, qui est *criticus*, ut ille *hermeneuticus*. Sed ut de utro-

Q 2

que



que accuratius praecipi possit, ante vniuersum primum de textu antiquo ab illis ipsis doctoribus lecto et tractato, et eius veluti historia, deinde de interpretatione vetere dicendum videtur.

## § 3.

Primum, cum et historici libri a diuersis, diuersisque in locis scripti, epistolae autem ad diuersas Ecclesias, per certas occasiones, missae essent; intelligitur, ab initio et primo nec notas omnes omnibus <sup>ee</sup>), multo minus omnium statim corpus eiusmodi factum, quod eodem volumine comprehensum haberent homines, etiam doctores Ecclesiarum, certe multi aut omnes: idque firmatur etiam veteri consuetudine in talibus rebus, et exemplis Codicum, quae nunc extant. vid. c. II. §. 9. <sup>f</sup>)

<sup>ee</sup>) *Chrysostomus* v. c. de actibus apostolorum testatur, hunc librum dioeceseos suae ecclesiis plane fuisse ignotum: prolog. in homil. I. act. apost.

<sup>f</sup>) In Clementis Rom. Epistola I. nullus liber N. T. excitatur, praeter primam Epistolam Pauli ad Corinthios, quae *εὐαγγέλιον* vocatur. Tertullianus quidem et Iulianus omnes fere libros N. T. laudant, si ab Apocalypsi discesseris: de corpore autem scriptorum seculo tertio demum cogitari coeptum est.

§ 4.

Cum porro describerentur libri a Christianis, in quibus aut nulli, aut perpauca essent, ab initio, docti ad scholae legem, etiam inter antistites Ecclesiarum; non est mirandum, si exempla facta sunt aberrantia ab ὀρθογραφία, aut aliis modis vitiosa, sed salua sententiarum bonitate et veritate, qua simplices et plebei homines erant contenti. Nec erant inter eos Grammatici, quibus apographa corrigenda committere possent. <sup>g)</sup>

g) Accedit, quod libri propter persecutiones et contemptum clandestine describerentur. Exinde colligas vitiorum originem et causas.

§ 5.

Seculum secundum habuit illud quidem Christianos ad scholae legem doctos, ut *Iustinum*, *Pantaenum*, <sup>h)</sup> *Clementem*, et alios, sed Philosophiae magis deditos, quam rei grammaticae, et libris potius scribendis, quam aliis castigandis intentos. Caeterum tum iam corpus scriptorum sacrorum factum, ex Irenaeo, Clemente Alex. Tertullianoque patet, qui prope omnes libros commemorant.

h) Primus erat linguae hebraicae imperitus: secundus, Clementis praeceptor, Stoicus. Vterque contextus N. T. rationem curare non poterat. Vide modo, quam ea, quae Iustinus M. dialogo cum Tryphone

phone de magis Damasco Bethlehemum venientibus memoriae tradidit, differant a secundo capite Matthaei.

## § 6.

Primus *Origenes* seculo tertio hanc curam sibi imponi passus est, vt, exemplis inter se pluribus et antiquioribus conferendis, delectum faceret lectionum optimarum, per quem textum integrum et incorruptum formaret. In quo quin bene ac perite versatus sit vir instructus criticarum rerum scientia et vsu, e diuturna earum disciplina, et libris antiquis assidue tractandis, vix est, vt dubitemus, vel propter auctoritatem exempli *Origeniani* in Ecclesia vetere graeca et latina. Interdum ita coniecturis vsus, vt eas etiam in textum inferret, vix certis argumentis doceri potest <sup>i</sup>). Nam quae in Commentariis eius proponuntur, eae non in textum illatae sunt. vid. Disp. nostra de *Origene* Interpret. SS. librorum grammaticae auctore. §. 16. 17. 20.

i) Neque tamen plane dilui potest haec immoderati in emendando calor criminatio. Sic v. c. Matth. VIII, 38. Γαργεσηνῶν pro Γαδαρηνῶν et Ioh. I, 28. Βηθαβαρᾶ pro Βηθανία, utroque loco male, substituisse dicitur. Vid. *Huetii Origeniana* l. III. c. 2. f.

## § 7.

Huius recensitionis exempla cum in clara  
Cae.

Caesareae Bibliotheca reposita essent, et pro norma coeperunt esse, ad quam exigerentur et corrigerentur alia, (vid. v. c. c. 1. §. 17.) et ex iis descripta tum *Eusebii* tempore (vid. c. 2. §. 16.) permulta, tum postea. Itaque eam fere secuti sunt Doctores graeci eruditiores et clariores Interpretes N. T. itemque ex Latinis Hieronymus; vt *Origenes* recte parens textus pure graeci orientalis haberi possit. Nec satis certa fide traditur quisquam alius postea talis recensitionis laborem suscepisse ac peregisse. Nam *Pierii* et *Pamphili* Codices in Bibliotheca Caesareensi, quos et ipsos laudat antiquitas, haud dubie ipsi sunt Origeniani exempli, et manu ipsorum curiose descripti. De Pamphilo quidem testatur *Euthalius* in subscript. epp. Cathol. p. 513.

§ 8.

Eodem tamen seculo, sed extremo, et post *Origenem*, textum suo modo concinnasse feruntur, qui et in versione V. T. graeca recensenda laborarunt, *Lucianus* Antiochenus, et *Hesychius*, Aegyptius Episcopus, auctore *Hieronymo* (praef. in IV. Euang.), qui tamen ea exempla non probat: *Praetermitto*, inquit, *eos Codices, quos a Luciano et Hesychio nuncupatos, paucorum hominum asserit peruersa contentio:*  
quibus

*quibus utique nec in nouo instrumento profuit emendasse* etc. Et tamen cum apud Alexandrinos et in Aegypto exemplum Hefychianum versionis τῶν ὁ ualuerit, etiam Noui Testamenti textus ab eo formatus obtinuisse putatur: unde eum nonnulli *Alexandrinum* vocant, cuius cum lectionibus glossas Hefychiani Glossarii, ad N. T. pertinentes, consentire obseruauit *Wetstenius* T. I. pag. 69. Atque idem potuit accidere in Luciano apud ea loca, ubi V. T. exemplum ab eo castigatum valebat, ut in Syria, auctore *Hieronymo*. In quo etiam odium *Origenis* potuit valere. ii)

ii) Vide erudite hac de re differentem *Hugium* Einleit. t. I. p. 176—198.

### § 9.

Nec tamen existimandum est, vni exemplo se vel regiones, vel homines singulos, adstrinxisse magis, quam exemplis certis V. T. *Euthalium* quidem Aegyptium, Caesaream profectum, exemplum suum ad Origenianum textum castigasse, supra vidimus: et Syrus postea, nouae versionis auctor, Origenis exemplaria requisivit. Et variarum recensio-  
num lectiones commisceri pariter potuere, ut in Vetere Testamento factum constat. Itaque omni tempore, etiam post *Origenem*, varietas lectionis a multis  
com-

commemoratur, vt *Chrysostomo*, *Theophylacto*, *Oecumenio*, et aliis.

§ 10.

Sed haec tamen, et ex iis quocunque modo nata exempla, graecam veritatem vtcunque retinuerunt. Exorta autem est noui exempli forma, cuius exemplaria plura et antiquissima superesse ante dictum est, in quo textus graecus ad latinum exemplar mutaretur pluribus locis et interpolaretur. Hoc genus interpolandi primum malo consilio tentasse *Marcionem*, scita ex *Epiphanio* et *Tertulliano* ducta observatio est *Millii* Proleg. n. 378. et *Wetstenii* T. I. p. 79. <sup>1)</sup> Sed postea ab ipsis orthodoxis similis ratio inita, vel inscitia, vel assentatione in Romanos, (vid. c. 2. §. 16.) vel vtraque, vel aliis de causis. Romanos quidem id. aequum censere potuisse vt fieret, et per se non abhorret, aestimantibus rem iugenii humani natura, vsu cognita, et exemplis perspicuis patet. Nam et orthodoxi Graeci, qui hebraica nescirent, haud dubitavere, graecum V. T. cui adsueta essent a maioribus, verius hebraico putare, nec Latini, *Hieronymum* grauis peccati reum agere, qui latinam versionem V. T. ex hebraico correxisset, dissentientem in multis ab ea, quam e graeco factam haberent. *Hilarius* autem,

autem, Diaconus Romanus, siue quisquis auctor est Commentarii in Epp. Pauli, inter *Ambrosii* opera edi soliti, non veretur interdum, vt ad *Rom.* 5, 14. postulare, vt graecus textus e latino corrigatur. In quo aliter et rectius sensit eruditissimus Latinorum, *Hieronymus*, (praef. ad IV. Euang.) et *Augustinus* (Doctr. Chr. II, 13. et de pecc. mer. et remiss. I, 11.), qui latina exemplaria ad graecam veritatem corrigenda censent.

1) Conf. *Loeffleri* dissert. Marcionem Pauli epistolas et Lucae euangelium adulterasse dubitatur. Traiecti ad Rhen. 1788.

### § 11.

Sed exempla illa, quae pure graeca vocamus (c. 2. §. 13.), praeferenda esse iis, quae latinam versionem imitantur, cum aliis argumentis clarum est, tum hoc maxime, quod sole clarius est, permagnam partem earum lectionum, quibus ea dissentit a graeca lectione, ortam esse partim ab inscitia graecorum tum legendorum, in illa vetere scriptura continente et compendia quaedam solemnia vsurpante, tum intelligendorum, partim ab negligentia, quaedam interdum transiliente. Nec huius argumenti vis vlla ratione debilitatur, aut Codice latino, quamvis antiquo, vt Gothico Hispalensi, quem tantopere iactat *Ios. Blanchinus*, ante dudum

dum iactatum a *Mariana*, (praef. Schol. in V. et N. T.) existimans, in eo esse genuinam *Hieronimi* versionem <sup>m</sup>). Nam et ipse habet, vt alii antiqui, vestigia integritatis veteris, discedens a latinis aliis in lectionibus insignioribus: et, si maxime *Hieronimi* versionem puram exhiberet, tamen non valeret vbique contra graecum textum per ea, quae c. 4. §. 18. dicta sunt. Et vetus est haeticorum inuentum, versiones, imprimis latinam, graeco praeferre, et graecum corruptum iactare, vt latini auctoritas stabiliatur, vt *Heluidii* ab *Hieronymo* bene hoc nomine castigati, cuius rationes recte probat etiam *R. Simon* Hist. Crit. de Vers. N. T. c. 6., quamquam ratio *Hieronimi*, quod fons purior riuo, non sufficit. Nam an purus sit fons, quaeri potest. Quod tamen non eo trahendum, vt non interdum xerior lectio aliqua in latina conseruata, eiusque omnino nulla auctoritas sit: de quo et in superiori capite diximus, et in capite sequente videbimus.

m) Hieronymus testatur, se amico cuidam in Hispania Baetica suam vtriusque testamenti versionem latinam dono dedisse. Existat autem nunc in ecclesia Hispalensi Codex totius Nou. Test. literis Gothicis scriptus et ecclesiae, vt ex subscriptione patet, dono datus a. 991., quo iam pro antiquo habitus fuit. Ille continet lectiones bonas, v. c. Ioh. VII, 34. non habet *datus*: sed Rom. V, 14. habet: *qui peccarunt*  
sicur



sicut Adam, omissa negatione, quod fauet Pelagianis. Hanc omissionem damnat Augustinus: hunc igitur patrem suum audiant strenui huius Cod. defensores.

## § 12.

Sed veterum illorum pure graecorum exemplarium vestigia cum in scriptis Doctorum veteris Ecclesiae restare credantur, qui talibus libris sunt vsi; eruditi N. T. interpretis est, modum eorum indagandorum tenere. In quo discrimina *aetatum*, *doctrinae*, *librorum*, singulorum deinde in his ipsis *locorum* videnda sunt. Nam illud sua sponte intelligitur, potiozem Graecorum rationem esse habendam, in Latinis autem eorum, quos graecis literis eruditos, et graecos libros tractasse constet<sup>n)</sup>, vt *Hieronymi*, et perpaucorum aliorum; in caeteris latinae potius versionis lectiones quaerendas esse.

n) V. c. Hilarius Pictaviensis, qui sua ex Origene hausit. Augustinus et Ambrosius non nisi mediocriter docti fuerunt.

## § 13.

Primo igitur in promptu est, vt quisque antiquior sit, ita potiozem ducendum esse. In quo dolendum est, quod e primis duobus seculis tam pauca monumenta supersunt, et in his ipsis tam pauca sunt huc pertinentia, quibus

quibus tuto niti possimus. Nam quae primi seculi Doctorum nomina praeferunt, aut manifeste spuria sunt °), aut interpolata, vt nusquam certa fides sit, aut in iis tantum obiter loca, eaque pauca, commemorantur, non interpretandi caussa. Nec multum diuersa est ratio eorum, quae secundi seculi sunt. Nam *Clementis* Alexandrini Hypotyposes, in quibus, auctore *Photio* Cod. 109. loca, vtriusque Testamenti tractat, maximam partem interiere: ceteris eius libris sunt quaedam, vnde, qualis eius Codex fuerit, nempe iam habuisse quasdam e Scholiis interpolationes, intelligi potest. Iustinus porro pauca, et tantum ex Euangeliiis, habet: et Irenaei libri latine modo extant, suntque testimonia e versione latina <sup>p)</sup>. v. Millius Proleg. n. 566.

o) V. c. scripta Clementis Rom., Barnabae et Ignatii cum Constitutionibus Apostolorum.

p) Maximam iacturam fecimus interitu libri Irenaei de haeresibus, quo multa Apocalypseos imprimis et secundae Epistolae Petrinae loca erant excitata: fragmenta nunc tantum existant apud Epiphanium.

#### § 14.

In *doctrina* porro videndum est, vt eos maxime amplectamur, qui literis bene instructi fuere, et interpretandae ad grammaticam rationem scripturae operam dedere.

#### § 15.

## § 15.

In genere librorum principatum tenent Commentarii: in quibus tamen ipsis maxime spectantur loca, quae verba singula interpretantur; vbi sine ambiguitate patet, quid in suo quisque Codice habuerit: nam interdum sententias modo tractant. His autem pares sunt alii, qui dogmata, aut controuersias, aut quascunque quaestiones ad religionem et scripturam pertinentes, tractant, iis quidem in locis, vbi demonstrandi causa interpretantur verba sacra, aut ex iis ita argumenta ducunt, aut a prauis interpretationibus vindicant, vt sine ambiguitate iudicari possit, quid legerint, aut, quod interdum fit, diserte lectiones veterum Codicum vel commemorant, vel defendunt. In quo genere etiam interdum haeticorum et christianae religionis aduersariorum testimonia, certe ad firmandam veram lectionem, prosunt, vt *Iuliani*, qui v. c. obicit Christianis, quod Iesum Iohannes vocet λόγον Θεόν, ap. *Cyrillum* pag. 327. pp) et in Epistolis: item quod a Iohanne Iesus appelletur Deus, quod ad 1 Io. 5. extr. pertinere omnes vident. Eius generis plura in istis fragmentis Iulianeis ap. *Cyrillum* sunt, quae a viris doctis non animaduersa video.

pp) Vide *Cyrillum Alexandrinum* opp. ed. Aubert. t. VI. p. 327. adde opus contra Iulianum lib. X. initio.

## § 16.

§ 16.

Sed hic non vna cautio est: prima, vt, cum in Commentariis textus ipse insertus est, videamus, e M<sup>ss</sup>to editus sit, an ex edito exemplo; velut, in *Oecumenii* Commentarios, satis constat, insertum esse textum ex editione *Erasmi* per *Morellium*: altera, vt in iis locis, vbi dicta scripturae simpliciter proferuntur, videamus, qua fide editor vsus sit: vtrum ea de Codice antiquo dederit, an ex edito aliquo exemplo: quod non raro factum scimus <sup>q)</sup>.

q) Praesertim seculo decimo septimo, quo in editionibus Patrum Romanis et Gallicis contextus ad versionem vulgatam constitutus est.

§ 17.

Tertia est, ne silentium eorum vel in interpretando, vel in disputando, statim eo trahamus, vt ab iis lectionem aliquam ignoratam, aut non agnitam iudicemus. Nam in interpretando fieri potest, vt aliquid quacunq; de causa transiliamus, certe non enucleatius tractemus; quod non mirum est, esse etiam a veteribus factum. Velut *Rom.* 11, 6. verba, *ἐξ ὧν καὶ ἐστὶν ἡ ἐξουσία*, non interpretatur *Chrysostomus* in Comm. nec alii Graeci, praeter *Theophylactum*. Et tamen *Chrysostomum* ea habuisse in suo libro, patet ex catena M<sup>ss</sup>. Augustana, e qua excerpta vid. ap. *Ehingerum* Hist. Eccl. Sec. XV.

XV. p. 672. Aliud exemplum notabile ad *Io.* 5. pertinens vid. apud Cel. *Wesselingium* *Disp.* ad Marmor vetus p. 19. In disputationibus autem, etiam iis, quae cogitate scribuntur, non semper omnia veniunt in mentem, et saepe elabuntur alias nota et optima. *Chrysostomus* recte utique legit verbum *Rom.* 9, 5. et tamen eo in disputatione adversus Arianos non est usus. (v. *Millius* ad h. l.). Quamquam tale quid etiam potuit accidere a diversitate interpretandi. Et sunt plerumque Theologis rata quaedam loca, quibus in disputando utuntur solis, neglectis aliis, saepe melioribus. <sup>r)</sup>

r) Suspectum tamen reddit locum insignem commune multorum silentium, v. c. *I. Ioh.* V, 7. qui a nullo Patre graeco excitatur.

### § 18.

Vehementer autem errant, quicumque cum *Whitbio*, *Mastrichto* et aliis, Ecclesiae Doctorum libris simpliciter negant hanc vim, ut varias lectiones, praesertim momentum facientes, suppeditent: cum id tantum concedi possit de locis iis, in quibus obiter ac memoriter afferunt verba sacra; ubi sane saepe non est certum, quid in Codicibus suis habuerint. Nam eos interpretatos esse, quod non haberent in exemplis suis, et inde argumenta duxisse, perabsurdum est credere.

dere. Atque etiam suspectum faciunt textum vulgatum, in quem satis constat, (vid. c. 3. §. 2.) quaedam ab editoribus primis de Commentariis Patrum recepta esse. Denique ipsi, in vindicandis lectionibus, Patrum testimoniis, interdum solis vtuntur; quod frustra facerent, si eorum in hoc genere nulla auctoritas esset. Nec *Irenaei* exemplo bene hic vtitur *Michaelis*, (*de V. L. N. T.* §. 14.) vt ostendat scilicet, lectiones Patrum cedere debere lectionibus Codd. graecorum et versionum \*). Nam eius liber graece non extat, nec est Commentarius librorum sacrorum. Recte de hoc quoque genere sensit et iudicauit eruditissimus ille noster *Glassius* (*Phil. S. L. I. Tr. II. P. I. membr. 3. n. 2.*), qui in dissensu Codicum scriptorum e Patrum graecorum explanationibus decerni posse iudicat †).

s) Hoc fecus esse docet locus *Matth. XVIII, II.* in nonnullis Codd. manu exaratis omisus: culus tamen sinceritas merito vindicatur ex *Chrysostomo*, *Theophylacto* et *Euthymio Zigabeno*, qui illum vnanimes praeferebant.

t) Addimus haec. Vsum criticum habent allegationes Patrum, 1) si ad Codd. prouocant, 2) si accuratam explicationem subiiciunt, 3) si plura loca parallela proferunt, 4) si loca excitant maiora, quam vt memoria illa complecti potuissent, 5) si eadem loca saepius iisdem verbis laudant, 6) si adhuc confirmantur idoneis Codd. et versionibus.

R

§ 19.

## § 19.

Haec de usu *critico*. Sequitur, ut propositum est, de *hermeneutico*. Ac primum, cum a nobis, in hac institutione, praecepta scribantur interpretationis grammaticae: sua sponte patet, ad eam maxime usum scriptorum ecclesiasticorum referendum esse: etsi allegoricam rationem non spernimus, si sit sobria et modesta, sed ita, ut, quia proprie non est interpretatio, vlibus popularibus seruiat.

## § 20.

Sed interpretationis literalis, quae sit erudito homine ac Theologo digna, primum auctorem ac parentem fuisse *Origenem*, et ex eius vel scholis vel libris, inprimis eo, qui *σημειώσεων* nomine insignis fuit, propemodum quicquid boni in hoc genere antiquitas christiana habet, fluxisse, per inductionem demonstratum est in *Disp. de Origene* etc. §. 27. 28. 29. Origenianis tamen quaedam addita ab sequentium ingenio, doctrina, ἀκριβεία, non negamus.

## § 21.

Nec vero contemnendum est totum illud, quod habet ex illa Origeniana disciplina antiquitas, aut illi scriptores prae nouitiis negligendi. Nam primo, quod nostra  
aetas

aetas praecipui et proprii in genere eo boni habet, h. e. quod non ab antiquitate acceptum teneat, id, vt nunc est, non sane minus multum aut magnum est: saepeque vidimus pro nouis haberi, quae essent antiqua<sup>u)</sup>: deinde multa, quae antiquitas recte ex indole graeci sermonis capiebat, a recentioribus, deceptis etiam versionum vel vitio vel ambiguitate, in alium sensum tracta sunt, vt exemplo perspicuo demonstratum est de censu *Luc. 2.* a *Wesselingio* l. c. p. 21. etiam a nobis l. c. et pluribus facile doceri potest.

u) V. c. *πίστιν παρίηκιν* Act. XVII, 31. iam Chrysostomus et Theophylactus explicuerunt, *fidem facere*, quare temere quibusdam noua visa est haec explicatio.

## § 22.

Itaque futuro interpreti cognoscendi erunt non modo Commentarii veterum, ad grammaticam inprimis rationem pertinentes, qui enumerabuntur alio loco, sed etiam ex aliis, velut allegoricis, v. c. Origenis, dogmaticis, elencticis erunt conquirenda, quae profint interpretationi. In quibus videnda erunt inprimis loca ea, in quibus ex instituto loca difficilia tractantur, vindicantur, aut argumentando ad veritatem capitum doctrinae illustrandam et asserendam conferuntur.



tur. Lutherus quidem Epist. T. I. p. 27. recte ait, Hieronymum sanius interpretari scripturas *obiter*, ut in epistolis, quam ubi eas tractet de industria <sup>uu</sup>).

uu) Iuvat, observationem Lutheri binis exemplis illustrare. Matth. VI, II. ἐπιούσιον Hieronymus vertit *futurum, crastinum*, לחם מחר, qua formula Matthaeus ipse usus erat. Gal. V, 12. ἀποκοφόνται τ. ε. περικοπτεσθῶσαν egregie explicat Hieronymus: si enim expoliatio (l. exspol.) membri proficit, quanto magis abscissio. Longiori interpretatione uterque locus non eget.

### § 23.

Nec erit inutile, inter legendum quoscunque graecos animadvertere, modos loquendi e scripturis ductos quomodo usurpant, si inde lux accedere locis scripturarum possit: cuius generis non pauca notari posse, supra indicauimus, in quibus vel frustra vulgo se torquent, vel a vero sensu aberrant, et inde in magnas ac saepe difficiles disputationes coniiciuntur. Exempli aliquot posuisse sat erit. A *Clemente Rom. Ep. 1.* p. m. 53. κανόνα de finibus muneris et prouinciae dici, clarum est per φράσιν, idque habet ex 2 *Cor. 12, 13.* μὴ παρεμβάλλων τὸν ὀρισμένον τῆς λειτουργίας αὐτῷ κανόνα. *Idem* p. 20. verbis: Ἰησὺς ἐκ ἡλθὲν ἐκ κόμης αἰλαζονείας, ἐδὲ ὑπερφανίας, καί τις δυνάμενος.

καίμενος, ἀλλὰ ταπεινοφρονῶν, explicat *Phil.* 2, 6. 7. v) *Cyrill. Hieros. Cat. XI. p. m. 222. extr.* τί ἐστὶν ἕτερον γινώσκον τὰ βάθη τῆς Θεᾶς, 1 *Cor.* 2, 10. vnde patet, in verbo ἐρευνᾶν nullam emphasim esse ab eo quaesitam, quae nec ibi est: pro eoque *Clemens* l. c. p. 52. ἐγκύπτειν ἐγκεκυφότες εἰς τὰ βάθη τῆς Θεᾶς γνώσεως; vnde et patet, τὰ βάθη τ. Θ. accepta esse de Euangelio, in quo est μυστήριον Θεᾶς, arcana olim voluntas Dei de salute hominum: bene *Cyrillus* idem *Catech. XVI. p. 429.* συγκρίνειν pro interpretari ex 1 *Cor.* 2, 13. quod non intellexit interpret *Preuotius*, et aliis locis plura. *Epist. Concil. Ephes. ad Imp. in Actis* p. 296. ed. *Comm.* μετὰ πάσης ἐδελοθησκειας ἐπέμψαμεν, summo pietatis nostrae erga te studio, ex *Coloss.* 2, 23. add. *Frommanni* V. C. obs. ad N. T. e Clemente Romano.

v) Idem Ed. Helmstad. p. 42. vbi homo a Deo factus adpellatur τῆς εἰκόνος αὐτοῦ χαρακτήρ, quod illustrat *Hebr.* I, 3.

## § 24.

In quo tamen vitia duo cauebuntur: primum, ne in alteram partem peccemus, et nullam interpretationem probandam putemus, quae non ab illis Doctoribus tradita sit: quod velle videntur ii, qui nihil noui in interpretando reperiri posse defendunt:  
alterum,

alterum, vt inconstantiam vulgarem vite-  
mus, quae, vt cum suis sententiis consentit  
antiquitas, nec ne, ita aliquid, quod illi  
ignotum fuerit, vel probandum vel impro-  
bandum decernit. v. Cel. *Wesselingii* Disp.  
ad Marmor vetus de P. Sulpicii Quirini censu  
p. 21. 22.

---

## CAP. VI.

*De variis Lectionibus, earumque causis,  
fontibus, iudicio et delectu.*

## § 1.

**T**raditis iis, quae ad usum Codicum scriptorum, et editorum, Versionum et librorum veterum ecclesiasticorum pertinebant, sequitur, ut praecipiamus de varietate lectionis, quae, illis non recte cognitis, recte tractari, et ad usum conferri non potest \*).

x) Formanda est simul in hoc capite theoria criticæ sacrae, quam, qui curas Semleri, Michaelis, Griesbachii, Hugii (Einleit. I, 437.) aliorumque noverint, facilius effingere poterunt. Quasdam observationes, quae huic theoriae formandae inservire fortasse queant, suppeditare conabimur.

## § 2.

Si archetypha apostolicorum librorum exempla restarent, aut unus tantum Codex graecus manu scriptus ex omni antiquitate superesset, nihil porro vel Versionum, vel Commentariorum; nulla sane vel paucissima  
lectionis

lectionis varietas foret: quorum illud sine plurimis et maximis miraculis fieri non potuit, hoc ne optari quidem sine dementia potest: re vera optare videntur ii, qui variis lectionibus infesti sunt: cuius generis, inde ab *Erasmi* aetate vsque ad hoc tempus, propter inscitiam rei criticae, permulti fuere.

## § 3.

Nunc cum horum librorum plures Codices scripti ex diuersis aetatibus extent, eorumque plerique temporibus parum bonis, aut ab hominibus parum peritis graecae linguae scripti; quippe etiam feminae (*Euseb.* VI, 3.) et latini scribae Codices graecos scripsere: cum tot porro Versiones antiquae, tot antiquorum Commentarii essent, in quibus eorum librorum verba tractentur, tot denique editiones: maior lectionis varietas in iis extiterit necesse est, quam in vlllo libro humano. In quo nihil esse, quod integritati eorum obfit, supra demonstratum est. y)

y) Iam tempore Clementis Alexandrini exstabant variantes lectiones: ille enim 2. Cor. V, 3. duplicem lectionem commemorat, ἐνδυσάμενοι et ἐκδυσάμενοι. Oecumenius, qui sua hausit ex antiquis 1. Cor. XV, 5. testatur, legi in Codd. quibusdam οὐ ante ἀλλαγησόμεθα, et supprimi ante κοιμηθησόμεθα.

## § 4.

§ 4.

Itaque non modo impiorum, vt Atheorum et Deistarum, criminationes repudiandae, sed etiam imperitia recte de diuinitate eorum librorum sentientium repellenda, ne impietati istorum aliud agendo seruiatur. In quo genere maxime est acerrimus ille *Millii* accusator *Whitbius*: qui in toto hoc argumento perinepte versatus est, et, quantum in ipso fuit, scepticismum induxit, mire gratum Pontificiis. Quo magis etiam mirandum est, eius librum ac conatum vulgo etiam bonis viris probatum fuisse, omninoque, vt bene cel. *Pfaffius* ait, in hac literarum luce homines talia contra *Millianam* varietatem, et lectionum variarum multitudinem effutire potuisse, ac non potius cum *Bengelio*, viro docto et pio, agnouisse, a *Millio* Ecclesiam inaeestimabili beneficio affectam esse, quod etiam ab ipso et aliis auctius factum sit. Sed lux literarum non est eadem vbique<sup>2)</sup>, certe non erat tum in Critica sacra, quod ad initia huius seculi mere dogmatico-scholastica fuit, parum illa literata.

2) Vid. *Griesbachius* Praef. ad N. T. ed. 2. Vol. I. pag. XXXIII. seqq. Neque enim nostrae aetati defunt *Whitbii*, qui bonis seuerisque Criticis inuidiam conflare, suaeque rei criticae imperitiae calumniam dogmaticam praestruere conentur.

§ 5.

## § 5.

Sed varietatis huius, ut ex dictis apparet, fontes sunt quatuor. Primus est *Codicum scriptorum*, alter *Versionum antiquarum*, tertius *Doctorum Ecclesiae veteris*, quartus *editorum librorum*. De quibus singulis quando necessaria praecepta tradidimus, nihil addendum hoc loco videtur.

## § 6.

Varietatis, quae a Codicibus venit, plures causae sunt. Prima et latissime patens est in *librariis*, eorumque negligentia et in-scitia. Nam dum dictantes male aut literas pronunciant, aut diuidunt verba ac legunt, scribentes vero male excipiunt dictata, aut porro exemplum quamvis rectum male describunt, omittentes verba, transponentes, diuidentes, coniungentes, omninoque male legentes, non intellectis notiora substituentes, glossas, item Scholia textui inferentes, id quod mature factum Clementis Alex. exemplo constat; vitia intulere textui plurima, et locum varietati lectionis fecere <sup>a)</sup>. Quae qui latius explicata et illustrata videre velit, ei ad-eundi sunt *Clericus* Art. Crit. P. III. Sect. I. *Pfaffius* de Var. Lect. N. T. c. 9. qui haufit e Clerico, et omnium diligentissimus *Mi-chaelis* in eiusdem argumenti libello §. 3. sqq.

a) Plures varr. lectt. fontes facile aperire poterit, qui versatus est in tractandis Codd. manu exaratis.

## § 7.

§ 7.

Altera est in *correctorum* inscitia et temeritate, de qua etiam *Origenes* queritur ad *Matth.* c. 19. Hi enim interdum, quae non intelligebant, quae obscuriora, duriora, superuacua, perturbata, omissa, denique regulae doctrinae non consentanea, sed haereticorum opinionibus apta videbantur, ea mutare, corrigere, interpretari, atque ita textum varie interpolare ausi sunt <sup>b)</sup>: ex quo genere in primis fuere latini, qui adeo graeca exempla e latinis interpolauere, ut supra dictum. Vide de his late *Pfaffium* c. 10. *Michaellem* §. 7.

b) *Matth.* XXVII, 16. 17. legebatur Ἰησοῦς Βαῦραβας. Hic deletum est nomen Iesu, ne conueniat alicui iniquorum. *Marc.* XI, 32. pro ἐφοβοῦντο Grammaticus male sedulus ponebat φοβοῦμεν. *I. Tim.* IV, 3. male interponebatur κελυόντων. *I. Tim.* V, 3. χήρας. Alia additamenta vide *Matth.* XX, 28. *Marc.* XVI, 8. 14. *Luc.* VI, 5. omissiones *Matth.* VI, 13. XVI, 2. 3. *Marc.* XVI, 9—25. *Luc.* XXI, 42. 44. *Ioh.* VIII, 1—11.

§ 8.

Accessit *haereticorum* et *impostorum* impietas, quae tamen omnium minime obfuit, nimis incurrente in oculos impudentia deprauationum <sup>c)</sup>. v. *Millius* *Prol.* n. 306. l. *Pfaffius* c. 11. Atque etiam, qui, de more veterum,



veterum, Codices instruxere glossis inter verficulos, aut in margine scriptis, ad vsus minus doctorum, aut suos ipsorum, non malo consilio, nec vt ea, quae adscriptis-  
sept, in textum reciperentur, variis lectionibus fingendis locum fecere, dum eae per inscitiam in textum recipiuntur: quod mature factum claris testimoniis doceri potest.

c) Haec antiqua vox est. Sic Marcionem legi Mo-  
saicae inimicum mutauisse in sensum contrarium Matth.  
V, 11. testatur Epiphanius. Vid. Millii Prolegom.  
§. 328—360.

### § 9.

Est autem *lectionum aestimandarum* non idem *modus*. Nam vel in se spectantur, vel e fonte ponderantur. Cum in se spectantur, vel *grauitas* lectionis, vel *bonitas* aestimatur. Nam vt minutias particularum, articulorum, pronominum et ordinis verborum mittamus, quaedam sunt plane et omni modo, verbis et sensu, pares; quaedam autem sensu tantum, cum in altero verbo sit aliquid elegantius aut exquisitius; quaedam denique plane diuersum sensum fundunt, vel diuersitate verborum, vel ad-  
diuione aut detractione aliqua. <sup>d)</sup>

d) Exempla cuiusuis ordinis sunt, 1) Luc. I, 42. alii Codd. habent ἀνεβόνησε, alii ἀνεβόησε,  
2) Hebr. IX, 12. alii Codd. legunt εὐρόμενος, alii  
exqui-

exquisitus, εὐρέμενος, 3) Rom. IX, 5. quaedam membranae habent ὅς, quaedam θεός.

§ 10.

*Bonitas* porro partim verborum est, partim sententiae. Nam meliorem lectionem dicimus, quae est grammatice vel rhetorice rectior et elegantior, cetero exquisitior. In N. T. bonitas etiam hebraismo censeri debet <sup>e</sup>). Sed maxime iudicatur sensu ad consilium scriptoris, ad sententiam totius loci, ad legem doctrinae et ad veritatem accommodato <sup>f</sup>). Sic 1. Tim. 5, 16. meliorem caeteris dicimus lectionem θεός, non tam quia dat argumentum pro diuinitate I. C., sed quia cum contextu melius, sola satis consentit, et est grammatice rectior.

e) Sic Matth. V, 47. ἀδελφούς melior lectio est, quam φίλους, v. 10. δικαιοσύνη melior, quam ἐλεημει-  
σύνη, Hebr. VIII, 11. πλησύν melior, quam πολίτην:  
omnes ex hebraismo.

f) Adde et hanc regulam, qua Bengelium saepius  
vsum videmus: illa lectio bonitatis notam prae se fert,  
ex qua reliquae discessionēs oriri poterant.

§ 11.

Cum e fontis natura aestimantur lectiones, genera singula sic fere comparantur, ut quae e Codicibus graecis, antiquis et non interpolatis sunt, in dissensu plus momenti faciant

faciant iis, quae de Codicibus vel recentioribus, vel interpolatis e latina versione, quamvis antiquis, ductae sunt <sup>g</sup>): item, quae de *versionibus* antiquioribus et e graeco factis recte sumuntur, h. e. vbi euident est, quid interpretes in textu habuerit, praeferuntur iis, quae de versionibus versionum <sup>h</sup>).

g) Vbi ad testes prouocatur, notandum est, debere 1) respici ad aetatem testis; 2) explorari illius *αξιοπιστία*, quoad eius fieri potest, omni ex parte; 3) ponderari consensum testium.

h) Ante omnia itaque critica face illustrandus est contextus versionum, priusquam in subsidium vocentur, id quod in plerisque adhuc desideres.

## § 12.

Lectiones porro *Doctorum veteris Ecclesiae graecae*, quae sunt e Commentariis, Scholiis, aut locis iis, vbi dictum aliquod explicatur, aut ad haereticos refellendos adhibetur, denique vbi diserte ad Codices prouocant, recte praeferuntur iis, quae oriuntur e simplici et obiter facta commemoratione alicuius dicti. Varias autem lectiones e Latinis, si ab *Hieronymo* et paucis aliis, qui graeca calluere, discesseris, Italicæ potius aut Hieronymianæ versionis, quam graeci textus varietates sunt.

## § 13.

§ 13.

*Editionum* denique varietates non editionum fama, sed fonte aestimantur, e quo in editionem quamque venere, h. e. Codicibus, versionibus, et Patrum locis. Nam ex his esse concinnatum textum editionum, supra dictum est. Itaque editiones N. T. per se nullum momentum faciunt in iudicando.

§ 14.

Ita ergo singula genera aestimantur. *Genera* autem *uniuersa* sic comparantur, ut *primum* locum obtineant lectiones Codicum graecorum non interpolatorum, inprimis consentientium<sup>1)</sup>; nam ita in omni critico genere iudicamus. Patrum deinde graecorum de primo genere, et *Hieronimi*, et similium; nam et in libris humanis dissentientibus exemplis scriptis et editis e testimoniis v. c. Grammaticorum decernitur. *Secundum* tenent versionum antiquarum e graeco ductarum lectiones, ubi planum est e perspicua lectionis bonitate, aberrationem non esse a vitio interpretis<sup>1)</sup>; quae etiam interdum primi ordinis vim assequuntur. In *tertium* denique, velut in subsidia, reiciuntur caeterae, quae e Codicibus de latino interpolatis, item recentibus, versionum ver-

versionibus, et meris citationibus Patrum ducuntur.

- 1) In disquisitione de consensu Codicis cum aliis testibus ἀξιωματικῶς videbimus; 1) qualem recensionem sequatur, eamque vel mixtam, vel puram?
- 2) num bonarum lectionum, quas continet, numerus antecellat numerum malarum et futilium?
- 3) Adde et hoc: vbi planum est, versionem antiquam recensionem exprimere.

§ 15.

Nec mirum videri debet, Patrum antiquorum testimonia, qualia descripsimus, itemque versionum quaedam acquari Codicibus librorum sacrorum ipsis, interdum etiam praeferi, cum Codices, quibus illi vti sunt, et e quibus versiones antiquae illae factae sunt, antiquiores fuerint, plerumque etiam accuratius castigati, omnibus his, quos nunc habemus <sup>m</sup>). Et supra ostendimus, puritatem Codicum nostrorum non certius, quam consensu cum Patribus graecis antiquioribus iudicari.

m) Sicut in literatura graeca ad emendandos tragicorum aliorumque libros adhibentur Stobaeus, Athenaeus, Pausanias, ita in N. T. Patres.

§ 16.

His ita constitutis, reliquum est, vt *usum* vari-

*variarum lectionum*, atque ita totius Apparatus Critici, per hoc et superiora capita propositi, et necessariis observationibus, siue Canonibus, vt vocant, instructi, demonstramus. Est autem vsus duplex: alter *criticus*, alter *hermeneuticus*.

§ 17.

*Criticus* cernitur in *lectionum delectu* faciendo: qui tanto diligentius et modestius fieri debet, quo maiorem sanctitatem habent libri, de quibus agitur, eamque ob causam etiam reverentiam maiorem iure suo postulant. Quo magis diligenter scriptis Canonibus debet gubernari.

§ 18.

Hoc genus Canonum est supernacuum de sententia eorum, qui a lectione vulgata omnino negant recedendum <sup>n</sup>). Sed hi partim non intelligunt, quid dicant: nam, quae recepta sit lectio, vix possint dicere; nisi vero Elzevirianae illius editionis lectionem intelligant, quae per inscitiam vulgata facta est: partim homines, et eos quidem, quos etiam numerant in haereticis, ἀνταρ-  
τήτες faciunt; a quibus quaedam, etiam de mera coniectura, e versione latina, vbi non debebant, in textum recepta esse, supra

S

mo-

monuimus, et exemplis pluribus demonstrat  
*Bengelius* pag. 436. 437.

n) Ab antiquis placitis recedere in omni fere disciplina religioni sibi duxerunt ingenia imbecilla et mediocria. Quis itaque mirabitur, theologos, auctoritatis vi abripi solitos, inueteratos errores etiam in re critica N. T. defendisse? Qualem v. c. sensum fundat lectio *εὐσεβεία* Act. III, 12. etiamnum in optimas editiones recepta? Reduci debet *ἡθροῦς* suadente *Semlero*: ut de aliis locis taceamus.

### § 19.

Est autem hoc genus Canonum scribendorum sane perdifficile; nec ullus Canon scribi potest, qui vniuerse valeat, et non habeat magnas in usu cautiones. Quod fit non modo ipsa huius criseos natura, quae versatur in rebus non necessariis, sed etiam natura rerum, et dictionis a scriptoribus sacris usurpatae. °) Nam quo magis haec a Grammaticorum vulgaribus legibus recedit, hoc minus potest ad eas leges seuere iudicari.

o) In Cicerone propter *ἀνρίβειαν* rhetoricam facilius Critice exerceri potest, quam in Plinio, et confidentius in Thucydide et Xenophonte, quam in Polybio. Multo difficilius eruitur in N. T. vera lectio propter dictionem hebraizantem, diuersam et mixtam.

### § 20.

Itaque nonnulli Canones critici, quibus

in

in caeteris libris utimur cum fiducia, conversi interdum sunt in his: v. c. is, quem certissimum putant, ut e duabus lectionibus, quarum altera grammaticae rectior et exquisitior sit, altera vulgaris et grammatica aestimatione deterior, illam praeferamus.

§ 21.

In his autem Canonibus scribendis etfi haud facile est, aut omnia complecti, aut omnibus satisfacere; quaedam tamen diligentius, quam vulgo factum est <sup>p)</sup>, sanciri possunt ac debent: ut ostendimus in Disp. de Difficult. Interpr. Gramm. N. T. §. 8. 9. Rem igitur tentabimus omnem paucis observationibus complecti, quibus adiuti modesti ac diligentis Critici munere fungi possimus.

p) In canonibus criticis *Mastrichtii* (ante suam N. T. Edit.) et *Pfaffii* (de varr. lectt. N. T.). Meliores suppeditant *Wetstenius*, *Semlerus*, *Griesbachius* et *Hugius*.

§ 22.

Primum igitur in lectionibus variis distinguemus *antiquitatem*, *bonitatem* et *veritatem*, sic, ut veram iudicemus nullam, quae non sit eadem antiqua et bona, sed non contra omnem antiquam aut bonam statim etiam veram. Sunt enim interdum plures lectiones antiquae et bonae, quae tamen

S 2

pari-



pariter verae esse non possunt: quippe seculo iam secundo variae lectiones extitere, et interdum nec Doctores veteris Ecclesiae decernere audent, sed malunt vtramque explicare, vt *Chrysostomus* 2 *Cor.* 5, 3.

## § 23.

Caeterum si vna antiqua et bona est, vt *Act.* 17, 26. προτεταγμένως, *Gal.* 5, 7. ἐνέκοψε etc. recte praefertur caeteris: si pariter antiquarum alterutra melior, vt Θεός 1 *Tim.* 3, 16. *ibid.* 5, 21. πρόκλιν, haec sequenda; et e pluribus aequae bonis antiquior deligenda est, vt 1 *Tim.* 6, 5. διαπατριβαί.

## § 24.

In lectionibus pariter antiquis et bonis veritas iudicanda est partim e libris, partim ex observationibus grammaticis. E libris primum secundum gradus comparationis §. 11. 12. 14. constitutos: e grammaticis observationibus fere in hunc modum.

## § 25.

Quae lectio est difficilior, rarior, et exquisitior, vt *Eph.* 1, 11. ἐκκληρώθημεν, et prima specie minus recta, vel sententia, vt *Matth.* 5, 22. ὁ ὀργιζόμενος τῷ ἀδελφῷ, ex  
Io.

Io. 7, 39. ἔγω γὰρ ἢ πνεῦμα, vel 1 Cor. 8, 7. συνεδήσει, cum libri plures habeant συνεδεία, quod facilius explicatur; item forma grammatica, vt Marc. 12, 28. εἰδὼς, pro ἰδὼν, Gal. 5, 14. ὡς ἑαυτὸν, pro σεαυτὸν, 1 Theff. 4, 9. ἔχετε, pro ἔχομεν, ea praeferenda planiori, vulgatori et rectiori: quod in illa correctionis a librariis tentatae causa est, in hac nulla. Ita bene etiam *Gerhardus* noster iudicat LL. Theol. de resurrect. §. 117. secutus *Erasmum* ad 1 Cor. 15, 51. qui ex hac obseruatione defendit lectionem graecam.

## § 26.

Quae lectio est auctoris cuiusque consuetudini scribendi conuenientior, ea potior videri debet. Itaque si in his N. T. scriptoribus altera est hebraizans, anteponi debet bene graecae, quod haec glossae notam habet, a Graeco profectae, non illa. 9)

9) Ep. Iud. I. ἡγιασμένοις potior lectio est praeter ἡγαπημένοις, quia prior scriptura magis consentanea est consuetudini Apostolorum in salutationibus et initiis Epistolarum. Act. XVII, 26. lectio ἐξ ἑνὸς ἀριθμῶν praefertenda est alteri ἐξ ἑνός, quamuis haec occurrat Rom. IX, 10, prior enim magis est hebraizans.

## § 27.

Si e duabus lectionibus Codicum graecorum

corum antiquis et bonis altera consentit cum Patribus graecis et versionibus antiquis, haec deligetur. §. 14. 24. <sup>99</sup>)

qq) Matth. V, 22. εἰς ἡν non legitur in cod. B. 48. et 198. Ad stipulantur *Iustinus* M. (apol. I. §. 20. p. 24. Thirlb.), *Tertullianus* (apol. adu. gentes c. 45.) et *Hieronymus*, qui sine causa in antiquis non legi diserte testatur. Quidni eiicimus vocem ὑποβλάταις, ab oratione contexta alienam, et ab *Eichhornio* recte damnatam?

### § 28.

Omnino autem cauendum, ne in iudicio hoc nimis tribuamus libris, praesertim vni aut alteri <sup>1)</sup>, cui ob aliquam causam praecipue faveamus: quod fit, cum eos solos spectamus, neglectis observationibus grammaticis et consuetudine scribendi scriptoris cuiusque: neue solis his fidamus, neglectis libris: quod sine libris fallere possunt, et potest aliquid bene consentire grammaticis observationibus, nec tamen verum esse. In utroque genere saepe a doctissimis viris peccatur.

r) Sic *Grotius* et *Bengelius* nimiam auctoritatem tribuerunt codd. A. et B., *Kiplingius* cod. D., *Matthaei* testimonio *Chrysostomi* et codd. Mosquensium.

### § 29.

Itaque non dubitabimus interdum, si  
res

res et sententia, et observationes grammaticae postulabunt, consensum antiquarum versionum et Patrum praeferre Codicibus graecis, ut omnes editores fecere, cum non satis caute, fecitque in versione *Lutherus*, aut Codices recentiores antiquioribus. Nam haec lectiones possunt ex antiquis et bonis Codicibus ortae esse.

§ 30.

Caeterum quoniam totum hoc iudicium non nimis saepe plena evidentiâ nititur, sed saepe coniectura et ἀρχινοία quadam vertitur, modestia est utendum in iudicando, quae etiam lapsus nostros excusationes faciet<sup>s</sup>). Ac de usu lectionum variantium critico satis dictum est<sup>t</sup>).

s) In re critica veritas unico, minimo saepius, puncto nititur, quod oculos facillime effugere potest. Quo magis, nostra etiam aetate, urbanitas commendanda est criticis, ut modestia se a quouis superari patiantur.

t) Adde regulas sequentes: 1) Codices, Versiones et Patres, quae unam recensionem sequuntur, unum testem solummodo constituunt: 2) lectio, quam omnes recensiones praeferunt, est verissima; 3) in dissensu recensionum illa lectio est probabilior, quam optimae editiones antiquae commendant: 4) auctoritas recensionum constituitur bonitate lectionum in uniuersum cum aliis libris MSS. conferenda et eruenda. Sic v. c. Alexandrina melior est occidentali,  
quae

quae tamen bonis lectionibus non caret: 5) lectiones in nulla recensionum antiquarum olim obviae nulla, plurimorum licet, Codicum iuniorum auctoritate defendi possunt.

### § 31.

Esti autem optabile est, ut rationes omnes, propter quas delectus in alterutram partem fieri debeat, concurrant; tamen, quoniam id non nimis saepe contingit, plures causae grauiioresque valebunt. In quo sane praecepta non sufficiunt. Sed etiam exercitatio quaedam consuetudoque capienda, ut boni quasi ratiocinatores esse possimus, et addendo detrahendoque videre, quae reliqui summa fiat, ex quo, quid potius sit, intelligatur. In quo etiam lectio eorum proderit, qui talia accurate circumspecteque tractarunt.

### § 32.

Est vero etiam usus aliquis variantium lectionum, qui interpretationem atque Theologiam videtur attingere. Nam interdum Interpretum veterum et recentiorum, itemque disputationum theologicarum rationes intelligi, et vel defendi excusarique, vel refelli non possunt, nisi, quam lectionem secuti sint, scias <sup>u)</sup>).

u) Sic Patres latini ex I. Cor. XV, 51. *uniuersalia tem*

litatem resurrectionis adseruerunt ex lectione: omnes obdormient. Sine noticia varietatis lectionum ne Lutheri quidem versio intelligi et vindicari potest, v. c, 2. Petr. II, 13. vbi pro ἀνάταις legit ἀγανάις, vnde engerem Allmosen, quod etiam praefert Griesbachius. Conf. adhuc Hebr. IX, 14. cum vers. Luth.

### § 33.

Quo magis vtilem operam nauarunt, qui varias lectiones ex iis, quos indicauimus, fontibus collegere. Cuius rei initium, quod quidem commemorari debeat, (nam et ante in Correctoriis biblicis res coepta) factum a *Laur. Valla*, collatis tribus Codicibus graecis, quibus ad latinam versionem emendandam vteretur: quod spectauit et *Fr. Lucas Brugenfis*. Auxit id studium, graeci textus edendi, et singulas editiones noua aliqua dote augendi cupido, inde ab *Erasmo*, qui primus varias lectiones addidit in notis, et *Roberto Stephano*, in ed. a. 1550. Sed maxime incensum est eius rei, omninoque criticae huius studium per *Curcellaeum*: non quod ipse aliquid in eo genere fecerit, quod esset eximium, quamquam superiores, qui post *Stephanum* fuere, longe superauit: sed quod primum eius editio *Fellum* impulit ad adornandam editionem nouam, quae variis lectionibus instructa esset, Oxon. 1675. repetitam a *Io. Gregorio*, 1703. et ad *Milium* incitandum, vt ad magnum illud opus molien-

molendum accederet; deinde quod, cum Theologis videretur in lectionibus variis fuisse Socinianis, et in eorum gratiam lectiones ex ingenio finxisse, Codices diligentius conquisiti et inspecti sunt, atque etiam de rebus criticis diligentius disputari coeptum est, adiuuante etiam tempore, quo res critica vniuersa diligentius tractari coeperat. <sup>v)</sup>

v) Vid. *Wetstenius* Proleg. p. 170. Adde curas *Michaelis*, *Semlevi*, *Griesbachii*, *Birchii*, *Alteri*, *Matthaei* aliorumque.

#### § 34.

Principatus in hoc genere haud dubie debetur *Io. Millio*, qui triginta annorum labore confecit opus, quod *Oxonii* 1707. f. primum prodit, textum *Elzevirianum* f. *Curcellaeum* exhibens, cum 30000. lectionum variarum, et Prolegomenis historico-criticis eruditissimis. Quod etsi non est sine peccatis, vel ab opinionum temere susceptarum errore, ut quod versioni *Italiae* et Codicibus ex ea interpolatis plus iusto tribuere videtur, vel ab imbecillitate humana, subinde Codicibus male designatis et Patrum locis et versionibus falso prolatis: tamen merito a *I. A. Fabricio* admirandae industriae et iudicii opus vocatur. Nam quod in Prolegomenis saepe aliter de lectionibus iudicat, quam in notis, id utentibus qui-

quidem incommodum, caeterum laudi est viro, qui, lecto interea, dum opus excuditur, Simoniano Historiae criticae opere, cum de multis rectius didicisset iudicare, in Prolegomenis ingenue iudicium suum retractavit. *Whitbium* autem huius operis examen etsi imperitis rei criticae probatum fuit, captis titulo libri, profitentis, *lectionem textus hodierni* (i. e. iudicium editoris *Elzeviriani*, aut *Curcellaei*) in omnibus defendi posse; tamen peritis nec professione illa, nec ratione vniuersa, probatur, et decreta sua factis tollit. vid. supra §. 5. c. V. §. 16. IV. §. 29. Ad *Whitbii* autem rationem factos *Canones Mastrichtianae editionis*, comparatio facile docet.

§ 35.

Sed hoc opus vel auctum vel expositum est praeclare a tribus, *L. Kustero*, *I. A. Bengelio*, et *I. I. Wetstenio*. Nam *Kusterus* in repetitione Millianae editionis duodecim Codicum graecorum excerpta addidit, melius etiam de illa meriturus, si minus festinans, vitia operarum ne repeterentur, cavisset, et notas e Prolegomenis ubique vel correxisset vel auxisset.

§ 36.

*Bengelius* porro in Apparatu Critico  
non



non modo quindecim Codd. lectiones primus edidit, sed et aliorum ab aliis editas adiunxit, cum multis earum, quae e versionibus et libris Patrum ductae sunt, supplementis, laudem diligentiae, et in tota illa causa modestiae, meritis. In summa iudicii de lectionibus deligendis non probatur, quod normam delectus maxime fecit Alexandrini Codicis et latinae versionis consensum, non animaduertens, id quod erat in promptu, in tanta lectionum similitudine, Codicem illum ex hac interpolatum esse. Cui addiderim, quod, contra sua praecepta, in iudicando observationibus grammaticis ac bonitate lectionum minus, quam debebat, vitur, et contra eas saepe male decernit e solis libris, (vid. §. 23.) praesertim iis, quos ante diximus. Velut *Eph. 5, 9.* praesert *καρπὸς φωτός*, cum aliis, nixus solis latinizantibus Codd. et latinis auctoribus maxime, non cogitans, *καρπὸς φωτός* frigide dici, et contra consuetudinem diuinorum librorum, eamque ob causam et consulto a Paulo mutatum tropum, et *καρπὸς πνεύματος* dictos. Sed ille omnino satis graece doctus non fuit \*). In variis etiam lectionibus praetermisit, quae non debebat: vt alia mittamus. Repetitus est Apparatus eius Criticus a. 1763. additis libellis variis eristicis: in quo nec auxit sua e *Wetstenio*, *Blanchino*, *Saba-*

**Sabatierio** et aliis, nec iudicium de Codice  
**Alex.** mutauit.

x) Neque etiam, profanae literaturae praesidio defuturus, iustas de genealogia Codicum habuit notiones. Vitia admissa rarius retractauit in gnomone, castigatus propterea a *Wetstenio*, *Wolfo* et *Baumgartenio*.

### § 37.

*Wetstenius* denique multorum annorum magno labore Codices plures et antea non collatos excerptit, alios denuo contulit, versiones et loca Patrum inspexit, et superiorum lapsus saepe correxit, usum lectionum, describenda Codicum indole, et aetate ut eunque definienda, paratiorem reddidit, atque hac ex parte caeteris palmam eripuit: in iudicio lectionum vniuerso praeter caeteros probandus, quod id ad Codices pure graecos et non interpolatos e latina versione, Patresque graecos veteres maxime dirigit y); in locis singulis illici se in fraudem passus est a cupiditate adiuuandae sententiae suae de I. C. diuinitate. Quo nomine merito reprehensus est a Cl. *Venema* in *Exerc. de vera diuinitate Christi*, et a nobis in *Castigationibus Wetsten.*, in quibus et alia notauimus, quae in hoc labore desiderari iure possint. Reprehendendus est et in hoc, quod Varietatem Lectionis Vaticani Ms. ut haberet et insereret, non curauit.

y) Ne-

y) Neque hoc merito fraudandus, quod coniecturis parum, aut nihil tribuit. Momenta versionum vero, orientalium imprimis, saepius e translatione latina aestimat; in excitandis Patrum locis saepius lahitur, subindeque sententias profert a festinantiori iudicio conceptas, v. c. ad Ioh. VIII. I—II.

## § 38.

Sed quidam etiam separatim edendis Codicum vel singulorum vel plurium lectionibus operam navarunt, quos omnes commemorare non est necesse. *Velesius* autem, cuius Excerpta XVI. Codd. in *Cerdani* Adversar. S. c. 91. edita sunt, ne bona quidem fide egisse videtur, cum lectiones varias dedit, non modo non commemoratis nominatim ac descriptis Codicibus, e quibus hausit, sed etiam sub illo generali Codicum nomine abscondenda, ut videtur, fraude, quae hoc agebat, ut Vulgatae auctoritatem stabiliret. Res ipsa autem docet, non modo e manuscriptis Florentino Concilio posterioribus, et ad Vulgatam refectis, ut *Mariana* iudicabat praef. ad Schol. V. et N. T. sed etiam e latinis ductas esse, ut *Wetstenius* demonstravit. add. *Michaelis* V. Cel. §. 87. Nec *Caryophili* lectiones, a *P. Possino* ad calcem Catenae in Marcum editae, multum profunt, cum Codicum indoles ignota sit, immo pateat, e latina interpolatos fuisse, cuius etiam stabiliendae consilium *Caryophilo*

*philo* fuit: (v. *Bengel. App. p. 439.*) quamquam interdum praefert lectionem ab latina diuersam, et id faciendum iudicat, quoties maior Graecorum numerus consentiat. Caeterum in iis esse etiam lectiones Codicis Vaticanani, excerptas ad vsum eorum, qui editionem N. T. ad exemplum Sixtinae V. T. graecis auctore Urbano VIII. moliebantur, et e literis viri docti Romae didici, et ex eo intellexi, quod omnes lectiones, quas e Cod. illo memoratas reperi, inesse vidi.

§ 39.

Caeterum cum ex iis, quae de variarum lectionum collectoribus tradita sunt, appareat, quantum erroris in delectu obiecerint viris doctissimis opiniones temere susceptae, vel de Codicibus ipsis, vel de versionum quarundam, vt Italicae, vt Vulgatae, auctoritate, vel denique de religionis ipsius dogmatibus: nihil magis cauendum est iis, qui in hac re velint recte atque ordine versari, quam ne tali aliqua opinione imbuti ad iudicandum accedant.

§ 40.

Id vitabimus, si, quae de quoque variarum lectionum fonte tradidimus, bene percepta habebimus, et in iudicando omnia ad praecepta delectus faciendi referemus, nec suscepta

fulcepta aliqua opinione de lectione loci cuiusquam, quid ad eam firmandam valere possit, quaeremus, sed omnibus momentis ad regulas ponderatis, tum demum, quid sequendum sit, iudicabimus.

## § 41.

Nec oportet existimare, omnia iam exhausta, omnia accurate notata, nec quicquam nostrae diligentiae relictum esse, sed omnia explorare, et in legendis veterum et recentiorum libris attendere, si quid, ad hanc rationem pertinens, occurrat, idque suis locis notare <sup>2</sup>). Nos quidem permulta ab superioribus vel praetermissa, vel non animaduersa, aut perperam tradita obseruauimus. Sed satis multa, ac fortasse nimis multa, de hoc genere diximus: ad ea, quae restant ad interpretandi usum, veniamus.

2) Ablegamus lectores ad Matth. V, 22. VI, 13. Marc. XVI, 9—20. Luc. I, 66. II, 22. Ioh. XVIII, 1. Act. II, 30. III, 12. VIII, 37. X, 33. XI, 20. XIII, 18. XVII, 26. XVIII, 5. XX, 28. XXIII, 9. Rom. VIII, 33. II. X, 16. I. Cor. III, 4. vt intelligant, quid in locis istis rectius constituendis et interpungendis adhuc praestandum restet?

## CAP. VII.

*De Vsu Versionis LXX. Vet. Test. et fragmentorum Aquilae, Symmachi etc.*

## § 1.

In quibus primum locum tenent Graeci hebraicorum V. T. librorum Interpretes, imprimis hi, quos, de vulgari fabula, septuaginta numeramus, rectius Alexandrinos appellabimus \*). Nam Alexandriae factam esse versionem illam, in eo consentit antiquitas: etsi id fortasse de iis modo libris intelligendum, qui tum in Synagogis legebantur, nam quorundam librorum versionem esse senioris aetatis, vix dubitandum: in quibus Iobum, Prouerbia, Canticum et Ecclesiastem posuerim, quem nonnulli ab Aquila esse putant, et non ab eodem omnes libros versos esse, ipsum scribendi genus euidenter arguit, quod quibusdam in libris diligentius hebraismum conseruat, estque a graeca puritate et elegancia r. notius, in aliis ab hebraismo longius recedit, atque etiam exquisitiora verba usurpat, imprimis in Iobo, Prouerbiis etc.

T

a) Vid.

a) Vid. omnino *Eichborn* Répert. Lit. Or. T. I. p. 266. Ex traditionibus ibi diligenter excussis conficitur hoc, Iudaeos Alexandrinos eiusmodi commentis versionem suam V. T. graecam popularibus in Palaestina pro diuina vendere, et ut archetypo illam non inferiorem facerent, *Ἱερονευσίας* gloriam et famam illi, ut fieri solet, conciliare voluisse. Sed diuersa aetate et a variis interpretibus facta esse videtur, (conf. *Hodius* de text. orig. L. I. c. 7—9.) primum Pentateuchus, postea Psalmi, deinde libri historici, denique Iesaias, vltimum Iobus et reliqua scripta V. T. Hucusque duas tantum habemus editiones principes, Sixtinam, vel Vaticanam 1587. fol. recusam a Bosio, et *Grabianam*, quae sequitur Cod. Alexandrinum, Oxon. 1707. repetitam a Breitingero. Multa nun sperari possunt de contextu LXX. interpretum restituendo post *Holmefii* Angli aliorumque VV. DD. curas et studia.

## § 2.

Huius versionis graecitas hebraizans <sup>b)</sup>, siue per inscitiam vsurpata est ab interpretibus, quod verba et phrasae hebraicas non possent bene graece exprimere, praesertim in rebus ad religionem proprie pertinentibus, siue per religionem aliquam existimantium, res sacras inquinari graecae elegantiae imitatione, quae certe posteriorum temporum opinio fuit, orta illa fortasse per Antiochiae adfectionis tempora; <sup>c)</sup> ea vero post fuit, inter Iudaeos graece loquentes, pro lege, quam sequerentur, qui de religione

gione scriberent, si quidem patrii moris essent tenaces, et popularibus vellent probari.

V. Progr. nostrum *de odio Iudaeorum in lingu. graec.* Itaque etiam nouae graecitatis versio Pentateuchi eam imitatur, et versiones Bibliorum Italicae Hispanicaeque, a Iudaeis curatae, ad eam formam expressae sunt, vid. *Simon Bibl. Crit. P. IV. p. 133.*

b) Graecitas LXX. interpretum est triplex: siue plane hebraizans, ut in versione Ecclesiastae: siue pura et interdum exquisita, ut in versione Iobi, Prouerborum et Cantici, ubi verba etiam poetica occurrunt: siue mixta, ut in plerisque V. T. libris. Vid. *Mücke de origine versionis LXX. interpretum. Züllich. 1789.*

c) Iudaei in lingua graeca nunquam excellabant, neque eminere inter alios barbaros poterant. Primum enim animum adpellebant ad hanc linguam addiscendam commercii causa: postea, ubi Antiochiae et Alexandriae aulae beneuolentiam captare coeperunt, exquisitam in scholis discere quidem studebant graecitatem, sed sine successu. Vbi denique Antiochus Epiphanes, ut sacra gentilium susciperent, voluit illos Graecorum mores imitari saltando, canendo, certando; tunc plane inuisa fieri coepit Iudaeis lingua graeca.

### § 3.

Itaque cum hoc genere scribendi, ut supra demonstrauius, vbi sint in Noui Testamenti libris viri diuini, facile intelligitur id, quod doctissimi Interpretes iudicant,

T 2

ad



ad cognoscendum usum loquendi Nou. Test. interpretandosque eius libros plurimum prodesse lectionem versionis graecae Vet. Test. recte institutam, atque adeo haud paullo plus, quam caeterorum graecorum librorum. v. in primis *Pearsonii* Praefatio paraenetica in edit. *Cantabrig. et Grabiana.* add. *Carpzou.* Crit. S. p. 547. <sup>cc</sup>)

cc) Cum *Bielio*, *Schleusnero*, *Paulo*, *Beckhusio* et al. Vid, *Bretschneideri* exc. II. ad Ies. Siracid. Ratisb. 1806. p. 709. ff.

#### § 4.

Quo magis Interpretes recentiores atque eruditiores ea versione sibi utendum censuerunt, ad explicandas formas loquendi N. T. et illustrandas, nec ante satis feliciter dicitio N. T. cognita est, quam inde ei lux est accensa. In quo genere principatus debetur haud dubie *Grotio*, qui primus iusta diligentia et scientia in hoc genere est usus, caeterisque omnibus in eo praeluxit. <sup>d</sup>)

d) Patres versione LXX. in explicando N. T. non usi sunt, quod plerique hebraica non intelligerent. Etiam *Melanchthon* et *Camerarius* rarissime illos in subsidium vocauerunt. Post *Grotium* celebrandus est *Reichenius* Obseru. in N. T. ex LXX.

#### § 5.

Nec parum in hoc genere profuere, qui  
he-

hebraismos N. T. illustrarunt \*), vñ inprimis versione illa, partim exemplis ex ea afferendis, vt intelligeretur, quid verba graeca hebraice sonarent, partim varietate interpretandi hebraica commemoranda, vt quid verbum hebraizans esset bene graece appareret: quamquam posterius vellem saepius factum. Caeterum quoniam exemplis magis res acta est, quam praeceptis; eamque ob causam, qui illam rationem imitarentur, saepe lapsi sunt; faciendum nobis putamus, vt eam ad pauca et perspicua praecepta redigamus, atque ita vñsum illius versionis faciliorem et certiore reddamus.

e) In his *Wyssius* in *Dialectologia sacra*. Melior est *Vorstius*, sed compendiosior *Leusdenus*, vterque ex Ed. *Fischeri*.

### § 6.

Primum igitur observationibus quibusdam grammaticis opus est, ad indolem illius, qua imitatur hebraicam consuetudinem, recte cognoscendam, vt hinc praecepta et cautiones, quibus vñsus eius dirigatur, duci legitime possint.

### § 7.

Observationes autem latissime patentes sunt hae. Primum, quod verbum graecum hebraico maxime simile est etymologia s. prima

prima significatione, id contulere intérpretes non modo ad primam et maxime solennem verbi hebraici significationem exprimendam, sed etiam ad omnes caeteras tropicas, vt in בָּרַךְ, קָרָךְ, הָרִיק, צָרוּךְ, בָּרִית, הָקִיץ, et aliis, quibus cum proprie responderent κενῶν, καλεῶν, ἐκλέξαμαι, δικαιοσύνη, διαθήκη, μαρτύριον, his verbis et eorum coniugatis etiam vti sunt in exprimendis illorum verborum tropicis significationibus, quas graeca consuetudo non agnoscit <sup>f)</sup>).

f) Adde בָּרַךְ, verbum, deinde res, negotium: sic explicanda vox εἷμα Matth. IV, 4. Luc. I, 37.: בָּרִית, pactum, foedus: deinde, constitutio, oeconomia religionis, διαθήκη: אִזְרָא res occulta, deinde profunda sapientia, μυστήριον.

## § 8.

Secundo, in verbis hebraicis, quae multiplicis significationis essent, non facile per troporum varietatem explicandae, et a prima significatione deriuandae, variae ac diuersae interpretationes permutantur, vt in דָּן, τέλος, δίκαιος, εὐλαβής <sup>g)</sup> etc. In hoc genere explicando in primis diligens est Gatakerus, vt in priori Vorstius.

g) Sic דָּן est dare et ponere: quapropter τιθέναι et δίδεναι permutantur in N. T. Ioh. X, II. ψυχὴν τιθέναι: בָּרִיךְ beneficus et princeps est in hebraico: hinc εὐεργέτης, princeps, Luc. XXII, 25.

## § 9.

§ 9.

In iisdemque vno eodemque verbo graeco varias illas significationes exprimunt: vt, quia μαρτύριον respondet τῷ עֵדָה vel עדות, propterea etiam, vt hebraica, pro lege, doctrina, hinc μαρτύριον Χριστῶ pro doctrina Christi, et μαρτυρεῖν pro docere; similiter νόμος, vt חוק, non modo de lege, quae latine dicitur, vt apud Graecos, sed etiam de religione vniuersa, et qualibet eius parte, vt promissionibus, dicitur. Cuius rei ignorantia mirabiles et contortas interpretationes ac sententias peperit, etiam *Vitrinae* Obs. III, 1. Cui simile est, quod, cum praefixo כ proprie aut maxime respondeat graecum ἐν, huius vsus non minus late patet, quam praefixi illius apud Hebraeos: in quo ipso ignorantia hebraismi mirifice, saepe ridicule se torfit <sup>h</sup>).

h) Exempla sunt ἐν Χριστῷ εἶναι, Christianum esse: ἐν ἀμαρτίαις ἀποθνήσκειν, in morte peccatorum esse plenum. Neque haec negligenda est observatio, permutari saepius in N. T. ἐν et εἰς ex consuetudine hebraici כ et ל.

§ 10.

Sunt etiam verba graeca, in quibus ex hebraica et graeca consuetudine intelligi non potest, quare iis sint vsi οἱ ὁ ad verbum hebraicum

braicum explicandum: in quibus forte, vt *Lud. de Dieu* et aliis visum est, Chaldaica et Arabica consuetudo spectata est, aut prima hebraici verbi significatio nunc ignoratur, quae forte in Chaldaica et Arabica superest<sup>1)</sup>). Velut, quod חנה interpretantur συγχρίνεν pro ἐρμηνεύεν aut ἐπιλύεν, forte ea significatio est hebraici verbi etymologica, aut tum in Chaldaismo vel in Arabismo valuit: quae ipsa interpretatio in N. T. venit.

i) Hoc rarius occurrit. Conf. tamen ad Rom. XI, 9. Ies. XXIX, 10. vbi חנהרנה, somnus profundus, a LXX. interpretibus conuertitur κατάνυξις, *compunctio*. Hanc autem potestatem habet arab. حنن, *consuit, compunxit*. Vid. Michaelis Supplem. p. 449. Inde solemnis est formula apud Arabes: *somnus mihi consuit oculos*. Conf. Michaelis Chrestom. arab. p. 66. (Meliora dabit Lennep in Etymol. v. νυσάζω, quae descendit a νύω, *πυτο*, vnde κατάνυξις, *sopor*.)

## § 11.

Interdum tamen etiam formas prorsus hebraicas, qua sensum, quem locus desiderat, bene graece, neglecto hebraismo, exprimunt, vt חנה ἐλεημοσύνη, et חנה חנה αγαθός, *benignus*, חנה חנה non modo εσχάτος, sed etiam ἐπιών, et cum חנה חנה non modo ἐν ἐσχάταις ἡμέραις, sed etiam μετὰ ταῦτα etc. Et nihil dicimus de hebraismis, qui sunt in constructione, et aliis generibus, quibus

quibus significatio non admodum adficitur, neque ambigua redditur: ut cum feminina pro neutris ponunt <sup>1)</sup>, et similia.

1) V. c. Matth. XXI, 42. *Θαυμάσῃ* pro *Θαυμασόν*. Adde et hoc: interdum hebraismi ex parte tantum explicantur, v. c. Genes. XIX, 21. *כַּנְזֵי נָפְלִים*, *Θαυμάζει πρόσωπον*, quod non est graecum: sed inde derives formulam N. T. *λαμβάνειν πρόσωπον*.

§ 12.

Hae igitur observationes in genere, et in singulis verbis, imprimis frequentius sic usurpatis, et, ut ita dicam, dogmaticis, debent esse in promptu, ut nobis in tempore succurrant, et adiuuent in sensu reperiendo. Quod efficiemus, si versionem illam ita legerimus, ut semper cum hebraicis graeca conferamus, item graeca cum graecis diversorum locorum, in quibus eadem verba hebraica sunt, et illas generales observationes ante oculos habeamus, ut iis admoniti de singulis verbis, quae consuetudo illius versionis sit, cognoscamus.

§ 13.

Ipsius autem versionis per tales observationes ad usum in indagando N. T. sensu conferendae methodus habet maxime praecepta haec: Primum, ut, quae in N. T. bene

bene graece dicta non sint, id quod cognita linguae graecae indoles et analogia docebit, saepe etiam ipse sensus verborum bene graecus, abhorrens a contextus sententia, ea requiramus in illa versione, et, quibus verbis hebraicis respondeant, videamus, vt ex hebraicis intelligamus graeca: vt in verbis κλησις, ἐκλογη et coniugatis, in μογιλάλος, *Marc.* 7, 52., quod respondet hebraico דָּבַר, κωφος, *Es.* 35, 6. <sup>m)</sup> In quo cautio est, vt hebraicorum vim recte teneamus, non latine e Lexicis vulgaribus vertamus; in quibus etiam latinitas plerumque est hebraica, saepe ex ipsa graeca versione, verbis graecis etymologice interpretandis, hausta: quae ratio non modo nihil profuerit, sed etiam deceperit. Itaque praecepti illius, quod supra posuimus, memores esse oportet tirones, vt libellos de hebraismis sibi familiares reddant, omninoque verborum potestates e vera linguae indole recte et perspicue cognoscere studeant.

m) Nequit μογιλάλος verti, *difficulter loquens*: qui enim naturaliter surdi sunt, illi etiam muti esse solent. Collato itaque loco excitato, patet, μογιλάλος positum esse pro ἄλαλος.

#### § 14.

Secundo, quae in illa versione ex hebraico bene graece vertuntur, quod fieri subinde,

inde, supra diximus, ea in N. T. oportet conferre ad intelligenda ea, in quibus clarum est, ex indole graecae linguae rem aestimanti, hebraica esse etymologice verbis graecis expressa. Quod optime cognoscetur, si graeca hebraice, verbum de verbo, vertantur. Vt si 1 Cor. 15, 54. εἰς νίκος vertas hebraice נִצָּחַ, meminerisque, id etiam bene graece ab iisdem interpretibus verti εἰς τέλος, διαπαντός, εἰς τὸν αἰῶνα, χρόνον πολὺν, non modo εἰς νίκος, sensum verum tenebis. Itaque oportet ea, quae sunt huiusmodi in versione illa, notata habere, ut sint in promptu, ubi eorum usus venerit.

§ 15.

Atque etiam in bene graecis, V. et N. T. communibus, proderit conferre hebraica, quibus ea in V. T. respondeant; ne in illis ipsis bene graecis, si non omnino, at hactenus decipiamur, ut plenum sensum non assequamur. Nam interpretes illi interdum vage, ut ita dicam, et crassius interpretantur, item antecedente pro consequente, genere pro specie, et contra, ponendo, aut similia permutando: ut cum יהוה אלהינו ver-  
tunt εὐηρέτησε τῷ θεῷ, Gen. 5, 24. 6, 9. con-  
sequente pro antecedente posito, quod ser-  
vatum ab Apostolo Ebr. 11, 5. n).

a) Ioh.



n) Ioh. 1, 14. *καρυάτης* est *רַחֵם רַב*, quod LXX. Gen. XXII, 2. explicant, *וְיֶסְעֵם אֶת־אֲבֹנֵיהֶם*.

## § 16.

Sunt etiam multa, quae, in utroque, bene graeca sunt sono, et tamen hebraicam interpretationem desiderant: qua ignorata, mirabiles sententiae existunt. Veluti *κατὰ τὰτα μέση τῆς γῆς Eph. 4, 9. Ps. 62, 9.* etc. non bene intelliguntur, nisi compares hebraica, *וְהָיָה מִשְׁכַּן הָאֱלֹהִים עַל־הָאָרֶץ*. Quod genus inprimis est lubricum, fallitque interpretes. Et sunt huius generis prope innumera. (vid. P. I. S. II. c. 3. §. 8.) Quo magis in his indagandis et ad usum in loco conferendis diligens esse interpres debet. °)

o) Non sine laude huic labori operam suam impenderunt *Bielius* in thesauro philologico et *Schlenfnerus* in Supplementis ad h. l. Utroque opere diligens interpres carere vix poterit.

## § 17.

In hac re proderit, ubi haerebimus, item exercendi ac discendi gratia, etiam indicibus versionis huius uti, ut videamus, quibus hebraicis verbis graecum quodque respondeat, et si quid inde lucis accedere possit locis obscuris: cuius generis a *Conr. Kircher* et *Abr. Tromm*io confectos habemus <sup>p</sup>). Sed in hac re multiplex cautio est: pri-

prima, ne affectatione aliqua, aut inscitia hebraismi, aut interpretum graecorum vaga interpretandi ratione decepti, peccemus; in quo genere merito reprehenditur *Dan. Heinsius* <sup>1)</sup> a *Salmasio de Foen. trapezit.* p. 805; secunda, ne illorum indicum vitiis et peccatis, quae sunt multa et magna, in fraudem inducamur, quod accidit multis, praesertim Kircheriano opere usis, cuius latina sunt e versione *Pagnini*, ut eidem *Heinsio*, ut *Calouio* ad 1 Cor. 12, 4. in verbis ἀνάθεμα et ἀνάθημα: tertia, ne, cum illi interpretes aliam, quam nunc textus hebraicus habet, lectionem interpretati sunt, eorum verba ex lectione textus nostri interpretemur, et inde verbo graeco significationem temere assignamus: quod accidit *Pearsonio* l. c. in *Ebr.* 10, 38; denique, ne pravas interpretationes verborum hebraicorum, quas non paucas esse constat, sequamur. Vid. dicta a nobis in *Disp. de Diffic. Interpr. Gramm. N. T.* §. 17. 18. 19. Quibus incommodis magno cum discipulorum fructu occurrere posset, si quis vir satis graece et hebraice doctus, rei criticae bene peritus, et in hac, quam descripsimus, ratione exercitatus, *Lexicon Graecitatis illius*, quae est in versione V. T. graeca, conficeret: quod in animo habuisse *Drusium*, ex eius praef. in *Praeterita* etc. patet. <sup>1)</sup>

p) Kir-

p) *Kircherus* ediderat concordantiam a. 1607. 4. ita, ut verba hebraica primo loco poneret, addito indice graeco, quod valde erat incommodum. Sed contra *Trommius* graeca primo loco posuit, addito indice hebraico, a. 1717. fol. Hic liber melior est priori, cuius auctor usus erat editione τῶν ὁ Wecheliana, in qua multa vitiose sunt expressa.

q) *Heinsius* usus *Pagnini* Lexico hebr. mere etymologico ἀπὸν ἐπιούσιον explicuerat, *panem crastinum*, quasi esset לחם חמיר, panis instans, חמיר falso ab עמר deriuato. Sic bonā explicatio inani eruditione vanisque argumentis erat suffulta.

r) Vid. not. ad §. 16.

### § 18.

Haec igitur maxime praecepta tenenti, praesertim exercitatione aliqua, et usu rei, legendis aut audiendis bonis interpretibus, adiuncto, licebit magno cum fructu ea interpretatione uti: ex qua profecto nondum omnia eruta sunt, quae utiliter ad interpretationem N. T. conferri possunt.

### § 19.

Enimuero etiam alios non contemnendos usus habet illa versio: primum valde necessarium in comparatione locorum, quae de Vetere Testamento commemorantur in Nouo: nec contemnendum alterum, in iudicio ac delectu lectionis; qui est criticus:  
tertium

tertium ad intelligendos Commentarios veterum Ecclesiae doctorum, qui fere ex hac versione pendent.

§ 20.

Satis enim constat, sanctos N. T. scriptores interdum verba V. T. ita protulisse, ut ea de versione graeca sumpta esse videantur. Nam etsi in nonnullis ipsi ex hebraico vertisse videri possunt, exprimendo verbum de verbo, ubi etiam fortasse nostrum quisque pari modo, aut non multum aliter, verterit; praesertim cum non raro ipsos vertisse, loci indicio sint ii, in quibus cum hebraico textu contra graecum consentiunt, ut *Matth.* 8, 17. ex *Es.* 53, 4. item *Io.* 19, 37. e *Zach.* 12, 10. tamen haud paucis in locis clarum est, verba e versione graeca depromta esse, hoc est, in iis, ubi non modo nihil ab hac, sed etiam ab hebraico perspicue discrepant, qui dissensus saepe sententiam adficit, estque interdum eiusmodi, ut supra fidem sit, duobus eadem verba in vertendo venisse in mentem: ut *Ebr.* 10, 38. 11, 21. In quibus locis si Apostolos ipsos ex hebraico vertisse dicamus, ut placuit quibusdam viris doctis, aut lapsos esse interpretando, sequetur, aut textum nostrum hebraicum in iis locis vitiosum esse; quorum neutrum probari potest; aut denique versione Apostolica sublata, a  
libra-

librariis insertam esse versionem vulgatam τὸν ε, quod ipsum nonnulli statuerunt: de quo est lata disputatio Lud. Capelli in *Append. Criticae S. p. 443.* \*)

2) In re multorum observationibus agitata pauca disputare attinet. Excitatur V. T. in nouo ab auctoribus *Ἰσχυροῦς* vel ex contextu hebraico, vel ex versione LXX. interpretum, vel ex alia nunc deperdita, vel ex memoria. Conf. *Eichbornius Allg. Bibl. d. bibl. Lit. T. II. p. 948. seqq.* et *Eckermannus* in symbolis theologicis. In vniuersum notandum est, tunc temporis morem aliorum scripta excitandi ita fuisse comparatum, ut

- 1) magis ad sensum loci, quam verba respiceretur, multa itaque adponerentur et omitterentur;
- 2) ut sensus loci excitati notionibus auctoris accommodaretur;
- 3) ut quilibet auctor etiam in excitandis aliorum scriptis ingenium suum proderet.

Petrus certe Act. II, 25. s. et Iacobus c. XV, 16. s. versione Alexandrina Hierosolymis vti non poterant; Graeci enim male ibi audiebant, et vterque apostolus non graece, sed syriace verba faciebat. Loca igitur V. T. ab iis excitata e Lucae memoria fluxerunt.

### § 21.

Causas varietatis huius in auctoritatibus illis ponendis, itemque consuetudinis vsurpandi versionem graecam, etiam tum, cum ab hebraico discrepat, curiose exquirere,  
non

non est necesse, praesertim in hac institutione: caeterum, cum ex versione graeca, quamquam aberrante a veritate hebraica, interdum pendeat tota ratio et vis argumentationis, nec modo in sententiis integris ac pluribus, sed interdum etiam in singulis verbis: facile intelligitur, ad intelligendas demonstrationes et rationes scriptorum sacrorum illius versionis comparationem et intelligentiam valde esse necessariam.

§ 22.

Vsum criticum habet, primum in illis ipsis locis, qui ex ea proferuntur. Nam in iis discrepant interdum libri veteres, ut discernendum sit, quid sequi velimus. In quo genere vniuerso, sane vix dubitari potest, quin lectio ea sit praefenda, quae in versionis bonis exemplis reperitur, praesertim, si habeat aliquid exquisiti, aut insolentior sit. Veluti *Hebr.* 1, 12. praefertur vulgatum ἐλίζεις τῷ ἀλλάζεις, contra quam *Ben-gelio* atque *Wetstenio* videtur, quod ἐλίζεις est in versione graeca, e qua totus ibi locus sumatus est<sup>t</sup>), glossaeque simile est ἀλλάζεις e versione N. T. latina, quae hoc verbum habere videtur ex Hieronymi correctione; quamquam sane hoc hebraico הָיָה similius est. Potest tamen accidere, ut ab eius auctoritate discedendum sit, proprijs alioni

U

loco

loco caussis: veluti, cum res et ratio argumentandi aliquid habet eiusmodi, propter quod aliquid consulto mutatum videatur, salua tamen sententia vniuersa: vt *Paulus Ebr.* 10, 5. pro ὡρία videtur σῶμα posuisse e *Pf.* 40. vt aptius rationi suae, cum vellet demonstrare, Iesum corpore suo immolando Deum placasse <sup>u</sup>).

t) Neque tamen silentio praeteriri debet, editionem τῶν ὁ Grabianam habere ἀλλάζεις, *Psalm.* CII, 26—28.

u) Etiam versio Philoxeniana habet ὡρα h. l. atque sic etiam legendum esse censet *Michaelis* colleg. crit. de *Psalmis* praecip. de Christo agentibus. p. 358. seqq.

### § 23.

Atque etiam in aliis locis adiuuare in iudicando potest, cum, in pari librorum auctoritate atque sensus bonitate, e verborum ratione, decernendum est (c. VI. §. 25.). Nam vix dubitari potest, quin tum lectio ea, quae sit consuetudini versionis huius conuenientior, praesertim durior, si graeca consuetudine aestimetur, praeferrí debeat. Quid quod etiam per eam caueri potest deprauatio textus, et lectio vera firmari. Non, vt opinor, *Interpres* latinus *Act.* 15, 2. omissurus erat καὶ συζητήσεως, quod videbatur lenius, quam pro εἰσαγωγῆς verbo, si εἰσάσω, quam

quam *seditionem* interpretatur, de more τῶν ὁ intellexisset *altercationem*, quae est in disputatione ac dissensu.

§ 24.

Sed in tota hac re videndum est, ut utamur exemplis versionis, quae e bonis Codicibus ducta sint, ne vitiis librorum decipiamur. Atque etiam plures editiones interdum conferendae, aut variae lectiones inspiciendae sunt. Itaque nemō 2 Cor. 13, 1. pro σαθήσεται e versione illa tentet rescribere σήσεται, quod Deut. 19, 15. in illa sententia habent Romana editio, et quae ex ea expressae sunt: quamquam hoc quoque sensu passivo intelligi potest: cum σαθήσεται in Aldina et Grabiana repererit.

§ 25.

Sed quamquam in hoc genere dominatur versio illa: tamen nec negligendae sunt reliquiae caeterarum versionum graecarum, *Aquilae* imprimis ac *Symmachi*, primum a *Petro Morino*, ut ipse narrat in epist. n. 31. iuvante *Ant. Agellio* e scriptis Patrum, imprimis Hieronymi, et Catenis collectae, et a *Flaminio Nobilio* in Bibliis Graecis Romanae editae, inde in pluribus editionibus repetitae, post a *Druſio* separatim, et ad usum aptius, sed e manuscriptis libris Grae-



corum Commentariorum, vt *Eusebii*, *Procopii* etc. longe auctius in Hexaplorum Origenianorum reliquiis editae a *Montefalconio* Parif. 1713. cum Lexico hebraico et graeco: quod opus in compendium redegit et auxit *Bahrdtius* Lipf. 1769. v) Plura promifit fupplementa e Codice Chifiano *Blanchinus*, fed non dedit, praeuentus morte.

v) Theodotion maximam partem confpirat cum LXX. interpr. proptereaue hoc loco minoris pretii eft. Sed vid. de hoc reliquisque fragmentorum hexplarium auctoribus *Eichbornius* Einl. in d. A. T. T. I. ed. 3. p. 335. ff.

### § 26.

Nam *Aquila*, Iudaico ingenio obsecutus, ita verit. hebraica, vt fingula verba exprimeret graecis, quae illis effent propria fignificatione fimillima: vnde κατ' ἀκριβειαν vertiffe dictus eft, mirificeque operam fuam Iudaeis probauit, non diffidentibus multum Christianis, qui eam etiam *Veritatem hebraicam* appellarunt, veluti, eam cum legerent, ipfa hebraica legerent: vnde faepe doctores graeci, cum hebraica memorant, versionem hanc intelligunt.

### § 27.

Hinc fit, vt adiuuare nos eius reliquiae poffint, cum quaerimus, cui verbo hebraico grae-

graecum, in quo haeremus, respondeat, ut inde, quam vim in sermone hebraeo-graeco habere possit, videamus. Veluti, *καίνος* verbum usurpatum ad exprimendum hebraicum קר, cum de funiculo mensorio dicitur: quod prodest ei verbo intelligendo atque illustrando 2 Cor. 10, 13. etc.

§ 28.

*Symmachum* autem veteres tradunt, atque id etiam reliquiae versionis ab eo factae docent, in vertendo puritatem linguae graecae conservare studuisse. Nam quae inter eas non pura sunt, ea per errorem scribentium ex *Aquila*, aut alio quo, irrepsisse videntur: sicut et *Symmachii* quaedam in excerpta *Aquilae*. Quo nomine ut laudatur mirifice ab *Hieronymo*, item *Theodoreto*, ita malam gratiam a popularibus suis, Iudaeis, iniit, qui ea ratione profanari oracula diuina putabant. Vid. Cl. *Thiemii* Disp. de Puritate *Symmachii*. x)

x) Videant et indicent hic viri docti, num in N. T. interpretatione ex antiquis Hellenismi monumentis instituenda alicuius pretii sit nova *V. T. versio graeca Veneta* a Villoissono (Argentor. 1784.) et nobis (Erlangae 1790. f. T. I—III.) edita, tum in disquirenda ratione, qua notiones hebraicae graece exprimi soleant, cuius rei scientia egregium est adcuratioris explicationis subsidium: tum in singulis verbis formulisque, v. c. in v. γάμος, משה, quod huius versionis auctor bene

bene conuertit in δόκος; in γ. ἐκνεύειν Ioh. V, 13. quo vocabulo noster exprimit מנה Deut. XXXI, 18.

## § 29.

Ex quo intelligitur, eas reliquias prod-  
esse posse, vt verba formasque loquendi he-  
braicas bene intelligamus, nec earum inter-  
pretationes graecas hebraizantes in sensum  
alienum trahamus. Ex quo genere est, v. g.  
quod εὐεργεσίαν interpretatur, quam οἱ ὁ ἀν-  
ταπόδοσιν Ps. 103, 2. etymologiam hebrai-  
cae vocis גמול secuti: quod etiam ad μισὸν  
trahere licet, qui pariter pro beneficiis ac  
honis, s. felicitate, a Deo accepta, sine re-  
spectu actionis praegressae dicitur Gen. 15,  
2. Quodsi non profunt in multis locis pro-  
prie, at profunt ad rationem vniuersam  
cognoscendi vsus loquendi in libris N. T.  
nec modo in singulis verbis, sed etiam in  
constructionibus, a graeca ratione aberran-  
tibus. Legantur Io. Frid. Fischeri V. C.  
Prolusiones de Interpretibus V. T. graecis,  
hebraicae linguae intelligendae magistris.  
(Lips. 1772. 8.)

---

## CAP. VIII.

*De usu scriptorum Iudaicorum.*

## § 1.

Cum sint in N. T. et verba, et formae loquendi, denique etiam sententiae, quae vel vi, vel structura discrepant a graecae linguae consuetudine, nec tamen ex hebraismo, quoad e libris sacris cognoscitur, aut ex interpretatione Alexandrina, explicari possunt: necesse est, ut eae fluxerint e consuetudine Syro-Chaldaica, quae tum in Palaestina valuit, in haud paucis a vetere hebraica discrepans, siue de rebus vulgaribus, siue ad religionem pertinentibus, loquerentur. y)

y) Duplex usus est scriptorum Iudaicorum in N. T. 1) secundum res, antiquitates et ritus Iudaeorum, ad quos in N. T. adluditur, ut et secundum opiniones illorum praeiudicatas, de Satana, de angelis, de Messia eiusque praenuntiis, de sabbato, de Deo Iudaeorum tantum Patre: 2) secundum verba et orationem in gnomis, parabolis, v. c. in Ἀδάμ ἀρχαῖος, γλῶσσαι καρναί, ἔπειραι etc.

## § 2.

## § 2.

Huius reliquiae quaedam vix dubitari potest, cum res ipsa loquatur, quin repariantur in libris Iudaicis, si non omnibus et cuiuscunque aetatis, at antiquioribus, et prioribus aetati Apostolorum, aut qui eius aetatis scriptorum fragmenta conseruauere. In priori genere *Targumim* <sup>2)</sup>, *Mischna* Hieros. c. Sec. II. liber *Sohar*, eiusdem prope aetatis, in posteriori multi alii numerantur; qui etsi aliquot seculis recentiores sunt, velut *Gemarici* et *Rabbothani*, vel *Midraschici*, tamen verba veterum Doctorum conseruauere: de quibus libris praeter *Wolffium* in Bibl. hebr. adeuudi *Schoettgenius* Lect. Rabbinic. L. I. *Gillius* in praef. Comm. in Euangelia, et *Harenbergius* in Proleg. ad Comm. in Apocak. Ioan.

2) Optima translatio תרגום est *Onkelos* in legem et *Jonathanis* in Prophetas. *Mischnam* latinitate et notis illustrauit *Guilielm. Surenhuse*. Amstelæd. 1693. fol. theqdisce facta est a *Rabio*, presbytero *Onoldino*, VI tomis. *Onoldi* 4. 1760. seqq. Ex *Gemara* idem vir doctus transtulit in nostram linguam tract. *Brachot*. Halae 1777. 4.

## § 3.

Itaque, etsi non cuiusuis est, hos scriptores excutere: tamen diligenter legenda et consulenda sunt scripta eorum, qui lectum  
ex

ex hoc fereore aurum vñbus communibus ad interpretationem Nou. Test. tradiderunt. Quorum principes sunt post Cartwrightum in mellificio hebr. Io. Drusius, Lightfootus et Schoettgenius, qui ex instituto hanc partem sunt persecuti, ille in *Praeteritorum* opere, hi in *Horis Talmudicis* <sup>a)</sup>. In quibus tamen omnibus locum habet, quod de Britanno monet Simon *Hist. Crit. T. III. pag. 795.*, cum eum dicit esse copiosorem in ritibus, quam in verbis, et nimis sequi eorum opiniones, denique cogere interdum Iudaeos dicere, quae ipsi placeant. His addi possunt etiam praeter *Haksplanum* de libris Iudaeorum, ad caleem *Lipomanni* Nizachon c. 3. Sect. II. de usu scriptorum Iud. ad interpretationem N. T. *Balth. Scheidii Praeterita Praeteritorum*, in *Menschiana Collectione*. Pauciora, sed magis delecta et exquisita, collegere *Capelli* <sup>b)</sup>, Ludouicus quidem per occasionem edendi *Cameronis Myrothecii*. Ex Interpretibus primus prope, certe satis diligenter, hoc genere usus est *Hugo Grotius*: et notarum *Wetstenii* in N. T., itemque *Gillii* Britanni in Euangelia, optima fere pars est ea, quae Iudaicorum scriptorum excerptis constat. De *Gaulmini* ineditis ex hoc genere notis v. *Simonis Bibl. Crit. IV. p. 183.* Paret, tantam huius generis iam copiam esse, vt  
alio

alio viro docto opus sit, qui delectum ex omnibus faciat <sup>bb</sup>),

a) *Drusius* edidit opus *Praeteritorum*, ab *Erasmo* nimirum et *Beza* 1612. 4: *Lightfootus* horas *Hebraicas* et *Talmudicas* *Cantabrig.* 1658. 4. repetitas *Lipsiae* cur. *Carpzonio*: *Schoettgenius* horas *Talmud.* *Dresdae* 1733. 4.

b) In *Capellis* tres sunt distinguendi: *Iacobus* uterque et *Ludouicus*, *Iacobi* filius, *Buxtorfii* aduersarius et *Criticae* sacrae auctor. *Collectiones* *Meuschenii* vide in eius *N. T. e Talmude illustrato.* *Lips.* 1736. 4.

bb) Multa enim a *Drasio*, *Lightfooto*, *Schoettgenio* et *Wetstenio*, qui archetypis rarius, versione latina autem saepissime vitur, congesta sunt e scriptoribus *Iudaicis*, quibus recta *N. T.* interpretatio parum adiuuatur. Superfunt tamen haud pauca, quae locis difficillimis lucem adfendant, tum e *Mischna*, inprimis libro *פירקי אבות*, tum e libro *Sohar*, cuius compendium dedit *Knorr a Rosenroth* in *Kabbala* denudata, tum e recentioribus *Iudaeorum* scriptis excerpta. Exempla vide in diss. nostra, *Adscensus I. C. in coelum historia biblica*, in nou. opusc. theol. *Gotting.* 1803. p. 57. ff. *De vestigiis theologiae Iudaicae in epistola Pauli ad Romanos*, ibid. p. 72. ff. *De linguis nonis*, *Erlang.* 1803. p. 9. f. Neque negligi velim *Maimonidem* in libro *מורה נבוכים*, cui observationes grammaticae insunt optimae frugis, et in utroque tractatu de *doctrina legis* et *poenitentia*, ed. *Clauering*, *Oxonii* 1705. Vide pag. 58. 59. 63. 73. 75. 87. Adde eiusdem tractatum de iureiurando ed. *Dithmar*, *Lugdun.* 1706.

§ 4.

Neque vero verborum modo intellectum adiuuant Iudaici scriptores, sed etiam rerum explicationi interdum seruiunt. Nam ritibus, moribus et opinionibus, ad quas alludunt non paucis locis scriptores Nou. Test. subinde lucem affundunt. In quo genere, praeter superiores illos, omnes ii laborarunt, qui Antiquitates hebraicas e Iudaicis scriptoribus illustrarunt. c) De quo genere, praeter *Relandi* Orationem, *Gillii* Disputatio adiri potest, inserta *Catenae Britannicae Commentar. in N. T. T. I.*

c) Utilitatem horum auctorum exempla doceant. Parabola Luc. XVI. intelligi nequit, nisi teneas, Lazarum esse Irum Hebraeorum, qui ex more orientis vitae aeternae gaudia sub imagine conuiuii, quo locus princeps erat in sinu Abrahami, adumbrabant et angelos piorum animas illuc deducere, impios autem in flammis sulphureas conicere, statuebant. Adde locum Matth. V, 34. *μη ὁμῶσαι ἔλως* e tractatu *Mischnae* *שכר עוה* illustrandum; Act. II, 3. *γλῶσσαι ὡσεὶ πυρὸς* a *Vitringa* (de syn. vet. p. 146.) sententia parallela e *Schalschelet Hakabbala* explicitum; orationem dominicam e Iudaeorum precibus *Kadisch* derivaram.

§ 5.

Sed in hoc genere plures sunt cautiones: prima, vt inconstantiam fugiamus eorum, qui, vt quoque loco commodum ipsis est, et



et susceptae ab ipsis opinioni consentaneum videtur, quod Iudaei tradunt, aut ex iis profertur, nec ne, ita Iudaicorum scriptorum usum et auctoritatem vel extollunt vel deprimunt: altera, ut κακοζηλίαν quorundam, qui studio suo capti, omnia, quae de Iudaeis proferuntur, sine delectu probant, et ad interpretandum N. T. accommodant. In quo genere utique saepe peccauere *Lightfootus* in primis et *Gillius*.

## § 6.

His igitur cautionibus facilius et rectius parebimus, omninoque hoc genere rectius utemur, si certum praeceptum tenebimus, quod delectus faciendi modum praescribat. Nam qui nihil aliud, nisi hoc, praecipunt, cauendum, ne in huius generis usu in alterutram partem peccemus, vel excedendo modum, vel citra modum subsistendo, delectum et iudicium non relinquunt: quod nemo se aut plus, aut minus, quam debebat, facere putat. <sup>d)</sup>

d) In vniuersum haec regula tenenda est: quidquid in N. T. ad ritus religionis, ad docendi et orationis formam spectat, maximam partem e scriptoribus Iudaicis illustrari debet. Sic e. c. Paulus in Epistola ad Romanos multa profert, quae Gamalielis discipulum prodant. Breuior per exempla est via, quam vel suo, vel aliorum adparatu instructus, praeiit *Wetstenius* in

in notis suis ad N. T. Delectum bonarum obseruationum e scriptoribus Iudaicis inuenias etiam in Eichbornii Commentario in Apocalypsin, Goting. 1791.

§ 7.

Atque non negem, in eo delectu plus prope valere sensum aliquem ingenii, datum ab natura, quem vsus, et exercitatio, et elegantia literarum humaniorum acuerit. Caeterum profuerit tenuisse hoc, vt ab illis scriptoribus auxilium petamus tum modo, cum necessitas aliqua vrgeat, h. e. vbi neque graecae neque hebraicae veteris linguae scientia suppetit, per quod sensus commodus et contextui aptus reperiri possit \*). Et haec est illa ipsa media via, quam tenendam in hoc genere nonnulli praecipiunt. Nam vbi ab his auxilium est, stultum sit, ab Iudaeorum magistris petere. Profuerit etiam legisse eos, qui in hoc genere caute et eleganter sunt versati; in quo *Capelli* inprimis *Spicilegium* commendem, et *Grotii* ex eo genere notas in N. T.

e) Exemplum illustre exstat Act. XIII, 48. τεταγμένοι εἰς ζωὴν αἰώνιον. Qui hoc ex sensu Iudaico explicant, illis τεταγμένους idem est, ac עררך, ordinatus, h. e. destinatus. Sed meliorem sensum fundit graecitas loci: τάττειν ἑαυτὸν εἰς τι est, studiosum esse alicuius rei: τεταγμένους, compositus. Vide tamen - Koppium ad Rom. IX, 22.

§ 8.

## § 8.

In ea autem parte, quae ad antiquitates pertinet, adiungendi, atque adeo Rabbini-  
cis scriptoribus longe praeferendi sunt *Philo*  
et *Iosephus*: quippe et antiquiores istis et  
eruditiores: neque vllō modo audiendi sunt,  
qui amore Rabbīnorum, aut suarum adeo  
opinionum capti, hos potius, quam illos,  
vbi dissentiant, sequendos putant. Nam in  
rebus ad templum Hierosolymitanum spe-  
ctantibus, et in ritibus religiosis, aut cum  
templo aliquam coniunctionem habentibus,  
vt in caussa Paschali, in adyto, et templo  
Herodis, maior profecto fides esse debet  
iis, qui suis oculis ista viderunt, et ipsi facti-  
tarunt, quam caeteris, qui excisa cum tem-  
plo vrbe, et sublato ritu Iudaico, vixere <sup>f</sup>).  
Legatur etiam *Heinius* Obs. S. I, 9. II, 3.  
de ignorantia Iudaeorum et crassis mendaciis  
in antiquitatibus hebraicis.

f) Sic v. c. Talmudici tradunt, sacerdotes macta-  
visse agnum paschalem, sed *Philo* quemvis patremfa-  
miliās hoc factitauisse perhibet. Templum Hierosoly-  
mitanum non totum ab Herode fuisse destructum, tra-  
duunt Rabbini: *Iosephus* autem etiam sanctuarium de-  
structum esse docet. Vtrobique *Iosephus* et *Philo*  
maiorē fidem merentur. Aliis N. T. locis adhuc la-  
cem adfundunt literae Samaritanae publicatae in Re-  
pert. Lit. Or. et Bibl. *Eichhorn*. Tom. IX. et in Re-  
pert. *Paul*. Tom. I. p. 120. sqq.

## § 9.

*Philo* vero etiam rationi allegoricae et mysticae, qua *Paulus* inprimis utitur, illustrandae et accuratius cognoscendae plurimum proderit: in quo tantum ei similitudinis cum *Paulo* intercedit, etiam interdum in modis loquendi, ut quidam etiam *Philonis* libros a *Paulo* lectos coniicerent<sup>g)</sup>, in his *Wetstenius* T. II. N. T. pag. 384. Quod nobis tamen non magis credibile videtur, quam quod *Ottio* in *Spicileg.* pag. 397. placebat, e *Pauli* libris *Iosephum* profecisse. Nam ut vix credi potest, *Paulum* graecae linguae ita peritum fuisse, ut *Philonis* orationem, plane abhorrentem ab hebraica indole, et Platonicae ac Demosthenicae aemulam, intelligeret: ita nihil impedit, quo minus utrique ex iisdem antiquiorum scriptorum fontibus hauserint. Legantur a studiofis *Loesneri* V. C. Lectiones Philonianae.

g) Magna omnino similitudo inter scripta *Pauli* et *Philonis*: vide *Gal.* IV, 24. s. et *Philon.* allegor. ed. Pfeifferi t. I. p. 385. Neque tamen exinde colligi potest, vnum ex altero hausisse: intelligitur potius, utrumque linguam graecam adcuratius didicisse.

## § 10.

Nec verum est, quod traditum vidi a Philologis nonnullis parum peritis, cum *Iosephi*

*sephi* lectionem ad intelligentiam N. T. vtilem dicerent, quod eodem genere scribendyteretur. Nam *Iosephus* bene graecos scriptores, imprimis Polybium, et in verbis singulis, et in forma orationis, diligenter ac satis feliciter imitatur, rarissime admittis hebraïsmis, desciscens in eo, vt ipse dicit, a gentis suae consuetudine. Sunt tamen et in phrasi, quae observasse non poenituerit. Ea ex instituto congeffit et illustravit *Ottius* l. c. diligentius multo *Cl. Krebsius* in *Observat. ad N. T. e Iosepho.* <sup>h)</sup> Et ab his quoque nonnulla, vt sit, praetermissa sunt: velut, quod τὰ βλεπόμενα de euentu promissionis dixit A. V, 10. extr. quod prodest ad Hebr. XI, 1. it. quod ἐκλογὴν de libertate, B. I. II, 8. 14. quod prodest illustrando loco *Rom.* 9, 11. vbi ἡ κατ' ἐκλογὴν πρόθεσις, in qua se tantopere torquent, qui ex Compendiis doctrinae interpretantur, nihil aliud est, quam libera Dei voluntas, omninoque libertas Dei in beneficiis tribuendis; ducto modo loquendi partim ex hebraïsmo, qui libertatem, nisi per verbum כּוּחַ, exprimere non potest, partim ex natura rei. Nam fundamentum libertatis est in facultate eligendi. Sed ad interpretationem N. T. multum proderit in legendo Iosepho observasse, quomodo tradens res Iudaicas e libris sacris, exprimat hebraica: quale est, cum in caussa

Core,

Core, verba כֹּהֵן יִשָּׁה, quae οἱ ὁ vertunt κατέναντι τῷ Κυρίῳ (Num. XVI.), ipse interpretatur κατέναντι τῷ προτεμενίσματος. Et hoc genus observationis fere neglectum vidimus.

h) Iosephus admodum feliciter imitatur Thucydem et Polybium, rarissime admittis hebraïsmis, v. c. κοινὸς pro βέβηλος, σάκκους περιτίθεισθαι, amictum fanebrem induere. Ne autem dictione Iosephi abutantur interpretes ad explicandum N. T. observent quæso, illum magis illustrare historiam V. et interdum etiam N. T., quam singula verba. — Multas bonæ observationes e scriptis Iudaicorum in N. T. inveniuntur adhuc in Raymundi Martini pugione fidei adversus Mauros et Iudæos. Lips. 1687.

## CAP. IX.

*De Interpretibus N. T. eorumque usu.*

## § 1.

Interpretandi genera plura usurpauit antiquitas, *mysticum* s. *allegoricum*, *dogmaticum* et *grammaticum* sine *grammatico-rhetoricum*. Nec eodem genere scribendi vti sunt omnes. Nam alii *Commentarios* scripsere, alii *Scholia*, alii *Homilias*.

## § 2.

Antiquissimum genus est *allegoricum*, ortum haud dubie e Synagoga, quae ab ea re בית-מרש magistris Iudaeorum dicitur, et scholis Doctorum Iudaicorum. Nam in Synagogis licuisse commentari in loca sacrorum librorum, Euangelia docent. Et in scholis Doctorum, quae pariter Synagogae dicuntur, quod in iis docebant fere magistri, et post sublatum templum nihil magis agebatur, quam ut ratio et modus explicandi legem et Prophetas traderetur, in quo summa et vna eruditio Iudaica erat <sup>1)</sup>.

i) Qua tamen in re sine vilo gustu, sine vilo veri

et pulchri sensu sunt versati. Vide *Vitringam* de synagoga vetere pag. 137. ff.

§ 5.

Id olim, ab ipsis Prophetis usurpatum, quoad incorruptum ab humani ingenii vanitate et lusibus mansit, habuit explicationem vaticiniorum de Iesu Christo, typorumque, et fortasse etiam rerum ipsarum, imprimis historicarum, accommodationes ad diuina et humana, per quas dogmata et praecepta vitae illustrarentur, et omnia ad usum fidei ac vitae conferrentur: idque adeo fuit mysticum genus, quod proprie ab allegorico differt, ut apud Graecos *Θεωσία* ab *ἀλληγορία*.<sup>1)</sup>

1) Historia interpretationis S. S. docet, tum mysticam, tum allegoricam N. T. explicationem ad formam Iudaicam fuisse expressam. Quae cum verae theologiae admodum sit perniciosa, plane fugienda est a liberali religionis doctore.

§ 4.

Sed paullatim ab ingeniis, parum subactis doctrina, et acuminis gloriam captantibus, mire corruptum est, omisssaque ineriori parte, quae ad vaticinia et typos pertinet, omnia ad accommodationes relata sunt, per quas et res minutissimae quacunque, et verba ipsa misere et inepte torquerentur, et



lufibus omnia replerentur: quo genere etiamnum quidam in parabolis interpretandis vtuntur. Melius tractat hoc genus Philo, quippe literis subacti vir ingenii, sed tamen nimis philosophatur.

## § 5.

Hoc ergo genus ab Iudaeis acceptum, coepit a Doctoribus Ecclesiae Christianae vsurpari, primum omnium in Aegypto, imitatione Philonis, qui nihil aliud egit, quam vt ab sensibilibus homines adduceret ad inuisibilia intelligenda et appetenda; et, quamuis post inducto grammatico, tamen frequentatum est inprimis ab his, qui, propter inscitiam linguae et historiae, etiam necessario allegorias consectabantur, quod de se iuvene fatetur *Hieronymus*: *allegorice interpretatus sum*, inquit, *Abdiam*, cuius historiam nesciebam, eiusque inscitiae veniam rogat. *Praef. ad Abdiam*. Nec minus prope ingenio indulgere etiam doctissimi, vt *Origenes*, quam Iudaei indulserant: et tamen haec ratio plurimum aduersus Chiliaftas, Anthropomorphitas et Gnosticos profuit. <sup>m)</sup>

m) Barnabas, Clemens Rom., Iustinus Martyr, Clemens Alexandrinus et Origenes, omnes vñ sunt interpretatione allegorica, admissa etiam gentilium philosophia. Vid. *Schulersi Histor. Interpretat. S. S. popularis*

leria theod. scripta. Tubing. 1787. Semleri librum: Versuch, die Auslegung des N. T. zu befördern. p. 185. seqq. et Rosenmülleri Commentatt. de fatis interpretationis sacrarum literarum in Ecclesia Christiana, nunc etiam theodisce factas. Lips. 1789—1791.

§ 6.

Sed adiunctum est ab Christianis huius generi, quod ad *οἰκδομὴν*, h. e. non tam ad intelligendas scripturas, quam ad dogmata et praecepta religionis inculcanda et commendanda, et ad gloriam ingenii usurpabatur, *grammaticum*, quod verba, historias, sententias, difficiles et obscuras explicaret, lectiones varias commemoraret ac diiudicaret, auctore, id quod satis constat, *Origene*, non theologica magis quam literarum scientia et usu praeclare instructo, quas illae Alexandriae docebat, auctore *Eusebio H. E.* <sup>a)</sup>)

a) Origenes interpretationem allegoricam, quam primam secutus erat, doctrinâ philologica imbutus in scriptis posterioribus reliquit. Idem nostris temporibus euenire videmus: quo magis theologus eminet doctrina solida veraque linguarum notitia, eo melior est S. S. interpres, sibi que temperat, quo minus doctrinas fidei et morum inanibus superstruat allegoriis, quibus auditorum animi magis obtruncantur, quam flectuntur.

§ 7.

Ad extremum, cum inter Graecos maior nume-

numerus esse coepisset Doctorum, qui eruditi essent literis humanioribus, et exculti elegantia doctrinae, allegoricum genus plane repudiari coepit, auctore *Diodoro Tarsensi* (v. *Socrat.* VI, 3. *Sozom.* VIII, 2.) cuius rationem discipuli, inprimis *Theodorus Mopsuestenus* et *Io. Chrysostomus*, imitati sunt. Nam quod, siue *Diodorus* ipse, siue *Theodorus*, siue uterque, in vaticiniis interpretandis ea ratione dicuntur abusi, historico sensu Prophetarum in accommodationes conuerso, ea, siue criminatio fuit hominum allegoricae interpretationi nimis fauentium, et per hoc grammaticam, atque adeo ipsos illos libros, quorum gloriae inuidebant, infamare cupientium, siue vera accusatio fuit, tamen non impedit, quominus de interpretatione scripturarum uersa in genere grammatico optime meriti sint. De *Theodoro* v. *Buddsi* Isag. pag. 1405. a quo in enarrandis interpretibus *Diodori* mentionem nullam factam, mirabile est, e cuius libris excerpta in *Catenis PP.* reperiuntur, quamquam nihil, quod nos quidem repperimus, admodum eximii inest.

### § 8.

In Ecclesia latina et ipsa allegoricum genus inualuit, partim ab eadem necessitate (§. 5.), partim per versiones latinas *Origenianorum*

orum Commentarios, aut quod, qui Graece docti essent, ut *Hilarius* et *Ambrosius*, ex *Origenis* et similium libris haurirent.

§ 9.

*Dogmaticum* genus interpretandi est eorum, qui in interpretando non tam verba accurate interpretantur, quam sententias utrinque intellectas, illustrant disputationibus de capitibus fidei et morum, controuersias etiam tractant, et veritatem doctrinae ab deprauationibus haereticorum vindicant: cuius generis est *Cyrilli* Alexandrini in *Iohannem* Commentarius, cui tamen interdum quaedam adspersa sunt e grammatica ratione; eique similes multi, praesertim de latinis, et recentioribus, proxime ab reparatorum sacrorum tempore scriptis. Quod genus ad intelligentiam rerum theologiarum utile, saepe ad interpretationem eam, quae proprie dicitur, parum prodest. °)

p) *Dogmaticum* interpretandi genus probatur, si superstructum sit explicationi grammaticae, v. c. *Ioh. X, 30. ἐγὼ καὶ ὁ πατὴρ ἓν ἐσμεν* Quod si hic notetur vnio moralis Iesu et Patris, quae consistit in communionem consilii de beandis hominibus, tunc bene observatur dogmatice, saluatorem diuinum singulari ratione cum Patre esse coniunctum. Si autem statim ex doctrina Ecclesiastica de Trinitate cogitetur de vnitate essentiali, aliis ex locis comprobanda, tunc locus explicatur

plicatur dogmaticæ, et quidem male, quia contextus orationis Iohanneus negligitur.

### § 10.

Est etiam quoddam genus ex omnibus, præsertim posterioribus duobus, mixtum, quod et verba curiose tractat, et sententiæ theologicæ persequitur: quod, si modum adhibet eum, quem supra descripsimus, non modo non est contemnendum, sed etiam vehementer probandum <sup>p</sup>). Sed leges interpretandi supra proposuimus.

p) Cum interpretatio S. S. accuratè et ex regulis artis instituta dogmatibus publicæ auctoritatè olim descriptis non semper faueat, abstinere fortasse prouidus interpres ab omnibus observationibus dogmaticis, eo lubentius, quia dogmata in vniuersum stabilienda non ex vno loco, vel altero, sed ex tota Nou. Test. analogia elici et probari debent.

### § 11.

In genere librorum, in quibus scripturæ tractarentur, principatus dabatur *Commentariis* <sup>q</sup>): in quibus copiosius et vberius, olim allegoriæ, intermixtis tamen subinde grammaticis observationibus, vt in *Origenis Tomis*, post sententiæ scriptorum tractatæ essent. Huius generis quæ ratio fuerit, bene *Hieronymus* explicat: *Commentarii quid operis habent? Alterius dicta edisserunt: quæ*

quae obscurae scriptae sunt, pleno sermone manifestant: multorum sententias reperiunt, et dicunt: hunc locum quidam sic edisserunt: alii sic interpretantur: illi sensum suum et intelligentiam his testimoniis et hac nituntur ratione firmare, ut prudens lector, cum diuersas explanationes legerit, multorum vel probanda vel improbanda didicerit, iudicet, quid verius sit, etc. adv. Rufin. L. I. p. m. 202.

q) Commentarius est perpetua explicatio auctoris ratione habita difficultatum, cum in verbis, cum in rebus obuiarum. Exemplum boni Commentarii est Heyniana interpretatio Virgilii. Multum difficultatis habet iste labor: inde mira honorum Commentariorum paucitas.

## § 12.

Aliud genus est *Homiliarum*, in quibus vel longiores *ῥήσεις* libri sacri, vel singulae sententiae breuiter explicantur, et ad usum, h. e. ad docendum, monendum, consolandum conferuntur: proprie destinatum vñbus Ecclesiae '). Latini *sermōnes*, imprimis *tractatus* appellant, et *tractatores* ipsos auctores; quos hodie concionatores appellant; quamquam etiam totum genus interpretum *tractatores scripturarum* dicuntur. *Glossae* quidem *ὁμιλίαν tractatum*,  
ὁμιλη-

ὁμιλητὴν tractatorem interpretantur. v. in-  
pr. Cangius in Glossar. in his verbis.

r) Quod nostris diebus sunt orationes in singula  
S. S. loca, primis seculis Christianorum erant homi-  
liae h. e. practicae locorum explicationes, fabulis san-  
ctis illorumque temporum philosophia refertae. Opti-  
mae sunt *Origenis* et *Chrysostomi*.

### § 13.

Terrium genus est *Scholiorum*, quae et  
*σημειώσεις* dictae, item ἐκβολαί vel ἐκλογαί,  
(*Eustathius* παραβολαίς appellat) excerpta,  
quo verbo, non satis vulgo intellecto, *Hie-  
ronymus* σημειώσεις bene interpretatur: *Hie-  
ronymus* genus commaticum, a breuitate,  
appellat in *Comm. ad Matthaeum*.

### § 14.

Ante *Origenem* vtrum *Commentarii* ex-  
isterint, nec ne, quaeri solet, adfirmantibus aliis, vt *Huetio*, *Tillemontio*, *Bud-  
deo*, cum alii ab *Origene* primo exemplum  
*Commentarii* scribendi propositum in Eccle-  
sia Christiana dicant. Me non poenitet, il-  
lius sententiae esse; nam *Origenes* Tom.  
VII. in Ioan. prouocat ad *Commentarios* su-  
periores; sed ita, vt de allegorico et dog-  
matico genere intelligatur: *Origenes* vocat  
scriptores ecclesiasticos. Nam literalem in-  
ter-

interpretationem in uniuersum N. T. primum *Origenem* edidisse in *σημειώσεις* opere, certum est. v. dicta in Disp. nostra de *Origene* etc. §. 26.

§ 15.

Omnino principatus inter veteres interpretes debetur *Origeni*, non modo, quod primus grammaticae interpretationis exemplum proposuit, aut, quod in omni genere interpretationis excelluit, ut qui *Tomos* allegoricarum interpretationum, *σημειώσεις* literales, et *Homilias* scripsit, sed etiam, et multo magis, quod prope, quicquid boni habent veteres graeci et latini interpretes N. T. id ab eo acceptum tenent; ut demonstrauimus l. c. §. 27. 28. ubi inprimis §. 25. de *σημειώσεις* dictum, i. e. de argumento et nomine operis.

§ 16.

Quo facilius etiam ferimus iacturam voluminis Origeniani, quod Scholia illa habuit: cum ea prope tota exhausta sint a sequentibus, *Chrysostomo*, et aliis. Nec continendi sunt *Tomis*), praesertim, quos graece ab *Huetio*, et nuper, cum aliis *Origenis* reliquiis graecis, ab *Rhaeo* editos habemus: quamquam et in latinis, ut in epist. ad Rom. multum boni inest. Nam adpersa sunt



sunt etiam ἀλληγορικά quaedam haud vulgaria, ad grammaticam rationem pertinentia: ut nihil dicamus de fragmentis Commentariorum, quae vel in Philocalia extant, vel in Catenis reperiuntur. Atque etiam allegorica, etsi non ad interpretandi rationem, at ad sensus pios vel instillandos vel abluendos prodesse possunt; quo nomine etiam *Erasmus*, quamquam alienus alias ab hoc genere, et grammaticus haud dubie interpretes, tamen interpretes allegoricos commendat in *Enchir. mil. Christ.* cap. 2. et forte hac de causa quaedam allegorica immiscuit Paraphrasi N. T. quod reprehendit *Clarcius* in Praefatione Paraphraseos suae N. T.

a) *Origenes* in Iohannem XXXII. tomos vel sectiones scripsit: reliqui tomi illustrant librum Iesuae, Matthaeum et Epistolam ad Romanos. Vid. *Origenis* commentaria in sacras scripturas, ed. Huetii. Colon. 1683. et *Roesleri* Bibl. Parr. Eccles. theod. II. p. 270. sq. Homiliae *Origenis* latine tantum extant. *Philocalia* est Epitome operum *Origenis* praeclare concinnata a *Spencer*o, Cantabrig. 1668.

### § 17.

Ei proximus est ex iis, quorum libri tantum tulere, *Chrysostomus*, cuius *Homiliae* in *Matthaeum*, *Iohannem*, *Actus Apost.* et *Epist. Pauli* extant, in has priorem separatim *Veronae*, 1529. ab *Giberto* Epi-

Episcopo editae, vniuersae, praeterquam in Operum Voluminibus, etiam separatim ab *Sylburgio*, quae sunt mistae e grammatico et dogmatico genere, breui et perspicuae verborum interpretationi et huius tractatione, vt appellatur in editis, subiecta. In epistolas quidem Pauli nil melius aut par totae antiquitas habet; et quicumque de Graecis post in has Epistolas scripsere, ex *Chrysostomo* pendent. In historicos libros optimus est et plenissimus Commentarius in *Matthaeum* inprimisque dignus lectu.

§ 18.

Eius discipulus fuit *Isidorus Pelusiota*, cuius Epistolarum libros quinque ab *Rittershusio* et *Schotto* per partes editos habemus, de Interpretatione Scripturae S. h. e. super locis Scripturarum, et quaestionibus dogmaticis, e sensu locorum quorundam pendentibus. Inprimis saepe vindicat loca, quae ad praedestinationem absolutam trahebantur, vt I, 56. IV, 59. etc. Eas magis ab aliis valde laudatas, quam vsu admodum dignas tali laude reperi. Sequitur fere *Chrysostomum* praeceptorem: caeterum grammaticae interpretationis fautor, atque etiam Criticae amans. Oportet studiosum interpretandarum scripturarum percurrere opus,  
et

et deligere; quae ad hanc rationem pertinent.

§ 19.

Haud paulo utilior et melior est *Theodoretus*, Cyri Episcopus, cuius Commentarium in Epistolas Pauli graece edidit *Sirmondus* (T. III. Opp. *Theod.*), quamquam Scholiorum potius, quam Commentarii formam habet. Ipse excerpta de Patrum, *Theod. Mopsuesteni* inprimis et *Chrysostomi*, scriptis appellat in Praefat. Nec modo verba breuiter explicat, sed etiam de interpunctionibus passim monet, vt *Rom.* 9, 5. et sententias breuiter illustrat, argumenta aduersus haereticos, inprimis Arianos, demonstrat, et a deprauationibus haereticorum, qui tum erant, vindicat. Itaque ab eius lectione initium fieri velim. <sup>1)</sup>

t) Dignus est inprimis, qui adcuratius inspiciatur, Commentarius eius in Epistolas Pauli minores. Comoda est editio a *Schulzio* et *Noesselto* curata 5 tomi, Halae 1769. f.

§ 20.

Similis huic est *Theophylactus*, Bulgariae Episcopus, inde vulgo *Vulgarius* olim appellatus, etiam *Melanchthoni*, *Erasmo* et *Camerario*, cuius in Euangelia, Acta Apost. et Epistolas Pauli Commentarios,   
sue

siue potius Scholia, habemus, ut quae etiam in Codicibus nonnullis *ἐπιτομαὶ* inscribuntur. Nam et ex iisdem fontibus haufit, et eadem methodo usus est; nisi quod, praeter dogmatica, etiam allegorica subinde lususque admiscuit: nisi ea ab aliis addita sunt: nam interpolatum esse subinde, diuersitas librorum arguit, nuperis etiam editoribus Venetis notata, aliis alio loco Codicibus modo breuioribus, modo copiosioribus, et, *Simoni Hist. Crit. T. IV. Cap. 28.* videtur, formula καὶ ἄλλως: quamquam haec Scholiastis graecis, nominatim Oecumenio, valde vsitata est. Caeterum Commentarius in Epist. Pauli accuratior est caeteris et verum compendium Chrysostomi. De nupera editione v. Bibl. theol. T. V. p. 771. f.

§ 21.

Ex eodem genere sunt *Oecumenii* \*) in Acta Apost. et Epistolas Pauli Scholia, si tamen sunt *Oecumenii*, cuius etiam aetas ignoratur. Nam ei tantum de coniectura editoris primi, *Donati Verouensis*, siue librorum auctoritate tribuuntur, per quos *Theophylacti* potius esse, nuper *Finettus* iudicauit, praef. ad T. III. Opp. *Theophyl.* Haec sunt, quae *Scholorum* nomine commemorari solent ab *Erasino*, *Camera-*  
rio, *Beza*, et aliis illius aetatis scriptori-  
bus.

bus. Et sunt potius ab ignoto e pluribus excerptae notae, quam vnius opus. Nam et *Oecumenii* nomen interdum est in margine, vt et *Ioannis*, i. e. *Chrysostomi*, et *Photii*. Ex *Origenis* Scholiis quaedam fluxisse, etiam hoc indicio est, quod in iis *Origenianarum* opinionum vestigia deprehensa sunt. v. *Erasmus* ad *Hebr.* VII, 25.

u) *Theophylactus* et *Oecumenius* sunt meri compilatores *Chrysostomi*, quibus parum frugis inest. Praebeat iudicii veritas ex hoc specimine: sunt IV. euangelistae, ait *Theophylactus*, quia IV. sunt virtutes cardinales.

### § 22.

Nec dispar est *Io. Damasceni* \*) in *Epistolas Pauli* *Commentariolus*, inter eius Opera T. II. ab editore *Benedictino* in lucem prolatus, vt qui etiam inscriptione profitetur, nihil nisi *Excerpta* esse e *Chrysostomi* Opere.

v) *Damascenus*, *Syriae* monachus, *Sec. VIII.* florens, non tam propter merita in interpretationem inclaruit, quam propter systema dogmaticum a se editum in libro: *περί ὁρθόδοξης πίστεως*.

### § 23.

His *Theophylacti* *Oecumenii*que Operibus simillimae sunt, quae sub *Catenarum*, ab *Thoma Aquinate* inuento nomine, vel editae

editae sunt, vel in Bibliothecis latent; Graecis ἐπιτομαὶ ἐρμηνειῶν dicuntur. x) Ea sunt excerpta e Commentariis, et aliis Patrum libris, quae etiam singula suis plerumque auctoribus nominatim redduntur, collecta et digesta ab *Olympiodoro*, *Niceta*, *Procopio Gazaeo*, et aliis: de quibus qui velit cognoscere, praeter *Ittigium* de Catenis Patrum, adeat imprimis *Simonem* l. c. c. 30. f. et *Noesseltum*, V. C. in Diss. de Catenis Patrum graecorum: qui soli ad usum accommodate de iis scripsere: caeteri, vt *Wolffius*, *Fabricius* etc. tantum historice.

x) Catenae celebrantur propter usum triplicem: 1.) seruarunt enim *Aquilam* et reliqua fragmenta hexaplaria, 2) continent extractus ex operibus ignotorum interpretum, et 3) multas bonae frugis variantes lectiones. Num autem nomen, *catena*, ab Aquinate inuentum sit, merito dubitatur. Praecipuae catense sunt *Nicephori* in Octateuchum 1581. *Olympiodori* in Iobum, Venet. 1587. *Possini* in Matthaeum 1646. *Corderii* in Lucam, Antwerp. 1648.

## § 24.

Nec praetereundus *Euthymius Zigabenus*, Panopliae Dogmaticae scriptor e Sec. XII. cuius Commentarios in Euangelia latine editos a *Io. Hentenio* habemus, pariter e *Chrysostomo* maxime, sed tamen et aliis ductos, 2.) et doctis valde probatos, vt *Sadoletto*,

*dolet*o, quem vid. Epist. p. 214. b. ed. nov. add. *Fabric. Bibl. Graec. T. VII. p. 474.* Et memorantur Codices scripti Comment. in Epist. Pauli, item Catholicas.

2). Nimirum Basilio, Origene et Gregorio Nazianzeno. Opus iussu Alexii Comneni contra omnes haereses exaratum est: insunt tamen hinc inde observationes egregiae, v. c. ad Matth. IV, II. quo loco tentationes Iesu Christi ad sollicitationes internas τῆς γαστριμαργίας, τῆς κενοδοξίας καὶ τῆς φιλοπλουτίας refert: οὗτοι γὰρ οἱ πειρασμοὶ εἰσὶν οἱ ἄρχοντες τῶν παθῶν. Facile intelligitur, quam prope haec absint a Beckeri, Heumannii, Eichbornii et Herderi interpretationibus. Commodam Euthymii editionem curavit Matthaei, textu Graeco, qui nunquam antea editus erat, diligenter recensito, Lips. 1792. 4 tom. 8.

### § 25.

Consulto ad hunc locum distulimus *Cyrrillum Alexandrinum*, cuius Commentarius in Iohannem exstat, graece, etsi non integer, ab *Auberto* inter Opera eius (T. IV.) editus: quod dogmata potius et controuersias, imprimis Arianas, tractat, quam interpretem agit, qui proprie dicitur. Insunt tamen nonnulla e ratione grammatica, in qua non dubitat ab auctoritate superiorum omnium discedere. Ex quo genere est, quod Io. 5, 39. primus defendit, ἐρευνᾶτε non imperatiue, sed indicatine accipiendum esse: item εὐλογεῖν et εὐχαρισεῖν esse eadem, et

et alia. Et sunt etiam in aliis eius scriptis, quae ad hanc rationem pertineant, et ad phraseos intelligentiam. Excerpta huius Commentarii dedit *Semlerus* V. C. in Selectis capp. Hist. Eccl. pag. 285.

§ 26.

Haec de Graecis. Latinorum longe princeps est *Hieronymus*, \*) solus hebraice et graece doctus, qui plures N. T. libros Commentariis illustravit, secutus maxime *Origenem*, cuius in *Praef. ad Quaes. in Genes.* etiam cum invidia nominis *Origeniani*, optat habere scientiam scripturarum: id quod e praefationibus patet, in quibus commemorat auctores, e quibus profecerit, imprimis in *Epist. ad Galatas*. Etsi potius aliorum sententias refert, quam ipse suas explicat, quo nomine etiam tum a nonnullis reprehensus est: v. *Praef. Comm. in Ierem.* et *L. I. c. Ruf.* tamen et ipse nonnunquam bona sua in critico, grammatico et dogmatico genere profert. *Lutherus* noster cum felicior in aliis libris, quam in Commentariis interpretari iudicat, ut supra memorauimus.

a) *Hieronymus* melius interpretatur S. S. in Epistolis, quam in Commentariis, melius V. quam N. T. Insunt tamen etiam commentariis observationes bonae frugis, v. c. *Matth. VI, II.* quo loco ἀγροὶ ἐκκοιμισθῶν



in euangelio secundum Hebraeos לחם מחר *adpellari* scribit, h. e. panem *crassinum*, siue *futurum*: quae vnice vera est h. v. explicatio. Animum attentum sibi deposcunt notitiae eius geographicae, quia per longum tempus commoratus est in Palaestina. Vid. beati *Oelrichsii* Commentar. de scriptor. Eccles. Lat. Lips. 1791. p. 512. f.

## § 27.

Nec tamen inutile fuerit, alios quoque consuluisse: quorum antiquissimus est *Hilarius* Pictauienfis, cuius Commentarius in *Matthaeum* extat, literalis ille quidem, sed subobscurus, ut sunt illius omnia, et e Graecis, imprimis *Origene*, ductus. Melior est alter *Hilarius*, Diaconus, (si tamen est auctor Commentarii in Epistolas Pauli, qui inter *Ambrosii* Opera editur,) ut videtur *Blondello Apol. Hieron.* pag. 47. 48. multos adstipulatores nacto, contra dicente *Petauio* de *Hierarch.* I, 12. quem sequitur *Oudinus* in Comment. de Script. Eccl. *Blondelli* sententia videtur potior, quae *Augustini* testimonio nititur, proferentis verba Hilarii, quae sunt in hoc Commentariolo. Nam v. c. vestigia Pelagianismi, a quo alienus fuit *Hilarius*, vel dubia sunt, vel ab interpolatione: cuius suspicionem video iam in mentem venisse editori Parisiensi a. 1529. in subiecta Epistolae ad Rom. admonitione. Certe qui dicit p. m. 490: a. 2. *nos peccasse*  
in

in *Adamo*, in *massa Adami*, is Pelagianus non fuit: ut necesse sit, ea, quae Pelagiana videantur, aut aliter ab eo intellecta, aut non scripta esse. Et sunt tamen in his Commentariis, quae graecae linguae imperitum arguant, ut qui lectionem aliquo loco graecam ita commemorat, ut ab obliuente, et de fama acceptam, ad Rom. XII, 11. Caeterum ut interdum valde ineptiat, ut in iis, quae de *praetorio* et *episcopis* ad *Phil. I.* dicit: tamen et multa bona habet, quae vix ab homine graecarum et hebraicarum literarum imperito exspectes. <sup>b)</sup>

b) *Oelrichs* l. exc. pag. 62. „in interpretando Codice sacro non magna laus Hilarii: satis enim constat, eum Origenem, nisi interpretatum, certe in plurimis secutum esse.“

### § 28.

Nec contemnendus est similis *Pelagii* Commentariolus in Pauli omnes, praeterquam ad Hebraeos, Epistolas, a quibusdam *Hieronymo*, inter cuius Opera editur, male tributus; quem nec *Cassiodorus* subtilissimum vocare, *Lect. diu. cap. 8.* nec Orthodoxi, praesertim posterioris aetatis, saepe usurpare dubitauere: <sup>c)</sup> quamquam insunt semina opinionum de peccato inprimis originali, et alii errores. v. *Kossius Hist. Pelag. I, 4.* et *Noris. Hist. Pelag. I, 3.*

c) Conf.

c) Conf. de hoc Pelagii Commentariolo *Walcbii* Histor. Haer. T. IV. p. 547. seqq. et b. *Schoenemann* biblioth. historico - liter. patrum latin. Lips. 1794. t. II. p. 433. f.

## § 29.

*Augustinus*, si hebraice et graece doctus fuisset, pro ingenii magnitudine et subtilitate, superasset haud dubie omnes. <sup>d)</sup> Nunc vir in Dialecticis et Rhetoricis exercitior, quam in Grammaticis, literisque graecis et hebraicis, Commentarios replevit allegoriis, et digressionibus dogmaticis, saepe valde bonis, quaesivitque mysteria in verbis, quae saepe adeo torquet, ut ludere voluisse videatur. Interdum tamen, felicitate ingenii, non modo sequitur meliores superiorum interpretationes, sed etiam sua sponte, maxime in libris dogmaticis, verum videt. Caeterum haec ratio interpretandi, quia non opus habet literis, sed ratiocinatione Dialectica vitur e verbis versio- nis, sensu vulgari latino acceptis, et ad analogiam doctrinae relatis, sequentibus seculis, quae et ipsa illis literis carebant, lectores et admiratores reperit plures, quam *Hieronymus*. Itaque interpretes latini, qui post fuere, usque ad instaurationem sacrorum, toti pendent ex *Augustino*, cuius interpretationes non modo e Commentariis, siue Sermonibus in libros sacros, sed etiam

e libris caeteris omuib, imprimisque iis, qui aduersus Arianos, Pelagium et alleclas, item Manichaeos scripti sunt, laboriose collegerunt, vt *Thomas* in *Catena aurea*, et totam interpretationem N. T. Augustinianam fecere. Nam quae ab Anglis, vt *Beda* et *Alcuino*, postquam literae graecae inter eos coli coepissent, e Graecis, vt *Chrysostomo*, et e literatura hebraica a *Nic. Lirano* et *Paulo Burgenfi*, Lirani continuatore, ducta sunt, ea tenuia sunt et pauca, quamquam non contempnda. Atque etiam proximis ab instauratione sacrorum temporibus, cum primi Theologi essent ei rationi adsueta, imprimis *Lutherus*, nec dum literis hebraicis et graecis ad nostrorum temporum modum instructi, *Augustinus* plurimum valuit, vt quem etiam *Victorinus Strigelius*, vir elegantissimae doctrinae, et inter optimos illius aetatis interpretes numerandus, *Loc. Théol.* P. III. p. 29. non dubitat, caeteris omnibus praefere: *nullus ex Patribus melior interpres est, quam Augustinus*. Caeterum commentariorum optimus est in Epistolam ad Galatas, parciior ille in allegoriis, magisque caeteris grammaticus.

(d) *Augustinus*, omnis orthodoxiae pater, hic commemorari debet propter CXXIV. sermones in Iohannem, Commentarium in orationem montanam, in Epistolam ad Romanos et propter quaestiones in Euangelistas.

listas. Neque praetermittendi sunt libri IV. de consensu euangelistarum, qua de re multa ingenue disputavit singularem quasi inspirationem diuinam in hoc argumento tractando sibi vindicans. In vniuersum *Augustinus* non tam inter interpretes verborum, quam rerum referendus est. Vid. *Oelrichs* l. c. p. 514. seqq. et *Schoenemann* l. c. p. 24. ff.

## § 30.

Itaque non est, quare de caeteris Latinis dicamus, aut de glossis, quarum ea, quae *Ordinaria* dicitur, a *Rabano Mauro*,<sup>e)</sup> s. potius *Walafrido Strabone* ex *Rabani* Commentariis, collecta altera breuior, quae *Interlinearis* appellatur, ab *Anselmo* Cantuariensi scripta est.

e) *Rabanus Maurus*, primum abbas Fuldensis, deinde Episcopus Moguntinus, Alcuini discipulus, scripsit catenam Patrum in Ev. Matthaei et Epistolas Pauli. Plura vide in *Simon*, Hist. Crit. T. III. c. 25.

## § 31.

Instauratis studiis linguarum, et mox sacris ipsis, commutata est paullatim ratio tractandi libros sacros, et emendata:<sup>f)</sup> sed nec omnes eodem modo tractarunt rem, nec omnibus temporibus eadem ratio valuit. Nam alii grammatica modo secuti sunt, ut sensus verborum explicaretur: alii sententias et dogmata, alii vtrumque genus complexi

plexi sunt, et alius alio vberior fuit. Et in principio primum genus a pluribus cultum; post alterum, deserto prope penitus primo, obtinuit; denique primum et tertium reuocatum est. Fuerunt etiam extremis temporibus, qui in locis difficilioribus per Observationum libros explicandis et illustrandis studium suum collocarent.

f) Poesis mater fuit philosophiae: hanc secutus est dogmatismus: hoc aedificio operose exstructo, multa diruit scepticismus. Similia fata experta est interpretatio S. S. Lusus imaginationis in fabulis sanctis creauit mysticismum et allegoriarum amorem: fides historica et arbitraria, rationis tyrannus, enixa est dogmatismus: auctorum veterum amor et studium peperit interpretationem grammaticam, quam ne *ἀνίστα* aliquando excipiat, verendum est.

### § 32.

Ex primo genere olim fuere *Laur. Val- la*, *Ioach. Camerarius*, *Flacius*, *Nic. Zengerus*, *R. Stephanus*, *Castellio*, quibus et *Stunica* et *Lucas Brugenſis* addi possunt: propioribus nostrae aetati, atque nostris adeo temporibus *Pricaeus*, *Erasmus Schmidius*, *Heinsius*, *de Dieu*, *Miltius*, *Georgius*, *Bengelius*, *Wetstenius*, *Heumannus* etc. <sup>8)</sup>

g) Ad priores refer etiam *Vatablum* et *Drusium*: ad posteriores *Michaelem*, *Rosenmüllerum*, *Koppium*, *Hetzellum*, *Schleusnerum*, *Pottium* aliosque.

### § 33.

## § 53.

Ex genere altero, quod quidem verba non plane negligit, sed tamen res et dogmata magis et latius tractat, sunt *Lutheri*, *Melanchthonis*, (v. infra §. 49.) *Aeg. Hunni*, *Balduini*, et aliorum, qui nunc fere negliguntur, *Calouii*, et extra Ecclesiam nostram *Petr. Martyris*, *Caluini*, *Pellicani*, *Cocceii* et alieclarum, *Lampii*, *Turretini*, et aliorum, quos omnes commemorari non est necesse. <sup>h)</sup>

h) Multa, quae huc pertinent, suppeditabit *Semlerus* in libro: Versuch die gemeinnützige Auslegung des N. T. zu befördern. Halae 1786. p. 195. sqq. *Meyer* Geschichte der Schrifterklärung t. II. p. 335. ff.

## § 54.

E genere mixto, quod vtrumque, verba et res, sed breuius, nisi vbi aliter necessitas aut alia causa postulat, tractat, princeps fuit *Erasmus*, cuius Aduotationes profecto viam bene interpretandi patefecerunt, in quarum etiam velut fundamentis omnes, qui post fuere boni interpretes, aedificauere: etsi ille in multis lapsus est, ignorantia imprimis hebraismi. Ei proxime adiungendus est *Victorinus Strigelius*, minus clarus, atque etiam ignotus *Simoni*, Historiae Criticae N. T. auctori, sed in multis melior *Erasmo*,

*Erasmo*, et ad usum studiosorum aptior. Et in interpretando non, ut illè, versionem latinam maxime, sed graeca, explicat et illustrat, nec modo e literis graecis, sed etiam hebraicis, permulta melius *Erasmo*. Atque etiam sententias tractat, breuiter rerum actiones perspicue tradit, estque, in utroque genere, *Erasmo* aequabilior, qui saepe digressionibus, etiam declamationibus indulget. In vno inferior est *Erasmo*, quod Critica non attingit, nescio an consulto. *Hypomnematum* nomine editum est opus, duobus voluminibus. Lipsiae a. 1565. 8.

§ 55.

Secuti sunt post alii: quorum princeps est *Beza*, veris interpretationis subsidiis pro facultate illorum temporum bene usus, libris manuscriptis, literis hebraicis, graecis, versione etiam V. T. graeca, et aliis. Certe parem non habuit ante *Grotium*, in iis, quae ad verba et phrasin pertinent, omnibus superiorem, et primum omnibus praesidiis satis instructum, ingenii, linguarum omnium, versionis τὸν ὅ, quam primus recte contulit, et usurpandae rationem exemplo demonstrauit, literarum etiam Iudaicarum et aliarum orientalium; ut vere *Turretinus* iudicet, eum de phrasi N. T. hoc est, de grammatica ratione, omnium optime



me meritum esse. In sententiis autem indulget opinionibus suis, et saepe a veritate aberrat. <sup>1)</sup>)

i) Quapropter etiam, ut fieri solet, a conuiciis sibi non temperauit Calouius, Grotiumque Socinianum, Arjanum, Antitrinitarium et Atheum adpellauit. Quae tamen nos non impediunt, quo minus illum inter optimos interpretes N. T. referamus eumque tironibus praesertim, postquam grammaticas difficultates superauerunt, commendemus. Exempli loco sit Ioh. VI, 17. de vero Bethsaidae situ, qui vel recentiores interpretes latuit. Conf. *Herderi* librum: *Briefe das Stud. d. Theol. betr.* Tom. II. p. 357. sqq.

### § 36.

Qui post fuere ex hac ratione, omnes, etiam qui vituperant *Grotium*, ex eius fontibus, qua grammatica scilicet, hausere; ut *Britanni*, *Whitbius*, *Hammondus*, <sup>1)</sup>) item *Clericus*, *Infans* et *Bellosobrius*, *Calmetus*, ut multos alios, qui in singulis libros aut locos scripsere, praetermittamus: ut ille profecto caput sit hodiernae interpretationis grammaticae.

1) *Whitby* in *Examine critico*: *Hammondus* in *Observationibus* in N. T. quas *Clericus* ex *Anglis* latinas fecit, typis postea repetitas *Francos.* 1714. fol.

### § 37.

Qui noluerunt integros *Commentarios* scri-

scribere, in quibus necesse est, ab aliis dicta et nota repetere, vel omnium, vel aliquot librorum verba, phrasas et sententias illustrare ex observationibus suis studuere. Ex quibus quidam sunt mere grammatici: in his plures scriptoribus graecis modo vsi, vt *Lamb. Bos, Elsnerus, Albertus, Rappellus, Kypkius*, <sup>m)</sup> et alii minus clari aut probandi: alii literatura orientali maxime, vt *Capelli, Drusus*, in Praeteritis, *Camero, Lightfootus, Schoettgenius*: alii denique versione Vet. Test. graeca, vt *Keuchenius*.

m) Adde *Valckenarii* adnotatt. crit. in loca quaedam N. T. cum *Kloßii* examine 1790. (opusc. edit. Lips. t. II. p. 229. ff.). In corpus redigere coepit observationes priorum scriptorum omnes *Hetzeli*: successu tamen hucusque caruit opus. Huc etiam referri debent coniecturae *Bowyeri* in N. T. theodisce versae a *Schulzio* Tom. I. II. Lips. 1774. f.

## § 58.

Fuerunt etiam, qui per omnes libros ita vagarentur, vt selecta et difficiliora loca, diligentius scriptis disputatiunculis, ex quocunque genere literarum, illustrarent, rerum etiam non oblitum, vt vindicarentur ab depravationibus et παραρρηνείαις τῶν ἑτεροδοξῶν, vt *Tarnouius, Hackspanus, Spanhemii, Werenfelsius, Deylingius, Oederus*, <sup>n)</sup> et alii.

n) *Ter-*

n) *Tarnouins* in Exercitatt. Bibl. *Hacksanus* Mi-  
 seellan. in N. T. *Spanhemius* pater in dubiis euangel.  
 filius in vindiciis euangelicis. *Werenselius* Obseruatt.  
 in N. T. *Deylingius* Obseruatt. in 3 tom. distrib. Lips.  
 1720—36. *Oederus* Obseruatt. in N. T. Adde exer-  
 citatt. *Mori*, *Seileri*, *Noeffelti*, *Knappii*, *Reinhardi*  
 (2 voll. Lips. 1809.).

### § 39.

Nec defuere, qui ex omnibus, aut dele-  
 ctis, quasdam quasi Catenas contexerent, vt  
 vno loco esset, quicquid in quemque locum  
 dictum esset ab aliis, aut melioribus. Ex il-  
 lo genere sunt *Ant. Walaei* in N. T. Anno-  
 tationes, non admodum probatae, et *Poli*  
*Synopsis* e Criticis Anglicanis, et *Curae*  
*I. C. Wolfii*, °) qui tamen et suum iudi-  
 cium interponit; haud paullo melior et co-  
 piosior illis, nec tamen semper satis accura-  
 tus: ex hoc Opus nouum, quod ex Inter-  
 pretibus Anglicanis delectas notas habet, an-  
 te francice editum, nunc et germanice cum  
 eruditis *Brukeri*, V. Cel. notis apud nos e-  
 ditum est Tomis VIII, 4.

o) *Walaenus* edidit Euangelia et acta cum scholiis,  
 suis etiam adnotationibus adpersis. *Poli* synopsis est  
 epitome Criticorum Anglorum, sed nimis cara, neque  
 etiam adprime utilis. *Curae Wolfii* philol. et crit. (ed.  
 2. Hamb. 1733—35. 4 Voll. in 4.) pleniores sunt  
 ritorum, quam rerum; expressit tamen subinde aucto-  
 argumenta librorum, quos excitauit.

### § 40.

§ 40.

Commentariorum denique integrorum Bibliothecae institutae sunt: ex quo genere sunt *Biblia magna* et *maxima*, Parisiis superiori seculo edita: in quibus et verbosissimi et parum probati Commentarii, ut *Menochii*, editi sunt. Melior est, quae *Criticorum Anglicanorum* nomine, auctore *Pearsono*, in Britannia, septem Voluminibus prodiit, cum auctario duorum Voluminum Francofurti repetita: qui tamen quosdam admisit, quos rectius repudiaisset, ut *Clarium* et alios quosdam.

§ 41.

Sed satis de Interpretibus, eorumque generibus, et interpretandi varietate dictum: restat, ut de usu admoneantur studiosi. Is est duplex: alter ad methodum bene interpretandi proprie pertinens, qui nostro iudicio est princeps: alter ad interpretationem singulorum verborum et sententiarum.

§ 42.

Debebit igitur ante omnia futurus interpretes sibi deligere unum et item alterum notae et confessae inter peritos praestantiae Interpretem, et quidem ex genere grammatico primum et maxime: quod ab intelligentia recta ver-

verborum etiam rerum intelligentia vera ducitur, nec sine ea contingere potest, h. e. talem, qualem supra descripsimus (P. I. c. ult.), eumque crebro legendo, excutiendo, et subsidia modumque interpretandi considerando, se paullatim ad eius rationem conformare, et dum hoc agit, caeteros tantum per occasionem alicuius necessitatis consulere. Il qui sint, e dictis facile est iudicare. E Grotianis Commentariis inprimis commendem hoc consilio eum, qui est in Matthaeum, omnium ille diligentissime scriptus.

## § 43.

In caeteris hoc curabit, vt, ad quod genus quisque pertineat, non ignoret, verba potius an res, et quomodo tractet: quo aut quibus generibus praesidiorum bene sit usus. Ita, qui vniuerse rationibus suis maxime conducant, qui quoque in genere difficultatis aut necessitatis consulendi sint, statim tenebit, nec inter plures incertus errabit. Id qui ipse nondum iudicare potest, aut cognoscendorum librorum facultatem non habet, consulat *Rich. Simonem*, qui de Interpretibus Nou. Test. non ille quidem sic, vt nihil erraret, at omnium, quos nos quidem cognouerimus aut sciamus, accuratissime, et ad illum usum accommodate, exposuit, et in plerisque rectissime iudicauit, *T. IV. Hist. Crit.*

ut sit in promptu vniuscuiusque character. V. c. cum didicerit, *Maldonati* haec esse inter vitia, quae a sectae studio contraxit, bona, ut primum hebraismos, praesertim difficiliores, bene explicet, deinde sententias Patrum super vnoquoque loco diligenter commemoret; nec repudiabit omnino Commentarium eius in Euangelia, quia est Iesuitae ferocioris, et in tempore uti bonis eius poterit. °°)

°°) Τα ἀρχαῖα παρῆλθε. Magni aestimamus R. *Simonem*, sed bene valere iubemus *Maldonatum*, in grammaticis ieiunum, in dogmaticis λόγον βαρύν. Adeant *Grotium* tirones, *Rosenmüllerum*, *Paulum*, *Kuinoelium*: Iesuitae commentario facile caesbunt.

#### § 44.

Plurimum autem proderit, notata habere loca culusque libri sacri difficultia, et ab interpretibus in varias sententias tractata, itemque lectionis nomine memorabilia, et in quibus nobis nondum nec alii satisfecere, nec nosmetipsi satisfacere potuimus. Ita, ubi Commentarius aliquis in manus venerit, licebit breui tempore cognoscere, an habeat aliquid noui aut praecipui boni, omninoque aliquid, quo deduci ad verum sensum possimus. °°°)

°°°) V. c. Matth. V, 3. Marc. IX, 49. Act. XXVII, 12. Gal. III, 20. Col. I, 15. f.

## § 45.

Qui autem excellere volet in hac ratione, debet etiam interdum integros Commentarios percurrere, alio tempore alium. Nam, ut non dicam, multa a multis subinde bene tradi, quae illo loco non quaerat quisquam, quod sit inprimis ab iis, qui ostendendae doctrinae occasionem solent quaerere: saepe utiliter admonebimur de locis, quorum interpretationem certam et minime dubiam videbamur tenere, quod eam a puerili institutione, cum iudicandi facultas non erat, e libris doctrinae vulgaribus suscepimus, et saepe repetendo velut corroborauimus. P)

p) Vbi cum aoristis semel inducias fecerit interpres, auctores N. T. singulos legat bono vocabulario instructus. Repetita lectione consulat bonam versionem, deinde idoneum interpretem, *Grotium*, *Koppium*, aut alium. Hoc bene ponderato, adeat etiam alios cum iudicio et delectu, ita tamen, ut reliqua subsidia critica haud negligat.

## § 46.

Inprimis auctor sim, ut Graecos, quos supra descripsimus, inde a *Chrysostomo*, eo, quo supra diximus ordine, excutiat, et inter se comparet. Et sunt nec nimis multi, nec nimis magni, ut non nimis multum aut temporis aut laboris infumendum sit ei, qui iam medio-

mediocrem profectum in eo genere cepit. Ea res praeter alias multas, etiam hanc utilitatem habebit, ut interpretationes latinorum, atque popularium nostrorum, inde a repurgatis sacris, ortas e versione latina, aut vernacula, vel plane aberrante a graeco, vel male, h. e. ex etymologia, aut latina vernaculae consuetudine accepta, et de manu in nanum traditas agnoscat, fontem erroris videat, et rectius verba sacra intelligere discat, nec credat amplius, vulgarem interpretationem esse antiquam, et vel hanc ob causam orthodoxam. Exempla supra aliquot locis quaedam posuimus, quibus addi potest locus Ebr. 2, 16. in verbo *ἐπιλαμβάνεται* quod cum recentiores quidam interpretari coepissent, *auxilium fert, asserit*, novitas et prohemodum *ἐτεροδοξία* iis obiecta est, cum conerenti graecos interpretes pateat, eam esse solam antiquam totius Ecclesiae graecae interpretationem; vulgarem nostrorum hominum et libellorum dogmaticorum esse novitiam, ortam ab latinis, qui interpretationem graeci verbi in Vulgata puerilem, et ex etymologia graeci verbi factam, *assumit*, latine capiendo, ad incarnationem transtulerunt, nec profecto, sua modo lingua nixi, alio transferre potuerunt. Et talia non pauca libet observare, quae ignorasse ei, qui interpretem se ferat, turpe fuerit.



## § 47.

Illud autem praeceptum commune est in omnium cum veterum, tum recentiorum lectione, ut non modo in bonis interpretationibus, praesertim insignioribus et difficiliorum locorum, videamus, qua via quisque et ratione ad verum sensum peruenerit, sed etiam, ut in vitiosis et absurdis causis erroris indagemus, atque ita ingenium et ad verum videndum et ad errorem cauendum acuamus.<sup>q)</sup>

q) V. c. Col. I, 16. quo loco *ἑρῶνους, κρυπτότας, ἀρχάς* etc. non ad magistratus politicos relatum fuissent interpretes bene multi, si Iudaeorum doctrinam de variis angelorum ordinibus perspectam habuissent.

## § 48.

In observationum autem scriptoribus hunc delectum habebimus, ut non multum temporis tribuamus Philologicis iis, qui solas literas graecas ad illuminandum N. T. contulerunt: propterea, quod raro aliquid aut multum bonae frugis, aut verae lucis inest. In ipsis Elsnorianis, quibus propemodum principatus a nonnullis tribuitur, vir decem alicuius momenti obseruatiunculas meminimus nos reperire, plerisque Lexico graeco locupletando, quam Nouo Testamento illuminando aptioribus. Meliores sunt, quae verba ambigua et obscura e lite-

ris

ris hebraicis et versione graeca Veteris Testamenti interpretantur, veras lectiones vindicant, res et sententias ipsas illuminant, et a dubitationibus liberant.<sup>qq)</sup>

qq) Quaeritur, quid sit *σκεῦος* I. Theff. IV, 4. ? Fuisse, qui loca colligerent e *Lucretio* et *Cicerone*, quibus corpus adpellatur *vas* et *receptaculum* animi; Erasmus ipse de *vas* fictili cogitavit; alii τὸ σκεῦος Pythagoreorum in subsidium vocauerunt; iterum alii uxorem designari e linguae Hebraicae usu probaturi erant. Falso: locus I. Sam. XXI, 5. docet, כלל נערים, σκεῦος τῶν LXX esse genitalia.

#### § 49.

Nec vero contemnendi aut prorsus negligendi sunt Commentarii hi, qui dogmata imprimis tractant: non quo iis ad ipsam interpretandi rationem multum adiuuemur, sed quod ex iis dogmatum scientiam augere possumus, quae in Commentariis biblicis veterum et recentiorum saepe diligentius et verius tractantur, quam in libris iis, qui proprie ad dogmatum explicationem pertinent. Et insunt etiam bonae interpretationes e genere grammatico, vt in Commentariis *Melanchthonis*: in quibus etiam interdum monet, melius rem expediri grammatica ex graecismo aut hebraismo explicatione, quam subtilitate philosophandi scholastica. v. ad 1 Cor. 15. pag. 299. vbi est egregium specimen

men loci hebraici e Vet. Test. bene tractandi, ad *Coloff.* 5, 14. vbi bene *primogenitum* et *thronos* explicat.★)

\*) Negari tamen nequit, Melanchthonem in interpretando N. T. saepius theologi, quam grammatici officio functum esse. Vide comment. in ep. ad Rom. c. V. de peccato originali p. 148. edit. Viteb. 1540.

### § 50.

Atque etiam iis, qui vel in Ecclesia, vel in Schola interpretaturi sunt literas sacras, hinc exempla petenda rerum, vel ad popularem captum, vel ad scholae subtilitatem accommodate tractandarum.†) Nam etsi in schola maxime probamus interpretem eum, qui verborum veritatem et sensum maxime amplectitur, quid ubique inest rerum, argumentorum dogmaticorum, breuiter modo monet, vt supra diximus: tamen interdum etiam maiori copia vtendum est, et difficiliora, itemque vtiliora ad fidem et pietatem, enucleatius et latius edisserenda sunt: cuius generis vix melius exemplum et imitatione dignius extat inter recentiores Turretinianis in Epistolam Pauli ad Romanos, quamquam postumis, Exercitationibus. Commendem etiam *Melanchthonis* Comment. ad *Coloff.*, qui non est nimis copiosus, et Luthero inprimis placuit.‡)

r) In vniuersum teneant futuri religionis doctores, interpretationem N. T. coram concione non ad canonicum hermeneuticorum rigorem institui, sed potius ad sensus pios attemperari, qua in re optimi oratores sacri exempla esse debent.

s) Profligata interpretationis historia, qua scopulos praeteruehere docemur, ad quos priorum temporum doctores plurimi adliti sunt, superest, vt de *explicatione N. T. historica* quaedam differantur. Constat nimirum inter bonos interpretes, auctores *ἱστορικῶν* suum scribendi genus attemperauisse ingenio temporum, quae, vt multis, Chaldaeorum imprimis, philosophematis et opinionibus praeiudicatis, v. c. de Satana, de daemonibus, de angelis, de regno Messiae, de vitae aeternae gaudiis praemiisque, ita dedita erant, vt vix ac ne vix quidem ab iis se auelli paterentur, non repente et vno velut ictu, meliora doceri poterant. Quaecum ita sint, sponte sua patet, distinguendum esse in N. T. inter veritatem absolute declaratam, et inter veritatem pro captu et necessitate temporum adumbratam. Plura propter varias rationes hic edisseri nequeunt: neque enim post *Storriam* (Dissert. de sensu historico. Tubing. 1778.) et multo magis *Keilium* (Diss. de interpretatione historica. Lips. 1788.) legisse poenitebit *Semlerum* in libro: Versuch die gemeinnützige Auslegung des N. T. zu befördern. p. 237. sqq. et *Bretschneideri* historisch-dogmatische Auslegung des N. T. Lips. 1806.

## CAP. X.

*De usu disciplinarum.*

## § 1.

Cum interpretatio versetur in sensu verborum indagando et explicando, eoque grammatico, isque unus sit sensus verus, et qui proprie dicitur: vel sic patet, Grammatices usum in interpretando N. T. esse et necessarium et maximum.

## § 2.

Neque vero sine ea aut verus verborum sensus, in linguis inprimis mortuis, reperiri, aut veri sensus certitudo esse, quoad ea ab humanis artibus nascitur, aut satis ab adversariis defendi, aut denique falsae interpretationes, praesertim si sententiam efficiant per se non absurdam aut ab analogia doctrinae abhorrentem, refelli possunt.

## § 3.

Atque etiam periculosum est, ad interpretandum accedere, qui non sit bene peritus linguarum ad grammaticam *αἰγιόβατον*, a qua

qua iusta linguae cuiusque scientia venit. Caret enim freno, quo licentia fingendi, et libido torquendi scripturas ad suarum opinionum arbitrium coerceri possit, vagaturque saepe incertis viis, nec habet, ubi tuto possit consistere.

## § 4.

Quod cum praeclare intelligerent Theologi eruditi, *Lutherus*, *Melanchthon*, et alii, studium Grammatices saepe multumque studiosis sacrarum literarum commendarunt, et de incommodis a Grammaticae neglectu et inscitia venturis monuerunt: quibus qui non paruerunt, graues saepe poenas dedere. Testimonia dabit *Sixt. Amama* in *Antibarb. bibl.* pag. 122. add. *Melanchth.* in *Consiliis et iudiciis theol.* pag. 578. extr.

## § 5.

Nam quod *Lutherus* Comm. in Genes. c. 16. *Grammaticam quidem necessariam, ait, esse et veram, sed eam non regere res, sed servire rebus debere:* id non hanc habet sententiam, ut calumniatur *Simon Hist. Crit. T. I. p. 435.*, quae det licentiam, verba contra grammaticas rationes ad suarum opinionum arbitrium explicandi: nam ita necessaria Grammatica non foret: sed, quae doceat, verba non esse ex grammaticis rationibus ubique praemenda et ad res aliunde perspicue cogni-

... particulam *αὐξητικὴν* esse iubet, quae eleganter vsurpetur interrogationem interrogationi iungendo. Quidni significationem verbi propriam eamque aduersatiuam retinemus? Oratio est imperfecta propter responsionem suppressam: Ἰωάννης βέλαιός ἐστι ἐν τοῖς ῥήμασιν αὐτοῦ· οὐ μὲν ἄρα ἐξήλθετε θεάσασθαι κάλαμον. Vide versum sequentem.

## § 9.

Sed multo etiam magis necessaria est *συντάξεως* scientia, non modo hactenus, vt ordinem verborum recte inuenire possimus, in quo saepe est magna vis ad bene intelligendum, sed etiam, vt modòs cuiusque verbi, etiam particulae, struendae primum per se teneamus, quod prodest ad iudicium puritatis, vtrum bene graeca fit phrasis nec ne, idque refert, vt supra demonstratum est, plurimum, sed etiam, vt cuiusque constructionis vim et sensum ex verâ linguae indole. Nam qui ea scientia caret, et illas formas, verbum de verbo vertendo in quamcunque aliam linguam, interpretatur, saepe numero peccat necessario, propter dissimilitudinem linguarum: cuius generis peccatis pleni sunt interpretum libri: nec potest peccata Interpretum et Criticorum vel agnoscere certa ratione, vel conuincere. \*)

\*) Exempli loco sit versus 21. cap. I. ad Philipenses. Vide, quam male habeantur interpretes a protasi *εἰ δὲ*, cuius apodosis est *καὶ τῆς*. Resolue locum:  
ἀλλ'

ἀλλ' εἰ (quatenus: Viger. ed. Zeunii p. 492.) καὶ τὸ  
 ζῆν ἐν σαρκὶ τοῦτόν μοι ἔχει καρπὸν ἔργου, καὶ  
 (tamen) τί αἰρήσομαι ὁ γ.

## § 10.

In hac parte sunt etiam praecepta de figuris orationis, ut ellipsi, pleonasmis et aliis, in quibus saepe argutantur interpretes, torquentque scripturas, nisi earum vim in usu loquendi calleant accurate. In quarum nonnullis tamen etiam Rhetorum praecepta sunt cognoscenda, ut veram vim in usu scribendi teneamus, nec aut emphases frustra quaeramus, aut vitium orationis fingamus. Nam, ut hoc utamur, pleonasmus in rhetoricis prodest et ad augendum et ad ornandum, nec tamen semper, sed est interdum vel ex antiquissima linguae simplicitate, cuius generis plures sunt in lingua hebraica, et inde in N. T., vel quacumque alia de causa in consuetudine loquendi ortus, atque etiam ab eleganter loquentibus usurpatus: unde vitii argui non potest, nec tamen ad vim aut ornatum torqueri debet. Similisque ratio est synonymiae aut tautologiae, quod est genus pleonasmis, cuius exempla multa sub pleonasmis titulo congeffit noster *Glossius* Phil. S. L. IV. tr. II. obs. 15. f.<sup>1</sup>) Quae qui ignorant, se nunquam satis in iis vel explicandis vel defendendis expediunt.

1) Me-



t) Melius disposita notisque illustrata hæc sunt in Editione Phil. *Glassii* Dathiana, quam vide. Neque carere potest idoneus interpres *L. Bosii* libro de ellipsis graecis, praesertim secundum editionem *Schaeferi* (Lips. 1808.), quae reliquis palmam longe praeripit.

## § 11.

Nec, quae vitia orationis dicuntur, ignota esse debent, ne in quaestionibus de barbarismis ac soloecismis N. T. in alterutram partem, vel affirmando vel negando, peccetur: u) quod accidit plerisque, cum aut prorsus, inuitis Grammaticorum praeceptis, negant, in N. T. aliquid inesse, quod his nominibus appellari possit, ut dignitati librorum consulant, aut ita adfirmant, ut ad contemptum scriptorum ipsorum trahatur: quorum neutrum probari potest. Imo formae dicendi tales tum demum sunt in vitio, cum per inscitiam et negligentiam, et nulla idonea et graui de causa, temere usurpantur; quod in scriptores Nou. Test. non cadere, patet ex iis, quae de hebraismis eorum dicta sunt.

u) Quod in nullo N. T. libro facilius accidere poterit, quam in apocalypsi Iohannea. Vid. *Michaelis* Introd. in N. T. Ed. 4. §. 284.

## § 12.

Summum autem Grammaticae fastigium  
est

est in *Critica*: quamquam non modo Grammaticorum praeceptis et observationibus nititur, sed etiam aliarum disciplinarum et rerum scientia atque praeceptis adiuuatur. Eius est, quid genuinum spuriumue sit, integrum et incorruptum, vitiosumue et corruptum, iudicare, et corrupta emendare, eiusque rei modum ac rationem tenere. v)

v) Huic scientiae latissimus apertus est campus in disquisitione de γνησιότητι priorum capitum Matthaei, loci I. Ioh. V, 7., Rom. IX, 5., Ioh. VIII, 1—12. in disputatione de lingua, qua Euangelium Matthaei ab initio conscriptum fuerit: de Euangelio ad Hebraeos, de fontibus Euangeliorum etc.

### § 13.

Eius etiam in interpretando necessitas inde intelligitur, quod sine ea saepe ne locum quidem habet interpretatio. Frustra enim interpretari coneris, quod est spurium aut corruptum: vnde mirabiles interdum interpretationes nascuntur. Vnde recte *Quintilianus* I, 4. *init.* primum in interpretando esse dicit, videre, an integer locus sit nec ne, et corrupta emendare: *Enarrationem*, inquit, *praecedat emendata lectio.*

### § 14.

Nec minor necessitas est ex eo, quod, qui eius expertus est ac rudis, disputationes  
criticas

criticas super locis sacrorum librorum non modo intelligere ac diiudicare, aut lectiones veras a falsis discernere, perite defendere, aut falsas denique, itemque inanes coniecturas aut deprauationes satis refellere non potest, sed etiam saepe se necessario in difficultates inextricabiles induit, atque adeo in-ridendos ac pudendos errores incidit; cuius generis multa exempla commemorare possemus. Vel illud quam alienum est ab iis, qui hos libris bene tractare velint, quod plerisque accidit, qui rei criticae sunt expertes, nec eius vllum vsum habent, ut, quae ab *Erasmo* et *Beza* in textum de iudicio suo, etiam e latina versione, non bene recepta sunt, aut per operarum errorem irrepererunt, et in editiones minores et vulgares propagata sunt, ea pro veris auctorum verbis teneant, explicent atque etiam defendant, et, si quis talia corrigat, etiam Spiritum sanctum corrigi clament. <sup>x)</sup>)

x) Eiusmodi voces nondum plane exspirauisse, docet *Griesbachius* Praef. ad N. T. Vol. II. pag. XI. seqq. ed. I.

### § 15.

Itaque merito Critica apud Theologos vere doctos semper in magno honore ac pretio fuit, eiusque bene periti Interpretes inter principes Theologorum sunt numerati,

vi

vt *Origenes*, de cuius scientia et meritis in hoc genere supra diximus, *Gregorius Nazianzenus*, *Basilius*, *Chrysostomus*, *Hieronymus*, et alii, quos enumerat *Henr. Valefius* de Critica I, 23. sqq. tantum abfuit, vt eam locum habere in sacrorum librorum interpretatione negarent. *Augustinus* quidem, *Codicibus emendandis primitus inuigilare debere solertiam eorum*, iudicat, *qui scripturas diuinas nosse defulerent, vt emendatis non emendati cedant*, etc. Adeatur etiam *Casaubonus* Exerc. Baron. I. n. 28. XVI. n. 110. et *Heinfius* Proleg. ad Exercit. in N. T. p. 4.

## § 16.

Nec solum ea *negligis* tolerata et vsurpata est, quae libros e libris emendat, sed etiam coniecturalis, quae ingenii et doctrinae, imprimisque analogiae ope, nititur, vt docent *Commentarii Patrum*, *Isid. Pelus. IV*, 112. 113. et *Casaubonus* l. c. *Glassius* quidem noster clare locum huic Crisi relinquit in *Philol. S. L. I. Tr. II. pag. 168.* probans etiam correctionem talem *Bezae* Act. VII, 14. quamquam non probandam. *Wetstenius* autem in Proleg. N. T. separatim editis p. 170. prope ducentas tales coniecturas Theologorum commemorat, quarum numerus etiam augeri posset. y)

A a

y) Et

y) Et auctus etiam est in *Bowyeri* coniecturis in N. T. a Schulzio editis. Lips. 1774. f.

### § 17.

Oportet igitur futurum librorum sacrorum interpretem in tempore, curare, ut Criticae veram indolem ac naturam cognoscat, non praeceptis modo, aut maxime, cognoscendis per libros, qui eius disciplinam profitentur inscriptione sua, quae solet esse fallax, sed usu, per modesti ac seueri Critici disciplinam, et lectionem Criticorum seuerorum ac modestorum, quales *Casaubonum*, *I. F. Gronouium*, *Graeuium*, *P. Burmannum*, *Perizonium*, et alios, nouimus. Ac tutius est, initium facere in genere librorum humanorum, ubi, adhuc quidem, magis et felicius usurpata est Critica, et ubi etiam excusatius peccatur. Raro, qui non ab tali disciplina et usu venit, in sacris operae pretium fecit: et qui nullis litteris graecis ac latinis, aut mediocriter modo, instructus ad Criticam sacram accedit, profecto operam inanem ludet.

### § 18.

Vbi autem rite praeparatus venerit, primum operam det, ut instrumentum Criticum cognoscat, eiusque in iudicando verum usum, per Canones Criticos, cum de  
lingua

ngulis generibus fontium, e quibus lectiones ducuntur, tum de comparationis modo. 1 quo poterit vti his, quae a nobis supra ap. 2. 3. 4. 5. tradita sunt.

## § 19.

Sed hoc magis usu rerum tractandarum, quam praeceptis ediscendis sibi agendum putat. Itaque vel audiet interpretes, qui Critica non prorsus negligunt, et in eo genere versatos ac tritos factis ostenderunt, vel regit, quae viri in hoc genere exercitati, *Tillii*, *Bengelii*, *Michaelis*, aliique, qui sunt sane perpauci <sup>2)</sup>, super locis illustribus maxime, scripsere, et ad praecepta illa examinabit, ut paulatim bene iudicandi facultas veniat.

2) V. c. *Griesbachius*, *Noesseltus*, *Morus*, *Döderlinus*, *Eichhornius*.

## § 20.

Cum, profectu facto, volet ipse aliquid solvendi, hanc sibi legem dicat, ut nihil facile sine libris probet aut statuatur, coniecturas doctorum hominum in locis iis, in quibus alia ratio se expediendi aut nulla aut omnino dura ac difficilis datur, non illas eadem omnino spernendas putet, si sint perspicuae, consentaneae rei, contextui,

A a 2      stilo

stilo scriptoris, et a vestigiis vulgatae, h. e. quae in omnibus libris scriptis et editis reperitur, non multum discrepent: qualis est v. c. Camerariana *Ioh.* 19, 29. pro ὑσσώπω, in quo se satis torquent interpretes, conicientis ὑσσώτῳ vel ὑσσῶ τω, et perpaucae, quas nos quidem repperimus, aliae: \*) caeterum in notis potius, Commentariis aut Observationum libris, proponendas, quam textui inferendas putet. \*\*)

\*) V. c. ἐξουσίαν *I. Cor.* XI, 10. σιαινέσθαι *I. Thess.* III, 3. Sunt tamen coniecturae istae, a Camerario, Godofredo et Reiskio profectae, meri lusui ingenii.

\*\*) Nisi a codicibus manu exaratis confirmentur, v. c. ἀπολέσει *Matth.* X, 42. ad quem locum vid. Wetstenius. Lectionem ἀπολέσῃ, in auctore bene Graeco praeferendam, ex Itacismo ortam esse puto.

### § 21.

Enimuero ut religio magna adhibenda est, ne in textu, qui nunc in manibus est, refingendo nimis faciles simus: ita contra indocta superstitio est vitanda, quae omnes voces ac literas vulgaris alicuius editionis sanctas et velut manu diuina positas et consecratas putat, a quibus discedendi ius et facultatem nec libri nec ratio vlla dare possunt. Non minus cauendum esse, ne Spiritui S.

tri-

tribuantur, quae eius non sunt, quam ne ei detrahantur, quae ab eo profecta sunt, supra admonuimus. <sup>a)</sup>

a) Quod inprimis caueri potest post notionem *Jeonpneusius* adcurate finitam, cuius rei periculum fecimus in libro: *Ausf. Unterricht in der christl. Glas-benslehre*. Norimb. 1807. t. I. p. 113. ff.

## § 22.

Hi vero abutuntur Critica, siue indigni potius sunt Critici nomine, qui ita proclives sunt ad coniecturas, ut, ubi primum aliquid non satis intelligunt, ad excogitandas lectiones conuertuntur: a quo quemque et ratio et exempla temerariarum et inanium coniecturarum detertere debent. Non enim quod quisque, etiam non indoctus, parum intelligit, et commode explicare non potest, ut legibus orationis parum conuenire videtur, id statim falsum aut vitiosum est: nec quisquam sibi hanc fiduciam sumere debet, ut se nihil fugere in talibus rebus putet. Et cum omnes propemodum tales coniecturae inanes repertae, et a peritioribus refictae sint, modesti et cauti Critici est, non praecipitare iudicium, et potius ignorantiam suam agnoscere et fateri, quam ad corrigendum festinare; quod etiam in humanis scriptis boni Critici facere solent.

## § 23.



## § 23.

Quo magis etiam impia arrogantia et mera *αὐτοκρατία* eorum repellenda est, qui suarum de rebus diuinis opinionum stabilendarum causa, non modo lectiones, in uno et altero libro, nec eo valde bono, reperiunt, recipere in textum aut defendere conantur, sed etiam excogitant nouas. <sup>b)</sup> In utroque genere Sociinianos et eorum fautores esse, satis constat; in illo nuper *Wetsteinus* pluribus locis peccauit.

b) Huius vitii inuidia iure conflata est *Babrtius* in examine Vers. N. T. theodiscae ad Ioh. I, I.

## § 24.

Quod vero Pontificii quidam, vt *Lau-  
brusselius* in libro Francico *de abusu Criticae in rebus sacris* P. I. p. 168. etiam hos imprimis abuti Critica in libris sacris defendunt, qui eius usurpandae potestatem non ab Ecclesia, siue Pontifice Rom. vt *Hieronymus* a *Damaso*, nacti sint, id merito repudiandum est penitus cum caeteris, quae ab illo, inter bene monita, ad defendendam Ecclesiae Romanae opiniones superstitionesque ita disputantur, vt in iis accusandis ac refellendis Criticae abusum cerni dicat: quod fere inclinant istius Ecclesiae doctores.

## § 25.

Illud inprimis debet esse persuasum studiosis, nihil esse vel in comparando vel in utendo difficilius Critica: adeo multarum ac prope infinitarum, in hisque minutarum, rerum accurata scientia tenetur, et in usu multas ac difficiles cautiones habet: in quibus adeo facile est labi, vel memoriae fraude, vel iudicii errore, ut, quemadmodum cuilibet condonandus est lapsus, ita quisque magis sibi diligentiam et modestiam in iudicando adhibendam putare debeat. \*) Legant studiosi *Mabillonium* de studiis Monast. P. II. c. 13. de *Critica et regulis in ea observandis*.

\*) Exempla sunt Matth. V, 22., quo loco εἰς ἡν delendum putamus, et Act. XXI, 15. quo sectionem ἀποσκευασάμενοι tuemur, quamvis eam ridiculam esse iudicavit *Morus*, adstipulantibus criticis bene multis. Defenditur enim non solum auctoritate codicum, versionis Syriacae et vulgatae recte explicitae, sed etiam linguae usu Hebraico, quo ἀποσκευάζεσθαι idem est ac פנה Levit. XIV, 36. Alexandrini interpretantur ἀποσκευάσαι, Aquila ἐκφορεῖν, efferre sarcinas, quod loco nostro egregie convenit.

## § 26.

Grammaticae iuncta est *Rhetorica* in instrumentis interpretandi. Ea maxime prodest, qua docet naturam et vim troporum.

rum. Nam ea ignorata, mirifice inepti interpretes esse solent. Sed quae ex eo genere profunt, a nobis supra commemorata, et ad interpretandi rationem collata sunt. Prodest vero etiam nosse, quae de generibus dicendi et virtutibus orationis, inprimis de altitudine et caeteris virtutibus sententiarum, in rhetoricis traduntur, ut iis in interpretando bene uti, hoc est, agnoscere facilius, sentire, inprimisque explicare possimus vim et praestantiam sententiarum, quae in libris sacris, inprimisque sermonibus Iesu Christi et Epistolis Paulinis, frequentes sunt. Nec tamen opus est, in interpretando lectoribus vel auditoribus, vel uti pueris, annumerare ubique nomina vulgaria troporum et figurarum, et cum nihil profunt ad bene intelligendum vel sensum ipsum vel eius aliquam virtutem.

## § 27.

Nec parum adiuvetur interpretes *Philosophia*, si ea recte uti didicerit. Ea autem non tam prodest rebus et sententiis, quam modo rerum tractandarum. Neque enim res in Scripturis traditae e *Philosophia* iudicandae, aut ad eius decreta, multo minus incertas opiniones, quas hypotheses vulgo vocant, accommodandae sunt: diligenterque cauendum est, ne notiones verborum e philosophi

lophi alicuius definitionibus inferamus Scripturae, et ex iis super rebus philosophemur; quo nimis fere inclinant, qui philosophia se dicunt vti in interpretando, si sunt parum triti literis: vnde omni tempore magnae noxae ortae, plurimumque incommodi in interpretatione sacrorum librorum natum est. \*)

\*) Constat interpretibus doctissimis displicuisse creationem mundi, quae Messiae tribuitur Col. I, 16. Traxerunt itaque locum ad emendationem hominum moralem per abusum philosophiae non probandum: conf. Ioh. I, 3. Ephes. III, 9. Hebr. I, 2. Notum enim est, ea, quae in Psalmis verbo Dei, in prouerbis et libris V. T. apocryphis sapientiae divinae tribuuntur, in N. T. referri ad λόγον, vel naturam Christi sublimiorem.

? R. S

### § 28.

Res igitur fere redit ad *Dialecticam*, quae in interpretando non vno modo prodesse potest. Ac primum hoc non paruum eius munus esse in hac re dixerim, quod docet ideas rerum distinguere a sono verborum, vt, quid intelligas, nec ne, possis iudicare: cuius iudicii necessitatem supra indicauimus. Id autem fit dupliciter. Et in iis quidem rebus, quae sensibus externis subiectae sunt, videndum est, an possimus speciem earum animo praesentem reddere, easque

easque per talem speciem ipsas contueri; ubi autem internis subsunt, an meminisse perceptionis earum ac sensus. In intelligibilibus porro iudicium fit ex eo, cum verborum definitiones tenemus, quibus notiones puris et perspicuis verbis exprimantur. Sed in rebus sensibilibus sufficit interdum, eas ad suum genus reuocare posse: idque locum habet tum, cum cernendarum ac sensu cognoscendarum nulla facultas esse potest, ut in quibusdam generibus plantarum, piscium etc. Sunt et aliae huius iudicii rationes, sed quae ad Dialecticam nihil pertineant.

## § 29.

Alterum eius munus cernitur in notionibus verborum, quas ea docet conficere, vel partibus earum dispersis in vnam summam apte colligendis, vel ab exemplis, in quibus eae latent, ducendis, et, ut Dialectici nostri loquuntur, abstrahendis, denique perspicue et breuiter exprimendis. Quo sane vehementer opus est interpreti, ne obscuris aut vagis et parum determinatis notionibus contentus vagetur et erret. c) In quo tamen plus usus, et facultas bene dicendi, quam praecepta, certe non haec sine illis valent. Potest enim, ut Cicero dicit, fieri, ut aliquis recte rem intelligat,  
nec

nec tamen possit recte aut satis perspicue ac circumscripte enūciare, quae bene intelligit: quod sine accurata linguae scientia et exercitatione scribendi contingere nemini potest.

c) Quod vulgaribus interpretibus praecipue occurrit in finiendis vocibus, βασιλεία τῶν οὐρανῶν, πνεῦμα, μετάνοια, πίσις, παρουσία Χριστοῦ, aliisque maximam partem iam egregie explicitis in libro Telleri: Wörterbuch des N. T. Ed. 4. 1785.

### § 30.

Tertium est, similia diligenter comparando distinguere, ne ambiguitate decepti confundamus diuersa. In quo tamen ipso usus loquendi bene cognitus esse debet, ne distinguamus, quae diuersa non sunt: quod facile accidit iis, qui e Lexicis sapere coguntur.

### § 31.

Omnino etiam atque etiam cauendum est, ne subtilitate dialectica et metaphysica abutamur in verborum sensu aestimando, et rebus distinguendis: quod etiam in humanis libris, qui populo scripti sunt, aut de rebus ad popularem intelligentiam et usum pertinentibus, repudiatur ac ridetur. Itaque in iis v. c. quae vniuerse aut absolute dicuntur, diligenter videndum erit, quid  
res

res subiectae patiantur. Rectissime Aristoteles Ethic. I, 1. τὸ ἀκριβὲς ἔχ' ὁμοίως ἐν ᾧ πᾶσι τοῖς λόγοις ἐπιζητητέον, vt non in scribendo, quod illi placet, cum de rebus ad vitam humanam pertinentibus sermo est, sic nec in interpretando; nec modo operam perdit, sed etiam in periculum venit, falsa, ridicula, certe aliena comminiscendi, quisquis in talibus metaphysicam subtilitatem requirit, vt bene *Theodorus Hackspanus* Misc. S. pag. 36.

### § 32.

In quo etsi sensus communis sufficere potest ad iudicandum, vt in aliis scriptoribus interpretandis, tamen non inutile erit, rerum naturas sic distinguere, vt, quae ad Deum et religionis formam proprie pertineant, in iis nullam subtilitatem alienam censeamus: quod in iis nihil incerti est, nihil, quod temporibus varietur: quae autem cum hominis natura et vita aliquam coniunctionem habent, in eas τὸ ἀκριβὲς non cadere putemus. <sup>d)</sup>

d) Egregie haec praecipi, dubitatione caret; scindimur tamen facile in studia contraria quaerentes, quatenam proprie ad Deum pertineant. Animis enim hominum multa adblandiuntur in iis, quae de redemptione, de resurrectione corporum et iudicio Dei adspectabili docentur, a veritatis coelestis indice non  
semper

semper probata. Formanda itaque erunt ingenia ad  
interiorem veri cognitionem, ut dubitationis scopulos  
euitent.

### § 33.

Itaque etiam illa, quam iactarunt non-  
nulli, ἀνάλυσις notionum Dialectica magna  
cum cautione vsurpanda, ne aut in notione  
ipsa constituenta decipiamur, ut supra  
monuimus §. 27., aut ex ea per talem ἀνάλ-  
υσιν colligamus, quae non insunt, commi-  
niscamurque, quae a mente scriptorum di-  
vinorum sunt aliena.

### § 54.

Nec illud paruum aut parum necessa-  
rium munus Dialecticae est, videre, quid  
repugnans sit, quid consequens. Nam et  
conclusionum in sacris libris passim occur-  
rentium ratio et vis explicanda est, et inter-  
dum repugnantiae species oritur, etiam in  
dogmaticis, qua apte remouenda, consen-  
sus dictorum componenda est. In quo ta-  
men tenenda sunt ea, quae de hac compo-  
sitione supra praecepimus, cauendumque,  
ne inscitia sermonis temere fingamus dissen-  
sum, aut in eo componendo subtilitate alie-  
na ab indole rei et scriptorum utamur.

### § 35.

Et quoniam Dialectica etiam docet, quae  
debeat



quae tamen bonis lectionibus non caret: 5) lectiones in nulla recensionum antiquarum olim obuias nulla, plurimorum licet, Codicum iuniorum auctoritate defendi possunt.

### § 31.

Esti autem optabile est, ut rationes omnes, propter quas delectus in alterutram partem fieri debeat, concurrant; tamen, quoniam id non nimis saepe contingit, plures causae grauiioresque valebunt. In quo sane praecepta non sufficiunt. Sed etiam exercitatio quaedam consuetudoque capienda, ut boni quasi ratiocinatores esse possimus, et addendo detrahendoque videre, quae reliqui summa fiat, ex quo, quid potius sit, intelligatur. In quo etiam lectio eorum proderit, qui talia accurate circumspicteque tractarunt.

### § 32.

Est vero etiam usus aliquis variantium lectionum, qui interpretationem atque Theologiam videtur attingere. Nam interdum Interpretum veterum et recentiorum, itemque disputationum theologicarum rationes intelligi, et vel defendi excusarique, vel refelli non possunt, nisi, quam lectionem secuti sint, scias <sup>u)</sup>).

<sup>u)</sup> Sic Patres latini ex I. Cor. XV, 51. *uniuersalitatem*

litatem resurrectionis adseruerunt ex lectione; omnes obdormient. Sine notitia varietatis lectionum ne Lutheri quidem versio intelligi et vindicari potest, v. c, 2. Petr. II, 13. vbi pro ἀνάταIs legit ἀγανάIs, vpon euerem Allmosen, quod etiam praefert Griesbachius. Conf. adhuc Hebr. IX, 14. cum vers. Luth.

§ 33.

Quo magis vtilem operam nauarunt, qui varias lectiones ex iis, quos indicauimus, fontibus collegere. Cuius rei initium, quod quidem commemorari debeat, (nam et ante in Correctoriis biblicis res coepta) factum a *Laur. Valla*, collatis tribus Codicibus graecis, quibus ad latinam versionem emendandam vteretur: quod spectauit et *Fr. Lucas Brugenſis*. Auxit id studium, graeci textus edendi, et singulas editiones noua aliqua dote augendi cupido, inde ab *Erasmo*, qui primus varias lectiones addidit in notis, et *Roberto Stephano*, in ed. a. 1550. Sed maxime incensum est eius rei, omninoque criticae huius studium per *Curcellaeum*: non quod ipse aliquid in eo genere fecerit, quod esset eximium, quamquam superiores, qui post *Stephanum* fuere, longe superauit: sed quod primum eius editio *Fellum* impulit ad adornandam editionem nouam, quae variis lectionibus instructa esset, Oxon. 1675. repetitam a *Io. Gregorio*, 1703. et ad *Milium* incitandum, vt ad magnum illud opus molien-

moliendum accederet; deinde quod, cum Theologis videretur in lectionibus variis fuisse Socinianis, et in eorum gratiam lectiones ex ingenio finxisse, Codices diligentius conquisiti et inspecti sunt, atque etiam de rebus criticis diligentius disputari coeptum est, adiuuante etiam tempore, quo res critica vniuersa diligentius tractari coeperat. v)

v) Vid. *Wetstenius* Proleg. p. 170. Adde curas *Michaelis*, *Semleri*, *Griesbachii*, *Birchii*, *Alteri*, *Matthaei* aliorumque.

#### § 34.

Principatus in hoc genere haud dubie debetur *Io. Millio*, qui triginta annorum labore confecit opus, quod *Oxonii* 1707. f. primum prodit, textum *Elzeuirianum* f. *Curcellae*anum exhibens, cum 50000. lectionum variarum, et Prolegomenis historico-criticis eruditissimis. Quod etsi non est sine peccatis, vel ab opinionum temere susceptarum errore, vt quod versioni *Italiae* et Codicibus ex ea interpolatis plus iusto tribuere videtur, vel ab imbecillitate humana, subinde Codicibus male designatis et Patrum locis et versionibus falso prolatis: tamen merito a *I. A. Fabricio* admirandae industriae et iudicii opus vocatur. Nam quod in Prolegomenis saepe aliter de lectionibus iudicat, quam in notis, id vtentibus qui-

quidem incommodum, caeterum laudi est viro, qui, lecto interea, dum opus excuditur, Simoniano Historiae criticae opere, cum de multis rectius didicisset iudicare, in Prolegomenis ingenue iudicium suum retractavit. *Whitbium* autem huius operis examen etsi imperitis rei criticae probatum fuit, captis titulo libri, profitentis, *lectionem textus hodierni* (i. e. iudicium editoris *Elzeviriani*, aut *Curcellaei*) in omnibus defendi posse; tamen peritis nec professione illa, nec ratione vniuersa, probatur, et decreta sua factis tollit. vid. supra §. 5. c. V. §. 16. IV. §. 29. Ad *Whitbii* autem rationem factos *Canones Mastrichtianae editionis*, comparatio facile docet.

§ 35.

Sed hoc opus vel auctum vel expolitum est praeclare a tribus, *L. Kustero*, *I. A. Bengelio*, et *I. I. Wetstenio*. Nam *Kusterus* in repetitione *Millianae* editionis duodecim Codicum graecorum excerpta addidit, melius etiam de illa meriturus, si minus festinans, vitia operarum ne repeterentur, cavisset, et notas e *Prolegomenis* ubique vel correxisset vel auxisset.

§ 36.

*Bengelius* porro in Apparatu Critico  
non

non modo quindecim Codd. lectiones primus edidit, sed et aliorum ab aliis editas adiunxit, cum multis earum, quae e versionibus et libris Patrum ductae sunt, supplementis, laudem diligentiae, et in tota illa causa modestiae, meritus. In summa iudicii de lectionibus deligendis non probatur, quod normam delectus maxime fecit Alexandrini Codicis et latinae versionis consensum, non animaduertens, id quod erat in promptu, in tanta lectionum similitudine, Codicem illum ex hac interpolatum esse. Cui addiderim, quod, contra sua praecepta, in iudicando observationibus grammaticis ac bonitate lectionum minus, quam debebat, vitur, et contra eas saepe male decernit e solis libris, (vid. §. 23.) praesertim iis, quos ante diximus. Velut *Eph. 5, 9.* praefert *καρπὸς φωτός*, cum aliis, nixus solis latinizantibus Codd. et latinis auctoribus maxime, non cogitans, *καρπὸς φωτός* frigide dici, et contra consuetudinem diuinorum librorum, eamque ob causam et consulto a Paulo mutatum tropum, et *καρπὸς πνεύματος* dictos. Sed ille omnino satis graece doctus non fuit \*). In variis etiam lectionibus praetermisit, quae non debebat: vt alia mittamus. Repetitus est Apparatus eius Criticus a. 1763. additis libellis variis eristicis: in quo nec auxit sua e *Wetstenio*, *Blanchino*, *Saba-*

**Sabatierio** et aliis, nec iudicium de Codice Alex. mutauit.

x) Neque etiam, profanae litteraturae praesidio defuturus, iustas de genealogia Codicum habuit actiones. Virtus admissa rarius retractauit in gnomohe, castigatus propterea a *Wetstenio*, *Wolfo* et *Baumgartenio*.

§ 37.

*Wetstenius* denique multorum annorum magno labore Codices plures et antea non collatos excerptit, alios denuo contulit, versiones et loca Patrum inspexit, et superiorum lapsus saepe correxit, usum lectionum, describenda Codicum indole, et aetate ut eunque definienda, paratiorem reddidit, atque hac ex parte caeteris palmam eripuit: in iudicio lectionum vniuerso praeter caeteros probandus, quod id ad Codices pure graecos et non interpolatos e latina versione, Patresque graecos veteres maxime dirigit<sup>y)</sup>; in locis singulis illici se in fraudem passus est a cupiditate adiuuandae sententiae suae de I. C. diuinitate. Quo nomine merito reprehensus est a Cl. *Venema* in *Exerc. de vera diuinitate Christi*, et a nobis in *Castigationibus Wetsten.*, in quibus et alia notauimus, quae in hoc labore desiderari iure possint. Reprehendendus est et in hoc, quod Varietatem Lectionis Vaticani Ms. ut haberet et insereret, non curauit.

y) Ne-

y) Neque hoc merito fraudandus, quod conjecturis parum, aut nihil tribuit. Momenta versionum vero, orientalium imprimis, saepius e translatione latina aestimat; in excitandis Patrum locis saepius lahitur, subindeque sententias profert, a festinantiore iudicio conceptas, v. c. ad Ioh. VIII, I—II.

§ 38.

Sed quidam etiam separatim edendis Codicum vel singulorum vel plurium lectionibus operam navarunt, quos omnes commemorare non est necesse. *Velesius* autem, cuius Excerpta XVI. Codd. in *Cerdani* Adversar. S. c. 91. edita sunt, ne bona quidem fide egisse videtur, cum lectiones varias dedit, non modo non commemoratis nominatim ac descriptis Codicibus, e quibus hausit, sed etiam sub illo generali Codicum nomine abscondenda, ut videtur, fraude, quae hoc agebat, ut Vulgatae auctoritatem stabiliret. Res ipsa autem docet, non modo e manuscriptis Florentino Concilio posterioribus, et ad Vulgatam refectis, ut *Mariana* iudicabat praef. ad Schol. V. et N. T. sed etiam e latinis ductas esse, ut *Wetstenius* demonstravit. add. *Michaelis* V. Cel. §. 87. Nec *Caryophili* lectiones, a *P. Possino* ad calcem Catenae in Marcum editae, multum profunt, cum Codicum indoles ignota sit, immo pateat, e latina interpolatos fuisse, cuius etiam stabiliendae consilium *Caryophilo*

*philo* fuit: (v. *Bengel. App. p. 459.*) quamquam interdum praefert lectionem ab latina diuersam, et id faciendum iudicat, quoties maior Graecorum numerus consentiat. Caeterum in iis esse etiam lectiones Codicis Vaticanani, excerptas ad usum eorum, qui editionem N. T. ad exemplum Sixtinae V. T. graecis auctore Urbano VIII. moliebantur, et e literis viri docti Romae didici, et ex eo intellexi, quod omnes lectiones, quas e Cod. illo memoratas reperi, inesse vidi.

§ 39.

Caeterum cum ex iis, quae de variarum lectionum collectoribus tradita sunt, appareat, quantum erroris in delectu obiecerint viris doctissimis opiniones temere susceptae vel de Codicibus ipsis, vel de versionum quarundam, ut Italicae, ut Vulgatae, auctoritate, vel denique de religionis ipsius dogmatibus: nihil magis cauendum est iis, qui in hac re velint recte atque ordine versari, quam ne tali aliqua opinione imbuti ad iudicandum accedant.

§ 40.

Id vitabimus, si, quae de quoque variarum lectionum fonte tradidimus, bene percepta habebimus, et in iudicando omnia ad praecepta delectus faciendi referemus, nec suscepta



fufcepta aliqua opinione de lectione loci cuiusquam, quid ad eam firmandam valere poffit, quaeremus, fed omnibus momentis ad regulas ponderatis, tum demum, quid fequendum fit, indicabimus.

## § 41.

Nec oportet exiftimare, omnia iam exhausta, omnia accurate notata, nec quicquam noftrae diligentiae relictum effe, fed omnia explorare, et in legendis veterum et recentiorum libris attendere, fi quid, ad hanc rationem pertinens, occurrat, idque fuis locis notare <sup>2)</sup>. Nos quidem permulta ab fuperioribus vel praetermiffa, vel non animaduerfa, aut perperam tradita obferuauimus. Sed fatis multa, ac fortaffe nimis multa, de hoc genere diximus: ad ea, quae reftant ad interpretandi vsum, veniamus.

2) Ablegamus lectores ad Matth. V, 22. VI, 13. Marc. XVI, 9—20. Luc. I, 66. II, 22. Ioh. XVIII, 1. Act. II, 30. III, 12. VIII, 37. X, 33. XI, 20. XIII, 18. XVII, 26. XVIII, 5. XX, 28. XXIII, 9. Rom. VIII, 33. ff. X, 16. I. Cor. III, 4. vt intelligant, quid in locis iftis rectius conftituendis et interpungendis adhuc praefandum reftet?

## CAP: VII.

*De Vsu Versionis LXX. Vet. Test. et fragmentorum Aquilae, Symmachi etc.*

## § 1.

In quibus primum locum tenent Graeci hebraicorum V. T. librorum Interpretes, imprimis hi, quos, de vulgari fabula, septuaginta numeramus, rectius Alexandrinos appellabimus \*). Nam Alexandriae factam esse versionem illam, in eo consentit antiquitas: etsi id fortasse de iis modo libris intelligendum, qui tum in Synagogis legebantur, nam quorundam librorum versionem esse serioris aetatis, vix dubitandum: in quibus Iobum, Prouerbia, Canticum et Ecclesiastem posuerim, quem nonnulli ab Aquila esse putant, et non ab eodem omnes libros versos esse, ipsum scribendi genus euidenter arguit, quod quibusdam in libris diligentius hebraismum conseruat, estque a graeca puritate et elegantia r. notius, in aliis ab hebraismo longius recedit, atque etiam exquisitiora verba usurpat, imprimis in Iobo, Prouerbiis etc.

T

a) Vid.

a) Vid. omnino *Eichborn Repert. Lit. Or. T. I. p. 266.* Ex traditionibus ibi diligenter excussis conficitur hoc, Iudaeos Alexandrinos eiusmodi commentis versionem suam V. T. graecam popularibus in Palaestina pro diuina vendere, et ut archetypo illam non inferiorem facerent, *ἱερονευσίας* gloriam et famam illi, ut fieri solet, conciliare voluisse. Sed diuersa aetate et a variis interpretibus facta esse videtur, (conf. *Hodius de text. orig. L. I. c. 7—9.*) primum Pentateuchus, postea Psalmi, deinde libri historici, denique Iesaias, vltimum Iobus et reliqua scripta V. T. Hucusque duas tantum habemus editiones principes, Sixtinam, vel Vaticanam 1587. fol. recusam a Bosio, et *Grabianam*, quae sequitur Cod. Alexandrinum, Oxon. 1707. repetitam a Breitingero. Multa nun sperari possunt de contextu LXX. interpretum restituendo post *Holmesei* Angli aliorumque VV. DD. curas et studia.

## § 2.

Huius versionis graecitas hebraizans <sup>b)</sup>, siue per inscitiam usurpata est ab interpretibus, quod verba et phrasae hebraicas non possent bene graece exprimere, praesertim in rebus ad religionem proprie pertinentibus, siue per religionem aliquam existimantium, res sacras inquinari graecae elegantiae imitatione, quae certe posteriorum temporum opinio fuit, orta illa fortasse per Antiochinae afflictionis tempora; <sup>c)</sup> ea vero post fuit, inter Iudaeos graece loquentes, pro lege, quam sequerentur, qui de religione

gione scriberent, si quidem patrii moris essent tenaces, et popularibus vellent probari.

V. Progr. nostrum *de odio Iudaeorum in lingu. graec.* Itaque etiam nouae graecitatis versio Pentateuchi eam imitatur, et versiones Bibliorum Italicae Hispanicaeque, a Iudaeis curatae, ad eam formam expressae sunt. vid. *Simon Bibl. Crit. P. IV. p. 133.*

b) Graecitas LXX. interpretum est triplex: siue plane hebraizans, ut in versione Ecclesiastae: siue pura et interdum exquisita, ut in versione Iobi, Prouerborum et Cantici, ubi verba etiam poetica occurrunt: siue mixta, ut in plerisque V. T. libris. Vid. *Mücke de origine versionis LXX. interpretum. Züllich. 1789.*

c) Iudaei in lingua graeca nunquam excellabant, neque eminere inter alios barbaros poterant. Primum enim animum adpellebant ad hanc linguam addiscendam commercii causa: postea, ubi Antiochiae et Alexandriae aulae benevolentiam captare coeperunt, exquisitam in scholis discere quidem studebant graecitatem, sed sine successu. Vbi denique Antiochus Epiphanes, ut sacra gentilium susciperent, voluit illos Graecorum mores imitari saltando, canendo, certando; tunc plane iniussa fieri coepit Iudaeis lingua graeca.

### § 3.

Itaque cum hoc genere scribendi, ut supra demonstraui, vti sint in Noui Testamenti libris viri diuini, facile intelligitur id, quod doctissimi Interpretes iudicant,

T 2

ad

ad cognoscendum usum loquendi Nou. Test. interpretandosque eius libros plurimum prodesse lectionem versionis graecae Vet. Test. recte institutam, atque adeo haud paullo plus, quam caeterorum graecorum librorum. v. in primis *Pearsonii* Praefatio paraenetica in edit. *Cantabrig.* et *Grabiana.* add. *Carpzou.* Crit. S. p. 547. <sup>cc</sup>)

cc) Cum *Bielio*, *Schleusnero*, *Paulo*, *Beckhusio* et al. Vid. *Bretschneideri* exc. II. ad Ies. Siracid. Ratisb. 1806. p. 709. ff.

## § 4.

Quo magis Interpretes recentiores atque eruditiores ea versione sibi utendum censuerunt, ad explicandas formas loquendi N. T. et illustrandas, nec ante satis feliciter dictio N. T. cognita est, quam inde ei lux est accensa. In quo genere principatus debetur haud dubie *Grotio*, qui primus iusta diligentia et scientia in hoc genere est usus, caeterisque omnibus in eo praeluxit. <sup>d</sup>)

d) Patres versione LXX. in explicando N. T. non usi sunt, quod plerique hebraica non intelligerent. Etiam *Melauchthon* et *Camerarius* rarissime illos in subsidium vocauerunt. Post *Grotium* celebrandus est *Reichenii* Obseru. in N. T. ex LXX.

## § 5.

Nec parum in hoc genere profuere, qui he-

hebraismos N. T. illustrarunt \*), vñ inprimis versione illa, partim exemplis ex ea afferendis, vt intelligeretur, quid verba graeca hebraice sonarent, partim varietate interpretandi hebraica commemoranda, vt quid verbum hebraizans esset bene graece appareret: quamquam posterius vellem saepius factum. Caeterum quoniam exemplis magis res acta est, quam praeceptis; eamque ob causam, qui illam rationem imitarentur, saepe lapsi sunt; faciendum nobis putamus, vt eam ad pauca et perspicua praecepta redigamus, atque ita vñum illius versionis faciliorem et certiorum reddamus.

e) In his *Wyssius* in *Dialectologia sacra*. Melior est *Vorstius*, sed compendiosior *Leusdenus*, vterque ex Ed. *Fischeri*.

### § 6.

Primum igitur observationibus quibusdam grammaticis opus est, ad indolem illius, qua imitatur hebraicam consuetudinem, recte cognoscendam, vt hinc praecepta et cautiones, quibus vñus eius dirigatur, duci legitime possint.

### § 7.

Observationes autem latissime patentes sunt hae. Primum, quod verbum graecum hebraico maxime simile est etymologia s. prima

prima significatione, id contulere intérpretes non modo ad primam et maxime solennem verbi hebraici significationem exprimendam, sed etiam ad omnes caeteras tropicas, vt in בָּרַךְ, אָרַךְ, הָרִיק, יָדוּר, בָּרִית, הָרַץ, et aliis, quibus cum proprie responderent κενῶν, καλεῖν, ἐκλέξασθαι, δικαιοσύνη, διαθήκη, μαρτύριον, his verbis et eorum coniugatis etiam vti sunt in exprimendis illorum verborum tropicis significationibus, quas graeca consuetudo non agnoscit <sup>f)</sup>).

f) Adde בָּרַךְ, *verbum*, deinde *res*, *negotium*: sic explicanda vox ῥῆμα Matth. IV, 4. Luc. I, 37.: בָּרִית, *pactum*, *foedus*: deinde, *constitutio*, *oeconomia religionis*, διαθήκη: אֵרַךְ *res occulta*, deinde *profunda sapientia*, μυστήριον.

## § 8.

Secundo, in verbis hebraicis, quae multiplicis significationis essent, non facile per troporum varietatem explicandae, et a prima significatione deriuandae, variae ac diuersae interpretationes permutantur, vt in דָּן, τέλειος, δίκαιος, εὐλαβής <sup>g)</sup> etc. In hoc genere explicando in primis diligens est Gatakerus, vt in priori Vorstius.

g) Sic דָּן est *dare* et *ponere*: quapropter τιθέναι et δίδναι permutantur in N. T. Ioh. X, II. ψυχὴν τιθέναι: דָּן, *beneficius* et *princeps* est in hebraico: hinc εὐεργέτης, *princeps*, Luc. XXII, 25.

## § 9.

§ 9.

In iisdemque vno eodemque verbo graeco varias illas significationes exprimunt: vt, quia μαρτύριον respondet τῷ עֵדוּת vel עדות, propterea etiam, vt hebraica, pro lege, doctrina, hinc μαρτύριον Χριστῶ pro doctrina Christi, et μαρτυρεῖν pro docere; similiter νόμος, vt חֻקִּים, non modo de lege, quae latine dicitur, vt apud Graecos, sed etiam de religione vniuersa, et qualibet eius parte, vt promissionibus, dicitur. Cuius rei ignorantia mirabiles et contortas interpretationes ac sententias peperit, etiam *Vitrinae* Obs. III, 1. Cui simile est, quod, cum praefixo כ proprie aut maxime respondeat graecum ἐν, huius vsus non minus late patet, quam praefixi illius apud Hebraeos: in quo ipso ignorantia hebraismi mirifice, saepe ridicule se torfit <sup>h</sup>).

h) Exempla sunt ἐν Χριστῷ εἶναι, Christianum esse: ἐν ἀμαρτίαις ἀποθνήσκειν, in morte peccatorum esse plenum. Neque haec negligenda est observatio, permutari saepius in N. T. ἐν et εἰς ex consuetudine hebraici כ et ל.

§ 10.

Sunt etiam verba graeca, in quibus ex hebraica et graeca consuetudine intelligi non potest, quare iis sint vsi οἱ ὁ ad verbum hebraicum



braicum explicandum: in quibus forte, vt *Lud. de Dieu* et aliis visum est, Chaldaica et Arabica consuetudo spectata est, aut prima hebraici verbi significatio nunc ignoratur, quae forte in Chaldaica et Arabica superest<sup>1)</sup>). Velut, quod חמר interpretantur συγχρίνεν pro ἐρμηνεύεν aut ἐπιλύεν, forte ea significatio est hebraici verbi etymologica, aut tum in Chaldaismo vel in Arabismo valuit: quae ipsa interpretatio in N. T. venit.

i) Hoc rarius occurrit. Conf. tamen ad Rom. XI, 9. Ies. XXIX, 10. vbi חמר, somnus profundus, a LXX. interpretibus conuertitur κατάνυξις, compunctio. Hanc autem potestatem habet arab. حمر, consuit, compunxit. Vid. Michaelis Supplem. p. 449. Inde sollemnis est formula apud Arabes: somnus mihi consuit oculos. Conf. Michaelis Chrestom. arab. p. 66. (Meliora dabit Lennep in Etymol. v. νυσάζω, quae descendit a νύω, nuto, vnde κατάνυξις, sopor.)

## § 11.

Interdum tamen etiam formas prorsus hebraicas, qua sensum, quem locus desiderat, bene graece, neglecto hebraismo, exprimunt, vt חמך ἐλεημοσύνη, et חמך ויח אגאθος, benignus, חריך non modo ἔσχατος, sed etiam ἐπιών, et cum חיים non modo ἐν ἐσχάταις ἡμέραις, sed etiam μετὰ ταῦτα etc. Et nihil dicimus de hebraismis, qui sunt in constructione, et aliis generibus, quibus

quibus significatio non admodum adficitur, neque ambigua redditur: ut cum femina pro neutris ponunt <sup>1)</sup>, et similia.

1) V. c. Matth. XXI, 42. *Θαυμάσῃ* pro *Θαυμασόν*. Adde et hoc: interdum hebraismi ex parte tantum explicantur, v. c. Genes. XIX, 21. *כַּדְרֵי מִשְׁכָּנָם*, *Θαυμάζει πρόσωπον*, quod non est graecum: sed inde deriuat formulam N. T. *λαμβάνειν πρόσωπον*.

## § 12.

Hae igitur obseruationes in genere, et in singulis verbis, imprimis frequentius sic vsurpatis, et, ut ita dicam, dogmaticis, debent esse in promptu, ut nobis in tempore succurrant, et adiuuent in sensu reperiendo. Quod efficiemus, si versionem illam ita legerimus, ut semper cum hebraicis graeca conferamus, item graeca cum graecis diuersorum locorum, in quibus eadem verba hebraica sunt, et illas generales obseruationes ante oculos habeamus, ut iis admoniti de singulis verbis, quae consuetudo illius versionis sit, cognoscamus.

## § 13.

Ipius autem versionis per tales obseruationes ad vsu in indagando N. T. sensu conferendae methodus habet maxime praecepta haec: Primum, ut, quae in N. T. bene

bene graece dicta non sint, id quod cognita linguae graecae indoles et analogia docebit, saepe etiam ipse sensus verborum bene graecus, abhorrens a contextus sententia, ea requiramus in illa versione, et, quibus verbis hebraicis respondeant, videamus, vt ex hebraicis intelligamus graeca: vt in verbis κλησις, ἐκλογη et coniugatis, in μογιλάλος, Marc. 7, 32., quod respondet hebraico דָּבַר, κωφός, Ef. 35, 6. <sup>m</sup>) In quo cautio est, vt hebraicorum vim recte teneamus, non latine e Lexicis vulgaribus vertamus; in quibus etiam latinitas plerumque est hebraica, saepe ex ipsa graeca versione, verbis graecis etymologice interpretandis, hausta: quae ratio non modo nihil profuerit, sed etiam deceperit. Itaque praecepti illius, quod supra posuimus, memores esse oportet tirones, vt libellos de hebraismis sibi familiares reddant, omninoque verborum potestates e vera linguae indole recte et perspicue cognoscere studeant.

m) Nequit μογιλάλος verti, *difficulter loquens*: qui enim naturaliter surdi sunt, illi etiam muti esse solent. Collato itaque loco excitato, patet, μογιλάλος positum esse pro ἄλαλος.

#### § 14.

Secundo, quae in illa versione ex hebraico bene graece vertuntur, quod fieri subinde,

inde, supra diximus, ea in N. T. oportet conferre ad intelligenda ea, in quibus clarum est, ex indole graecae linguae rem aestimanti, hebraica esse etymologice verbis graecis expressa. Quod optime cognoscetur, si graeca hebraice, verbum de verbo, vertantur. Vt si 1 Cor. 15, 54. εἰς νῆκος, veritas hebraice נִצָּח, meminerisque, id etiam bene graece ab iisdem interpretibus verū εἰς τέλος, διαπαντός, εἰς τὸν αἰῶνα, χρόνον πολὺν, non modo εἰς νῆκος, sensum verum tenebis. Itaque oportet ea, quae sunt huiusmodi in versione illa, notata habere, ut sint in promptu, ubi eorum usus venerit.

§ 15.

Atque etiam in bene graecis, V. et N. T. communibus, proderit conferre hebraica, quibus ea in V. T. respondeant; ne in illis ipsis bene graecis, si non omnino, at hactenus decipiamur, ut plenum sensum non assequamur. Nam interpretes illi interdum vage, ut ita dicam, et crassius interpretantur, item antecedente pro consequente, genere pro specie, et contra, ponendo, aut similia permutando: ut cum יהוה אלהינו verunt εὐηρέτησε τῷ θεῷ, Gen. 5, 24. 6, 9. consequente pro antecedente posito, quod servatum ab Apostolo Ebr. 11, 5. n)

n) Ioh.

n) Ioh. I, 14. *καρπος γένος* est *רִבְרֵי בָנִים*, quod LXX.  
Gen. XXII, 2. explicant, *וְיֶסֶד אֲנָשִׁים*.

## § 16.

Sunt etiam multa, quae, in utroque, bene graeca sunt sono, et tamen hebraicam interpretationem desiderant: qua ignorata, mirabiles sententiae existunt. Veluti *κατὰ τὰ μέλη τῆς γῆς Eph. 4, 9. Ps. 62, 9.* etc. non bene intelligentur, nisi compares hebraica, *רַגְלֵי אֲדָמָה*. Quod genus inprimis est lubricum, fallitque interpretes. Et sunt huius generis prope innumera. (vid. P. I. S. II. c. 3. §. 8.) Quo magis in his indagandis et ad usum in loco conferendis diligens esse interpres debet. °)

o) Non sine laude huic labori operam suam impenderunt *Bielius* in thesauro philologico et *Schlesingerus* in supplementis ad h. l. Utrouque opere diligens interpres carere vix poterit.

## § 17.

In hac re proderit, ubi haerebimus, item exercendi ac discendi gratia, etiam indicibus versionis huius uti, ut videamus, quibus hebraicis verbis graecum quodque respondeat, et si quid inde lucis accedere possit locis obscuris: cuius generis a *Conr. Kirchero* et *Abr. Trommio* confectos habemus <sup>p)</sup>. Sed in hac re multiplex cautio est: pri-

prima, ne affectatione aliqua, aut inscitia hebraismi, aut interpretum graecorum vaga interpretandi ratione decepti, peccemus; in quo genere merito reprehenditur *Dan. Heinsius* <sup>1)</sup> a *Salmasio de Foen. trapezit.* p. 805; secunda, ne illorum indicum vitiis et peccatis, quae sunt multa et magna, in fraudem inducamur, quod accidit multis, praesertim Kircheriano opere usis, cuius latina sunt e versione *Pagnini*, ut eidem *Heinsio*, ut *Calouio* ad 1 Cor. 12, 4. in verbis ἀνάθεμα et ἀνάθημα: tertia, ne, cum illi interpretes aliam, quam nunc textus hebraicus habet, lectionem interpretati sunt, eorum verba ex lectione textus nostri interpretemur, et inde verbo graeco significationem temere assignamus: quod accidit *Pearsonio* l. c. in *Ebr.* 10, 38; denique, ne pravas interpretationes verborum hebraicorum, quas non paucas esse constat, sequamur. Vid. dicta a nobis in *Disp. de Diffic. Interpr. Gramm. N. T.* §. 17. 18. 19. Quibus incommodis magno cum discentium fructu occurrere posset, si quis vir satis graece et hebraice doctus, rei criticae bene peritus, et in hac, quam descripsimus, ratione exercitatus, *Lexicon Graecitatis illius*, quae est in versione V. T. graeca, conficeret: quod in animo habuisse *Drusium*, ex eius praef. in *Praeterita* etc. patet. <sup>1)</sup>

p) Kir-

p) Kircherus ediderat concordantiam a. 1607. 4. ita, ut verba hebraica primo loco poneret, addito indice graeco, quod valde erat incommodum. Sed contra Trommius graeca primo loco posuit, addito indice hebraico, a. 1717. fol. Hic liber melior est priori, cuius auctor usus erat editione τῶν ὁ Wecheliana, in qua multa vitiose sunt expressa.

q) Heinsius usus Pagnini Lexico hebr. mere etymologico ἀπὸν ἐτιμολογικόν explicuerat, panem *crastinum*, quasi esset לחם חמיר, panis instans, חמיר falso ab עמר deriuato. Sic bonā explicatio inani eruditione vanisque argumentis erat suffulta.

r) Vid. not. ad §. 16.

### § 18.

Haec igitur maxime praecepta tenenti, praesertim exercitatione aliqua, et usu rei, legendis aut audiendis bonis interpretibus, adiuncto, licebit magno cum fructu ea interpretatione uti: ex qua profecto nondum omnia eruta sunt, quae utiliter ad interpretationem N. T. conferri possunt.

### § 19.

Enimuero etiam alios non contemnendos usus habet illa versio: primum valde necessarium in comparatione locorum, quae de Vetere Testamento commemorantur in Nouo: nec contemnendum alterum, in iudicio ac delectu lectionis; qui est criticus:  
tertium

tertium ad intelligendos Commentarios veterum Ecclesiae doctorum, qui fere ex hac versione pendent.

§ 20.

Satis enim constat, sanctos N. T. scriptores interdum verba V. T. ita protulisse, ut ea de versione graeca sumpta esse videantur. Nam etsi in nonnullis ipsi ex hebraico vertisse videri possunt, exprimendo verbum de verbo, ubi etiam fortasse nostrum quisque pari modo, aut non multum aliter, verterit; praesertim cum non raro ipsos vertisse, loci indicio sint ii, in quibus cum hebraico textu contra graecum consentiunt, ut *Matth.* 8, 17. ex *Es.* 53, 4. item *Io.* 19, 37. e *Zach.* 12, 10. tamen haud paucis in locis clarum est, verba e versione graeca depromta esse, hoc est, in iis, ubi non modo nihil ab hac, sed etiam ab hebraico perspicue discrepant, qui dissensus saepe sententiam adficit, estque interdum eiusmodi, ut supra fidem sit, duobus eadem verba in vertendo venisse in mentem: ut *Ebr.* 10, 38. 11, 21. In quibus locis si Apostolos ipsos ex hebraico vertisse dicamus, ut placuit quibusdam viris doctis, aut lapsos esse interpretando, sequetur, aut textum nostrum hebraicum in iis locis vitiosum esse; quorum neutrum probari potest; aut denique versione Apostolica sublata, a  
libra-



librariis insertam esse versionem vulgatam τὸν ε', quod ipsum nonnulli statuerunt: de quo est lata disputatio Lud. Capelli in *Append. Criticae S.* p. 445. \*)

2) In re multorum observationibus agitata pauca disputare attinet. Excitatur V. T. in nouo ab auctoribus *Ἰσχυροῦς* vel ex contextu hebraico, vel ex versione LXX. interpretum, vel ex alia nunc deperdita, vel ex memoria. Conf. *Eichhornius Allg. Bibl. d. bibl. Lit. T. II. p. 948. seqq.* et *Eckermannus* in symbolis theologicis. In vniuersum notandum est, tunc temporis morem aliorum scripta excitandi ita fuisse comparatum, ut

- 1) magis ad sensum loci, quam verba respiceretur, multa itaque adponerentur et omitterentur;
- 2) ut sensus loci excitati notionibus auctoris accommodaretur;
- 3) ut quilibet auctor etiam in excitandis aliorum scriptis ingenium suum proderet.

Petrus certe Act. II, 25. s. et Iacobus c. XV, 16. s. versione Alexandrina Hierosolymis vti non poterant; Graeci enim male ibi audiebant, et vterque apostolus non graece, sed syriace verba faciebat. Loca igitur V. T. ab iis excitata e Lucae memoria fluxerunt.

### § 21.

Causas varietatis huius in auctoritatibus illis ponendis, itemque consuetudinis vsurpandi versionem graecam, etiam tum, cum ab hebraico discrepat, curiose exquirere, non

non est necesse, praesertim in hac institutione: caeterum, cum ex versione graeca, quamquam aberrante a veritate hebraica, interdum pendeat tota ratio et vis argumentationis, nec modo in sententiis integris ac pluribus, sed interdum etiam in singulis verbis: facile intelligitur, ad intelligendas demonstrationes et rationes scriptorum sacrorum illius versionis comparisonem et intelligentiam valde esse necessariam.

§ 22.

Vsum criticum habet, primum in illis ipsis locis, qui ex ea proferuntur. Nam in iis discrepant interdum libri veteres, ut discernendum sit, quid sequi velimus. In quo genere uniuerso, sane vix dubitari potest, quin lectio ea sit praefenda, quae in versionis bonis exemplis reperitur, praesertim, si habeat aliquid exquisiti, aut insolentior sit. Veluti *Hebr.* 1, 12. praeferetur vulgatum ἐλίξεις τὸν ἀλλάξεις, contra quam *Ben-gelio* atque *Wetstenio* videtur, quod ἐλίξεις est in versione graeca, e qua totus ibi locus sumtus est<sup>1</sup>), glossaeque simile est ἀλλάξεις e versione N. T. latina, quae hoc verbum habere videtur ex Hieronymi correctione; quamquam sane hoc hebraico הָלַח similius est. Potest tamen accidere, ut ab eius auctoritate discedendum sit, propriis alioquin

U

loco

loco caussis: veluti, cum res et ratio argumentandi aliquid habet eiusmodi, propter quod aliquid consulto mutatum videatur, salua tamen sententia vniuersa: vt *Paulus Ebr.* 10, 5. pro ὁρία videtur σῶμα posuisse e *Pf.* 40. vt aptius rationi suae, cum vellet demonstrare, Iesum corpore suo immolando Deum placasse <sup>u</sup>).

t) Neque tamen silentio praeteriri debet, editionem τῶν ὁ Grabianam habere ἀλλάξεις, *Psalm.* CII, 26—28.

u) Etiam versio Philoxeniana habet ἦτα h. l. atque sic etiam legendum esse censet *Michaelis* colleg. crit. de *Psalmis* praecip. de Christo agentibus. p. 358. seqq.

### § 23.

Atque etiam in aliis locis adiuuare in iudicando potest, cum, in pari librorum auctoritate atque sensus bonitate, e verborum ratione, decernendum est (c. VI. §. 25.). Nam vix dubitari potest, quin tum lectio ea, quae sit consuetudini versionis huius conuenientior, praesertim durior, si graeca consuetudine aestimetur, praeferrī debeat. Quid quod etiam per eam cauēri potest deprauatio textus, et lectio vera firmari. Non, vt opinor, *Interpres* latinus *Act.* 15, 2. omissurus erat καὶ συζητήσεως, quod videbatur lenius, quam pro σώσεως verbo, si σώσιν, quam

quam *seditionem* interpretatur, de more τῶν ὁ intellexisset *altercationem*, quae est in disputatione ac dissensu.

§ 24.

Sed in tota hac re videndum est, ut utamur exemplis versionis, quae e bonis Codicibus ducta sint, ne vitiiis librorum decipiamur. Atque etiam plures editiones interdum conferendae, aut variae lectiones inspiciendae sunt. Itaque nemo 2 *Cor.* 13, 1. pro σαθήσεται e versione illa tentet rescribere σήσεται, quod *Deut.* 19, 15. in illa sententia habent Romana editio, et quae ex ea expressae sunt: quamquam hoc quoque sensu passivo intelligi potest: cum σαθήσεται in Aldina et Grabiana repererit.

§ 25.

Sed quamquam in hoc genere dominatur versio illa: tamen nec negligendae sunt reliquiae caeterarum versionum graecarum, *Aquilae* imprimis ac *Symmachi*, primum a *Petro Morino*, ut ipse narrat in epist. n. 31. iuvante *Ant. Agellio* e scriptis Patrum, imprimis Hieronymi, et Catenis collectae, et a *Flaminio Nobilio* in Bibliis Graecis Romae editae, inde in pluribus editionibus repetitae, post a *Druſio* separatim, et ad usum aptius, sed e manuscriptis libris Grae-

corum Commentariorum, vt *Eusebii*, *Procopii* etc. longe auctius in Hexaplorum Originianorum reliquiis editae a *Montefalconio* Paris. 1713. cum Lexico hebraico et graeco: quod opus in compendium redegit et auxit *Bahrdtius* Lips. 1769. v) Plura promisit supplementa e Codice Chifiano *Blanchinus*, sed non dedit, praeuentus morte.

v) Theodotion maximam partem conspirat cum LXX. interpr. proptereaue hoc loco minoris pretii est. Sed vid. de hoc reliquisque fragmentorum hexaplerum auctoribus *Eichbornius* Einl. in d. A. T. T. I. ed. 3. p. 335. ff.

### § 26.

Nam *Aquila*, Iudaico ingenio obsecutus, ita vertit hebraica, vt singula verba exprimeret graecis, quae illis essent propria significatione simillima: vnde κατ' ἀκριβειαν vertisse dictus est, mirificeque operam suam Iudaeis probauit, non dissentientibus multum Christianis, qui eam etiam *Veritatem hebraicam* appellarunt, veluti, eam cum legerent, ipsa hebraica legerent: vnde saepe doctores graeci, cum hebraica memorant, versionem hanc intelligunt.

### § 27.

Hinc fit, vt adiuuare nos eius reliquiae possint, cum quaerimus, cui verbo hebraico grae-

graecum, in quo haeremus, respondeat, vt inde, quam vim in sermone hebraeo-graeco habere possit, videamus. Veluti, *καρνόος* verbum vsurpatum ad exprimendum hebraicum קר, cum de funiculo mensorio dicitur: quod prodest ei verbo intelligendo atque illustrando 2 Cor. 10, 13. etc.

§ 28.

*Symmachum* autem veteres tradunt, atque id etiam reliquiae versionis ab eo factae docent, in vertendo puritatem linguae graecae conservare studuisse. Nam quae inter eas non pura sunt, ea per errorem scribentium ex *Aquila*, aut alio quo, irrepsisse videntur: sicut et *Symmachi* quaedam in excerpta *Aquilae*. Quo nomine vt laudatur mirifice ab *Hieronymo*, item *Theodoreto*, ita malam gratiam a popularibus suis, Iudaeis, iniit, qui ea ratione profanari oracula diuina putabant. Vid. Cl. *Thiemii* Disp. de Puritate *Symmachi*. x)

x) Videant et iudicent hic viri docti, num in N. T. interpretatione ex antiquis Hellenismi monumentis instituenda alicuius pretii sit *noxa V. T. versio graeca Veneta* a Villoisino (Argentor. 1784.) et nobis (Erlangae 1790. f. P. I—III.) edita, tum in disquirenda ratione, qua notiones hebraicae graece exprimi soleant, cuius rei scientia egregium est adcuratioris explicationis subsidium; tum in singulis verbis formulisque, v. c. in v. γάμος, משה, quod huius versionis auctor bene

bene conuertit in δόκος; in γ. ἐκνεύειν Ioh. V, 13. quo vocabulo noster exprimit מנה Deut. XXXI, 18.

## § 29.

Ex quo intelligitur, eas reliquias prod-  
esse posse, vt verba formasque loquendi he-  
braicas bene intelligamus, nec earum inter-  
pretationes graecas hebraizantes in sensum  
alienum trahamus. Ex quo genere est, v. g.  
quod εὐεργεσίαν interpretatur, quam οἱ ὁ ἀν-  
ταπόδοσιν Ps. 103, 2. etymologiam hebrai-  
cae vocis גמול secuti: quod etiam ad μισθόν  
trahere licet, qui pariter pro beneficiis ac  
honis, s. felicitate, a Deo accepta, sine re-  
spectu actionis praegressae dicitur Gen. 15,  
2. Quodsi non profunt in multis locis pro-  
prie, at profunt ad rationem vniuersam  
cognoscendi vsus loquendi in libris N. T.  
nec modo in singulis verbis, sed etiam in  
constructionibus, a graeca ratione aberran-  
tibus. Legantur Io. Frid. Fischeri V. C.  
Prolusiones de Interpretibus V. T. graecis,  
hebraicae linguae intelligendae magistris.  
(Lips. 1772. 8.)

---

## CAP. VIII.

*De usu scriptorum Iudaicorum.*

## § 1.

Cum sint in N. T. et verba, et formae loquendi, denique etiam sententiae, quae vel vi, vel structura discrepant a graecae linguae consuetudine, nec tamen ex hebraismo, quoad e libris sacris cognoscitur, aut ex interpretatione Alexandrina, explicari possunt: necesse est, ut eae fluxerint e consuetudine Syro-Chaldaica, quae tum in Palaestina valuit, in haud paucis a vetere hebraica discrepans, siue de rebus vulgaribus, siue ad religionem pertinentibus, loquerentur. y)

y) Duplex usus est scriptorum Iudaicorum in N. T. 1) secundum res, antiquitates et ritus Iudaeorum, ad quos in N. T. adluditur, ut et secundum opiniones illorum praeiudicatas, de Satana, de angelis, de Messia eiusque praenuntiis, de sabbato, de Deo Iudaeorum tantum Patre: 2) secundum verba et orationem in gnomis, parabolis, v. c. in Ἀδάμ ἀρχαῖος, γλῶσσαι καὶ καὶ, ἔπειτα etc.

## § 2.



## § 2.

Huius reliquiae quaedam vix dubitari potest, cum res ipsa loquatur, quin repariantur in libris Iudaicis, si non omnibus et cuiuscunque aetatis, at antiquioribus, et prioribus aetati Apostolorum, aut qui eius aetatis scriptorum fragmenta conseruauere. In priori genere *Targumim* <sup>2)</sup>, *Mischna* Hieros. c. Sec. II. liber *Sohar*, eiusdem prope aetatis, in posteriori multi alii numerantur; qui etsi aliquot seculis recentiores sunt, velut *Gemarici* et *Rabbothani*, vel *Midraschici*, tamen verba veterum Doctorum conseruauere: de quibus libris praeter *Wolffium* in Bibl. hebr. adeuudi *Schoettgenius* Lect. Rabbinic. L. I. *Gillius* in praef. Comm. in Euangelia, et *Harenbergius* in Proleg. ad Comm. in Apocak. Ioan.

2) Optima translatio תרגום est *Onkelas* in legem et *Ionathanis* in Prophetas. *Mischnam* latinitate et notis illustrauit *Guilielm. Surenbuse*. Amstelæd. 1698. fol. theodisce facta est a *Rahio*, presbytero Onoldino, VI tomis. Onoldi 4. 1760. seqq. Ex Gemara idem vir doctus transtulit in nostram linguam tract. *Brachor*. Halae 1777. 4.

## § 3.

Itaque, etsi non cuiusuis est, hos scriptores excutere: tamen diligenter legenda et consulenda sunt scripta eorum, qui lectum  
ex

ex hoc fereore aurum vsibus communibus ad interpretationem Nou. Test. tradidere: Quorum principes sunt post Cartwrightum in mellificio hebr. Io. Drusus, Lightfootus et Schoettgenius, qui ex instituto hanc partem sunt persecuti, ille in *Praeteritorum* opere, hi in *Horis Talmudicis* <sup>a</sup>). In quibus tamen omnibus locum habet, quod de Britanno monet *Simon Hist. Crit. T. III. pag. 795.*, cum eum dicit esse copiosorem in ritibus, quam in verbis, et nimis sequi eorum opiniones, denique cogere interdum Iudaeos dicere, quae ipsi placeant. His addi possunt etiam praeter *Haksplanum* de libris Iudaeorum, ad calcem *Lipomanni* Nizachon c. 3. Sect. II. de usu scriptorum Iud. ad interpretationem N. T. *Balth. Scheidii Praeterita Praeteritorum*, in Meuscheniana Collectione. Pauciora, sed magis delecta et exquisita, collegere *Capelli* <sup>b</sup>), Ludouicus quidem per occasionem edendi *Cameronis Myrothecii*. Ex Interpretibus primus prope, certe satis diligenter, hoc genere usus est *Hugo Gratius*: et notarum *Wetstenii* in N. T., itemque *Gillii* Britanni in Euangelia, optima fere pars est ea, quae Iudaicorum scriptorum excerptis constat. De *Gaulmini* ineditis ex hoc genere notis v. *Simonis Bibl. Crit. IV. p. 183.* Patet, tantam huius generis iam copiam esse, vt  
alio

alio viro docto opus sit, qui delectum ex omnibus faciat <sup>bb)</sup>).

a) *Drusius* edidit opus *Praetitorum*, ab *Erasmo* nimirum et *Beza* 1612. 4: *Lightfootus* horas *Hebraicas* et *Talmudicas* *Cantabrig.* 1658. 4. repetitas *Lipsiae* cur. *Carpzouio*: *Schoettgenius* horas *Talmud.* *Dresdae* 1733. 4.

b) In *Capellis* tres sunt distinguendi: *Iacobus* uterque et *Ludouicus*, *Iacobi* filius, *Buxtorfii* aduersarius et *Criticae* sacrae auctor. *Collectiones* *Meuschenii* vide in eius *N. T. e Talmude illustrato.* *Lips.* 1736. 4.

bb) Multa enim a *Drasio*, *Lightfooto*, *Schoettgenio* et *Wetstenio*, qui archetypis rariis, versione latina autem saepissime vitur, congesta sunt e scriptoribus *Iudaicis*, quibus recta *N. T.* interpretatio parum adiuuatur. Superfunt tamen haud pauca, quae locis difficillimis lucem adfundant, tum e *Mischna*, inprimis libro *פירקי אבות*, tum e libro *Sohar*, cuius compendium dedit *Knorr a Rosenroth* in *Kabbala* denudata, tum e recentioribus *Iudaeorum* scriptis excerptenda. Exempla vide in *diff. nostra*, *Adscensus I. C. in coelum historia biblica*, in nou. opusc. theol. *Götting.* 1803. p. 57. ff. *De vestigiis theologiae Iudaicae in epistola Pauli ad Romanos*, *ibid.* p. 72. ff. *De linguis novis*, *Er-lang.* 1803. p. 9. f. Neque negligi velim *Maimonidem* in libro *מורה נבוכים*, cui observationes grammaticae insunt optimae frugis, et in utroque tractatu de doctrina legis et poenitentia, ed. *Clauering*, *Oxonii* 1705. Vide pag. 58. 59. 63. 73. 75. 87. Adde eiusdem tractatum de iureiurando ed. *Dithmar*, *Lugdun.* 1706.

§ 4.

Neque vero verborum modo intellectum adiuuant Iudaici scriptores, sed etiam rerum explicationi interdum seruiunt. Nam ritibus, moribus et opinionibus, ad quas alludunt non paucis locis scriptores Nou. Test. subinde lucem affundunt. In quo genere, praeter superiores illos, omnes ii laboraverunt, qui Antiquitates hebraicas e Iudaicis scriptoribus illustrarunt. c) De quo genere, praeter *Relandi* Orationem, *Gillii* Disputatio adiri potest, inserta *Catenae Britannicae Commentar. in N. T. T. I.*

c) Utilitatem horum auctorum exempla doceant. Parabola Luc. XVI. intelligi nequit, nisi teneas, Lazarum esse Irum Hebraeorum, qui ex more orientis vitae aeternae gaudia sub imagine conuiuii, quo locus princeps erat in sinu Abrahami, adumbrabant et angelos piorum animas illuc deducere, impios autem in flammis sulphureas coniicere, statuebant. Adde locum Matth. V, 34. *μη ὀμῶσαι ἔλως* e tractatu *Mischnae* *תענית* illustrandum; Act. II, 3. *γλῶσσαι ὡσεὶ πυρὸς* a *Vitringa* (de syn. vet. p. 146.) sententia parallela e *Schalschelet Hakabbala* explicitum; orationem dominicam e Iudaeorum precibus *Kadisch* derivaram.

§ 5.

Sed in hoc genere plures sunt cautiones: prima, ut inconstantiam fugiamus eorum, qui, ut quoque loco commodum ipsis est, et

et susceptae ab ipsis opinioni consentaneum videtur, quod Iudaei tradunt, aut ex iis profertur, nec ne, ita Iudaicorum scriptorum usum et auctoritatem vel extollunt vel deprimunt: altera, ut κακοζηλίαν quorundam, qui studio suo capti, omnia, quae de Iudaeis proferuntur, sine delectu probant, et ad interpretandum N. T. accommodant. In quo genere utique saepe peccauere *Lightfootus* in primis et *Gillius*.

## § 6.

His igitur cautionibus facilius et rectius parebimus, omninoque hoc genere rectius utemur, si certum praeceptum tenebimus, quod delectus faciendi modum praescribat. Nam qui nihil aliud, nisi hoc, praecipunt, cauendum, ne in huius generis usu in alterutram partem peccemus, vel excedendo modum, vel citra modum subsistendo, delectum et iudicium non relinquunt: quod nemo se aut plus, aut minus, quam debebat, facere putat. <sup>d)</sup>

d) In vniuersum haec regula tenenda est: quidquid in N. T. ad ritus religionis, ad docendi et orationis formam spectat, maximam partem e scriptoribus Iudaicis illustrari debet. Sic e. c. Paulus in Epistola ad Romanos multa profert, quae Gamalielis discipulum prodant. Breuior per exempla est via, quam vel suo, vel aliorum adparatu instructus, praeiit *Wetstenius* in

in notis suis ad N. T. Delectum bonarum obseruationum e scriptoribus Iudaicis inuenias etiam in Eichbornii Commentario in Apocalypsin, Gotting. 1791.

§ 7.

Atque non negem, in eo delectu plus prope valere sensum aliquem ingenii, datum ab natura, quem usus, et exercitatio, et elegantia literarum humaniorum acuerit. Caeterum profuerit tenuisse hoc, ut ab illis scriptoribus auxilium petamus tum modo, cum necessitas aliqua urgeat, h. e. ubi neque graecae neque hebraicae veteris linguae scientia suppeditet, per quod sensus commodus et contextui aptus reperiri possit <sup>e</sup>). Et haec est illa ipsa media via, quam tenendam in hoc genere nonnulli praecipiunt. Nam ubi ab his auxilium est, stultum sit, ab Iudaeorum magistris petere. Profuerit etiam legisse eos, qui in hoc genere caute et eleganter sunt versati; in quo *Capelli* imprimis *Spicilegium* commendem, et *Grotii* ex eo genere notas in N. T.

e) Exemplum illustre exstat Act. XIII, 48. τεταγμένοι εἰς ζωὴν αἰώνιον. Qui hoc ex sensu Iudaico explicant, illis τεταγμένους idem est, ac ערוך, ordinatus, h. e. destinatus. Sed meliorem sensum fundit graecus loci: τάττειν ἑαυτὸν εἰς τι est, studiosum esse alicuius rei: τεταγμένους, compositus. Vide tamen Koppiam ad Rom. IX, 22.

§ 8.

## § 8.

In ea autem parte, quae ad antiquitates pertinet, adiungendi, atque adeo Rabbini-  
cis scriptoribus longe praeferendi sunt *Philo*  
et *Iosephus*: quippe et antiquiores istis et  
eruditiores: neque vllō modo audiendi sunt,  
qui amore Rabbīnorum, aut suarum adeo  
opinionum capti, hos potius, quam illos,  
vbi dissentiant, sequendos putant. Nam in  
rebus ad templum Hierosolymitanum spe-  
ctantibus, et in ritibus religiosis, aut cum  
templo aliquam coniunctionem habentibus,  
vt in caussa Paschali, in adyto, et templo  
Herodis, maior profecto fides esse debet  
iis, qui suis oculis ista viderunt, et ipsi facti-  
tarunt, quam caeteris, qui excisa cum tem-  
plo vrbe, et sublato ritu Iudaico, vixere <sup>f</sup>).  
Legatur etiam *Heinius* Obs. S. I, 9. II, 3.  
de ignorantia Iudaeorum et crassis mendaciis  
in antiquitatibus hebraicis.

f) Sic v. c. Talmudici tradunt, sacerdotes macta-  
visse agnum paschalem, sed *Philo* quemuis patremfa-  
milias hoc factitavisse perhibet. Templum Hierosoly-  
mitanum non totum ab Herode fuisse destructum, tra-  
duunt Rabbini: *Iosephus* autem etiam sanctuarium de-  
structum esse docet. Vtrobique *Iosephus* et *Philo*  
maiores fidem merentur. Aliis N. T. locis adhuc la-  
cem adfundunt literae Samaritanae publicatae in Re-  
pert. Lit. Or. et Bibl. *Eichhorn*, Tom. IX. et in Re-  
pert. *Paul*, Tom. I. p. 120, sqq.

§ 9.

*Philo* vero etiam rationi allegoricae et mysticae, qua *Paulus* inprimis utitur, illustrandae et accuratius cognoscendae plurimum proderit: in quo tantum ei similitudinis cum *Paulo* intercedit, etiam interdum in modis loquendi, ut quidam etiam *Philonis* libros a *Paulo* lectos coniicerent<sup>g)</sup>, in his *Weistenius* T. II. N. T. pag. 384. Quod nobis tamen non magis credibile videtur, quam quod *Ottio* in *Spicileg.* pag. 397. placebat, e *Pauli* libris *Iosephum* profecisse. Nam ut vix credi potest, *Paulum* graecae linguae ita peritum fuisse, ut *Philonis* orationem, plane abhorrentem ab hebraica indole, et Platonicae ac Demosthenicae aemulam, intelligeret: ita nihil impedit, quo minus utrique ex iisdem antiquiorum scriptorum fontibus hauserint. Legantur a studiosis *Loesneri* V. C. Lectiones Philonianae.

g) Magna omnino similitudo inter scripta *Pauli* et *Philonis*: vide *Gal.* IV, 24. f. et *Philon.* allegor. ed. Pfeifferi t. I. p. 385. Neque tamen exinde colligi potest, vnum ex altero hausisse: intelligitur potius, utrumque linguam graecam adcuratius didicisse.

§ 10.

Nec verum est, quod traditum vidi a Philologis nonnullis parum peritis, cum *Iosephi*



*sephi* lectionem ad intelligentiam N. T. utilem dicerent, quod eodem genere scribendyteretur. Nam *Iosephus* bene graecos scriptores, inprimis Polybium, et in verbis singulis, et in forma orationis, diligenter ac satis feliciter imitatur, rarissime admittis hebraïsmis, desciscens in eo, vt ipse dicit, a gentis suae consuetudine. Sunt tamen et in phrasi, quae observasse non poenituerit. Ea ex instituto congeffit et illustravit *Ottius* l. c. diligentius multo *Cl. Krebsius* in *Observat. ad N. T. e Iosepho.*<sup>h)</sup> Et ab his quoque nonnulla, vt sit, praetermissa sunt: velut, quod τὰ βλεπόμενα de euentu promissionis dixit A. V, 10. extr. quod prodest ad Hebr. XI, 1. it. quod ἐκλογὴν de libertate, B. I. II, 8. 14. quod prodest illustrando loco *Rom.* 9, 11. vbi ἡ κατ' ἐκλογὴν πρόθεσις, in qua se tantopere torquent, qui ex Compendiis doctrinae interpretantur, nihil aliud est, quam libera Dei voluntas, omninoque libertas Dei in beneficiis tribuendis; ducto modo loquendi partim ex hebraïsmo, qui libertatem, nisi per verbum כּוּר, exprimere non potest, partim ex natura rei. Nam fundamentum libertatis est in facultate eligendi. Sed ad interpretationem N. T. multum proderit in legendo Iosepho observasse, quomodo tradens res Iudaicas e libris sacris, exprimat hebraica: quale est, cum in caussa

Core,

Core, verba כֹּהֵן יִשָּׁה, quae οἱ ὁ vertunt κατέναντι τῷ Κυρίῳ (Num. XVI.), ipse interpretatur κατέναντι τῷ προτεμενίσματος. Et hoc genus observationis fere neglectum vidimus.

h) Iosephus admodum feliciter imitatur Thucydem et Polybium, rarissime admittis hebraïsmis, v. c. καὶνὸς pro βέβηλος, σάκκους περιτίθασθαι, amictum funebrem induere. Ne autem dictione Iosephi abutantur interpretes ad explicandum N. T. obseruent quæso, illum magis illustrare historiam V. et interdum etiam N. T., quam singula verba. — Multae bonae observationes e scriptis Iudaicorum in N. T. inveniuntur adhuc in Raymundi Martini pugione fidei adversus Mauros et Iudaeos. Lips. 1687.

## CAP. IX.

*De Interpretibus N. T. eorumque usu.*

## § 1.

Interpretandi genera plura usurpauit antiquitas, *mysticum* s. *allegoricum*, *dogmaticum* et *grammaticum* sine *grammatico-rhetoricum*. Nec eodem genere scribendi vti sunt omnes. Nam alii *Commentarios* scripsere, alii *Scholia*, alii *Homilias*.

## § 2.

Antiquissimum genus est *allegoricum*, ortum haud dubie e Synagoga, quae ab ea re בית-מרש magistris Iudaeorum dicitur, et scholis Doctorum Iudaicorum. Nam in Synagogis licuisse commentari in loca sacrorum librorum, Euangelia docent. Et in scholis Doctorum, quae pariter Synagogae dicuntur, quod in iis docebant fere magistri, et post sublatum templum nihil magis agebatur, quam ut ratio et modus explicandi legem et Prophetas traderetur, in quo summa et vna eruditio Iudaica erat <sup>1</sup>).

i) Qua tamen in re sine vilo gustu, sine vilo veri  
et

et pulchri sensu sunt versati. Vide *Vitringam* de synagoga veteri pag. 137. ff.

§ 3.

Id. olim, ab ipsis Prophetis vsurpatum, quoad incorruptum ab humani ingenii vanitate et lusibus mansit, habuit explicationem vaticiniorum de Iesu Christo, typorumque, et fortasse etiam rerum ipsarum, inprimis historicarum, accommodationes ad diuina et humana, per quas dogmata et praecepta vitae illustrarentur, et omnia ad vsum fidei ac vitae conferrentur: idque adeo fuit mysticum genus, quod proprie ab allegorico differt, vt apud Graecos *θεωρία* ab *ἀλληγορία*.<sup>1)</sup>

1) Historia interpretationis S. S. docet, tum mysticam, tum allegoricam N. T. explicationem ad formam Iudaicam fuisse expressam. Quae cum verae theologiae admodum sit perniciosa, plane fugienda est a liberali religionis doctore.

§ 4.

Sed paullatim ab ingeniis, parum subactis doctrina, et acuminis gloriam captantibus, mire corruptum est, omisssaque meliori parte, quae ad vaticinia et typos pertinet, omnia ad accommodationes relata sunt, per quas et res minutissimae quacque, et verba ipsa misere et inepte torquerentur, et

X 2

lusibus

Iusibus omnia replerentur: quo genere etiamnum quidam in parabolis interpretandis utuntur. Melius tractat hoc genus Philo, quippe literis subacti vir ingenii, sed tamen nimis philosophatur.

## § 5.

Hoc ergo genus ab Iudaeis acceptum, coepit a Doctoribus Ecclesiae Christianae usurpari, primum omnium in Aegypto, imitatione Philonis, qui nihil aliud egit, quam ut ab sensibilibus homines adduceret ad invisibilia intelligenda et appetenda; et, quamvis post inducto grammatico, tamen frequentatum est inprimis ab his, qui, propter inscitiam linguae et historiae, etiam necessario allegorias consectabantur, quod de se iuvene fatetur *Hieronymus*: *allegorice interpretatus sum*, inquit, *Abdiam*, cuius historiam nesciebam, eiusque inscitiae veniam rogat. *Praef. ad Abdiam*. Nec minus prope ingenio indulgere etiam doctissimi, ut *Origenes*, quam Iudaei indulserant: et tamen haec ratio plurimum aduersus Chiliaistas, Anthropomorphitas et Gnosticos profuit. <sup>m)</sup>

m) Barnabas, Clemens Rom., Iustinus Martyr, Clemens Alexandrinus et Origenes, omnes vñ sunt interpretatione allegorica, admissa etiam gentilium philosophia. Vid. *Schulersi Histor. Interpretat. S. S. popularis*

leria theod. scripta. Tubing. 1787. Semleri librum; Versuch, die Auslegung des N. T. zu befördern. p. 185. seqq. et Rosenmülleri Commentatt. de fatis interpretationis sacrarum literarum in Ecclesia Christiana, nunc etiam theodisce factas. Lips. 1789—1791.

§ 6.

Sed adiunctum est ab Christianis huius generi, quod ad οἰκονομῆν, h. e. non tam ad intelligendas scripturas, quam ad dogmata et praecepta religionis inculcanda et commendanda, et ad gloriam ingenii usurpabatur, *grammaticum*, quod verba, historias, sententias, difficiles et obscuras explicaret, lectiones varias commemoraret ac diiudicaret, auctore, id quod fatis constat, *Origene*, non theologica magis quam literarum scientia et usu praeclare instructo, quas illae Alexandriae docebat, auctore *Eusebio H. E.* \*)

\*) Origenes interpretationem allegoricam, quam primam secutus erat, doctrina philologica imbutus in scriptis posterioribus reliquit. Idem nostris temporibus enectire videmus: quo magis theologus eminet doctrina solida veraque linguarum notitia, eo melior est S. S. interpres, sibi que temperat, quo minus doctrinas fidei et morum inanibus superstruat allegoriis, quibus auditorum animi magis obtruncantur, quam flectuntur.

§ 7.

Ad extremum, cum inter Graecos maior

nume-

numerus esse coepisset Doctorum, qui eruditi essent literis humanioribus, et exculti elegantia doctrinae, allegoricum genus plane repudiari coepit, auctore *Diodoro Tarsensi* (v. *Socrat.* VI, 3. *Sozom.* VIII, 2.) cuius rationem discipuli, inprimis *Theodorus Mopsuestenus* et *Io. Chrysostomus*, imitati sunt. Nam quod, siue *Diodorus* ipse, siue *Theodorus*, siue vterque, in vaticiniis interpretandis ea ratione dicuntur abusi, historico sensu Prophetarum in accommodationes conuerso, ea, siue criminatio fuit hominum allegoricae interpretationi nimis fauentium, et per hoc grammaticam, atque adeo ipsos illos libros, quorum gloriae inuidebant, infamare cupientium, siue vera accusatio fuit, tamen non impedit, quominus de interpretatione scripturarum vniuersa in genere grammatico optime meriti sint. De *Theodoro* v. *Buddei* Isag. pag. 1405. a quo in enarrandis interpretibus *Diodori* mentionem nullam factam, mirabile est, e cuius libris excerpta in *Catenis* PP. reperiuntur, quamquam nihil, quod nos quidem repererimus, admodum eximii inest.

## § 8.

In Ecclesia latina et ipsa allegoricum genus inualuit, partim ab eadem necessitate (§. 5.), partim per versiones latinas *Origenianorum*

orum Commentariorum, aut quod, qui Graece docti essent, ut *Hilarius* et *Ambrosius*, ex *Origenis* et similium libris haurirent.

§ 9.

*Dogmaticum* genus interpretandi est eorum, qui in interpretando non tam verba accurate interpretantur, quam sententias utrinque intellectas illustrant disputationibus de capitibus fidei et morum, controuersias etiam tractant, et veritatem doctrinae ab deprauationibus haereticorum vindicant: cuius generis est *Cyrilli* Alexandrini in *Iohannem* Commentarius, cui tamen interdum quaedam adspersa sunt e grammatica ratione; eique similes multi, praesertim de latinis, et recentioribus, proxime ab repurgatorum sacrorum tempore scriptis. Quod genus ad intelligentiam rerum theologicarum vtile, saepe ad interpretationem eam, quae proprie dicitur, parum prodest. °)

p) *Dogmaticum* interpretandi genus probatur, si superstructum sit explicationi grammaticae, v. c. *Ioh. X, 30. ἐγώ καὶ ὁ πατὴρ ἐν ἑσμέν* Quod si hic notetur vnio moralis Iesu et Patris, quae consistit in communionem consilii de beandis hominibus, tunc bene observatur dogmatice, saluatorem diuinum singulari ratione cum Patre esse coniunctum. Si autem statim ex doctrina Ecclesiastica de Trinitate cogitetur de vnitate essentiali, aliis ex locis comprobanda, tunc locus explicatur



plicatur dogmaticæ, et quidem male, quia contextus orationis Iohanneus negligitur.

### § 10.

Est etiam quoddam genus ex omnibus, præsertim posterioribus duobus, mixtum, quod et verba curiose tractat, et sententiæ theologicæ persequitur: quod, si modum adhibet eum, quem supra descripsimus, non modo non est contemnendum, sed etiam vehementer probandum <sup>p</sup>). Sed leges interpretandi supra proposuimus.

p) Cum interpretatio S. S. adcurate et ex regulis artis infirmitatibus publicæ auctoritatis olim descriptis non semper faueat, abstinebit fortasse prouidus interpres ab omnibus observationibus dogmaticis, eo lubentius, quia dogmata in vniuersum stabilienda non ex vno loco, vel altero, sed ex tota Nou. Test. analogia elici et probari debent.

### § 11.

In genere librorum, in quibus scripturæ tractarentur, principatus dabatur *Commentariis* <sup>q</sup>): in quibus copiosius et vberius, olim allegoriæ, intermixtis tamen subinde grammaticis observationibus, vt in *Origenis Tomis*, post sententiæ scriptorum tractatæ essent. Huius generis quæ ratio fuerit, bene *Hieronymus* explicat: *Commentarii quid operis habent? Alterius dicta edisserunt: quæ*

quae obscure scripta sunt, pleno sermone manifestant: multorum sententias reperiunt, et dicunt: hunc locum quidam sic edisserunt: alii sic interpretantur: illi sensum suum et intelligentiam his testimoniis et hac nituntur ratione firmare, ut prudens lector, cum diuersas explanationes legerit, multorum vel probanda vel improbanda didicerit, iudicet, quid verius sit, etc. adv. Rufin. L. I. p. m. 202.

q) Commentarius est perpetua explicatio auctoris sententiae habita difficultatum, cum in verbis, cum in rebus obuiarum. Exemplum boni Commentarii est Heyniana interpretatio Virgilii. Multum difficultatis habet iste labor: inde mira bonorum Commentariorum paucitas.

## § 12.

Aliud genus est *Homiliarum*, in quibus vel longiores *θήσεις* libri sacri, vel singulae sententiae breuiter explicantur, et ad usum, h. e. ad docendum, monendum, consolandum conferuntur: proprie destinatum vñbus Ecclesiae <sup>1)</sup>. Latini *sermones*, imprimis *tractatus* appellant, et *tractatores* ipsos auctores; quos hodie concionatores appellant; quamquam etiam totum genus interpretum *tractatores scripturarum* dicuntur. *Glossae* quidem *ὁμιλίαν tractatum*,  
ὁμιλίαν

ὁμιλητικὸν tractatorem interpretantur. v. in-  
pr. Cangius in Glossar. in his verbis.

1) Quod nostris diebus sunt orationes in singula  
S. S. loca, primis seculis Christianorum erant homi-  
liae h. e. practicae locorum explicationes, fabulis san-  
ctis illorumque temporum philosophia refertae. Opti-  
mae sunt Origenis et Chrysostomi.

### § 13.

Terium genus est *Scholiorum*, quae et  
σημειώσεις dictae, item ἐκβολαί vel ἐκλογαί,  
(*Eustathius* παραβολαίς appellat) excerpta,  
quo verbo, non satis vulgo intellecto, *Hie-  
ronymus* σημειώσεις bene interpretatur: *Hie-  
ronymus* genus commaticum, a breuitate,  
appellat in *Comm. ad Matthaeum*.

### § 14.

Ante *Origenem* vtrum *Commentarii* ex-  
isterint, nec ne, quaeri solet, adfirmanti-  
bus aliis, vt *Huetio*, *Tillemontio*, *Bud-  
deo*, cum alii ab *Origene* primo exemplum  
*Commentarii* scribendi propositum in Eccle-  
sia Christiana dicant. Me non poenitet, il-  
lius sententiae esse; nam *Origenes* Tom.  
VII. in Ioan. prouocat ad *Commentarios* su-  
periores; sed ita, vt de allegorico et dog-  
matico genere intelligatur: *Origenes* vocat  
scriptores ecclesiasticos. Nam literalem in-  
ter-

interpretationem in uniuersum N. T. primum  
*Origenem* edidisse in *σημειώσεων* opere, cer-  
 tum est. v. dicta in Disp. nostra de *Origene*  
 etc. §. 26.

§ 15.

Omnino principatus inter veteres inter-  
 pretes debetur *Origeni*, non modo, quod  
 primus grammaticae interpretationis exem-  
 plum proposuit, aut, quod in omni genere  
 interpretationis excelluit, ut qui *Tomos* al-  
 legoricarum interpretationum, *σημειώσεις*  
 literales, et *Homilias* scripsit, sed etiam,  
 et multo magis, quod prope, quicquid  
 boni habent veteres graeci et latini interpre-  
 tes N. T. id ab eo acceptum tenent; ut de-  
 monstrauimus l. c. §. 27. 28. ubi inprimis  
 §. 25. de *σημειώσεσι* dictum, i. e. de argu-  
 mento et nomine operis.

§ 16.

Quo facilius etiam ferimus iacturam vo-  
 luminis Origeniani, quod Scholia illa ha-  
 buit: cum ea prope tota exhausta sint a se-  
 quentibus, *Chrysostomo*, et aliis. Nec  
 continendi sunt *Tomus* \*), praesertim, quos  
 graece ab *Huetio*, et nuper, cum aliis *Ori-*  
*genis* reliquiis graecis, ab *Ruaeo* editos ha-  
 bemus: quamquam et in latinis, ut in *epist.*  
*ad Rom.* multum boni inest. Nam adspersa  
 sunt

sunt etiam ἀλληγορικά quaedam haud vulgaria, ad grammaticam rationem pertinentia: ut nihil dicamus de fragmentis Commentariorum, quae vel in Philocalia extant, vel in Catenis reperiuntur. Atque etiam allegorica, etsi non ad interpretandi rationem, at ad sensus pios vel instillandos vel alendos prodesse possunt; quo nomine etiam *Erasmus*, quamquam alienus alias ab hoc genere, et grammaticus haud dubie interpret, tamen interpretes allegoricos commendat in *Enchir. mil. Christi.* cap. 2. et forte hac de causa quaedam allegorica immiscuit Paraphrasi N. T. quod reprehendit *Clarkius* in Praefatione Paraphraseos suae N. T.

s) *Origenes* in Iohannem XXXII. tomos vel sectiones scripsit: reliqui tomi illustrant librum Iosuae, Matthaeum et Epistolam ad Romanos. Vid. *Origenis* commentaria in sacras scripturas, ed. Huetii. Colon. 1683. et *Roesleri* Bibl. Parr. Eccles. theod. II. p. 270. sq. Homiliae *Origenis* latine tantum exstant. *Philocalia* est Epitome operum *Origenis* praedare concinnata a *Spencero*, Cantabrig. 1668.

## § 17.

Ei proximus est ex iis, quorum libri tantum tulere, *Chrysostomus*, cuius *Homilie* in *Matthaeum*, *Iohannem*, *Actus Apost.* et *Epist. Pauli* extant, in has priorem separatim *Veronae*, 1529. ab *Giberto* Epi-

Episcopo editae, vniuersae, praeterquam in Operum Voluminibus, etiam separatim ab *Sylburgio*, quae sunt mistae e grammatico et dogmatico genere, breui et perspicuae verborum interpretationi ethica tractatione, vt appellatur in editis, subiecta. In epistolas quidem Pauli nil melius aut par tota antiquitas habet; et quicumque de Graecis post in has Epistolas scripsere, ex *Chrysostomo* pendent. In historicos libros optimus est et plenissimus Commentarius in *Matthaeum* inprimisque dignus lectu.

§ 18.

Eius discipulus fuit *Isidorus Pelusiota*, cuius Epistolarum libros quinque ab *Rittershusio* et *Schotto* per partes editos habemus, de Interpretatione Scripturae S. h. e. super locis Scripturarum, et quaestionibus dogmaticis, e sensu locorum quorundam pendentibus. Inprimis saepe vindicat loca, quae ad praedestinationem absolutam trahebantur, vt I, 56. IV, 59. etc. Eas magis ab aliis valde laudatas, quam usu admodum dignas tali laude reperi. Sequitur fere *Chrysostomum* praeceptorem: caeterum grammaticae interpretationis fautor, atque etiam Criticae amans. Oportet studiosum interpretandarum scripturarum percurrere opus, et

et deligere; quae ad hanc rationem pertinent.

§ 19.

Haud paullo vtilior et melior est *Theodoretus*, Cyri Episcopus, cuius Commentarium in Epistolas Pauli graece edidit *Sirmondus* (T. III. Opp. *Theod.*), quamquam Scholiorum potius, quam Commentarii formam habet. Ipse excerpta de Patrum, *Theod. Mopsuesteni* inprimis et *Chrysostomi*, scriptis appellat in Praefat. Nec modo verba breuiter explicat, sed etiam de interpunctionibus passim monet, vt *Rom.* 9, 5. et sententias breuiter illustrat, argumenta aduersus haereticos, inprimis Arianos, demonstrat, et a deprauationibus haereticorum, qui tum erant, vindicat. Itaque ab eius lectione initium fieri velim. \*)

\*) Dignus est inprimis, qui accuratius inspicatur, Commentarius eius in Epistolas Pauli minores. Com-  
moda est editio a *Schulze* et *Noesselto* curata 5 tomi,  
Halaë 1769. f.

§ 20.

Similis huic est *Theophylactus*, Bulgariae Episcopus, inde vulgo *Vulgarius* olim appellatus, etiam *Melanchthoni*, *Erasmo* et *Camerario*, cuius in Euangelia, Acta Apost. et Epistolas Pauli Commentarios, huc

sive potius Scholia, habemus, ut quae etiam in Codicibus nonnullis ἐπιστομαὶ inscribuntur. Nam et ex iisdem fontibus hausit, et eadem methodo usus est; nisi quod, praeter dogmatica, etiam allegorica subinde huiusque admiscuit: nisi ea ab aliis addita sunt: nam interpolatum esse subinde, diuersitas librorum arguit, nuperis etiam editoribus Venetis notata, aliis alio loco Codicibus modo breuioribus, modo copiosioribus, et, *Simoni Hist. Crit. T. IV. Cap. 28.* videtur, formula καὶ ἄλλως: quamquam haec Scholiastis graecis, nominatim Oecumenio, valde vsitata est. Caeterum Commentarius in Epist. Pauli accuratior est caeteris et verum compendium Chrysostomi. De nupera editione v. Bibl. theol. T. V. p. 771. f.

§ 21.

Ex eodem genere sunt *Oecumenii* \*) in Acta Apost. et Epistolas Pauli Scholia, si tamen sunt *Oecumenii*, cuius etiam aetas ignoratur. Nam ei tantum de coniectura editoris primi, *Donati Verouensis*, sine librorum auctoritate tribuuntur, per quos *Theophylacti* potius esse, nuper *Finettus* iudicauit, *praef. ad T. III. Opp. Theophyl.* Haec sunt, quae *Scholorum* nomine commemorari solent ab *Erasino*, *Camera-*  
*rio*, *Beza*, et aliis illius aetatis scriptori-  
bus.



bus. Ex sunt potius ab ignoto e pluribus excerptae notae, quam vnius opus. Nam et *Oecumenii* nomen interdum est in margine, vt et *Ioannis*, i. e. *Chrysostomi*, et *Photii*. Ex *Origenis* Scholiis quaedam fluxisse, etiam hoc indicio est, quod in iis *Origenianarum* opinionum vestigia deprehensa sunt. v. *Erasmus* ad *Hebr.* VII, 25.

u) *Theophylactus* et *Oecumenius* sunt meri compilatores *Chrysostomi*, quibus parum frugis inest. Patet iudicii veritas ex hoc specimine: sunt IV. euangelistae, ait *Theophylactus*, quia IV. sunt virtutes cardinales.

### § 22.

Nec dispar est *Io. Damasceni* \*) in *Epistolas Pauli* *Commentariolus*, inter eius Opera T. II. ab editore *Benedictino* in lucem prolatus, vt qui etiam inscriptione profitetur, nihil nisi *Excerpta* esse e *Chrysostomi* Opere.

v) *Damascenus*, *Syriae* monachus, *Sec. VIII.* florens, non tam propter merita in interpretationem inclaruit, quam propter systema dogmaticum a se conditum in libro: *περί ὁρθόδοξης πίστεως*.

### § 23.

His *Theophylacti* *Oecumeniique* Operibus simillimae sunt, quae sub *Catenarum*, ab *Thoma Aquinate* inuento nomine, vel editae

editae sunt, vel in Bibliothecis latent; Graecis ἐπιτομαὶ ἐρμηνειῶν dicuntur. x) Ea sunt excerpta e Commentariis, et aliis Patrum libris, quae etiam singula suis plerumque auctoribus nominatim redduntur, collecta et digesta ab *Olympiodoro*, *Niceta*, *Procopio Gazaeo*, et aliis: de quibus qui velit cognoscere, praeter *Ittigium* de Catenis Patrum, adeat imprimis *Simonem* l. c. c. 30. f. et *Noesseltum*, V. C. in Diss. de Catenis Patrum graecorum: qui soli ad usum accommodate de iis scripsere: caeteri, vt *Wolffius*, *Fabricius* etc. tantum hiflorice.

x) Catenae celebrantur propter usum triplicem: 1) seruarunt enim *Aquilam* et reliqua fragmenta hexaplaria, 2) continent extractus ex operibus ignotorum interpretum, et 3) multas bonae frugis variantes lectiones. Num autem nomen, *catena*, ab Aquinate inuentum sit, merito dubitatur. Praecipuae catenae sunt *Nicephori* in Octateuchum 1581. *Olympiodori* in Iobum, Venet. 1587. *Possini* in Matthaeum 1646. *Corderii* in Lucam, Antuerp. 1648.

## § 24.

Nec praetereundus *Euthymius Zigabenus*, Panopliae Dogmaticae scriptor e Sec. XII. cuius Commentarios in Euangelia latine editos a *Io. Hentenio* habemus, pariter e *Chrysostomo* maxime, sed tamen et aliis ductos, <sup>2)</sup> et doctis valde probatos, vt *Sadoletto*,

*dolet*o, quem vid. Epist. p. 214. b. ed. nov. add. *Fabric. Bibl. Graec. T. VII. p. 474.* Et memorantur Codices scripti Comment. in Epist. Pauli, item Catholicas.

2). Nimirum Basilio, Origene et Gregorio Nazianzeno. Opus iussu Alexii Comneni contra omnes haereses exaratum est: insunt tamen hinc inde observationes egregiae, v. c. ad Matth. IV, II. quo loco tentationes Iesu Christi ad sollicitationes internas τῆς γαστριμαργίας, τῆς κενοδοξίας καὶ τῆς φιλοπλουτίας refert: οὗτοι γὰρ οἱ πειρασμοὶ εἰσὶν οἱ ἄρχοντες τῶν παθῶν. Facile intelligitur, quam prope haec absint a Beckeri, Heumannii, Eichhornii et Herderi interpretationibus. Commodam *Enthymii* editionem curavit Matthaei, textu Graeco, qui nunquam antea editus erat, diligenter recensito, Lips. 1792. 4 tom. 8.

### § 25.

Consulto ad hunc locum distulimus *Cyrrillum Alexandrinum*, cuius Commentarius in Iohannem exstat, graece, etsi non integer, ab *Auberto* inter Opera eius (T. IV.) editus: quod dogmata potius et controuersias, inprimis Arianas, tractat, quam interpretem agit, qui proprie dicitur. Insunt tamen nonnulla e ratione grammatica, in qua non dubitat ab auctoritate superiorum omnium discedere. Ex quo genere est, quod Io. 5, 39. primus defendit, ἐρευνᾶτε non imperatiue, sed indicatine accipiendum esse: item εὐλογεῖν et εὐχαρισεῖν esse eadem,

et

et alia. Et sunt etiam in aliis eius scriptis, quae ad hanc rationem pertineant, et ad phraseos intelligentiam. Excerpta huius Commentarii dedit *Semlerus* V. C. in Selectis capp. Hist. Eccl. pag. 285.

§ 26.

Haec de Graecis. Latinorum longe princeps est *Hieronymus*, \*) solus hebraice et graece doctus, qui plures N. T. libros Commentariis illustravit, secutus maxime *Origenem*, cuius in *Praef. ad Quaes. in Genes.* etiam cum invidia nominis *Origeniani*, optat habere scientiam scripturarum: id quod e praefationibus patet, in quibus commemorat auctores, e quibus profecerit, imprimis in *Epist. ad Galatas*. Etsi potius aliorum sententias refert, quam ipse suas explicat, quo nomine etiam tum a nonnullis reprehensus est: v. *Praef. Comm. in Ierem.* et *L. I. c. Ruf.* tamen et ipse nonnunquam bona sua in critico, grammatico et dogmatico genere profert. *Lutherus* noster cum felicior in aliis libris, quam in Commentariis interpretari iudicat, vt supra memorauimus.

a) *Hieronymus* melius interpretatur S. S. in Epistolis, quam in Commentariis, melius V. quam N. T. Insunt tamen etiam commentariis observationes bonae frugis, v. c. *Matth. VI. II.* quo loco ἀγρευ ἐκ τῶν σίων

in euangelio secundum Hebraeos לחם מחר adpellari scribit, h. e. panem *crastinum*, siue *futurum*: quae vnice vera est h. v. explicatio. Animum attentum sibi deposcunt notitiae eius geographicae, quia per longum tempus commoratus est in Palaestina. Vid. beati Oelrichsii Commentar. de scriptor. Eccles. Lat. Lips. 1791. p. 512. f.

## § 27.

Nec tamen inutile fuerit, alios quoque consuluisse: quorum antiquissimus est *Hilarius* Pictauienfis, cuius Commentarius in Matthaeum extat, literalis ille quidem, sed subobscurus, vt sunt illius omnia, et e Graecis, imprimis *Origene*, ductus. Melior est alter *Hilarius*, Diaconus, (si tamen est auctor Commentarii in Epistolas Pauli, qui inter *Ambrosii* Opera editur,) vt videtur *Blondello Apol. Hieron.* pag. 47. 48. multos adstipulatores nacto, contra dicente *Petauio* de *Hierarch.* I, 12. quem sequitur *Oudin* in Comment. de Script. Eccl. *Blondelli* sententia videtur potior, quae *Augustini* testimonio nititur, proferentis verba Hilarii, quae sunt in hoc Commentariolo. Nam v. c. vestigia Pelagianismi, a quo alienus fuit *Hilarius*, vel dubia sunt, vel ab interpolatione: cuius suspicionem video iam in mentem venisse editori Parisiensi a. 1529. in subiecta Epistolae ad Rom. admonitione. Certe qui dicit p. m. 490. a. 2. *nos peccasse*  
in

in *Adamo*, in *massa Adami*, is Pelagianus non fuit: ut necesse sit, ea, quae Pelagiana videantur, aut aliter ab eo intellecta, aut non scripta esse. Et sunt tamen in his Commentariis, quae graecae linguae imperitum arguant, ut qui lectionem aliquo loco graecam ita commemorat, ut ab obliuente, et de fama acceptam, ad Rom. XII, 11. Caeterum ut interdum valde ineptiat, ut in iis, quae de *praetorio* et *episcopis* ad *Phil.* I. dicit: tamen et multa bona habet, quae vix ab homine graecarum et hebraicarum literarum imperito exspectes. <sup>b)</sup>

b) *Oelrichs* l. exc. pag. 62. „in interpretando Codice sacro non magna laus Hilarii: satis enim constat, eum Origenem, nisi interpretatum, certe in plurimis secutum esse.“

### § 28.

Nec contemnendus est similis *Pelagii* Commentariolus in Pauli omnes, praeterquam ad Hebraeos, Epistolas, a quibusdam *Hieronymo*, inter cuius Opera editur, male tributus, quem nec *Cassiodorus* subtilissimum vocare, *Lect. diu. cap. 8.* nec Orthodoxi, praesertim posterioris aetatis, saepe usurpare dubitauere: <sup>c)</sup> quamquam insunt semina opinionum de peccato inprimis originali, et alii errores. v. *Vossius* Hist. Pelag. I, 4. et *Noris.* Hist. Pelag. I, 3.

c) Conf.

c) Conf. de hoc Pelagii Commentariolo *Walchii* Histor. Haer. T. IV. p. 547. seqq. et b. *Schoenemann* biblioth. historico - liter. patrum latin. Lips. 1794. t. II. p. 433. f.

## § 29.

*Augustinus*, si hebraice et graece doctus fuisset, pro ingenii magnitudine et subtilitate, superasset haud dubie omnes. <sup>d)</sup> Nunc vir in Dialecticis et Rhetoricis exercitior, quam in Grammaticis, literisque graecis et hebraicis, Commentarios repleuit allegoriis, et digressionibus dogmaticis, saepe valde bonis, quaesivitque mysteria in verbis, quae saepe adeo torquet, ut ludere voluisse videatur. Interdum tamen, felicitate ingenii, non modo sequitur meliores superiorum interpretationes, sed etiam sua sponte, maxime in libris dogmaticis, verum videt. Caeterum haec ratio interpretandi, quia non opus habet literis, sed ratiocinatione Dialectica utitur e verbis versio- nis, sensu vulgari latino acceptis, et ad analogiam doctrinae relatis, sequentibus seculis, quae et ipsa illis literis carebant, lectores et admiratores reperit plures, quam *Hieronymus*. Itaque interpretes latini, qui post fuere, usque ad instaurationem sacrorum, toti pendent ex *Augustino*, cuius interpretationes non modo e Commentariis, siue Sermonibus in libros sacros, sed etiam

e libris caeteris omuib, imprimisque iis, qui aduersus Arianos, Pelagium et alleclas, item Manichaeos scripti sunt, laboriose collegerunt, vt *Thomas* in *Catena aurea*, et totam interpretationem N. T. Augustinianam fecere. Nam quae ab Anglis, vt *Beda* et *Alcuino*, postquam literae graecae inter eos coli coepissent, e Graecis, vt *Chrysostomo*, et e literatura hebraica a *Nic. Lirano* et *Paulo Burgenfi*, Lirani continuatore, ducta sunt, ea tenuia sunt et pauca, quamquam non contemnenda. Atque etiam proximis ab instauratione sacrorum temporibus, cum primi Theologi essent ei rationi adsueta, imprimis *Lutherus*, nec dum literis hebraicis et graecis ad nostrorum temporum modum instructi, *Augustinus* plurimum valuit, vt quem etiam *Victorinus Strigelius*, vir elegantissimae doctrinae, et inter optimos illius aetatis interpretes numerandus, *Loc. Theol.* P. III. p. 29. non dubitat, caeteris omnibus praeferre: *nullus ex Patribus melior interpres est, quam Augustinus*. Caeterum commentariorum optimus est in Epistolam ad Galatas, parcius ille in allegoriis, magisque caeteris grammaticus.

d) *Augustinus*, omnis orthodoxiae pater, hic commemorari debet propter CXXIV. sermones in Iohannem, Commentarium in orationem montanam, in Epistolam ad Romanos et propter quaestiones in Euangelistas.



listas. Neque praetermittendi sunt libri IV. de consensu euangelistarum, qua de re multa ingenue disputauit singularem quasi inspirationem diuinam in hoc argumento tractando sibi vindicans. In vniuersum *Augustinus* non tam inter interpretes verborum, quam rerum referendus est. Vid. *Oelrichs* l. c. p. 514. seqq. et *Schoenemann* l. c. p. 24. ff.

## § 30.

Itaque non est, quare de caeteris Latinis dicamus, aut de glossis, quarum ea, quae *Ordinaria* dicitur, a *Rabano Mauro*,<sup>e)</sup> s. potius *Walafrido Strabone* ex *Rabani* Commentariis, collecta altera breuior, quae *Interlinearis* appellatur, ab *Anselmo* Cantuariensi scripta est.

e) *Rabanus Maurus*, primum abbas Fuldensis, deinde Episcopus Moguntinus, Alcuini discipulus, scripsit catenam Patrum in Ev. Matthaei et Epistolas Pauli. Plura vide in *Simon*. Hist. Crit. T. III. c. 25.

## § 31.

Instauratis studiis linguarum, et mox sacris ipsis, commutata est paullatim ratio tractandi libros sacros, et emendata:<sup>f)</sup> sed nec omnes eodem modo tractarunt rem, nec omnibus temporibus eadem ratio valuit. Nam alii grammatica modo secuti sunt, ut sensus verborum explicaretur: alii sententias et dogmata, alii vtrumque genus complexi

plexi sunt, et alius alio vberior fuit. Et in principio primum genus a pluribus cultum; post alterum, deserto prope penitus primo, obtinuit; denique primum et tertium reuocatum est. Fuerunt etiam extremis temporibus, qui in locis difficilioribus per Observationum libros explicandis et illustrandis studium suum collocarent.

f) Poesis mater fuit philosophiae: hanc secutus est dogmatismus: hoc aedificio operose exstructo, multa diruit scepticismus. Similia fata experta est interpretatio S. S. Lusus imaginationis in fabulis sanctis creauit mysticismum et allegoriarum amorem: fides historica et arbitraria, rationis tyrannus, enixa est dogmatismus: auctorum veterum amor et studium peperit interpretationem grammaticam, quam ne *anista* aliquando excipiat, verendum est.

### § 32.

Ex primo genere olim fuere *Laur. Val- la*, *Ioach. Camerarius*, *Flacius*, *Nic. Zengerus*, *R. Stephanus*, *Castellio*, quibus et *Stunica* et *Lucas Brugenfis* addi possunt: propioribus nostrae aetati, atque nostris adeo temporibus *Pricaeus*, *Erasmus Schmidius*, *Heinsius*, *de Dieu*, *Miltius*, *Georgius*, *Bengelius*, *Wetstenius*, *Heumannus* etc. <sup>8)</sup>

g) Ad priores refer etiam *Vatablum* et *Drusum*: ad posteriores *Michaelem*, *Rosenmüllerum*, *Koppium*, *Hetzlium*, *Schleusnerum*, *Pottium* aliosque.

### § 33.

## § 55.

Ex genere altero, quod quidem verba non plane negligit, sed tamen res et dogmata magis et latius tractat, sunt *Lutheri*, *Melanchthonis*, (v. infra §. 49.) *Aeg. Hunnii*, *Balduini*, et aliorum, qui nunc fere negliguntur, *Calocuii*, et extra Ecclesiam nostram *Petr. Martyris*, *Caluini*, *Pellicani*, *Cocceii* et alieclarum, *Lampii*, *Turretini*, et aliorum, quos omnes commemorari non est necesse. <sup>h)</sup>

h) Multa, quae huc pertinent, suppeditabit *Semlerus* in libro: Versuch die gemeinnützige Auslegung des N. T. zu befördern. Halae 1786. p. 195. sqq. *Meyer* Geschichte der Schrifterklärung t. II. p. 335. ff.

## § 54.

E genere mixto, quod vtrumque, verba et res, sed breuius, nisi vbi aliter necessitas aut alia causa postulat, tractat, princeps fuit *Erasmus*, cuius Adnotationes profecto viam bene interpretandi patefecerunt, in quarum etiam velut fundamentis omnes, qui post fuere boni interpretes, aedificauere: etsi ille in multis lapsus est, ignorantia imprimis hebraismi. Ei proxime adiungendus est *Victorinus Strigelius*, minus clarus, atque etiam ignotus *Simoni*, Historiae Criticae N. T. auctori, sed in multis melior *Erasmo*,

*Erasmo*, et ad usum studiosorum aptior. Et in interpretando non, ut illè, versionem latinam maxime, sed graeca, explicat et illustrat, nec modo e literis graecis, sed etiam hebraicis, permulta melius *Erasmo*. Atque etiam sententias tractat, breuiter rerum notiones perspicue tradit, estque, in utroque genere, *Erasmo* aequabilior, qui saepe digressionibus, etiam declamationibus indulget. In vno inferior est *Erasmo*, quod Critica non attingit, nescio an consulto. *Hypomnematum* nomine editum est opus, duobus voluminibus. Lipsiae a. 1565. 8.

§ 35.

Secuti sunt post alii: quorum princeps est *Beza*, veris interpretationis subsidiis pro facultate illorum temporum bene usus, libris manuscriptis, literis hebraicis, graecis, versione etiam V. T. graeca, et aliis. Certe parem non habuit ante *Grotium*, in iis, quae ad verba et phrasin pertinent, omnibus superiorem, et primum omnibus praesidiis satis instructum, ingenii, linguarum omnium, versionis τῶν ὁ, quam primus recte contulit, et usurpandae rationem exemplo demonstrauit, literarum etiam Iudaicarum et aliarum orientalium; ut vere *Turretinus* iudicet, eum de phrasi N. T. hoc est, de grammatica ratione, omnium optime

me meritum esse. In sententiis autem indulget opinionibus suis, et saepe a veritate aberrat. <sup>1)</sup>

i) Quapropter etiam, ut fieri solet, a conuiciis sibi non temperauit Calonius, Grotiumque Socinianum, Arrianum, Antitrinitarium et Atheum adpellauit. Quae tamen nos non impediunt, quo minus illum inter optimos interpretes N. T. referamus eumque tironibus praesertim, postquam grammaticas difficultates superauerunt, commendemus. Exempli loco sit Ioh. VI, 17. de vero Bethsaidae situ, qui vel recentiores interpretes latuit. Conf. *Herderi* librum: *Briefe das Stud. d. Theol. betr.* Tom. II. p. 357. sqq.

### § 36.

Qui post fuere ex hac ratione, omnes, etiam qui vituperant *Grotium*, ex eius fontibus, qua grammatica scilicet, hausere; ut *Britanni*, *Whitbius*, *Hammondus*, <sup>1)</sup> item *Clericus*, *Infans* et *Bellosobrius*, *Calmetus*, ut multos alios, qui in singulos libros aut locos scripsere, praetermittamus: ut ille profecto caput sit hodiernae interpretationis grammaticae.

1) *Whitby* in *Examine critico*; *Hammondus* in *Observationibus* in N. T. quas *Clericus* ex Anglis latinis fecit, typis postea repetitis Francof. 1714. fol.

### § 37.

Qui noluerunt integros *Commentarios* scri-

scribere, in quibus necesse est, ab aliis dicta et nota repetere, vel omnium, vel aliquot librorum verba, phrasas et sententias illustrare ex observationibus suis studuere. Ex quibus quidam sunt mere grammatici: in his plures scriptoribus graecis modo vsi, vt *Lamb. Bos, Elsnerus, Albertus, Rappellus, Kypkius*, <sup>m)</sup> et alii minus clari aut probandi: alii literatura orientali maxime, vt *Capelli, Drusus*, in Praeteritis, *Camero, Lightfootus, Schoettgenius*: alii denique versione Vet. Test. graeca, vt *Keuchenius*.

m) Adde *Valckenarii* adnotatt. crit. in loca quaedam N. T. cum *Kloßii* examine 1790. (opusc. edit. Lips. t. II. p. 229. ff.). In corpus redigere coepit observationes priorum scriptorum omnes *Hetzeli*: successu tamen hucusque caruit opus. Huc etiam referri debent coniecturae *Bowyeri* in N. T. theodisce versae a *Schulzio* Tom. I. II. Lips. 1774. f.

## § 58.

Fuerunt etiam, qui per omnes libros ita vagarentur, vt selecta et difficiliora loca, diligentius scriptis disputatiunculis, ex quocunque genere literarum, illustrarent, rerum etiam non oblitum, vt vindicarentur ab deprauationibus et παραρρηνείαις τῶν ἑτεροδόξων, vt *Tarnouius, Hackspanus, Spanhemii, Werenfelsius, Deylingius, Oederus*, <sup>n)</sup> et alii.

n) *Tar-*

n) *Tarnouius* in Exercitatt. Bibl. *Hackspanus* Miscellan. in N. T. *Spanhemius* pater in dubiis euangel. filius in vindiciis euangelicis. *Werenselius* Obseruatt. in N. T. *Deylingius* Obseruatt. in 3 tom. distrib. Lips. 1720—36. *Oederus* Obseruatt. in N. T. Adde exercitatt. *Mori*, *Seileri*, *Noesselti*, *Knappii*, *Reinardi* (2 voll. Lips. 1809.).

## § 39.

Nec defuere, qui ex omnibus, aut delectis, quasdam quasi Catenas contexerent, ut vno loco esset, quicquid in quemque locum dictum esset ab aliis, aut melioribus. Ex illo genere sunt *Ant. Walaei* in N. T. Annotationes, non admodum probatae, et *Poli* Synopsis e Criticis Anglicanis, et *Curae I. C. Wolfii*, °) qui tamen et suum iudicium interponit; haud paullo melior et copiosior illis, nec tamen semper satis accuratus: ex hoc Opus nouum, quod ex Interpretibus Anglicanis delectas notas habet, ante francice editum, nunc et germanice cum eruditis *Bruckeri*, V. Cel. notis apud nos editum est Tomis VIII, 4.

o) *Walaeus* edidit Euangelia et acta cum scholiis, suis etiam adnotationibus adpersis. *Poli* synopsis est epitome Criticorum Anglorum, sed nimis cara, neque etiam adprime utilis. *Curae Wolfii* philol. et crit. (ed. 2. Hamb. 1733 — 35. 4 Voll. in 4.) pleniores sunt ritualorum, quam rerum; expressit tamen subinde auctor argumenta librorum, quos excitauit.

## § 40.

§ 40.

Commentariorum denique integrorum Bibliothecae institutae sunt: ex quo genere sunt *Biblia magna et maxima*, Parisiis superiori seculo edita: in quibus et verbosissimi et parum probati Commentarii, ut *Menochii*, editi sunt. Melior est, quae *Criticorum Anglicanorum* nomine, auctore *Pearsono*, in Britannia, septem Voluminibus prodiit, cum auctario duorum Voluminum Francofurti repetita: qui tamen quosdam admisit, quos rectius repudiasset, ut *Clarium* et alios quosdam.

§ 41.

Sed satis de Interpretibus, eorumque generibus, et interpretandi varietate dictum: restat, ut de usu admoneantur studiosi. Is est duplex: alter ad methodum bene interpretandi proprie pertinens, qui nostro iudicio est princeps: alter ad interpretationem singulorum verborum et sententiarum.

§ 42.

Debet igitur ante omnia futurus interpres sibi deligere unum et item alterum notae et confessae inter peritos praestantiae Interpretem, et quidem ex genere grammatico primum et maxime: quod ab intelligentia recta  
ver-



verborum etiam rerum intelligentia vera ducitur, nec sine ea contingere potest, h. e. talem, qualem supra descripsimus (P. I. c. ult.), eumque crebro legendo, excutiendo, et subsidia modumque interpretandi considerando, se paullatim ad eius rationem conformare, et dum hoc agit, caeteros tantum per occasionem alicuius necessitatis consulere. Hi qui sint, e dictis facile est iudicare. E Grotianis Commentariis inprimis commendem hoc consilio eum, qui est in Matthaeum, omnium ille diligentissime scriptus.

## § 43.

In caeteris hoc curabit, vt, ad quod genus quisque pertineat, non iguoret, verba potius an res, et quomodo tractet: quo aut quibus generibus praesidiorum bene sit usus. Ita, qui vniuerse rationibus suis maxime conducant, qui quoque in genere difficultatis aut necessitatis consulendi sint, statim tenebit, nec inter plures incertus errabit. Id qui ipse nondum iudicare potest, aut cognoscendorum librorum facultatem non habet, consulat *Rich. Simonem*, qui de Interpretibus Nou. Test. non ille quidem sic, vt nihil erraret, at omnium, quos nos quidem cognoverimus aut sciamus, accuratissime, et ad illum usum accommodate, exposuit, et in plerisque rectissime iudicauit, *T. IV. Hist. Crit.*

vt sit in promptu vniuscuiusque character. V. c. cum didicerit, *Maldonati* haec esse inter vitia, quae a sectae studio contraxit, bona, vt primum hebraismos, praesertim difficiliores, bene explicet, deinde sententias Patrum super vnoquoque loco diligenter commemoret; nec repudiabit omnino Commentarium eius in Euangelia, quia est Iesuitae ferocioris, et in tempore vti bonis eius poterit. °°)

°°) Τα ἀρχαῖα παροῦλθε. Magni aestimamus R. *Simonem*, sed bene valere iubemus *Maldonatum*, in grammaticis ieunum, in dogmaticis λύκον βαρύν. Adeant *Grotium* tirones, *Rosenmüllerum*, *Paulum*, *Kuinoelium*: Iesuitae commentario facile casebunt.

#### § 44.

Plurimum autem proderit, notata habere loca culusque libri sacri difficultia, et ab interpretibus in varias sententias tractata, itemque lectionis nomine memorabilia, et in quibus nobis nondum nec alii satisfecere, nec nosmetipsi satisfacere potuimus. Ita, vbi Commentarius aliquis in manus venerit, licebit breui tempore cognoscere, an habeat aliquid noui aut praecipui boni, omninoque aliquid, quo deduci ad verum sensum possimus. °°°)

°°°) V. c. Matth. V, 3. Marc. IX, 49. Act. XXVII, 12. Gal. III, 20. Col. I, 15. f.

## § 45.

Qui autem excellere volet in hac ratione, debet etiam interdum integros Commentarios percurrere, alio tempore alium. Nam, ut non dicam, multa a multis subinde bene tradi, quae illo loco non quaerat quisquam, quod sit inprimis ab iis, qui ostendendae doctrinae occasionem solent quaerere: saepe utiliter admonebimur de locis, quorum interpretationem certam et minime dubiam videbamur tenere, quod eam a puerili institutione, cum iudicandi facultas non erat, e libris doctrinae vulgaribus suscepimus, et saepe repetendo velut corroborauimus. <sup>P)</sup>

p) Vbi cum aoristis semel inducias fecerit Interpres, auctores N. T. singulos legat bono vocabulario instructus. Repetita lectione consulat bonam versionem, deinde idoneum interpretem, *Grotium*, *Koppium*, aut alium. Hoc bene ponderato, adeat etiam alios cum iudicio et delectu, ita tamen, ut reliqua subsidia critica haud negligat.

## § 46.

Inprimis auctor sim, ut Graecos, quos supra descripsimus, inde a *Chrysostomo*, eo, quo supra diximus ordine, excutiat, et inter se comparet. Et sunt nec nimis multi, nec nimis magni, ut non nimis multum aut temporis aut laboris infumendum sit ei, qui iam medio-

mediocrem profectum in eo genere cepit. Ea res praeter alias multas, etiam hanc vtilitatem habebit, vt interpretationes latinorum, atque popularium nostrorum, inde a repurgatis sacris, ortas e versione latina, aut veriacula, vel plane aberrante a graeco, vel nale, h. e. ex etymologia, aut latina vernaculae consuetudine accepta, et de manu in nanum traditas agnoscat, fontem erroris vitleat, et rectius verba sacra intelligere discat, nec credat amplius, vulgarem interpretationem esse antiquam, et vel hanc ob causam orthodoxam. Exempla supra aliquot locis praedam posuimus, quibus addi potest locus Ebr. 2, 16. in verbo *ἐπιλαμβάνεται* quod cum recentiores quidam interpretari coepissent, *auxilium fert, asserit*, novitas et proemodum *ἐπεροδοξία* iis obiecta est, cum conerenti graecos interpretes pateat, eam esse olam antiquam totius Ecclesiae graecae interpretationem; vulgarem nostrorum hominum et libellorum dogmaticorum esse noviam, ortam ab latinis, qui interpretationem graeci verbi in Vulgata puerilem, et ex etymologia graeci verbi factam, *assumit*, laine capiundo, ad incarnationem transtulerunt, nec profecto, sua modo lingua nixi, alio transferre potuerunt. Et talia non pauca libet obseruare, quae ignorasse ei, qui interpretem se ferat, turpe fuerit.

## § 47.

Illud autem praeceptum commune est in omnium cum veterum, tum recentiorum lectione, ut non modo in bonis interpretationibus, praeserim insignioribus et difficiliorum locorum, videamus, qua via quisque et ratione ad verum sensum peruenerit, sed etiam, ut in vitiosis et absurdis causis erroris indagemus, atque ita ingenium et ad verum videndum et ad errorem cauendum acuamus.<sup>q)</sup>

q) V. c. Col. I, 16. quo loco *ἑρμῆως, κρυπτότας, ἀρχαῖς* etc. non ad magistratus politicos relatum fuissent interpretes bene multi, si Iudaeorum doctrinam de variis angelorum ordinibus perspectam habuissent.

## § 48.

In observationum autem scriptoribus hunc delectum habebimus, ut non multum temporis tribuamus Philologicis iis, qui solas literas graecas ad illuminandum N. T. contulerunt: propterea, quod raro aliquid aut multum bonae frugis, aut verae lucis inest. In ipsis Elsnerianis, quibus propemodum principatus a nonnullis tribuitur, vir decem alicuius momenti obseruatiunculas meminimus nos reperire, plerisque Lexico graeco locupletando, quam Nouo Testamento illuminando aptioribus. Meliores sunt, quae verba ambigua et obscura e literis

ris hebraicis et versione graeca Veteris Testamenti interpretantur, veras lectiones vindicant, res et sententias ipsas illuminant, et a dubitationibus liberant.<sup>99)</sup>

99) Quaeritur, quid sit *σπείρος* I. Thess. IV, 4? Fuisse, qui loca colligerent e *Lucretio* et *Cicerone*, quibus corpus adpellatur *vas* et *receptaculum* animi; Erasmus ipse de *vas* fictili cogitavit; alii τὸ σπείρος Pythagoreorum in subsidium vocauerunt; iterum alii uxorem designari e linguae Hebraicae usu probaturi erant. Falso: locus I. Sam. XXI, 5. docet, כלל נערים, σπείρ τῶν LXX esse genitalia.

#### § 49.

Nec vero contemnendi aut prorsus negligendi sunt Commentarii hi, qui dogmata imprimis tractant: non quo iis ad ipsam interpretandi rationem multum adiuuemur, sed quod ex iis dogmatum scientiam augere possumus, quae in Commentariis biblicis veterum et recentiorum saepe diligentius et verberius tractantur, quam in libris iis, qui proprie ad dogmatum explicationem pertinent. Et insunt etiam bonae interpretationes e genere grammatico, ut in Commentariis *Melanchthonis*: in quibus etiam interdum monet, melius rem expediri grammatica ex graecismo aut hebraismo explicatione, quam subtilitate philosophandi scholastica. v. ad 1 Cor. 15. pag. 299. ubi est egregium specimen

men loci hebraici e Vet. Test. bene tractandi, ad *Coloss.* 5, 14. vbi bene *primogenitum* et *thronos* explicat.\*)

\*) Negari tamen nequit, Melanchthonem in interpretando N. T. saepius theologi, quam grammatici officio functum esse. Vide comment. in ep. ad Rom. c. V. de peccato originali p. 148. edit. Viteb. 1540.

### § 50.

Atque etiam iis, qui vel in Ecclesia, vel in Schola interpretaturi sunt literas sacras, hinc exempla petenda rerum, vel ad popularem captum, vel ad scholae subtilitatem accommodate tractandarum. \*) Nam etsi in schola maxime probamus interpretem eum, qui verborum veritatem et sensum maxime amplectitur, quid ubique insit rerum, argumentorum dogmaticorum, breuiter modo monet, vt supra diximus: tamen interdum etiam maiori copia vtendum est, et difficiliora, itemque vtiliora ad fidem et pietatem, enucleatius et latius edisserenda sunt: cuius generis vix melius exemplum et imitatione dignius extat inter recentiores Turretiniani in Epistolam Pauli ad Romanos, quamquam postumis, Exercitationibus. Commendem etiam *Melanchthonis* Comment. ad *Coloss.*, qui non est nimis copiosus, et Luthero inprimis placuit. \*)

r) In vniuersum teneant futuri religionis doctores, interpretationem N. T. coram concione non ad canonicum hermeneuticorum rigorem institui, sed potius ad sensus pios attemperari, qua in re optimi oratores sacri exempla esse debent.

s) Profligata interpretationis historia, qua scopulos praeteruehere docemur, ad quos priorum temporum doctores plurimi adliti sunt, superest, vt de *explicatione N. T. historica* quaedam differantur. Constat nimirum inter bonos interpretes, auctores *ἱστορικῶν* suum scribendi genus attemperauisse ingenio temporum, quae, vt multis, Chaldaeorum inprimis, philosophematis et opinionibus praeiudicatis, v. c. de Satana, de daemonibus, de angelis, de regno Messiae, de vitae aeternae gaudiis praemiisque, ita dedita erant, vt vix ac ne vix quidem ab iis se auelli paterentur, non repente et vno velut ictu, meliora doceri poterant. Quae cum ita sint, sponte sua patet, distinguendum esse in N. T. inter veritatem absolute declaratam, et inter veritatem pro captu et necessitate temporum adumbratam. Plura propter varias rationes hic edisseri nequeunt: neque enim post *Storriam* (Differt. de sensu historico. Tubing. 1778.) et multo magis *Keilium* (Diff. de interpretatione historica. Lips. 1788.) legisse poenitebit *Semlerum* in libro: Versuch die gemeinnützige Auslegung des N. T. zu befördern. p. 237. sqq. et *Bretschneideri* historisch-dogmatische Auslegung des N. T. Lips. 1806.



## CAP. X.

*De usu disciplinarum.*

## § 1.

Cum interpretatio versetur in sensu verborum indagando et explicando, eoque grammatico, isque unus sit sensus verus, et qui proprie dicitur: vel sic patet, Grammatices usum in interpretando N. T. esse et necessarium et maximum.

## § 2.

Neque vero sine ea aut verus verborum sensus, in linguis inprimis mortuis, reperiri, aut veri sensus certitudo esse, quoad ea ab humanis artibus nascitur, aut satis ab adversariis defendi, aut denique falsae interpretationes, praesertim si sententiam efficiant per se non absurdam aut ab analogia doctrinae abhorrentem, refelli possunt.

## § 3.

Atque etiam periculosum est, ad interpretandum accedere, qui non sit bene peritus linguarum ad grammaticam ἀκριβοῦς, a qua

qua iusta linguae cuiusque scientia venit. Caret enim freno, quo licentia fingendi, et libido torquendi scripturas ad suarum opinionum arbitrium coerceri possit, vagaturque saepe incertis viis, nec habet, ubi tuto possit consistere.

## § 4.

Quod cum praeclare intelligerent Theologi eruditi, *Lutherus*, *Melanchthon*, et alii, studium Grammatices saepe multumque studiosis sacrarum literarum commendarunt, et de incommodis a Grammaticae neglectu et inscitia venturis monuerunt: quibus qui non paruerunt, graues saepe poenas dedere. Testimonia dabit *Sixt. Amama* in *Antibarb. bibl.* pag. 122. add. *Melanchth.* in *Consiliis et iudiciis theol.* pag. 578. extr.

## § 5.

Nam quod *Lutherus* Comm. in Genes. c. 16. *Grammaticam quidem necessariam*, ait, *esse et veram, sed eam non regere res, sed servire rebus debere*: id non hanc habet sententiam, ut calumniatur *Simon Hist. Crit. T. I. p. 435.*, quae det licentiam, verba contra grammaticas rationes ad suarum opinionum arbitrium explicandi: nam ita necessaria Grammatica non foret: sed, quae doceat, verba non esse ex grammaticis rationibus ubique praemenda et ad res aliunde perspicue cogni-

cognitas peruertendas conferenda, sed contra ex his ita interpretando moderanda, ne scriptura semet ipsa euertere videatur. Quod fieri debere, supra demonstraui, explicato etiam rei modo. Nec id scripturis sacris proprium, sed cum omnibus humanis libris commune est.<sup>ss)</sup>

ss) Patet itaque, loca, quibus libri sacri sibi ipsi aduersari videntur, ad sententias vniuersas reuocanda esse, quod sine idearum h. e. rationis et philosophiae usu fieri nequit.

### § 6.

Sed cum duplex Grammatica sit, altera historica, altera technica: nobis hic sermonem esse intelligendum est de technica, quae proprie Grammatica est: cuius partes ad hunc quidem interpretandi usum pertinentes duae sunt, Etymologia, latius accepta, siue Analogia, quae in verbis singulis versatur, et Syntaxis, quae in verborum ad certas leges coniunctione.

### § 7.

Vtraque cum dupliciter profit, vel ad recte dicendum, vel recte intelligendum: patet, nobis hic rationem habendam esse hanc, vt vtriusque scientiam habeamus eam, quae intelligendi et interpretandi facultatem adiuuare possit, adde etiam iudicium de puritate

itate textus et lectionum varietate, quod si-  
ne accurata grammaticarum legum scientia  
recte fieri non potest.

### § 8.

Oportet igitur primum interpretem ac-  
curate nosse discrimina verborum et potesta-  
tes, quoad pendent e forma grammatica (nam  
quas ex usu et consuetudine loquendi ha-  
bent, observationis sunt, de qua alio loco  
dictum est,) vt deriuationis compositionis-  
que modo, scriptura et accentibus: qua-  
rum rerum certae sunt leges, a Gramma-  
ticis traditae, aut ex usu cognoscendae,  
cum suis, in prioribus duobus generibus, ex-  
ceptionibus. Nec minus diligenter cogno-  
scenda est in iis, quae in arte Gramma-  
ticorum proprie verba dicuntur, vis et dis-  
crimen formarum, cum singulis usus ab lege  
quaquē aberrationibus, item temporum at-  
que modorum. Quarum rerum accurata et  
usu multo firmata scientia vbi deest, facile in  
interpretando, nec leuiter, peccatur; cuius  
generis exempla, incredibile propemodum  
est, quam multa extent: cum saepe parua ex  
eo genere observatio tollat difficultatem, et  
aditum faciat non modo ad intelligendum,  
verum etiam ad refellendum.\*)

\*) Quaeritur, quid significet *ἀλλὰ* Matth. XI, 8.  
*Denarius* idem esse putat, ac *τὸ τῆς*; *Schleusnerus* et  
*Kninoelius* synonymum esse credunt *τοῦ ἡ*; *Westenius*  
parti-

particulam αὐζητικήν esse iubet, quae eleganter vsurpetur interrogationem interrogationi iungendo. Quidni significationem verbi propriam eamque aduersatiuam retinemus? Oratio est imperfecta propter responsionem suppressam: Ἰωάννης βέβαιός ἐστι ἐν τοῖς ῥήμασιν αὐτῶν· οὐ μὲν ἄρα ἐξήλθετε θεάσασθαι κάλαμον. Vide versum sequentem.

## § 9.

Sed multo etiam magis necessaria est συντάξεως scientia, non modo hactenus, vt ordinem verborum recte inuenire possimus, in quo saepe est magna vis ad bene intelligendum, sed etiam, vt modòs cuiusque verbi, etiam particulae, struendae primum per se teneamus, quod prodest ad iudicium puritatis, vtrum bene graeca sit phrasis nec ne, idque refert, vt supra demonstratum est, plurimum, sed etiam, vt cuiusque constructionis vim et sensum ex verâ linguae indole. Nam qui ea scientia caret, et illas formas, verbum de verbo vertendo in quamcunque aliam linguam, interpretatur, saepe numero peccat necessario, propter dissimilitudinem linguarum: cuius generis peccatis pleni sunt interpretum libri: nec potest peccata Interpretum et Criticorum vel agnoscere certa ratione, vel conuincere. \*)

\*) Exempli loco sit versus 21. cap. I. ad Philippenfes. Vide, quam male habeantur interpretes a προῦν ἐξ ὧν, cuius apodosis est καὶ τῶν. Resolue locum:  
ἀλλ'

ἀλλ' εἰ (quatinus: Viger. ed. Zeunii p. 492.) καὶ τὸ  
 ζῆν ἐν σαρκὶ τοῦτόν μοι ἔχει καρπὸν ἔργου, καὶ  
 (tamen) τί αἰρήσομαι ὁ γ.

## § 10.

In hac parte sunt etiam praecepta de figuris orationis, ut ellipfi, pleonasmus et aliis, in quibus saepe argutantur interpretes, torquentque scripturas, nisi earum vim in usu loquendi calleant accurate. In quarum nonnullis tamen etiam Rhetorum praecepta sunt cognoscenda, ut veram vim in usu scribendi teneamus, nec aut emphases frustra quaeramus, aut vitium orationis fingamus. Nam, ut hoc utamur, pleonasmus in rhetoricis prodest et ad augendum et ad ornandum, nec tamen semper, sed est interdum vel ex antiquissima linguae simplicitate, cuius generis plures sunt in lingua hebraica, et inde in N. T., vel quacumque alia de causa in consuetudine loquendi ortus, atque etiam ab eleganter loquentibus usurpatus: unde vitii argui non potest, nec tamen ad vim aut ornatum torqueri debet. Similisque ratio est synonymiae aut tautologiae, quod est genus pleonasmus, cuius exempla multa sub pleonasmus titulo congeffit noster *Glossius* Phil. S. L. IV. tr. II. obs. 15. f.<sup>t</sup>) Quae qui ignorant, se nunquam satis in iis vel explicandis vel defendendis expediunt.

t) Me-

t) Melius disposita notisque illustrata haec sunt in Editione Phil. *Glassii* Dathiana, quam vide. Neque carere potest idoneus interpres *L. Bosii* libro de ellipsis graecis, praesertim secundum editionem *Schaeferi* (Lips. 1808.), quae reliquis palmam longe praeripit.

### § 11.

Nec, quae vitia orationis dicuntur, ignota esse debent, ne in quaestionibus de barbarismis ac soloecismis N. T. in alterutram partem, vel affirmando vel negando, peccetur: u) quod accidit plerisque, cum aut prorsus, inuitis Grammaticorum praeceptis, negant, in N. T. aliquid inesse, quod his nominibus appellari possit, ut dignitati librorum consulant, aut ita adfirmant, ut ad contemptum scriptorum ipsorum trahatur: quorum neutrum probari potest. Imo formae dicendi tales tum demum sunt in vitio, cum per inscitiam et negligentiam, et nulla idonea et graui de causa, temere usurpantur; quod in scriptores Nou. Test. non cadere, patet ex iis, quae de hebraismis eorum dicta sunt.

u) Quod in nullo N. T. libro facilius accidere poterit, quam in apocalypsi Iohannea. Vid. *Michaelis* introd. in N. T. Ed. 4. §. 284.

### § 12.

Summum autem Grammaticae fastigium  
est

est in *Critica*: quamquam non modo Grammaticorum praeceptis et observationibus nititur, sed etiam aliarum disciplinarum et rerum scientia atque praeceptis adiuuatur. Eius est, quid genuinum spuriumue sit, integrum et incorruptum, vitiosumue et corruptum, iudicare, et corrupta emendare, eiusque rei modum ac rationem tenere. v)

v) Huic scientiae latissimus apertus est campus in disquisitione de γνησιότητι priorum capitum Matthaei, loci I. Ioh. V, 7., Rom. IX, 5., Ioh. VIII, 1—12. in disputatione de lingua, qua Euangelium Matthaei ab initio conscriptum fuerit: de Euangelio ad Hebraeos, de fontibus Euangeliorum etc.

### § 13.

Eius etiam in interpretando necessitas inde intelligitur, quod sine ea saepe ne locum quidem habet interpretatio. Frustra enim interpretari coneris, quod est spiritum aut corruptum: unde mirabiles interdum interpretationes nascuntur. Unde recte *Quintilianus* I, 4. *init.* primum in interpretando esse dicit, videre, an integer locus sit nec ne, et corrupta emendare: *Enarrationem*, inquit, *praecedat emendata lectio.*

### § 14.

Nec minor necessitas est ex eo, quod, qui eius expertus est ac rudis, disputationes criticas



criticas super locis sacrorum librorum non modo intelligere ac diiudicare, aut lectiones veras a falsis discernere, perite defendere, aut falsas denique, itemque inanes coniecturas aut depravationes satis refellere non potest, sed etiam saepe se necessario in difficultates inextricabiles induit, atque adeo in ridendos ac pudendos errores incidit; cuius generis multa exempla commemorare possemus. Vel illud quam alienum est ab iis, qui hos libris bene tractare velint, quod plerisque accidit, qui rei criticae sunt expertes, nec eius vllum vsum habent, ut, quae ab *Erasmo* et *Beza* in textum de iudicio suo, etiam e latina versione, non bene recepta sunt, aut per operarum errorem irrepererunt, et in editiones minores et vulgares propagata sunt, ea pro veris auctorum verbis teneant, explicent atque etiam defendant, et, si quis talia corrigat, etiam Spiritum sanctum corrigi clament. <sup>x)</sup>

x) Eiusmodi voces nondum plane expiravisse, docet *Griesbachius* Praef. ad N. T. Vol. II. pag. XI. seqq. ed. I.

### § 15.

Itaque merito Critica apud Theologos vere doctos semper in magno honore ac pretio fuit, eiusque bene periti Interpretes inter principes Theologorum sunt numerati,

vt

vt *Origenes*, de cuius scientia et meritis in hoc genere supra diximus, *Gregorius Nazianzenus*, *Basilius*, *Chrysostomus*, *Hieronymus*, et alii, quos enumerat *Henr. Valefius* de Critica I, 23. sqq. tantum abfuit, vt eam locum habere in sacrorum librorum interpretatione negarent. *Augustinus* quidem, *Codicibus emendandis primum inuigilare debere solertiam eorum*, iudicat, *qui scripturas diuinas nosse desiderant, vt emendatis non emendati cedant*, etc. Adeatur etiam *Casaubonus* Exerc. Baron. I. n. 28. XVI. n. 110. et *Heinfius* Proleg. ad Exercit. in N. T. p. 4.

## § 16.

Nec solum ea *xpioris* tolerata et usurpata est, quae libros e libris emendat, sed etiam coniecturalis, quae ingenii et doctrinae, imprimisque analogiae ope, nititur, vt docent *Commentarii Patrum*, *Isid. Pelus. IV*, 112. 113. et *Casaubonus* l. c. *Glassius* quidem noster clare locum huic Crisi relinquit in *Philol. S. L. I. Tr. II. pag. 168.* probans etiam correctionem talem *Bezae* Act. VII, 14. quamquam non probandam. *Wetstenius* autem in Proleg. N. T. separatim editis p. 170. prope ducentas tales coniecturas Theologorum commemorat, quarum numerus etiam augeri posset. y)

A a

y) Et

y) Et auctus etiam est in *Bowyeri* coniecturis in N. T. a Schulzio editis. Lips. 1774. f.

## § 17.

Oportet igitur futurum librorum sacrorum interpretem in tempore, curare, vt Criticae veram indolem ac naturam cognoscat, non praeceptis modo, aut maxime, cognoscendis per libros, qui eius disciplinam profitentur inscriptione sua, quae solet esse fallax, sed vsu, per modesti ac seueri Critici disciplinam, et lectionem Criticorum seuerorum ac modestorum, quales *Casaubonum*, *I. F. Gronouium*, *Graeuium*, *P. Burmannum*, *Perizonium*, et alios, nouimus. Ac tutius est, initium facere in genere librorum humanorum, vbi, adhuc quidem, magis et felicius vsurpata est Critica, et vbi etiam excusatius peccatur. Raro, qui non ab tali disciplina et vsu venit, in sacris operae pretium fecit: et qui nullis litteris graecis ac latinis, aut mediocriter modo, instructus ad Criticam sacram accedit, profecto operam inanem ludet.

## § 18.

Vbi autem rite praeparatus venerit, primum operam det, vt instrumentum Criticum cognoscat, eiusque in iudicando verum vsu, per Canones Criticos, cum de  
lingua

ngulis generibus fontium, e quibus lectiones ducuntur, tum de comparationis modo. a quo poterit uti his, quae a nobis supra ap. 2. 3. 4. 5. tradita sunt.

## § 19.

Sed hoc magis usu rerum tractandarum, quam praeceptis ediscendis sibi agendum putat. Itaque vel audiet interpretes, qui Critica non prorsus negligunt, et in eo genere versatos ac tritos facis ostenderunt, vel eget, quae viri in hoc genere exercitati, *Tillii*, *Bengelii*, *Michaeles*, alique, qui sunt sane perpauci \*), super locis illustribus maxime, scripsere, et ad praecepta illa examinabit, ut paullatim bene iudicandi facultas veniat.

z) V. c. *Griesbachius*, *Noesseltus*, *Morus*, *Döderlinus*, *Eichbornius*.

## § 20.

Cum, profectu facto, volet ipse aliquid notari, hanc sibi legem dicat, ut nihil facile sine libris probet aut statuatur, coniecturas doctorum hominum in locis iis, in quibus alia ratio se expediendi aut nulla aut penitus dura ac difficilis datur, non illas eadem omnino spernendas putet, si sint perspicuae, consentaneae rei, contextui,

A a 2

stilo

stilo scriptoris, et a vestigiis vulgatae, h. e. quae in omnibus libris scriptis et editis reperitur, non multum discrepent: qualis est v. c. Camerariana *Ioh.* 19, 29. pro ὑσώπω, in quo se satis torquent interpretes, coniectantis ὑσσωτῶ vel ὑσσω τῶ, et perpaucae, quas nos quidem repererimus, aliae: \*) cæterum in notis potius, Commentariis aut Observationum libris, proponendas, quam textui inferendas putet. \*\*)

\*) V. c. ἐξουσίαν *I. Cor.* XI, 10. σιαινεσθαι *I. Thess.* III, 3. Sunt tamen coniecturae istae, a Camerario, Godofredo et Reiskio profectae, meri salus ingenii.

\*\*) Nisi a codicibus manu exaratis confirmantur, v. c. ἀπολέσει *Matth.* X, 42. ad quem locum vid. *Wetstenius*. Lectionem ἀπολέσῃ, in auctore bene Graeco praeferendam, ex Itacismo ortam esse puto.

### § 21.

Enimuero vt religio magna adhibenda est, ne in textu, qui nunc in manibus est, refingendo nimis faciles simus: ita contra indocta superstitio est vitanda, quae omnes voces ac literas vulgaris alicuius editionis sanctas et velut manu diuina positas et consecratas putat, a quibus discedendū ius et facultatem nec libri nec ratio vlla dare possunt. Non minus cauendum esse, ne Spiritui s.

17

tribuantur, quae eius non sunt, quam ne ei detrahantur, quae ab eo profecta sunt, supra admonuimus. <sup>a)</sup>

a) Quod inprimis caueri potest post notionem *θεοπνευσίας* adcurate finitam, cuius rei periculum fecimus in libro: *Ausf. Unterricht in der christl. Glaubenslehre*. Nörimb. 1807. t. I. p. 113. ff.

§ 22.

Hi vero abutuntur Critica, siue indigni potius sunt Critici nomine, qui ita proclives sunt ad coniecturas, ut, ubi primum aliquid non satis intelligunt, ad excogitandas lectiones conuertuntur: a quo quemque et ratio et exempla temerariarum et inanium coniecturarum detertere debent. Non enim quod quisque, etiam non indoctus, parum intelligit, et commode explicare non potest, aut legibus orationis parum conuenire videtur, id statim falsum aut vitiosum est: nec quisquam sibi hanc fiduciam sumere debet, ut se nihil fugere in talibus rebus putet. Et cum omnes propemodum tales coniecturae inanes repertae, et a peritioribus refictae sint, modesti et cauti Critici est, non praecipitare iudicium, et potius ignorantiam suam agnoscere et fateri, quam ad corrigendum festinare; quod etiam in humanis scriptis boni Critici facere solent.

§ 23.

## § 23.

Quo magis etiam impia arrogantia et mera ἀνερπία eorum repellenda est, qui suarum de rebus diuinis opinionum stabilendarum causa, non modo lectiones, in uno et altero libro, nec eo valde bono, reperi-  
tas, recipere in textum aut defendere conantur, sed etiam excogitant nouas. b) In utroque genere Sociinianos et eorum fautores esse, satis constat; in illo nuper *Wetsteinus* pluribus locis peccauit.

b) Huius vitii inuidia iure conflata est *Babrtius* in examine Verf. N. T. theodiscae ad Ioh. I, I.

## § 24.

Quod vero Pontificii quidam, vt *Lau-  
brusselius* in libro Francico *de abusu Criticae in rebus sacris* P. I. p. 168. etiam hos imprimis abuti Critica in libris sacris defendunt, qui eius usurpandae potestatem non ab Ecclesia, siue Pontifice Rom. vt *Hieronymus* a *Damaso*, nacti sint, id merito repudiandum est penitus cum caeteris, quae ab illo, inter bene monita, ad defendenda Ecclesiae Romanae opiniones superstitionesque ita disputantur, vt in iis accusandis ac refellendis Criticae abusum cerni dicat: quod fere inclinant istius Ecclesiae doctores.

## § 25.

Illud inprimis debet esse persuasum studiosis, nihil esse vel in comparando vel in utendo difficilius Critica: adeo multarum ac prope infinitarum, in hisque minutarum, rerum accurata scientia tenetur, et in usu multas ac difficiles cautiones habet: in quibus adeo facile est labi, vel memoriae fraude, vel iudicii errore, ut, quemadmodum cuilibet condonandus est lapsus, ita quisque magis sibi diligentiam et modestiam in iudicando adhibendam putare debeat. \*) Legant studiosi *Mabillonium* de studiis Monast. P. II. c. 13. de Critica et regulis in ea observandis.

\*) Exempla sunt Matth. V, 22., quo loco εἰς ἡν delendum putamus, et Act. XXI, 15. quo sectionem ἀποσκευάμενοι tuemur, quamvis eam ridiculam esse iudicavit *Morus*, adstipulantibus criticis bene multis. Defenditur enim non solum auctoritate codicum, versionis Syriacae et vulgatae recte explicitae, sed etiam linguae usu Hebraico, quo ἀποσκευάζεσθαι idem est ac פנה Levit. XIV, 36. Alexandrini interpretantur ἀποσκευάσαι, Aquila ἐκφορεῖν, efferre sarcinas, quod loco nostro egregie convenit.

## § 26.

Grammaticae iuncta est *Rhetorica* in instrumentis interpretandi. Ea maxime prodest, qua docet naturam et vim troporum.



rum. Nam ea ignorata, mirifice inepti interpretes esse solent. Sed quae ex eo genere profunt, a nobis supra commemorata, et ad interpretandi rationem collata sunt. Prodest vero etiam nosse, quae de generibus dicendi et virtutibus orationis, imprimis de altitudine et caeteris virtutibus sententiarum, in rhetoricis traduntur, ut iis in interpretando bene uti, hoc est, agnoscere facilius, sentire, imprimisque explicare possimus vim et praestantiam sententiarum, quae in libris sacris, imprimisque sermonibus Iesu Christi et Epistolis Paulinis, frequentes sunt. Nec tamen opus est, in interpretando lectoribus vel auditoribus, vel uti pueris, annumerare ubique nomina vulgaria troporum et figurarum, et cum nihil profunt ad bene intelligendum vel sensum ipsum vel eius aliquam virtutem.

## § 27.

Nec parum adiuvetur interpretes *Philosophia*, si ea recte uti didicerit. Ea autem non tam prodest rebus et sententiis, quam modo rerum tractandarum. Neque enim res in Scripturis traditae e *Philosophia* iudicandae, aut ad eius decreta, multo minus incertas opiniones, quas hypotheses vulgo vocant, accommodandae sunt: diligenterque cauendum est, ne notiones verborum e philosophi

lophi alicuius definitionibus inferamus Scripturae, et ex iis super rebus philosophemur; quo nimis fere inclinant, qui philosophia se dicunt vti in interpretando, si sunt parum triti literis: vnde omni tempore magnae noxae ortae, plurimumque incommodi in interpretatione sacrorum librorum natum est. \*)

\*) Constat interpretibus doctissimis displicuisse creationem mundi, quae Messiae tribuitur Col. I, 16. Traxerunt itaque locum ad emendationem hominum moralem per abusum philosophiae non probandum: conf. Ioh. I, 3. Ephes. III, 9. Hebr. I, 2. Notum enim est, ea, quae in Psalmis verbo Dei, in prouerbis et libris V. T. apocryphis sapientiae divinae tribuuntur, in N. T. referri ad λόγον, vel naturam Christi sublimiorem.

? R. S

### § 28.

Res igitur fere redit ad *Dialecticam*, quae in interpretando non vno modo prodesse potest. Ac primum hoc non paruum eius munus esse in hac re dixerim, quod docet ideas rerum distinguere a sono verborum, vt, quid intelligas, nec ne, possis iudicare: cuius iudicii necessitatem supra indicauimus. Id autem fit dupliciter. Et in iis quidem rebus, quae sensibus externis subiectae sunt, videndum est, an possimus speciem earum animo praesentem reddere, easque

easque per talem speciem ipsas contueri; ubi autem internis subsunt, an meminisse perceptionis earum ac sensus. In intelligibilibus porro iudicium fit ex eo, cum verborum definitiones tenemus, quibus notiones puris et perspicuis verbis exprimantur. Sed in rebus sensibilibus sufficit interdum, eas ad suum genus reuocare posse: idque locum habet tum, cum cernendarum ac sensu cognoscendarum nulla facultas esse potest, ut in quibusdam generibus plantarum, piscium etc. Sunt et aliae huius iudicii rationes, sed quae ad Dialecticam nihil pertineant.

## § 29.

Alterum eius munus cernitur in notionibus verborum, quas ea docet conficere, vel partibus earum dispersis in vnam summam apte colligendis, vel ab exemplis, in quibus eae latent, ducendis, et, ut Dialectici nostri loquuntur, abstrahendis, denique perspicue et breuiter exprimendis. Quo sane vehementer opus est interpreti, ne obscuris aut vagis et parum determinatis notionibus contentus vagetur et erret. <sup>c)</sup> In quo tamen plus usus, et facultas bene dicendi, quam praecepta, certe non haec sine illis valent. Potest enim, ut Cicero dicit, fieri, ut aliquis recte rem intelligat,  
nec

nec tamen possit recte aut satis perspicue ac circumscripte enunciare, quae bene intelligit: quod sine accurata linguae scientia et exercitatione scribendi contingere nemini potest.

c) Quod vulgaribus interpretibus praecipue occurrit in finiendis vocibus, βασιλεία τῶν ἰουδαίων, πνεῦμα, μετάνοια, πίσις, παρουσία Χριστοῦ, aliisque maximam partem iam egregie explicitis in libro Telleri: Wörterbuch des N. T. Ed. 4. 1785.

### § 30.

Tertium est, similia diligenter comparando distinguere, ne ambiguitate decepti confundamus diuersa. In quo tamen ipso usus loquendi bene cognitus esse debet, ne distinguamus, quae diuersa non sunt: quod facile accidit iis, qui e Lexicis sapere coguntur.

### § 31.

Omnino etiam atque etiam cauendum est, ne subtilitate dialectica et metaphysica abutamur in verborum sensu aestimando, et rebus distinguendis: quod etiam in humanis libris, qui populo scripti sunt, aut de rebus ad popularem intelligentiam et usum pertinentibus, repudiatur ac ridetur. Itaque in iis v. c. quae vniuerse aut absolute dicuntur, diligenter videndum erit, quid res

res subiectae patiantur. Rectissime Aristoteles Ethic. I, 1. τὸ ἀκριβὲς ἔχ' ὁμοίως ἐν ᾧ πᾶσι τοῖς λόγοις ἐπιζητητέον, vt non in scribendo, quod illi placet, cum de rebus ad vitam humanam pertinentibus sermo est, sic nec in interpretando; nec modo operam perdit, sed etiam in periculum venit, falsa, ridicula, certe aliena comminiscendi, quisquis in talibus metaphysicam subtilitatem requirit, vt bene *Theodorus Hackspanus* Misc. S. pag. 36.

## § 32.

In quo etsi sensus 'communis sufficere potest ad iudicandum, vt in aliis scriptoribus interpretandis, tamen non inutile erit, rerum naturas sic distinguere, vt, quae ad Deum et religionis formam proprie pertineant, in iis nullam subtilitatem alienam censeamus: quod in iis nihil incerti est, nihil, quod temporibus varietur: quae autem cum hominis natura et vita aliquam coniunctionem habent, in eas τὸ ἀκριβὲς non cadere putemus. <sup>d)</sup>

d) Egregie haec praecipi, dubitatione caret; scindimur tamen facile in studia contraria quaerentes, quatenam proprie ad Deum pertineant. Animis enim hominum multa adblandiuntur in iis, quae de redemptione, de resurrectione corporum et iudicio Dei adspectabili docentur, a veritatis coelestis indice non  
semper

semper probata. Formanda itaque erunt ingenia ad  
interiorem veri cognitionem, ut dubitationis scopulos  
euitent.

### § 53.

Itaque etiam illa, quam iactarunt non-  
nulli, ἀνάλυσις notionum Dialectica magna  
cum cautione vsurpanda, ne aut in notione  
ipsa constituenda decipiamur, ut supra  
monuimus §. 27., aut ex ea per talem ἀνά-  
λυσιν colligamus, quae non insunt, commi-  
niscamurque, quae a mente scriptorum di-  
vinorum sunt aliena.

### § 54.

Nec illud paruum aut parum necessa-  
rium munus Dialecticae est, videre, quid  
repugnans sit, quid consequens. Nam et  
conclusionum in sacris libris passim occur-  
rentium ratio et vis explicanda est, et inter-  
dum repugnantiae species oritur, etiam in  
dogmaticis, qua apte remouenda, conten-  
tio dictorum componenda est. In quo ta-  
men tenenda sunt ea, quae de hac compo-  
sitione supra praecepimus, cauendumque,  
ne inscitia sermonis temere fingamus dissen-  
sum, aut in eo componendo subtilitate alie-  
na ab indole rei et scriptorum utamur.

### § 55.

Et quoniam Dialectica etiam docet, quae  
debeat

debeat esse series differendi, haec quoque praecepta cognita esse debent Interpreti, eam perite indagare et cognoscere possit locis iis, vbi talem seriem vsurpant scriptores; quod facit interdum Paulus. Vid. Melanchth. dedic. ad dispos. epist. ad Rom. Nec tamen et hic summa subtilitas, multaeque minus vbique talis series quaerenda, et per ieiunas et inanes ἀναλύσεις constituenda quae etiam ad intelligendum nihil profunt. Nam vbi in scribendo nullam talem seriem secuti sunt auctores, ibi frustra sit eorum orationem intra talis seriei ac viae necessitatem compingere.

e) Et beatus Koppins in sua epistolarum Paulinarum editione passim.

### § 36.

Praeter scientiam autem et vsum earum doctrinarum, quae instrumenta interpretis appellari solent, etiam opus est multa et accurata scientia rerum historicarum. Multa enim sunt in his libris ad rationem temporum, locorum pertinentia, multa de personis, ritibusque ac moribus antiquis, cum sacris tum civilibus, quibus ignoratis, interpretatio perfecta esse non potest. Horum igitur scientiam interpret futurus sibi comparabit in tempore, augebitque studiose. \*)

\*) Ab-

\*) Ablegamus ad loca Matth. XXIII, 35. Luc. II, 2. III, 1. Act. VII, tot. 2. Thessal. II, tot., quae sine historiae praefidio vix intelliguntur. Adde historiam Iohannis baptistae tum e Iosepho, tum e Zoziorum monumentis petendam, qua via ad grauissimasquisitiones muniatur.

## § 37.

In quo cauendum, ne qualicumque earum rerum notitia, aut e vulgaribus libellis, compendiis et schediasmatis hausta, et terebre collecta, contentus sit, sed eam ex fideis fontibus per iustam literarum scientiam sibi comparandam putet. Pleni sunt Commentarii in N. T. etiam clarorum virorum, et multo magis obseruationum ac disputationum libelli erroribus, saepe grauib, in hoc rerum genere, nullo alio ex fonte, quam quod earum scientia non ea, qua diximus, nota comparata erat: existuntque saepe mirabiles ac prope ridiculae interpretationes, quibus impediuntur citius lectores, quam e difficultatibus explicantur. f)

f) Vid. *Krebsius* Prolus. de ratione N. T. e moribus antiquis illustrandi minus caute instituta in *Opusce*, p. 519. seqq.

## § 38.

Primum igitur nosse debet *Geographiae* capita, cum rebus Christi et Apostolorum con-



coniuncta. Quorum primum est, quod pertinet ad Palaestinam, eiusque varias vicissitudines in modo *descriptionis*, *finiam* et *imperii ciuilis*.

### § 39.

*Descriptio* alia est veterrima occupatae a Iosua terrae Cananaeae ad numerum tribuum, quae, sublato primum per Assyrios Samaritico; deinde etiam Iudaico per Babylonios regno; sublata et ipsa est, vsurpata tamen interdum scriptoribus diuinis, vt *Matth.* 4, 13. 15.: alia, quae ab his rerum conuersionibus inducta ad excidium vsque gentis atque templi durauit. Ea primum, h. e. ab excidio Samaritici regni duplex, orta ab numero pristino regnorum, post, incertum quando, certe sub Assamouaeorum imperio, quadruplex facta est, in *Iudaeam*, *Samariam*, *Galilaeam* et *Peraeam*. Iudaeae siue pars, siue accessio et prouincia fuit *Idumaea*, *Marc.* 3, 8. de qua mox. Sed tamen etiam Iudaeae nomen de vniuersis interdum vsurpatur. *Samariae* caput Christi tempore Sichem fuit, *Io.* 4, 5. dudum deleta vrbe Samaria cum templo. *Galilaea* autem est et *superior*, Phoenicibus et Syris vicina, quae est *Galilaea gentium*, *Matth.* 4, 15. et *inferior*, fere intelligenda, cum Galilaea simpliciter memoratur: \*) in qua

qua Tiberias, Nazareth, Capernaum, mons Itabyrius, et Decapolis, certe eius pars, *Marco*. 7, 31. *Peraea* proprie est earum regionum, quas olim tribus Rubenitica et Gaditica tenuerant, sed post varie aucta.

\*) De hac distributione Galilaeae, adi *Buxtorffii* Lex. Tahnuld. in 553, vbi etiam collecta e libria Iudaicis de dialecto Galilaeorum digna lectu reperiuntur.

§ 40.

Nam *finēs* plerarumque partium, in quas descripta fuit, paullatim variauerē. Ad *Iudaeam* primo accessit Idumaeae vetus, a Davide primum subacta, a Iohanne autem Hyrcano recuperata prouincia, propter suscepta tum Iudaica sacra etiam Iudaeae ipsi accensa, cum et Idumaei eadem de causa Iudaeos se ferrent atque ita appellarentur, de quo *Casaubonus* adeundus Exerc. I. ad App. Baron. n. 3. vbi et Herodem recte Iudaeum appellari defendit. Ad *Peraeam* autem adscriptum est, quicquid paullatim vicinis regionibus detractum nouo regno Iudaico, siue per Assamoneos, vt Ituraea, siue per Herodas et Caesarum liberalitatem accessit, vt Augusti, Trachonitis, Batanaea, Auranitis; Abilene: quamquam illa pleraque olim Israelitarum fuerant, sed, eum in Syrorum potestate essent, nouis nominibus

B b                      appel-

appellata, non omnia ab Assamonaecis recuperata erant.

## § 41.

Imperio haec omnia paruere *Herodis Magni*, Antipatri, Idumaeae ante, post, Iulii Caesaris decreto, Iudaeae vniuersae, sub Hyrcano, Procuratoris, filii: quo mortuo, ex ipsius testamento, ita filiis tribus ab Augusto diuisa sunt, vt *Archelaus* Iudaeam, quae proprie dicitur, cum Idumaea et Samaria, Ethnarchae nomine, h. e. regio, sed sine nomine et insigni, imperio, haberet; *Herodes Antipas* Galilaeam et Peraeam, antiquis et angustioribus finibus; *Philippus* autem reliquae transiordanicae regionis partem maximam, quae Ituraeae et Trachonitidos nominibus *Luc. 5, 1.* appellatur, vterque tetrarchae nomine. \*)

\*) Occurrit idem Philippus Matth. XIV, 3.; a Iosepho autem Salomae iungitur, quam ei genitam fuisse ab Herodiade testatur Matthaeus. Cane *Michaeli* credas, qui Herodis Philippi nomen ei fuisse putauit; Iosepho enim auctore Herodias primum Herodi, deinde Antipae nupta fuit. Sed haec altioris indaginis sunt.

## § 42.

Sed Archelao in exilium acto, quicquid sub imperio eius fuerat, ad prouinciae Romanae

manae formam redactum, a Procuratoribus Romanis administratum est, h. e. Praefidi-  
bus minoribus, nec magistratu aliquo sena-  
torio functis, e quorum numero fuit Pon-  
tius Pilatus: de quo, praeter *Iosephum*,  
*Philo Legat. ad Cai.* p. 1034. videndus.  
Ei provinciae accessit et Antipae, pariter in  
exilium missi, portio. Nam Philippi, an-  
no altero ab Christi morte defuncti, tetrar-  
chia Syriae contributa est.

## § 43.

Huic Procuratori primum Herodis An-  
tipae tetrarchia detracta, ab Caligula data  
est *Agrippae maiori*, regni nomine (*Philo*  
l. c. p. 1037.) cum ante iam Philippi tetrar-  
chiam et Lysaniae accepisset; a Claudio re-  
liqua, h. e. Iudaea et Samaria, adiecta sunt.  
Ita provincia sublata, regnum restitutum  
est. Sed Agrippa tribus annis post mortuo,  
rediit provinciae ius cum Procuratoribus.  
E quibus *Felicem* et *Festum* memorant *Acta*  
*Apostolorum* 25. et 26. Nam *Agrippa*  
*minor*, maioris filius, ab Claudio primum  
tantum Chalcidis regnum, post Philippi te-  
trarchiam accepit, cum potestate in tem-  
plum Hierosolymitanum, et iure creando-  
rum Pontificum. §)

g) Adcurata harum rerum illustratio inter summa  
merita versionis N. T. a beato *Michaelis* cum notis et

aratæ referenda videtur. Vide genealogiam Herodum in calce editionis Iosephi ab Havercampo curatæ.

## § 44.

Haec igitur oportet accurate tenere et in promptu habere, ne saepe haerens, cogare libellos vulgares consulere: itemque nomina et situm vrbium, regionum, fluminum etc. vt in mentione cuiusque scias, quo referre debeas, nec incertis regionibus erres ac vagere, \*) Sed nec hospitem esse oportet in vicinis regionibus, Phoenice, Syria, Arabia, quarum crebra in literis sacris commemoratio, commemoratis etiam vrbibus clarioribus, vt Phoenices Tyro, Sidone, Syriae Damasco, Antiochia etc. In hac parte proderit cognouisse, quae viri docti ad *Eusebii* de locis hebraicis libellum, et *Relandus* in Palaestina tradidere. b)

\*) V. c. Marc. V, 45. *πρὸς τὴν Βηθσαιδᾶν*, caue, ne locum quaeras Capernaumo vicinum: agitur enim de Bethsaida, in ripa orientali Tiberiadis sita. Vide *Schleusneri* lex. h. v.

b) Adde *Bochartum* in *Phaleg* et *Michaelis Geographiam Hebraeorum* exteram post *Bochartum*. T. I. II. Gotting. 1769. f.

## § 45.

Proxime his necessaria est notitia Asiae cum reliquae, tum imprimis minoris, insularum

larum maris Aegaei, Graeciae porro, Italiaeque, cum vicinis maribus insulisque, ad intelligendas res gestas et itinera Apostolorum, Ecclesiarum Apostolicarum sedes, et alia, quae sine locorum notitia satis intelligi non possunt. In quo genere *Cellarium* imprimis consuluisse iuuabit. Ecclesiarum ab Apostolis conditarum Catalogum notulis illustratum dabit *I. A. Fabricius* in *Luce Salut. Euang.* c. 6. <sup>i)</sup>

i) Adde *Büschingii* *Asiam* in *Op. geogr. mai.*

#### § 46.

In hac autem ratione plurimum prodest, nosse descriptionem prouinciarum Romanarum et nomina et genera. Nam appellationes ipsae accommodatae sunt interdum ad civilem imperii et prouinciarum rationem, veluti, quicquid mari Ionio (in *Actis Apostolor.* 27, 27. *Adria* dicitur) Aegaeoque, Pangaei iugis et Nesto amne comprehenditur, Macedoniae et Achaiae nominibus *Act.* 19, 21. continetur, quae sunt prouinciarum Romanarum nomina, quibus omnes illae regiones diuisae, cum olim et in antiquiori Geographia utrumque nomen longe angustius diceretur. Itaque Lucas Philippos appellat urbem Macedoniae prouinciae, cum sit ad veterem rationem Thraciae vrbs. <sup>ii)</sup> Et tamen interdum vetus ratio obti-

obtinet; velut *Act.* 20, 2. *Graecia* memoratur, vetere et proprio sensu, de regionibus inter Thessaliam et Peloponnesum interiectis, vel de tota Achaica prouincia, vt apud *Sueton. Claud.* 16. vbi vid. *not. nostr.*

ii) Locus est *Act.* XVI, 12. Vereor tamen, ne memoria hic lapsus, sit auctor: cf. *Lin.* XLV, 29.

### § 47.

Prouinciaryum autem Romanarum cum ante, libera republica, duo genera fuissent, alterum Consularium, alterum Praetorium, quod in maiores, ad quas tuendas exercitu et imperio opus esset, viri Consulares missi, in minores autem, aut tutas ab vi hostili, quarum administratio tota fere esset in iurisdictione, Praetorii: ab Augusto sic res est constituta, vt aliae, h. e. eae, quae ante Consulares fuissent, Caesaris essent, aliae Senatus ac populi, illacque a Legato Caesaris, plerumque Consulari, hae a Proconsule, vt Asia, *Act.* 19, 38. regerentur, tertium genus esset minorum, quae Caesari relictas, ab equestri ordinis, post etiam inferioris, viris, Procuratorum nomine, administrarentur, qualem Iudaeam ante diximus. Ad eam rationem cognoscendam videndi *Strabo* L. XVII. extr. et *Dio Cass.* Libr. LIII. p. 503. add. *Excurs.* nostr. ad *Suet. Aug.* 47. Non haesissent interpretes in

in Proconsule Cypri, *Sergio*, *Act.* 13, 7. si eum locum ad illam prouinciarum rationem exegissent, ex qua Cyprus Proconsulem habere debuit. Ex ea porro ratione patet, *Quirinum*, *Luc.* 2. 1. Legatum Caesaris consularem fuisse. <sup>1)</sup>

1) Nisi in simplici *ἐπιτρόπου* dignitate acquiescere malis. Quocunque autem te veritas sententiae, difficultates chronologicae remanent vix expediendae.

### § 48.

In prouincijs porro genera ciuitatum distinguenda sunt. Nam aliae sunt sociorum vrbes, aliae Romanorum coloniae, cuius generis instituendi extra Italiam in prouincijs, etiam vltra mare, initium factum temporibus Gracchanis, frequentatum autem maxime est a Caesaribus, Iulio et Octauiano. Ex hoc numero sunt *Philippi*, *Corinthus*, et aliae. Inde lux accedit interdum dictis scriptorum, veluti *Act.* 16, 20. vt intelligamus, qui sint *σπαρτηγοί*, quos male comparat *Hammondus* cum *σπαρτηγοῖς* *Luc.* 22, 52., vt nihil de alijs dicamus, cum sint magistratus colonici, duumviri opinor, (*Cic. Agr.* III, 34. conf. *Vales.* ad *Euseb. H. E.* VII, 12.) item qui *ῥαβδῆχοι* v. 35. lictores cum bacillis, non fascibus. *Cicer.* loc. cit.

### § 49.



## § 49.

Intercedit etiam discrimen dignitatis ex eo, quod quaedam sunt *metropoles*, aliae item *conuentus iuridici*. *Metropolis* clare est vrbs Philippenfis, quae *μεγίστος Μακεδονίας πρῶτη* dicitur *Act.* 16, 12. (vid. *Spanhemius de usu et praest. numism. Diff. IX. §. 14.*) id est, partis eius, quae Thraciae detracta, Macedoniae contributa est, *ἐπιπλητος* Graecis dicta. Alias prima vrbs et caput prouinciae est, vbi sedet magistratus Romanus, vt olim, Archelao pulso, Iudaeae prouinciae Hierosolyma, post, Agrippa maiore mortuo, Caesarea, *Act.* 25, 53. vnde fere origo metropolium ecclesiasticarum, quarum tamen nulla in N. Test. vestigia sunt; quamquam ea *Petrus Marca de Concord. Sac. et Imp. VI, 1, 5.* sibi videtur inuenisse *Tit.* 1, 5. *Conuentus iuridici* exemplum est *Act.* 19, 58. in *ἀγοραίοις*.

## § 50.

Caeterum in hoc genere, vt in aliis, hoc plurimum commendandum est studiosis, vt hanc partem doctrinae aliquando vno tenore tractent, nec sperent, se eius idoneam consecuturos esse scientiam, si in singulis locis consulant libros geographicos, vt paullatim notitiam vniuersorum colligant. Illud etiam curare oportet, vt quaestiones, de quibus  
diuersa

diuerſa ſentiunt docti in eo genere viri, teneant, velut, vtrius Galilaeae *Cana* ſit *Ioh.* 3, 1. *Nicopolis Tit.* vlt. Epiri ſit an Thraciae, *Decapolis* Galilaeae ſit an Peraeae etc. nec tamen exiſtimare, in iis magnum momentum eſſe, aut iis excutiendis multum temporis tribuere.

§ 51.

Geographiae adiungenda eſt etiam temporum ſcientia, quae in libris N. T. plures difficultates habet, non facile expediendas certa ratione. Et e Vet. quidem Teſt. hiſtoria aſſumenda eſt primo notatio temporis, quod ab promiſſione Abrahamo facta ad liberationem populi e ſeruitute Aegyptiaca, legiſlationemque Moſaicam, item in illa ipſa ſeruitute effluxit (ad *Act.* 7, 6. *Gal.* 3, 17.), deinde ab occupata Palaeflina ad imperii regii initia (ad *Act.* 13, 20.), ratio porro ducentorum ſeptuaginta annorum ſeruitutis Babylonicae et hebdomadam Danielis, <sup>m</sup>) quae habent coniunctionem cum tempore paſſionis dominicae, de quibus multae multorum diſputationes extant, e quibus iuuabit tirones, conſuluiſſe *Voffium* in *Iſag. Chronol.* qui omnes has et ſimiles quaefſtiones diligentiffime perſequitur, vel *Vitrinae Hypotyp. Hiſt. et Chron.*

m) De his tamen antea conſulendus eſt *Eichber-*  
*nus*

nus Allg. Bibl. d. bibl. Lit. T. III. p. 761. seqq.  
et de chronologia in vniuersum, *Frankii nouum sy-*  
*stema chronologiae cum praef. Gattereri. Gotting.*  
1778.

## § 52.

Quaestiones autem chronologicae N. T. propriae sunt primum, quae ad Iesum ipsum pertinent, de anno dieque natali eius, de numero paschatum ab ipso per ministerii publici tempus actorum; vnde magna parte pendet altera, de anno passionis dominicae; cum quaeritur, in quem aetatis Christi annum mors eius inciderit; in quarum nulla consentiunt Chronologi, quorum etiam integri de quibusdam extant Commentarii: neo possunt vique ita explicari, vt nihil dubitationis relinquatur, summis in hac parte doctrinae viris consentientibus, sibi non liquere: vt magnae impudentiae sit, in iis discernere. Sed hae tamen quaestiones, quid quamque contineat, in quo caussa vertatur, cum suis momentis, notae esse debent interpreti, vt certa ab incertis distinguere possit, et vtcunque, quid probabile sit, videre, nec earum inscitia in errores turpes incidat. <sup>mm)</sup>

<sup>mm)</sup> Variant enim euangelistae tum in indicando loco, tum etiam in tempore natiuitatis Iesu Christi. Secundum Matthaeum natus est Bethlehemi in domicilio Iosephi (Matth. I, 25. II, 1.); secundum Lucam in diuerso eiusdem loci (II, 7.): Iohannes autem de Nazareth

resha scrupulum iniicit animo (I, 46. VII, 41. f.). Idem valet de tempore natiuitatis Christi: cf. Matth. II, 22. Luc. II, 2. III, 1. 23. quae loca fere omnia in diuersas rationes trahunt lectorem.

## § 53.

Nobilis porro quaestio et cognoscenda interpreti est, de anno Conuerſionis Paulinae, a quo pendet ratio annorum ab ipso memoratorum, vt *Gal.* 1, 18. 2, 1. et tempus conuentus Hierosolymitani, *Act.* 15. itinera porro Pauli Hierosolymitana, *Gal.* 1, 18. *Act.* 9, 26. tempora etiam epistolarum quarundam, denique aduentus primus Pauli in urbem Romam: vnde patet, eam non negligendam esse. De quo inprimis *Pearsonus* in *Annal. Paulin.* videndus, qui cum plerisque veterum in alterum a Passione Dominica illigat, et *Fr. Spanhemius*, qui proprio libello eum sexto vel septimo vindicare tentauit. Omninoque notatio temporum Paulinorum cognoscenda est; quam, praeter *Pearsonum*, etiam *Vſſerius* in *Analibus* diligenter tradidit, nec caeterorum Apostolorum temporibus neglectis. \*)

\*) Reuixit controuersia vel nostris temporibus inter viros eruditos, videlicet in constituendo ordine itinerum Pauli Hierosolymitanorum: πάλιν enim *Gal.* II, 1. ad *Act.* XI, 30. et XV, 2. trahi posse videtur. Quamuis autem sententiam postremam a vero propius abesse nullus dubitem, verior tamen, vt tota res ad liqui-

liquidum constitui queat, nisi fontes actuum apostolicorum curatius indagentur. Alius enim temporum ordo in his notatur, rursus alius in epistolis Paulinis.

## § 54.

Sed rationes horum temporum vel coniunctae sunt cum temporibus aliis, ut Imperatorum Romanorum et Herodum, etiam Praesidum Syriae, et Procuratorum Palaestinae, vel cum iis comparantur evidendae causa, quae sine hac comparatione esse non potest. Igitur Chronologia Augusti, Tiberii, Caii Claudii et Neronis nota esse debet, modusque varius annorum Caesareorum numerandorum, inprimis Augusti et Tiberii, in cuius anno quintodecimo *Luc.* 3, 1. a quo etiam passionis dominicae annus pendet, definiendo, propter illam ipsam varietatem non consentiunt viri doctissimi, aliis numerandi initium capientibus a morte Augusti, de vulgari more, aliis cum *Pagio* ad a. C. 12. 147. a Proconsularis Imperii initiis, *Sueton. Tit.* 21. siue Collegio Imperii, *Tacit. Ann.* I, 3. e potestate tribunitia et in omnes provincias.

## § 55.

Nec minus implicita sunt tempora rerum sacrarum temporibus Herodum: quod sub extremis Herodis M. forte vix anno aut aliquot

quot mensibus ante mortem eius, natus est Christus, totaque eius vita, et res Apostolorum, ad excidium vsque gentis Iudaicae per Vespasianum, vna decurrunt cum rebus caeterorum, primum Archelai, Herodis Antipae et Philippi, deinde Agrippae vtriusque, quorum minor excisa vrbe superstes fuit. Sed Herodum tempora diligenter *Iosephus* notauit, suntque a multis diligenter illustrata, nec tamen libera ab difficultate omni aut dissensione doctorum.

## § 56.

Iudaica porro Chronologia ex antiquissimo more, vt Romana Consulum, sic Pontificum M. designatione tenetur, vsurpata et ab *Luca* 3, 1. vnde diligenter notati sunt a *Iosepho* in Antiquitatum opere. Sed ea in temporibus Christi et Apostolorum multis difficultatibus obnoxia est e mutata per licentiam Herodum et Romanorum magistratum successionem legitima, de qua post dicemus.

## § 57.

In omni autem ratione temporum designandorum duo cum primis obseruanda: primum, non intelligendos semper esse annos neque singulos solidos, in principio ac fine numerandi, sed cauos, hoc est, quamlibet  
anni

anni partem: deinde in vetere numerandi ratione initium fieri ita, vt praecedens v. c. annus ducatur, fitque alter aut secundus, quem nostra consuetudo primum numerat. Ita fit, vt v. c. illi quindecim anni Tiberii, nostro more computandi, duodecim pleni paullo amplius esse possint.

## § 58.

Habet porro haec res cautiones plures, maxime autem duas: primam, ne temere sumamus pro certo, quod non potest euidenter doceri, et inde pro certis colligamus, quae non minus incerta sunt, quam quod sumimus; quod est maxime frequens vitium in hoc genere quaestionum: alteram, ne his quaestionibus, in quibus, consentiunt periti, vix aliquid certi esse posse, nimium studij ac temporis tribuamus. Quibus duobus vitiis vitatis, vtiliter studium in his rebus cognoscendis ab interprete futuro ponetur. Restat, vt de historia et rituum morumque scientia dicamus.

## § 59.

Huius vero latissime patet vsus in interpretatione N. Test. adeo multa insunt, quae cum historia, ritibus moribusque antiquis aliquam coniunctionem habent. Sed est haec scientia difficilior, quam in caeteris  
fere

fere graecis latinisque scriptoribus; propterea, quod in illis plerumque vnius modo populi res moresque sufficiunt, in his Iudaicarum, Graecarum et Romanarum rerum scientia opus est. Nec levis earum notitia requiritur, sed magna et accurata, h. e. e fontibus ipsis per iustam linguarum scientiam hausta. Etiamnum luctantur libri Nou. Test. cum multis ac saepe turpibus ex hoc genere erroribus interpretum, etiam clarissimorum. Itaque si quis hic ab interpretibus modo pendet, nunquam certo gradu poterit incedere, nec verum a falso discernere. Quare omni modo futurus interpretes debet curare in tempore, ut hinc bene et per severam disciplinam praeparatus ad interpretandi studium accedat.

## § 60.

Neque tamen contemnendi erunt, qui de talibus rebus ad interpretandi usum scripsere, vel tradenda aliqua earum parte, vel erroribus vulgaribus castigandis. Sed delectus erit adhibendus, e iudicio alicuius in talibus haud dubie periti, et accurate diligenterque versati viri, qui doceat, id quod tali viro iudicare in promptu est, utrum e fontibus quisque recte ac diligenter hausta perspicue tradat, an congesta temere ex aliis, vulgaribusque historiarum et antiquitatum



tatum Commentariis, Lexicis, academicis et scholasticis Diatribis (Disputationes et Programmata vocant) et similibus, in quibus oppido paucae dignae lectu sunt ac probandae. Itaque plurimum proderit, *Scaligeri* Animaduersiones in *Eusebii* Chronicon, et Lib. VI. de Emendat. temp. legisse, in quibus multi errores vulgares castigati sunt, ad hanc doctrinae partem pertinentes, *Cassauboni* et *Pagii* in *Baronii* Annales, Castigationes, *Valesii* notas ad libros *Eusebianae* H. E. priores, *Perizonii* libellos ex hac ratione, et alios quosdam, si qui sunt his similes; a quibus etiam exemplum ἀκριβέας et methodi peti potest. Aliorum, quamquam clarorum et doctorum virorum, ut *Basnagiorum*, *Fr. Spanhemii*, Opera melius erit ad iudicandi maturitatem, aetate multoque usu partam, differre, ut vera a falsis, certa ab incertis discernere possis. Nos de singulis generibus, quid et quomodo discendum usurpandumque sit, breuiter admonendo, studiosos in viam deducere tentabimus.

## § 61.

Igitur primum populi Israelitici vniuersi, et Iudaici proprie, <sup>n</sup>) fata, sedes, magistratus, ritus ac mores et ad religionem et ad vitam civilem pertinentes, cognita esse debent cum vniuerse, quod multa in N. T.

tan-

tanguntur, quae sunt temporum antiquiorum, tum maxime aecommodate ad tempora Christi et Apostolorum. Et illa quidem fere nota sunt e V. Test. libris: in his cognoscendis libri humani Iudaeorum, Graecorum ac Romanorum consulendi sunt.

n) Vid. post Beerii et Hessii libros maiores: Geschichte des jüdischen Volks von Abraham bis auf Jerusalems Zerstörung. Lips. 1791.

### § 62.

Vniuersi igitur populi cum duodecim tribus essent, decem, quarum Samaria caput erat, postea etiam totius regionis nomen, *Io.* 4, 5. abductae sunt a Salmanassare in Assyriam, summissis in earum locum Cuthaeis, qui post Samaritani dicti, religionem Israeliticam, ad formam eam, quae ante illis in terris fuerat, ex instituto Iero-boami, receperunt, admistis tamen fortasse quibusdam suis opinionibus. Sed ea forma religionis emendata et ab idololatrico simulacrorum cultu liberata videtur ab Manasse, qui, ob coniugium cum externa femina, multatus Hierosolymitano Pontificatu, per socerum Sanballatum ab Alexandro M. impetrauerat potestatem templi apud Samariam, quo eodem tempore plures alii Iudaei eo migrauerant simili de causa, (*Ioseph. XI. An.*) aedificandi ad formam Hierosolymitani:

C c

quo

quo per Ioannem Hyrcanum destructo, mos tamen colendi Dei institutus in monte Garizim mansit. Etiam plebeios inter Samaritanos tempore Christi de Messia recte sensisse, ipsorum Iudaeorum plerisque incorruptius, sermones mulieris Samaritanae, *Ioh. 4, 25.* docent. Sed de Samaritanis *Waltonus* in *Appar. Bibl. Prolegom. XI.* et *Relandus* consulendi. °)

°) Conf. quae *Schnurrer* de Samaritanis publicavit in *Repert. Eichhorn. T. IX. p. 1. sqq.* et in *Pauli Repert. T. I. p. 120. sqq.*

### § 63.

Secuta est similis Iudaeorum clades per Nabuchodonosorum, regem Babylonicum, abducto in Chaldaeam cum rege populo uniuerso: sed reductus est Cyri decreto populus, et res Iudaica in priscis sedibus restituta. Quod tamen ita intelligendum est, ut plures illic remanserint sponte, qui rem illi reperissent, et familiam ita constitutam haberent, ut eos fortunae non poeniteret, maluerintque certa fortuna uti, quam incertam sequi. Atque hi sunt, qui cum Assyriacae seruitutis reliquiis Babylone et ultra Euphratem Synagogas habuere, et cultum veri Dei in illis terris propagauere: quorum etiam in *N. T.* mentio *Act. 2, 9.* Hinc orta videtur Babylonica Christianorum ecclesia, *1 Petr. 5, 15.*

5, 13. aditum dante ad docendum Euangelium Synagoga. Nam Romam ibi intelligi, ne probabile quidem est: idque bene refellit *Sealiger* Canon. Isagog. L. III. epoch. 13. p. 285. 284.

## § 64.

Sed ut Iudaei non ad vnum omnes abducti sunt Babylonem, auctore Ieremia, sed principes, nobiles ac diuites maxime, multis tenuioribus, qui agrum colerent, relictis; ita credibile fit, etiam in Samaritanis finibus plures tenuioris sortis vel neglectos, vel fugiendo ac latendo ereptos hostium manibus. Atque etiam, cum Iudaeis e Babylone in patriam reuertendi potestas facta esset a Cyro, bene docent *Vsserius*, in *Annalibus*, ad a. 5468. et *Witsius* de decem tribubus, ad calcem *Aegyptiacorum*, multos Samariticae originis, hac opportunitate usos, cum Iudaeis abiisse. Ex quibus intelligi potest, quomodo interdum commemorentur domus *Israelis*, *Matth.* 15. et tribus *Israeliticae*, *Matth.* 4, 14. et *duodecim tribus*, *Iac.* 1, 1. cum de Palaestinae incolis loquuntur viri sancti, aut iis, qui ab his orti sunt: item vnde *Anna Luc.* 2, 36. de tribu *Aser*. Consuli hic poterit etiam *Waltonus* Appar. Proleg. IX, 4. qui et ipse *Vsserianus* usus est.

## § 65.

Nec vero restituti in patriam Cyri beneficio, suis se finibus tenuere. Nam primum magnus numerus a Ptolemaeo I. per vim in Aegyptum abductus est, (quo etiam in Israelitici regni excidio quidam concesserant,) *Ioseph. A. I. XII, 1.* partim in Alexandrina vrbe, iure ciuitatis dato, partim Cyrenis et in Libyae vrbibus collocati, eodem auctore *l. c. et c. Apion. II, 4.* Vnde lucem capit *Lucae* locus *Act. 2, 10. 6, 9.* vbi etiam quidam pro *Λιβερτιῶν* corrigi volunt *Λιβυσιῶν.* conf. praeter *Grotium* ad h. l. *Cel. Wesselingium* de *Archont. Iudaeorum* p. 24. Sed de rebus Iudaeorum in his regionibus, omninoque eorum conditione extra Iudaeam, cognoscendum est e *Philonis Legatione ad Caium* et *Oratione in Flaccum*, quorum libellorum lectionem studiosis commendamus. Forte hinc et in Cyprum, quae et ipsa ditionis Aegyptiacae per Ptolemaeum eundem facta, Iudaeorum quasi coloniae venire, *Act. 13, 4. l. 11, 20.*

## § 66.

Post etiam in Syriam et Asiam migrationes multae factae, cum sub Seleucidis Palaestina esset, inprimis Antiochiam, et alias nouas vrbes, alliciente magnis propositis commodis Seleuco Nieatore. vid. *Ioseph.*  
XII,

XII, 5. Hinc illa Iudaeorum Antiochiae multitudo, et inde Christianorum, statim in principiis propagatae extra Palaestinam Ecclesiae, *Act.* 11, 20. sq.

## § 67.

Et si per eas et similes occasiones paulatim in pluribus urbibus sedes fortunarum posuere multi Iudaeorum, tamen maxime tracti sunt, quibuscunque in locis Asiae atque Europae lucri per mercaturam faciendi spes appareret, primum societate Romanorum impetrata per Assamoneos (*Ioseph.* XIII, 17.), deinde a Iulio Caesare, nationi illi valde fauente, magna pecunia emta libertate sacrorum subrum, quolibet in loco imperii Romani, nempe impediende, faciendorum, (vid. *Ioseph. A. I.* XIV, 10.) seruantibus Caesaris instituta Augusto et Tiberio. Vnde omnibus in locis synagogae et proseuchae institutae, imprimis Romae, ubi iam Caesare viuo magna multitudo Iudaeorum, caedem eius imprimis lugentium prope ad seditionem: quae etiam post aucta est, habuitque locum proprium ad habitandum trans Tiberim et proseuchas multas. vid. inpr. *Phil. Legat. ad Cai.* pag. 1014. Quare, non dubitari potest, quin praemunire Deus voluerit aditum religioni Christianae in vniuersum orbem. Nam ita Apostolis via data

data est in omnes partes et vrbes; cum vbi-  
que essent Iudaeorum synagogae, in quibus  
exponere doctrinam Christi liceret; vnde  
per pbselytos etiam ad gentiles peruenit.  
Caeterum, his cognitis, plura in actis re-  
busque Apostolicis fiunt planiora, vt *Act.*  
28, 17. item, quae sit διασπορὰ τῶν ἐλλή-  
νων (*Ioh.* 7, 35.), vniuersa, vel certarum re-  
gionum, vt *Iac.* 1, 1. *1. Petr.* 1, 1. Intél-  
ligi etiam hinc potest, quare Ecclesiae, Ro-  
mana, Antiochena et Alexandrina, maximae  
ab initio, et hanc quoque ob causam, cla-  
rissimae, et dignitate praecipuae fuerint.

## § 68.

Hic populus, Iesu Christi et Apostolo-  
rum temporibus, quibus in Palaestina pa-  
ruerit, supra iam dictum est, cum de Geo-  
graphia Palaestinae agebatur. Nec opus est  
de Herodis familia tradere, quae ad consi-  
lium nostrum nihil profint. Quamquam  
non decet interpretem eruditum ignorare,  
quae *Iosephus*, *Dio*, et alii de ea tradidere,  
collecta et disposita ab viris doctis, qui de  
gente Herodis scripsere, siue singulis libris,  
vt *Noldio*, siue in serie historiarum vniuersa,  
aut per alias occasiones, vt *Pagio* in *Critica*  
*Bar. Valesio* ad *Eusebium*, et aliis, etiam  
*Relando* in Palaestina. Lucem etiam Acto-  
rum locis quibusdam affundunt, quae *Iose-*  
*phus*

*phus* de Herodum rebus, itemque *Philo*, locis supra commemoratis, pag. 1034. 980. sqq. de Pilato et utroque Agrippa tradunt. Sed ad gentem Herodis pertinet etiam *Philippus* alter, Herodis Antipae frater, non vterinus, sed e Mariamne, Simonis filia, *Ioseph. XVIII, 15, 1. 4.* Is duxerat *Herodiadem*, natam ex *Aristobulo*, Herodis M. filio, sororem Agrippae maioris, e qua suscepit *Salomen* filiam. Hanc abduxit ab eo Herodes Antipas, hoc nomine ab Iohanne reprehensus, *Luc. 3, 19. Matth. 14, 5.* add. *Deylingium Obs. II, 26, 20.*

## § 69.

In loco *Lucae* nobili 5, 1. commemoratur etiam Abilenes tetrarcha *Lyfanius*, diversus ab altero, *Ptolemaei Mennaei* filio, qui, sexaginta amplius annis ante, illam tetrarchiam tenuerat, ipso interfecto, primum ab Antonio Cleopatrae donatam, post, rebus conuersis, a Zenodoro quodam mercede conductam. <sup>p)</sup> Id fieri ab *Luca* videtur hac de causa, quod in ista tetrarchia Iudaei multi essent, eamque etiam Iesus ipse docendo contigisset. Atque ita placere video *Casaubono*, qui de tetrarchis Abilenes accurate exponit *Exerc. Bar. XIII, 3.*

p) Vide *Michaelem*, *Paulum* et imprimis *Kuinoetium* ad h. l. Induunt se interpretes in difficultates varias



varias siue grammaticas, siue chronologicas. Quidam statuamus, historiae extrerae notitiam ad euangelistae prouinciam non pertinuisse?

§ 70.

De Procuratoribus Romanis, qui et quales fuerint, pariter dictum est supra: sed hic pauca restant admonenda. Primum igitur eorum potestas fuit tantum civilis. Etsi enim aliquid militum habuere, tamen iis non ad bellum gerendum, sed ad tutelam munitorum locorum, templi Hierosolymitani, ad custodiam reorum, supplicia poenasque alias sumendas utebantur, *Matth.* 27, 27. etc. *Act.* 22, 31, quod et in aliis prouinciis vsitatum, quarum Praeses sine imperio militari esset. Etsi autem Iudaica prouincia ab *Iosepho* recte appellatur προδιίκη Συρίας, tamen non magis Procurator sub Imperio Legati Syriae fuit, quam magistratus Cyrenaicae sub Praefecto Aegypti, cuius et ipsa appendicula semper fuit. Nam habuit potestatem gladii, *Ioh.* 19, 10. cum prouocatione, non ad Legatum Syriae, sed ad Caesarem ipsum, *Act.* 25, 11. Habuit tamen coniunctionem haec prouincia cum Syria hanc, vt, cum aliquid maius et extraordinarium agendum esset, in quo imperio militari opus esset, id Legato Syriae mandaretur. Ex quo genere fuit census ab Quirino actus, *Luc.* 2, 2. *Act.* 5, 37. diuersus ab eo, per

per cuius occasionem mater Iesu Bethlehemi venit, eoque prior, ut recte *Herwartus*, *Perizonius* libellis propriis defendunt.<sup>q)</sup> Nam in eo militaris opera usurpata, ut docet titulus antiquus a *Muratorio* primum editus, et a Cel. *Wesselingio* illustratus. Atque vel hanc ob causam Interpreti utilis est notitia Praesidium Syriae, a Pompeio in provinciae formam redactae; quam institutam a *Casaubono Exero. Bar. I, 3.* auctam et correctam ab *Norisio Cenotaph. Pis. II, 16.* perfecit *Pagius Crit. Bar. T. I. p. 23. 24.*

q) Argumentis tamen ficulneis; longe meliora dedit Paulus ad h. l. Vide modo, ne euangelistae causam agens tuam deseras.

### § 71.

Sed de his Procuratoribus eorumque rebus et actis, quae in Euangeliiis et Actis Apostolicis traduntur, rectius iudicabit, qui magistratuum provincialium rationem e latinis scriptoribus accurate cognoverit. Hic *Praetorium*, non ignorabit, esse domum Procuratoris, quod ea esset propria appellatio domus, in qua magistratus provincialis habitaret, *Matth, 27, 27.* etc. Nam Cicero in Verrinis diserte dicit, Praetorium Verris fuisse regiam veterem Syracusis. Itaque et *Praetorium Herodis, Act. 23. extr. domicilium Procuratoris fuit: certe et hic Praetorium*

torium est magnificum Palatium; contra *Phil.* 1, 13. castra praetoriana ad v. Romam intelligenda sunt, quorum Praetor memoratur *Act.* 28, 16. Sciens praetor iurisdictionem et iudicia acta sub dio in porticu maiore, magistratu sedente in aediliali, *Matth.* 27, 19. quod pro magnificentia illorum temporum stare in loco toto marmore, quod λιθόστρωτον est. *Io.* 19. (vid. *Suet. Caes.* 46. et notas ibi nostras) multa denique de modo habendi iudiciorum et dicendi in provinciis. Ad quod cognoscendam plurimum proderit, inprimis legisse Verrinam secundam de iurisdictione Siciliensi: unde etiam *Merillius* Ictus proprio libello historiam passionis dominice illustravit. Comparasse etiam proderit *Act.* 25, 23. et *Ciceron. Verrin.* I, 29. Qui licens diligenter commendatus esse debet fidei, quod in his rebus a doctissimis etiam viris saepe et grauius peccatum est propter ignoracionem analogiae historicae in his rebus, ex fontibus ductae. \*)

\*) Conf. *Faberi* Archaeol. Hebr. P. I. pag. 10 seqq. et ad paragr. anteced. *Krebsii* opuscula pag. 13 seqq.

### § 72.

Magna etiam potestas fuit Pontificum laicorum, quod iis ius cognoscendi in rebus

ut aut religionem pertinentibus a Romanis  
dictum, et fontes puniendi, forte tamen  
praecapitis suppliciant, *Io. 18, 31.* Nam  
quod Stephanus Pontificibus et Synedrio de-  
mentibus occisus, *Act. 8, 59.* id ad He-  
rodis Agrippae tempora pertinere vide-  
tur. Itaque Interpreti cognita esse de-  
bet Pontificum, praesertim illis temporibus  
ratio, multum ab superiorum temporum  
more diuersa. Nam postquam Lagidae et  
Seleucidae sibi hoc sumserant, ut eorum  
regnandorum potestate contra ius legitimae  
accessionis vterentur, seruatō tamen fami-  
liae iure, longius progressi Herodes et Pro-  
curatores Romani, identidem etiam, re-  
posito priori, alium suffecere. Vnde eodem  
tempore plures Pontifices, siue, ut Latino-  
rum more loquamur, Pontificii Viri, Ac-  
tescimus, an ad tollendam difficultatem,  
quae e *Luc. 5, 1. Act. 4, 6.* de duobus Pon-  
tificibus nectitur, multis et diuersis docto-  
rum virorum disputationibus agitata, com-  
modissimum et facillimum sit, existimare,  
eos, quibus Pontificatus abrogatus esset, no-  
minis dignitatem seruasse, eo quo diximus  
sensu, et in Synedrio magna auctoritate  
fuisse; Annam autem hoc plus valuisse, et  
prope alterum Pontificem fuisse, quod non  
modo vir prudentissimus esset, contra ius  
motus loco, et magnae apud populum au-  
ctori-

etoritatis, sed etiam: Caiphae socer, et propter ab eo inprimis coleretur, et in omnibus rebus maioribus adhiberetur. Certe hanc rationem adiuuat locus *Ioannis* 18, 3. Atque hoc video etiam placere *H. Valesio* ad *Euseb.* I, 10. Caeterorum rationes, *Scaligeri* in *Prolegom. ad Euseb. Chron.* *Cassauboni Exerc. ad Bar.* X, 1. XIII, 4. *Bezae* ad *Marc.* 2, 26. aliorumque excutit *Petauius Doctr. Tempp.* X, 58. qui vniuerse de serie et successione Pontificum adeundus a c. 49-58. vt mittam *Waltonum* in *Appar.* et alios:

rr) Loca *Ioh.* XVIII, 31. et *Act.* VII, 59. neuiquam secum pugnant; multo minus autem cum *Michele* de lapidatione *Stephani* tumultuaria cogitandum est. Distingue modo supplicia capitalia potestatis civilis et ecclesiasticae: horum ius Synedrio erat etiam sub Procuratoribus; illa a iudicio magistratus Romani pendebant.

### § 73.

Sed Pontificis veluti ὀργανον erat *Synedrium Hierosolymitanum*: in quo memorantur, praeter Pontificem Praesidem, Viri generis Pontificii, Theologi et Interpretes legis (nam hi sunt, qui saepe memorantur in Euangelis *γραμματεῖς*) quorum consilio in causis cognoscendis vterentur, eamque ob causam et ipsi magistratus s. archontes, (vid. *Vales.* ad *Euseb.* III, 8.) et Senatores alii,

alii, id est, Presbyteri, e Mosaico sc. instituto, *Act.* 4, 5. De quo multi multa e Iudaeorum libris congesta tradunt, nec necessaria ad intelligendos N. T. libros, nec probanda omnia, valde saltem incerta; quippe tradita fere ab iis, qui post sublatum Synedrium vixere. Sed hi omnes, qui in illo Synedrio fuere, communi ἀρχόντων nomine appellantur l. c. Nam et 1 *Macc.* 1, 14. 27. ἀρχοντες sunt Synedrii Assesores. Omninoque tenendum est, quamlibet potestatem, quamvis parvam, ac dignitatem, qualis est iudicum minorum in singulis oppidis, ἀρχὴν, et hinc, qui eam potestatem haberent, *Archontas* appellari in sacris literis, ex interpretatione graeca *Exod.* 2, 13. cauendumque, ne in istorum verborum interpretatione versionibus vernaculis decipiamur, et maius aliquid concipiamus animo, quam res et veritas patitur. Nec aliter ceperim ἀρχοντα *Luc.* 12, 58. qui et κριτὴς appellatur.

## § 74.

In Archontibus urbanis etiam numerandus, qui σπαρthyς τῆ ἰερῆς dicitur *Act.* 4, 1. et medius inter Pontifices et Senatores ponitur, *Luc.* 22, 52. Nam σπαρthyς Graecis interdum dicitur pro magistratu quocunque, ut in iisdem Actis c. 17, 20. Eius munus fuit, in templo quietem et tranquillitatem prae-

praestare. Iudaeum fuisse, vel ex eo patet, quod Pontifici operam nauat in comprehendendis, quos seditiosos putarent, sine auxilio Procuratoris Romani.

### § 75.

Caeterum et alii magistratus Iudaici fuerunt, quorum et vestigia in N. T. reperiuntur. Extra Iudaicas terras quidem saepe in monumentis antiquis Archontum mentio est, quod genus diligenter et erudite, more suo, illustrauit *Wesselingius*, V. C. in Diatribe de *Archontibus Iudaeorum*, ne altero quidem neglecto, de quo post. Nam Iudaeis datum est Regum, a quibus in suas terras vel deducti vel allecti essent, beneficio, post vero etiam Romanorum, ut suos sibi Magistratus proprios haberent, qui de rebus ad religionem et sacra pertinentibus, forte etiam aliis causis quibusdam ciuilibus, quae ad solos Iudaeos pertinerent, cognoscerent. De Romanis plane rem demonstrat L. Antonii Epistola ad Sardanios apud *Iosephum* XIV, 10, 17. Sed in Aegypto praeter magistratus et archontas oppidanos, quales memorantur in titulo graeco Berenicensis Ciuitatis in Cyrenaica apud *Maffaeum Antiquit. Gall. Epist. 1. et 8. Wesselingii* Diatriba illustrato, fuit etiam maior Alexandriae ex instituto antiquo, qui toti genti prae-

praeesset, atque ea de causa *Ethnarcha* (apud *Philonem* etiam γενάρχης) diceretur, auctore *Strabone* apud *Iosephum* XIV, 7, 2. cui ab Augusto *Senatus Iudaicus* substitutus, auctore *Philone* in *Flacc.* p. 975. qui et ipse Archontum nomine appellatur p. 976. De hoc *Ethnarcha* est insignis locus apud *Origenem* in *Epist.* ad *Africanum* pag. 243. ubi frustra obloquitur *Wetstenius*. Atque etiam praeterea *Alabarches*, vel, ut malunt nonnulli, in his *Wesselingius* pag. 75. *Archarches*, ut dicatur a Νομῶν Ἀρχάρχης Aegypti, sitque e genere Nomarcharum, memoratur, qualis fuit *Alexander Lyfimachus*, frater *Philonis* Iudaei, apud *Iosephum* XIX, 4, 5. cuius filius, *Alexander Tiberius*, duxit *Berenicen*, Agrippae maioris filiam. Atque ad hunc ipsum trahit locum *Act.* 4, 8. *Alexandrumque* ibi memoratum de *Alexandro Lyfimacho* accipit *Mangaeus*, in praefatione *Philoni* suo praeposita, non improbabili coniectura; quod illum sacerdotali genere natum, et propter liberalitatem in templum gratiosum apud Iudaeos fuisse constat: *Ethnarcham* autem *Damascenum*, qui 2 *Cor.* 11, 32. memoratur, ad Iudaeos referri cum nonnullis, vel hoc non finit, quod *Aretae* *Ethnarches* vocatur, i. e. ab *Areta* impositus *Damasco* et circumiectis ditionis suae regionibus.



## § 76.

In ipsa Iudaica terra quodlibet oppidum, quamvis exiguum, ut apud nos, suos habuit archontas, id est, magistratus vel iudices, qui causas minores cognoscerent: de quibus antiquitatum Iudaicarum scriptores adeundi. Neque enim ea res multum prodest instituto interpretis. Huc autem pertinet locus ante indicatus *Luc.* 12, 58. de quo sententiam nostram diximus §. 75. diuersam ab Wesselingiana p. 106. *Patriarchae* autem et *Primates* Iudaeorum, qui ex illis Archontibus et Ethnarchis videntur orti, non sunt horum temporum.

## § 77.

Haec fere sunt vel historica, vel cum historia coniunctiora. In ritibus et moribus nihil aptius fuerit ad cognoscendum, quam de singulorum populorum ritibus ac moribus separatim, quid cognoscendum sit, videre. Itaque primum Interpreti opus est, scire sacerdotum et ministrorum sacerdotalium, id est, Levitarum, iura et munera, descriptionemque classium et munerum ex illo ordine obeundorum, τὰς ἐφημερίαν vocat *Lucas* 1, 5. 8. de qua praeter *Iosephum* VII, 14, 7. *Scaliger* in *Canon. Isagogicis* p. 303. 304. consulendus. In muneribus autem primum locum tenent preces  
et

et sacrificia, vel statis temporibus anni et diei, vel fortuitis de causis facienda, quae cum ritibus omnibus cognoscuntur e lege Mosaica. Itaque cum iis coniunctus est locus de diebus festis et Sabbato. In quibus maxime diligenter cognoscenda ratio solemnum paschaliū, inprimis propter coniunctionem Paschatos cum passione Dominica. De quibus nihil diligentius scriptum vidimus *Bocharti* Disputatione in *Hierozoico* P. II. L. II. c. 50. quae studiosis est legenda. Sed tamen in hac ipsa Iudaeorum magistris interdum nimis tribuit in rebus, quas ipsi non viderunt, et de quibus potius philosophati sunt, quam, quid factum esset, ex idoneis auctoribus tradidere, contra testimonia disertā antiquiorum, qui istis rebus interfuerant. Quale est, quod cum *Eudwortho* mactationem agni paschalis, etiam in Hierosolymitana urbe, ultimis temporibus, vindicat sacerdotibus solis, cum *Philo*, qui genere sacerdotali natus ac Theologus fuit, saepeque, quid ibi ageretur, vidit, nec ullo modo rem talem ignorare potuit, diserte tradat, ab unoquoque patrefamilias mactari agnum solitum, de *Vit. Mos. III. p. 686.* quo probato, multae et inextricabiles difficultates tolluntur. \*)

\*) Cf. librum nostrum: *Biblische Theologie* t. II. ed. 2. p. 392. ff.

## § 78.

Sed sacrorum omnium ratio, et multa praeterea loca Noui Test. non bene intelligi possunt sine notitia templi, quod ab Herode M. per partes destructum et restitutum est. In quo rursus frustra fides detrahitur *Iosepho*, sacerdoti, qui illud templum viderat, non historicis argumentis, sed metu, ne ea res obsit loco nobili *Hagg.* 2, 10. de templi secundi dignitate: cum ea *Iosephi* narratio bene conueniat testimoniis apud *Matthaeum* 24, 1. et *Io.* 2, 20. Sed nos illum etiam metum inane esse demonstravimus in prolusione de templo secundo ad *Haggaei* locum. In templo autem cognoscendo nihil attinet, imitari eos, qui in Salomonei templi descriptione tota constituenta frustra laborarunt. Nam etsi *Iosephus* scriptor est eruditus disciplinis et artibus, a quo accurata descriptio erat speranda: tamen rei natura non patitur, talium operum, praesertim magnorum et e multis partibus nexorum, descriptiones tales fieri, ne ab architecto quidem dicendi perito, ut sine figuris plane intelligi, et inde forma eorum accurate vel concipi vel pingi possit: quod patet exemplis descriptionum talium apud disertissimos et peritissimos scriptores, etiam *Vitruvium* et *Plinium*, cuius villas nemo adhuc

huc potuit ex eius descriptione ita exprimere, ut peritis satisfaceret.

## § 79.

Itaque satis erit ad intelligendum, nosse primum discrimen *ναὸς* et *ιερός*, deinde partes maiores, *ναόν*, in quo et τὸ ἄγιον, solis sacerdotibus patens, cum sacris nonnullis (*Ebr. 9.*), de quibus non poeniteat *Deylingium Obferu. II. n. 47.* legisse, et ἁδύτρον, in quod soli Pontifici, una modo die, semel ingredi fas erat, ut rursus *Philo Leg. ad Caium* pag. 1035. tradit, non quater, ut magistris Iudaicis vulgo creditur: circumiectam porro aream, in qua ara, ubi sacrificia et preces factae, quo non adire liceret, nisi Sacerdoti et Leuitae, atria deinde caetera, basilicas nobiliores, in historiis sacris memoratas, et loricās vel septa, quibus atria direnta, h. e. substructiones, in quibus oeci plures (*Act. 2, 2.*) seruientes coetibus discen- tium, precantiumue, diaetae et cubicula ad vsus Sacerdotum et Leuitarum *λεωεργίας* tempore, gazophylacium, etc. Quibus bene notatis ac distinctis, licebit in singulorum rerum commemoratione, ad suum quaeque locum et usum referre, ne morum nostrorum cogitatione conturbemur, et ineptas res comminiscamur contra historiam et templi rationem; cuius generis multa me

D d 2

audire

audire ac legere memini, quae commemorare non est necesse. Alia, quae e magistris Iudaeorum minute proferuntur, vel commentitia sunt, vel Interpreti nihil praesunt. De magistratu templi ante dictum.

## § 80.

Sacris, sed sine victimis, faciendis, precando, libros sacros praelegendo et interpretando, seruiuere etiam ab antiquissimis temporibus, *Act.* 15, 21. *Synagogae et Proseuchae*, quae extra urbem in omnibus fuerant locis, quae a Iudaeis habitarentur, post libertatem sacrorum impetratam quocunque in loco, etiam extra Iudaeam, ipsa in urbe Roma. vid. supra §. 67. In urbe Hierosolymorum ipsa templum superuacuas proseuchas fecit: nec locus *Io.* 18, 20. aut *Act.* 6, 4. aduersatur. Itaque nulla in urbe proseucharum mentio in libris sacris. Interdum nihil aliud, nisi locus, etiam subdualis, sed ei rei destinatus, hoc nomen tulit, ut *Act.* 14, 13. Nec differt Proseucha a Synagoga, praeterquam nomine: nisi forte Synagoga interdum maior Proseucha, ut placet *Valesio* ad *Eusebium* II, 6. qui, ut opinor, frustra laborat in discrimine utriusque constituendo. Synagogarum Praefectos, id est, ἀρχισυναγώγες et ἀρχοντας fuisse, qui sacris praessent, et potestatem dicendi

dicendi facerent, nihil dubitationis habet, *Matth.* 9, 18. vbi vid. *Grotius*, *Marc.* 5. etc. Et sunt alia, quae de more Synagogarum certis sacrorum librorum testimoniis docemur, vt, non fuisse certos doctores, sed vnicuique potestatem fieri potuisse docendi, qui peteret, *Matth.* 4, 23. *Luc.* 4, 15. seq. vbi etiam minister Synagogae memoratur p. 20. etiam poenas ibi minores sumtas ab noxiis, vt flagellationem, *Matth.* 10, 17. Caetera, quae e magistris Iudaeorum proferuntur, diligenter ab his discernenda, vt fortasse nouitia et posterioris aetatis, nec ad interpretationem librorum sacrorum conferenda; quod fecerunt interdum, qui de hac parte antiquitatis vel in Corpore antiquitatum hebraicarum vel propriis libris scripsere, vt *Vitringa*, et alii.

## § 81.

Nec, quae de Scholis Iudaeorum traduntur, qualis fuit Gamalielis *Act.* 22, 3. et aliorum in vrbe, et aliis post locis, vt Babylone, Tiberiade etc. ad solas Synagogas, quae Proseucharum numero sunt, trahenda: quippe et in templi porticibus et Hierosolymis aliisque locis publicis, vt Athenis philosophi, docebant, hoc est, de rebus sacris per occasiones datas differebant, *Luc.* 2, 46. Atque in his quoque Scholis cau-

cauendum, ne iis aut nostros mores affingamus, eas nostris similes credamus, aut omnia, quae de posteriorum seculorum scholis Iudaicis traduntur, ad illius aevi scholas trahamus. Disciplina autem earum nihil aliud habuit, quam interpretationem legis et Prophetarum, quae sola Iudaeorum sapientia fuit, ab Iudaeis iis, qui graece scriberent, *Φιλοσοφία*, more Graecorum, dicta, etiam Paulo in epistolis: nec quicquam aliud, neque in libris sacris, neque apud *Iosephum*, hoc nomine intelligi debet; cum de suo populo aut de religione ac sacris loquuntur. Theologiae verbo de rerum sacrarum scientia uti, mos illorum temporum non ferebat. Ne illud quidem probem, quod vulgo e verbis Pauli, quibus *παρὰ πόδας* Gamalielis sedisse ait, *l. c.* imaginantur sedem doctorum editiorem: nec aliud in his verbis intelligi debet, quam *Luc. 10, 39.* vbi Maria *παρὰ πόδας* Iesu sedens audit eum differentem, aut *Luc. 2, 46.* vbi Iesus apud doctores inter se disputantes sedet, sc. in solo, atque adeo *παρὰ πόδας* eorum. In verbis quidem Pauli nihil tale intelligendum.

## § 82.

Sed huius Philosophiae, id est, Theologiae, sectas plures fuisse, ab diuersitate  
inter-

interpretandarum scripturarum dogmatumque ortas, *Phariseorum* et *Sadducaeorum*, claris librorum sacrorum testimoniis constat: nam tertium genus *Essaeorum*, quod superioribus adiungit *Iosephus B. I. II. 8.* et alibi, magis viuendi disciplinam seueriorem habuit, quam propriam et dissidentem ab aliis Theologiae formam, nec ulla eius in scripturis mentio. De quibus sectis multiplex disputatio est virorum doctorum, multis et magnis libris explicata; quam cognoscere etsi non alienum est a persona interpretis; tamen ad interpretationem ipsam parum proderit. Satis erit, quae *Iosephus* habet, legisse. \*) Et Euangelia ipsa satis perspicue de eorum opinionibus atque institutis tradunt. Ad disputationem Paulinam de legis imbecillitate ad veram sanctitatem homini ingenerandam forte vtile erit, e *Iosepho* cognouisse opinionem Phariseorum de libertate et legis vi, quam illi talem putabant, vt homini legem edocto seruandae legis facultatem tribuerent. Caeterum Phariseorum nomine et Sadducaeorum appellati videntur non modo Theologi ipsi, sed etiam caeteri, qui eorum opiniones et mores sequerentur. Ac sic forte accipienda haec nomina *Matth. 3, 7.* Nec vero hos doctores nostris similes, publica auctoritate constitutos fuisse existimandum est. Licebat



bat doctorem agere, qui posset ac vellet, ex omni genere vitae. Nam Paulus quidem, etsi exercebat opificium, tamen theologum agere cogitabat, idque etiam, iam doctor religionis Christianae, exercebat.

s) Adde quae in Chronico Samaritano leguntur in Pauli Repert. Lit. Bib. Tom. I. p. 142. f.

### § 83.

Et haec sunt fere maiora ex hoc genere. Caetera, etsi minora sunt, ut de temporis distributione, de ponderibus, mensuris, numis, vestibus, poenis etc. tamen ignorata, interdum impediunt interpretem in difficultates, aut ad comminiscendas ineptias deducunt. Itaque cognoscendum anni sacri et civilis discrimen, quorum ille a Martio, hic ab Septembri initium capiebat; ratio porro mensium, quos lunares usurpatos constat, imprimisque dierum et noctium distributiones. Et noctem quidem in vigilias quatuor diuisam fuisse, patet *Matth.* 14, 25. *Luc.* 12, 38. nec id ab Romanis ascitum, sed e veteri instituto seruatum, *Thren.* 2, 19. *Iud.* 7, 19. quamquam quibusdam olim tres modo fuisse videntur: diem autem naturalem totum in duodecim horas, e *Io.* 11, 9. ut apud Romanos, per totum annum, nisi aequinoctialibus diebus, inaequales; quas quomodo mensi sint, quod nos quidem sciamus,

mus, non diferte traditur. Tertia, sexta et nona cuiusque diei sacris publicis solennes fuere. Totum denique tempus pomeridianum, ex antiquissima ratione diei in mane et vesperi diuidendi, vesperae nomine appellatur, diuisum tamen in duas partes aequales, quae et ipsae vesperae appellatae, *Matth.* 26, 20. add. *Scaligerum de Emend. temp.* p. 568. Hebdomada dierum σαββατα, atque etiam σαββατον vocant Euangelia, *Marc.* 16, 1. *Luc.* 18, 12. etc.

## § 84.

Mensurarum Iudaicarum rara mentio in Nou. Test. *Batus* et *Corus* sunt *Luc.* 16, 6. 7. illa liquidorum, haec aridorum. *Batus* aequat fere *Metreten* Graecorum, *Io.* 2, 6. qui 72. sextarios (ξῆστς) habet, auctore *Iosepho* VIII, 2. hoc est, sex congios, qui tres amphorae quadrantes aequant. *Corus* autem, qui est *Chomer*, capit decem batos, *Ezech.* 45, 11. *Choenix*, *Apoc.* 6, 6. est sexta modii pars, qui habet pedem cubicum. \*) Huc referre etiam licet *Viam Sabbaticam*, *Act.* 1. quam bis mille passibus, hoc est, octo stadiis definiunt Iudaeorum magistri, cum Interpretes Syrus septem ponat, etiam locus *Iosephi* aduersari videatur. v. Interpp. ad *Act.* l. c. et *Hauercampum* ad *Iosephi* l. c. Sed de mensuris omnes libri

libri vulgares antiquitatum Iudaicarum. In quo genere vniuerso videbunt, qui aliquid intelligere velint, ne vulgaribus nominibus modii, etc. contenti sint, sed tum demum se intelligere aliquid putent, cum geometricè, hoc est, pedibus et digitis, exprimere magnitudinem possint. Nam ne comparatio quidem cum Romanis aut Graecis mensuris, qua *Iosephus* vti solet, sufficit, nisi harum magnitudinem ad pedis rationem reuocare possis. Caeterum in hoc genere nemo diligentior est *Eisen Schmidio* in libro *de Ponderibus et Mensuris*: cui et *Lamius Appar. Bibl. I, 15. 16.* addi potest. Numi autem fere Graecorum et Romanorum sunt, qui in Euangeliiis commemorantur. Nam Graecis numis vti coeperunt, ex quo tempore sub Graecorum imperium venerant; Romani autem cum ipso Romanorum imperio inducti. Hebraicos *Siclos* interpretantur *ἀγύρια*, *Matth. 26, 15.* quos Graecorum tetradrachmis comparat *Iosephus A. I. III, 8, 3.* quod firmant *Gronouius de sestert. p. 168.* et *Relandus de Numis Samar. Diss. V. pag. 188.* et cum versione τῶν ὀ, quae δίδραχμον interpretatur, conciliat *Deylingius Obseru. S. P. III. n. 25. §. 9.* Nempe Alexandrinum δίδραχμον par est tetradrachmo Attico. Tetradrachmo par est *Stater*, *Matth. 17, 27. coll. 24.* Sicli igitur vel  
stateris

stateris dimidium est διδραχμον, *Matth.* 17. 24. quae ibi est pecunia sacra templo quotannis ab unoquoque inferenda. Sed sicii nomen proprie ponderis est (de quo vid. *Eisenschmid. S. I. c. 4.*) aequans fere semunciam Romanorum. Sexaginta sicii faciunt *minam*, ter mille autem *talentum*. De caeteris numorum graecorum et latinorum generibus dicere, nil attinet: sunt enim pueris nota. De usu horum numorum universo aliquid admonere, non alienum fuerit. Et quoniam ea res habet aliquam coniunctionem cum vectigalibus et tributis, de his praemonendum est.

1) Vid. quae de litra nuper disputavit *Kirschius* in Edit. Barhebraei ad *Chron. Syr.* p. 559.

### § 85.

Romani igitur, ex quo in Palaestinam aliquid potestatis usurpare coepere, eam tributariam reddidere, auctore rei Pompeio, qui, cum, Consule Cicerone, controuersiam inter Hyrcanum et Aristobulum secundum Hyrcanum diremisset, tributum imposuit, non permittente modo Hyrcano, sed etiam adiuuante: quo respexit forte *Cicero Flacc.* 28. certe sic intelligebat *Scaliger Animadu.* ad *Euseb. Chron.* p. 153. Provinciarum autem in numerum redacta, per *P. Sulpicium Quirinum* res tributaria constituta

Bituta est acto censu, *Lyc. 2., 2. Act. 5, 37.* add. supra §. 70. Procuratore *Coponio*. Atque huc pertinet haud dubie locus *Matth. 22, 17.* Huius census, ac tributis e censu ratio, cognoscetur optime e *Verrinis Ciceronis*, *Tacito*, apud quem saepe censuum provincialium mentio, vt *Ann. I, 31.* vbi videndus *Lipsii Exc. K.* et aliis latinis scriptoribus. Sed tum etiam vectigalia omnia ad Romanos redire, quorum genus vnum modo diserte in Euangelis memoratur, quod in portibus, portorii nomine, soluebatur. Vtriusque exactio fuit eiusmodi, more Romano, id quod e *Verrinis* patet, vt census exigenter a magistratibus vrbis cuiusque, et inde confecta pecunia tributis vel stipendii (*φόρος*) nomine solueretur, vectigalia autem (*τὰ τέλη*) a publicanis per operas suas, quarum praepositus *Promagistro* (*Verrin. II, 70.*) dictus. Atque hae operae intelligendae in *τελώναις*, portitores, promagistro autem in *ἀρχιτελώνῃ* Zachaeo: nam publicani non erant nisi equites Romani: in ministerio exactionum autem fere provincialium hominum opera utebantur.

## § 86.

In his tributis vectigalibusque soluendis non modo Romanam, sed etiam Graecam pecuniam valuisse, dubitare nos non sinit vete-

veterum testimonia. Nam propriè quidem in pecuniis describendis et veuigalibus exigendis, certe in illis, h. e. tributis, modus pecuniarum more Romanorum definitus, vnde denarius est νόμισμα κήνος, *Matth.* 22, 17. sed accepti pro Romanis Graeci, drachma pro denario, et pecunia talis a publicanis vel negotiatoribus Romanis, qui in prouinciis essent, permutatione facta, Romam curata est, vt ibi pecunia Romana aerario numeraretur.

## § 87.

Secus fuit in numeranda pecunia, quae aerario templi deberetur ex lege. Nam ea soluta numis Iudaicis. Itaque vt tales numi essent in promptu daturis aliquid religionis causa, et permutari graecis latinisue possent, institutae in templo mensae argentariorum, in quibus pecunia talis emi posset. Hi sunt κολλυβισαί et κερματισαί, quorum mensas evertit Iesus, *Matth.* 21, 12. *Io.* 2, 14. In pecuniae sacrae numero fuit et διδραχμον s. semiclus, qui ab vnoquoque Iudaeo, etiam extra Palaestinam, solueretur, *Matth.* 17, 24. cuius pecuniae etiam apud profanos, vt apud *Ciceronem Flacc.* 28. qui est locus classicus, *auri Iudaici*, et in *Codice Theod. auri coronarii* nomine mentio est, de quo hic dici non est necesse. Caeterum qui de eo velint cognoscere, adeant interpretes *Ciceronis*

ceronis l. c. et Gothofredum ad Cod. Theod. Lib. XVI. tit. de Iudaeis l. 14. 17. etc.

§ 88.

In caeteris vitae communis ac ciuilibus partibus non multum est, quod morari interpretem possit. In vestitu ἱμάτιον respondet Graecorum pallio, et χιτῶν ac σολή Romanorum tunicae vel breuiori vel longiori: quae seueriores, ut prophetae, quos Ioannes imitatus est, Matth. 5, 4. e cilicio facta vñ. vid. Ioseph. A. I. V, 8, 4. In tunica cinctu vñ sunt viri, Act. 12, 8. Tunica ἀξέφατος et ὑφαντός δι' ὅλης Io. 19, 23. est, quae non e duabus plagulis siue segmentis fit, in latere vtroque fibula aut acu nectendis, sed constat vna continenti tela, nihil habente suturae aut commissurae in lateribus aut humeris, qualem describit Iosephus A. I. III, 7, 4. tunicam talarem s. stolam Pontificis, quod et σερογγύλον ἐνδυμα vocat B. I. V, 5, 7. Huius tunicae conficiendae modum describit Theophylactus ad loc. cit. et Palaestinae proprium tradit e Chrysostomi Homil. 84. in Io. adde Rubenium de Lato clauo I, 9. qui recte repudiat rationem Salmasii, (ad Script. Histor. Aug. Tom. II. pag. 679.) tunicam e confutis, non fibula commissis segmentis intelligentis, multis temere sequentibus. Delicatiores pluribus tunicis vñ sunt,

(ut

(ut Augustus apud *Sueton.* 82.) unde Iesus vna contentos esse iubet discipulos, *Matth.* 10, 10. *Κερίσπεδα* *Matth.* 25, 5. sunt in pallio *Marc.* 9, 20. laciniae, quae Graecis *πρεσβύια*. Nam finabrias adfutas habuisse Iesum, non credibile. *Λευκὰ ἱμάτια* *Matth.* 17, 2. sunt Latinorum candidae vestes, ab artificio fullonum, *Marc.* 11, 5. a splendore etiam *ἐξασπάρτοντα*. Nam et *Cyrillus*, *Catech.* 2. vestem baptizandorum *ἀσπάρτσαν* appellat. *ὑποδήματα* interdum eadem cum sandaliis, id est, soleis ligneis, quae corrigiis devincirentur, *Marc.* 1, 7. interdum calcei caui, quorum usu suis interdicat Iesus, *Matth.* 10, 10. Nam sandaliis uti sinit, *Marc.* 6, 9. iisque usus Petrus, *Act.* 12, 8. add. *Salmasius* ad *Tertullianum de Pallio* p. 388.<sup>u)</sup>

u) Plura dabit *Braunius* in libro, de Vestitu sacerdotum hebraeorum. *Amstelodam.* 1701. 4.

### § 89.

Modus coenandi nihil, praeterquam in precibus, dissimilitudinis habet a Graeco aut Romano. Nam pariter circa horam vudecimam fit coena, et in ea lectis stratis (*Marc.* 14, 15.), eum in paschali, *Marc.* 14, 18. discumbitur, secus quam in principio factum, et *Bocharto* loc. cit. pag. 601. visum. vid. *Scaliger Emend. Temp.* pag. 570. Cibus manu



manu sumtus, sine fuscinae et cultri usu, unde mos lotionum in coenis, *Marc.* 7., 3. et fractio panis lati et tenuis. Vinum semper cum aqua sumtum, et quidem post cibum sumtum vel coenam: merum bibere, extra quam in morbo, intemperantis et ἀσώτῃς, et de misto semper οἶνος capiendus. Lauti etiam vnguentis vfi: unde honos Iesu habitus effusa in caput vnguenti lagenula, ἀλάβαστρον vocat *Matth.* 26, 7. cuius confractio *Marc.* 14, 3. de refracta superiore parte colli intelligenda, orificio obfigmato, quod signum erat genuini vnguenti foris adveeti, auctore *Plinio*. Etiam coli (Gr. ἡθυσῆ) usus in coenis, sicut apud alios populos, *Matth.* 23, 24. per quod funderetur in pocula vinum e cratere, ne quid alieni admisceretur. v. *Chishul* ad *Inscript. Sigeam* p. 37. sq. In conuiuiis lautioribus etiam magisteria conuiuii vfitata, *Io.* 2, 9. non tamen ad modum Graecorum aut Romanorum, sed quae curam conuiuii haberent. Ea porro in libris N. T. semper fiunt Sabbatis: nam alii dies profesti labori destinati. His propria loca in aedibus ditiorum destinata fuisse, vt Romae trichinia, locus *Marc.* 14, 15. arguit, de quo mox.

## § 90.

Sed omnino aedificandi ratio Iudaica  
non

non debet esse ignota. Tecta prope plana fuisse, ut apud Graecos, vulgo etiam notum est pluribus V. T. locis. In aedibus ditiorum memoratur προαύλιον et αὐλή, siue duplex aula, *Marc.* 14, 66. 68. conf. *Io.* 17, 15. 16. illud vestibulo, haec atrio respondet, siue altera est exterior, altera interior aula ante aedes, et προαύλιον est, quae Graecis proprie αὐλή. In hac porro porticus, in quibus conuiuia acta, et alia, ut ea, quae de Iesu acta sunt apud Pontificem Caiphā, ut patet e *Matth.* 26, 69. coll. *Luc.* 22, 61. Υπερώων est oecus in superiori parte aedium, destinatus variis vlibus, ut conuiujs, *Marc.* 14, 15. nam ἀνώγειον ipsum ὑπερώων: *Hesychius*: ὑπερώα, ἀνώγαια: precibus faciendis et similibus rebus, *Act.* 1, 13. 20, 7. 8. proponendis mortuorum cadaueribus, *Act.* 9, 37. etc. Aedificia priuata, quos πύργος vocant Euangelia, *Matth.* 21, 33. *Luc.* 14, 28. intelligenda locis editis structa, aut alius, prospectus causa, in vineis, hortis, villis, non, quas nos turres vocamus. vid. *Dukerus ad Liuium* 35, 48. v)

v) Et *Faber* in *Archaeologia Hebraeorum*, cuius primus tantum tomus prodiit. Multa ei insunt bene exposita; hic illic tamen (v. c. p. 419. ad *Luc.* V, 19.) trepidat.

## § 91.

Ea igitur fuit pars funeris curandæ, de qua ante. Sed corpus mortui totum involvitur fasciis, os tectum sudario, *Io.* 11, 44. 19, 39. 20, 5. quod bene illustrat *Cuperus Obs.* 2, 9. etiam vinctum honoris causa, *Marc.* 16, 1. *Luc.* 24, 1. *Io.* 19, 39. in quo est pars *ἐνταφιασμῶς*. Adhibiti etiam tibicines, *Matth.* 9, 23. Elatum corpus feretro, illatum est sepulcro, quod ditiores superstructis monumentis ornabant. In ipso sepulcro, quod exciso saxo factum esset, in parietibus cavitates excisæ sunt, ad modum corporis humani, in quas illatum corpus; cui rei illa vinctura fasciarum serviebat: quod tamen secus fuisse videtur in sepulcro Christi, *Io.* 20, 12. vid. *Stephanus Monachus Var. Sacr.* T. II. p. 516. sqq.

## § 92.

Poenæ inter Iudæos usitatae commemorantur in libris N. T. *lapidatio*, *Act.* 7, 58. seq. ex quo loco coll. *Deut.* 17, 7: moris ratio satis clara est, et *decollatio*, *Act.* 12, 2. *Crucis* poenam, qualis sumpta a Iesu Christo, non esse Iudaici moris, contra opinionem *Lipsii*, et aliorum, planum facit, ut alios taceamus; *Cusaubonus c. Baron.* 16, 77. nec magistri Iudæorum inter capitis poenas crucem referunt. Nam quod Moses ha-

be!

het de suspendendis maleficis, id de interfectorum gladio, aut alio modo, cadaueribus, contumeliae causa, ad occasum solis suspendendis e palo, intelligendum:\*) nec quemquam verba *saupōs*, *saupēv*, et similia, quae de crucis poena dici solent, conturbare debent. Sed omnino ambigitur, Iudaei poenarum capitalium sumendarum ius habuerint sub Procuratoribus, nec ne. Analogia iuris prouincialis sane non finit, hoc ius iis concedi. Itaque si fuit, excepta fuerit, necesse est, in formula prouinciae et iure Iudaeis concessio, potestas interficiendorum e legibus suis, quos religio occidi iuberet; quod non abhorret ab iis, quae Iudaeis Caesarum decretis tributa sunt. Locus tamen *Io.* 18, 31. ob stare videtur, in quo simpliciter Iudaei profitentur, sibi *nullius* interficiendi ius esse. Nec inuat locus *Act.* 7, 57. Nam vix satis liquet, an ea res ante acta sit, quam imperium Iudaeae ad Agrippam rediisset.

\*) Conf. Ioh. Bened. Michaelis de Poenis Hebraeorum capitalibus. Halae 1749. et L. D. Michaelis Ius Mosaic. Tom. V. §. 231. seqq. Vide obseruat. ad §. 72.

### § 93.

In caeteris poenis *fustigatio*, eiusque modus occurrit 2 *Cor.* 11, 14. dein *flagellatio*, *Matth.* 10, 17. denique *excommunicatio*,

Ee 2

Io.

*Io. 9, 22.* de qua multa et anceps est disputatio. In qua vereor, ne, vt in aliis capitulis, recentiora cum antiquis commisceantur, sitque proprie vna excommunicatio, quae l. c. exprimatur, submotio a communionem sacrorum, quae, extra Hierosolyma, exclusionem ab aditu Synagogarum cernatur. Certe loca *1 Cor. 5, 5. 16, 2.* male ad excommunicationem trahuntur, vt bene monet *Basnagius Dispp. Antiqu. S. Dispp. 1. (T. II. Annal.)*, quem tamen non sequar, defendentem cum *Seldeno*, eam tantum pertinuisse ad remotionem a congressibus priuatis ac ciuilibus, quae ne in christiana quidem excommunicatione intelligitur, nec hoc esse potest ἀποσυνάγωγον εἶναι. Haec de ritibus, institutis ac moribus Iudaicis, et iis, quae propria Iudaeorum fuere, et cacteris, quae ab imperio alieno orta sunt, et coniunctionem aliquam cum rebus Graecorum et Romanorum habuere: ad Romana et Graeca veniamus.

## § 94.

E Romana igitur historia res Caesarum ab Augusto ad Neronem cognosci debent, sub quibus Iesus vitam in his terris egit, Apostoli docuerunt, et Ecclesia Iesu Christi constituta est, propterea, quod in Euangelis et Actis Apostolorum multa sunt, quae vel explicari

explicari satis non possunt, nisi Caesarum rebus accurate cognitis, vel certe lucis aliquid inde accipiunt. Quae autem ad hanc partem historiae Romanae pertinent, optime discuntur e *Tacito*, *Suetonio*, *Dione Cassio*, inprimisque *Iosepho*, vnde pleraque etiam collecta, digesta, et observationibus illustrata sunt a Viris doctis; e quibus *Casaubonum* et *Pagium*, libris supra laudatis, et *Tillemontium* in historia Imperatorum, vt *anxi-Bezeers*, maxime commendauerim, quorum Commentarios, quae pertinent ad hunc locum, legent, saltem, vbi aliquid vel obscuritatis, vel dubitationis inciderit, vtiliter consulent studiosi. In hac ratione inprimis proderit videre, quae Actorum Apostolicorum pars ad cuiusque Imperatoris aetatem atque imperium pertineat. Sed hoc proprie ad temporum rationem pertinet, de qua supra dictum.

## § 95.

Maxime autem videndum est, vt forma imperii Caesarei, ab Augusto inducta, bene nota sit, quomodo, et per quos magistratus, respublica domi forisque administrata fuerit, quid ea denique diuersi habuerit ab ea, quae libera respublica fuit, cui ab lectione scriptorum eorum, qui in scholis minoribus tractantur, latinitatis discendae causa, adfuerunt

sunt studiosi, et propterea facile res diuerfas, similitudine nominum decepti, confundunt; in quo genere viros doctissimos interdum lapsos vidimus. De Proconsule Cypri supra diximus. Inprimis in prouinciis administrandis non modo vniuersa ratio tenenda est, quam ante explicauimus; sed etiam commutationes in ea ratione subinde factae. Nam et Augustus quaedam mutauit, et Tiberius, et caeteri. Achaia et Macedonia Proconsulares in principio, ex Augusti instituto, a Tiberio Caesareae factae, quas per Legatos regeret; ab Claudio Senatui redditae sunt: vnde recte et proprie, *Act.* 18, 12. Gallio Proconsul Achaiae appellatur, sed alia, quam apud Ciceronem P. Sulpicius, vi, vt et Asiae magistratus *Act.* 19, 38. vbi nemo in numero debet arguari. Ita etiam in promptu erit, quomodo loco quoque ἡγεμῶν et ἡγεμονεύειν, et de qua potestate capi debeat, iudicare,

## § 96.

Ipsa autem potestas prouincialis quomodo iure dicundo et iudiciis exercendis usurpata sit, sciendum est, quique in ea remores fuerint. Id vnde optime discatur, supra monuimus §. 71. Et sunt multa in narrationibus de rebus prouincialibus, apud *Tacitum* inprimis, quae ad hanc partem cognoscendam profunt, inprimis, quae differunt ab

ab vetere ratione, quae libera reipublica fuit, itemque in decimo Epistolarum Plinianarum. Ex quo genere est mos appellandi Caesares, et ab decretis magistratuum provincialium ad eorum iudicium prouocandi, nec minus locus de causis iis, quae Caesaris cognitioni relinquerentur, ad *Act.* 25, 11. 28, 16.

## § 97.

Et quoniam etiam rei militaris, qualis Caesarum temporibus in Vrbe et provinciis fuit, vestigia quaedam sunt in Euangeliiis et Actis Apostolorum, haec quoque non ignota esse debet. Et in Vrbe quidem, cum ex instituto Caesaris copiae quaedam fuissent, ad custodiam salutis suae, Augustus tales copias habuit Cohortium praetorianarum nomine, inducto more a Triumuiris, ut idem plures haberet, cum prisco more singuli Duces singulas habuissent: iisque duo Praefecti praepositi, per quas non modò salutem suam domusque suae tuerentur, sed quas etiam instrumenta et munimenta principatus haberent. Eas Castris propriis, extra urbem, vno loco habere instituit Tiberius. Ipsae Cohortes et Castra pariter *Praetorium* appellata (*Phil.* 1, 13.), atque inde Praefectus Praetorio, *στρατοπύδαρχος*, *Act.* 28, 16. Per hos milites actum, quicquid militari in vrbe ministerio indigebat. Praefectum eum, qui



a Luca commemoratur, *Burrum* intelligendum esse, speciose disputant viri docti: cuius rei iudicium in temporum ratione situm est. Nam numerus singularis in Praefecti verbo, quo inprimis nituntur, quod Burrus hanc potestatem sine collega habuit, quod ante et post ipsum secus fuit, in ea re nihil efficit. Etiam Traianus apud *Plinium* X, 68. de aliquo scribit: *vinctus ad Praefectum Praetorii mitti debet*, et apud *Suetonium* Claudius c. 12. postulat, vt sibi liceat, *Praefectum Pr.* in curiam inducere; ex quibus locis nemo colligit, vnum tum Praefectum fuisse.

### § 98.

In prouinciis porro vel legiones vel cohortes collocatae ad custodiam securitatis vel externae vel internae, et ad ministeria magistratum, in quibus manu militari opus esset. Legiones maiorum prouinciarum sunt, cohortes minorum, quales Iudaea, Cyrenaica etc. quae a Procuratoribus administrantur. Itaque in Actis Apost. *σπεῖραι* modo commemorantur, *Italica* cap. 10. et *Augusta* c. 27. quae non bene a nonnullis pro legionibus habentur, et propter analogiam institutorum prouincialium, et quia legio Italica a Nerone demum instituta est, in cuius tempora locus ille non cadit, denique legio Augusta in iis regionibus nulla fuit. Itaque nec dux maior tribuno occurrit. Sed  
haec

haec in pace. Cum bellum esset in tali provincia, aut belli metus, etiam legiones eoductae sunt. Locus huc pertinebat est apud *Iosephum* A. I. XIX, 9, 2. De legionibus Rom. earumque castris in provinciis nobilis est locus *Dionis* Lib. LV. pag. 564. in quo valde laborarunt viri docti, *Lipsius*, *Bretingerus*, V. C. et alii. vid. *Cel. Reimari* notam ad illum locum. De Cohorte Italica et Augusta extat libellus *Schwarzii* *Altorfii*. Caetera, quae ex militari ratione tanguntur in N. T. ut de vigiliis etc. vulgo nota sunt.

## § 99.

Ad provincialem administrationem pertinet etiam Censui, cum aliis redditibus, vel aerario, vel fisco Caesaris inferendis: quod genus supra iam tetigimus. In maioribus provinciis ea cura fuit quaestorum et procuratorum Caesaris, illis aerarii, his fisci redditus curantibus. In Iudaea res omnis pertinet ad curam Procuratoris. In N. T. census et vectigalia memorantur: de quibus et ipsis dictum. Sed de Censu aliquid hoc loco addendum videtur. Ac de censu eo, qui propter tributa fieret, qui et ipse pro tributo dicitur; (nam ut apud *Tacit. Ann. I, 11*. sunt *tributa aut vectigalia*, sic *Matth. 17, 25*. τέλη ἢ κῆνσος) quomodo actus sit, et per quos, supra diximus: adde *Lipsium* ad

ad *Taciti Annal. I. 31. Exc. K.* nec in eo est difficultas aut dubitatio. Sed et alterum genus censendi putant viri docti esse, in quo nihil nisi numerus hominum quaereretur, talemque intelligendum esse eum, per cuius occasionem Maria cum Iosepho Bethlehem venerit, *Luc. 2, 1.* quam sententiam late et probabiliter defendit *Perizonius de Augusta orbis terr. descriptione.* Contra dici potest, quod talis census in provinciis, multo magis in regno alieno, acti nullum uspiam exemplum extat; et si talis census in regno Herodis agi potuit, nihil impedire videtur, quo minus et tributum alicuius conferendi causa actus dicatur, quod vel exemplo Pompeii fieri potuit, vel ex conditione ac lege, qua Herodi regnum alienum concessum est. Sed difficile est, in tali re aliquid certi reperire. \*)

\*) Quare v. c. Maria censebatur *Luc. II. 5.*? Respondemus: in Syria etiam feminae tributum capitis soluere debebant; *Digest. L. 15. 3.*

### § 100.

Sunt alia rerum Romanarum vestigia in libris N. T. ut coloniarum, numorum, pecuniarum, quas partim propter coniunctionem cum rebus Iudaicis iam attigimus supra, partim, quia nimis nota sunt, praetermittimus. Atque etiam de iure civitatis Romanae, quod

quod a Paulo in Actis commemoratur, vulgata sunt omnia, vt in iis nemo facile possit haerere. Illa vero quaestio, vnde Pauli vel maiores, vel pater, ius ciuitatis acceperint, haud facile dirimi perspicue potest. Caeterum Verrinae Ciceronis declarant, Imperatores Romanos, qui prouincias obtinerent; extremis reipublicae temporibus, faciles admodum fuisse in ciuitate Romana tribuenda prouincialibus, vel propter operam sibi in aliquo genere nauatam, vel per gratiam, vel propter commendationem alienam. Itaque etiam per talem aliquam causam ad aliquem de Pauli maioribus ciuitas Romana venire potuit.

## § 101.

Graeci ritus vestigia plura esse in N. T. mirum non est, cum in Actis narrentur multa in ciuitatibus graecis acta, epistolae Pauli autem scriptae sint plures ad Ecclesias in ciuitatibus graecis. Itaque non oportet Interpretem rudem esse rerum graecarum, sed bene nosse religiones graecas, magistratus, instituta publica, moresque vitae priuatae. Religionum notitia lucem dabit locis iis, vbi sacra graeca commemorantur, vt loco *Act.* 19, 35. vbi Dianae cultus est *Ἐφεσίων νεωκόρων*, et Dianae simulacrum *Διόνειρος*; vt *ibid.* 17, 23, et 14, 12. tum his, in

in quibus infanda Graecorum superstitio accusatur, vt *Act.* 17, 16. *Rom.* 1. *Eph.* 2, 1. etc. item de εἰδωλοθύτοις loco. Nec sine literis graecis intelligi potest, quales magisteratus *Asiarchae*, et γραμματεῖς in *Actis* 19, 31. 35. sint: de quibus multi multa, vt *Valesius* ad *Euseb.* IV, 15. *Rubenius* de *Vrbibus Neocoris*, *Spanhemius* de *usu et praestantia numism.* *Diff.* IX. §. 4. etc. item *Areopagitae* Atheniensem, *Act.* 17, 34.

## § 102.

Est etiam, vbi ritus sacrorum graecorum aliquid lucis praebent, vt de ornatu victimarum, *Act.* 14, 13. vbi ταῦροι καὶ σέμμα-  
τα sunt, id est, *tauri cum vittis*. Ex hoc genere etiam putant esse τὰ τετραχλησιμένα, *Hebr.* 4, 13., quod tamen fortasse rectius a resupinatione noxiorum ducitur, qui contumeliae causa per vias vrbis ducuntur, vt apud *Sueton.* *Vit.* 17. coll. 1 *Cor.* 4, 9. Quomodo autem se Paulus περιβάδαιμα et περίφημα appellet 1 *Cor.* 4, 13. optime intelligitur e more victimarum piacularium, earundemque humanarum, apud Graecos: quod pulcre illustrat *Lamb.* *Bos* in *Exerc.* *Phil.* ad N. T. ad h. l.

## § 103.

Neo dubitari potest, quin res numaria,  
sicut

sicut Hebraeorum et Romanorum, sic Graecorum; nota esse debeat Interpreti: quod in pecunia fere verbis graecis utuntur scriptores sancti, et pecunia hebraica comparatione cum graeca explicari debet, ut supra vidimus. Nam, ut nihil dicamus de drachma, quam denario Romano respondere, satis constat, et quartae sicli parti, et de stater, de quo supra diximus: λεπτα *Marc.* 12, 42. commemorantur, quae esse drachmis apud Graecos interdum synonyma, docet *Gronovius de sestert.* pag. 91. Sed ille locus difficilem habet explicationem, si quis nolit contentus esse vulgatis versionibus. Et *Act.* 19, 19. ἀργυροῖς μυριάδες πέντε occurrunt, quas ad rationem graecam, non ad hebraicam cum *Hammondo*, accipiendas esse, in promptu est ex ipsa re, et loco rei gestae, hoc est, ut argenti verbo drachmae intelligantur. Eandemque ob causam mensurae et pondera Graecorum cognoscenda sunt. Nam talentum et mina est in Evangelis, quae si non graeco sensu accipienda, certe cum ponderibus graecis comparanda sunt: quod iam supra tetigimus: et μετρητήν habet *Io.* 2, 6. quae est mensura graeca duodecim capiens congios, de quibus et ipsis ante dictum.

## § 104.

Saepe etiam est in epistolis Pauli, vbi modi loquendi ducti sunt ab armaturis Graecorum, vt in pulcerrimo loco *Eph.* 6, 10. sqq. item a ludis gymniciis, vt *Phil.* 3, 12. et in *1 Cor.* 9, 24. sqq. quo loco nihil est pulcrius: quae lucem capiunt ex institutis Graecorum in hoc genere. Τὸ ὑπὸ πικρῶν ἰβι pulcre illustrat *Lambert.* *Bos* ad h. l. et toutum illud pag. 26. 27. *Zornius* ad Excerptum *Rhenferdii* in *Bibl. Antiqu. Exeget.* pag. 866. sqq.

## § 105.

Prodest etiam, nosse morem Graecorum in concionibus habendis, ad intelligendam mentionem theatri in tali re, *Act.* 19, 31. nec minus altero loco, de concione Herodis ad populum Caesareensem, *Act.* 12, 21. de quoq. adeundus *Ranischius*, in *Disp.* ad h. l. et *Iosephi* de eadem re narrationem. Quid dicam de re nauali, qua non intellecta e libris Graecorum, haud bene interpretetur quis capita Actorum Apost. de navigatione Paulina, imprimis 27, 16. 17. 28. 29. 30. 40. etc. et 28, 11. quem illustrant *Scaliger* ad *Euseb.* pag. 40. imprimisque *Albertus* ad h. l. Sed omnino de hoc genere, vbi opus erit, consulendus *Schefferus* in proprio *de re nauali veter.* opere, qui

qui eam rationem diligentissime est persecutus. Et sunt alia antiquitatis graecae, non inutilia interpreti, sed minutiora, nec difficilia. Nec nobis animus fuit, omnia persequi, sed per praecipua capita ire.

## § 106.

Haec autem omnia recensuimus etiam hac de causa, ut appareret studiosis, quam multa essent in libris sacris, quae sine historiae et antiquitatis scientia, sine multis literis graecis et latinis, bene, h. e. ut dignum est interprete, tractari non possent. Et sunt aliae quoque causae, quare haec pars literarum atque doctrinae cum caeteris, quas in principio huius capituli commendauimus, etiam atque etiam commendata esse debeat.

## § 107.

Nam si ii, qui libros humanos, graecos et latinos, tractant, non dubitant omnia excutere diligentissime, ad minutias usque, ut nihil neque in verbis, neque in rebus intactum et obscurum maneat, atque in eis se vtiliter operam ponere putant, laudem quaerunt et inueniunt: certe turpe sit Interpreti sacrorum librorum, his non idem tribuere, et ignauiae atque inscitiae suae velimenta quaerere ex eo, quod earum scientia nihil ad doctrinam religionis valeat.

## § 108.



## § 108.

Atque etiam illud sciendum est, ingenium humanum, praesertim si sit non obtusum, in omni genere doctrinae non contentum esse scientia rerum necessariarum, sed requirere aliquid amplius et exquisitius, in quo exercere ingenium et diligentiam possit. Igitur optimum fuerit Interpreti, se ad hanc partem conferre, ne deducatur ad nugas, et ineptias metaphysicas, et alia commenta ingenii non subacti bonis literis, ad quae semper proclives fuere, qui ab literis rudes aut leuiter tincti ad libros sacros tractandos accessere. Nihil aliud scholasticas nugas peperit, et nunc parit similes, et somnia vigilantium hominum, quam liberalis doctrinae contemptus et ignoratio.

## § 109.

Sed illud maximum est, quod sine accurata harum rerum scientia verba diuina saepe torquentur, peruertuntur, et excogitantur, quae pro interpretationibus venduntur, sed saepe sine risu audiri, aut legi non possunt. In vna passionis dominicae historia quam multi saepe nugati sint, et adhuc nugentur, in praeputio est iis, qui haec recte intelligunt, atque etiam questi sunt inter doctos viros. Sed pleni sunt et veterum et recentiorum Interpretum libri talibus

bus rebus, quas ab ignorantia historiae, antiquitatis et linguarum natas esse patet. Quod quam indignum sit libris sacris, quam diligenter cauendum, omnes vident.

## § 110.

Habet autem haec ratio antiquitatis graecae et latinae, omninoque literarum graecarum et latinarum, ad interpretationem conferendae, plures cautiones. Nam primo videndum est, ne eius studio nimis capiamur, deinde, ne ea scientia inepte utamur. In illo vitio sunt, qui nihil aliud in interpretandis scripturis sequuntur, et hoc prope vnum agunt, ut voces et phrasas graecas e scriptoribus graecis illustrent, et summa diligentia veniantur omnia loca, quae ad id consilium prodesse videantur: de quo genere admonui Cap. IX. §. 48. Itaque torquent verba vel sacrorum librorum ad rationem suarum observationum, vel etiam verba humanorum, et cogunt idem significare, quod, aliunde didicere, verba diuina valere. Quo genere ineptiarum pleni sunt libri Observationum philologicarum e scriptoribus graecis. Quod est diligenter cavendum, resque ita moderanda, ut nec negligamus lectionem scriptorum veterum graecorum conferre ad illuminandas formas vere graecas Nou. Test. sed id faciamus recta ratione et eleganter: in caeteris, ex

F f                      hebrai-

hebraicis potius cum versione τῶν ὁ comparatis interpretationem ducamus, et secundum ea, quae supra dicta sunt, existimemus, plus hanc ad bene interpretandum Nou. Test. valere, quam alios graecos libros omnes. In antiquitatibus autem videndum est, ne eas alieno loco obtrudamus scriptoribus diuinis, et inde exprimamus sensus alienos: tum ne fingamus ritus et mores antiquos e verbis male intellectis, cuius generis ipsius exempla in libellis philologicis reperiuntur; nec modo his, qui ad Nou. Test. pertinent, sed etiam, qui ad caeteros scriptores graecos et latinos. Nam illud supra iam monuimus, hanc omnem scientiam certam et accuratam, hoc est, e fontibus ipsis recte ductam esse debere. Hae literae leuiter tactae ineptos faciunt et nocent, penitus et accurate perceptae modo profunt.

## § 111.

Ne partem aliquam historiae veteris praetermisisse videamur, etiam philosophica attingenda est, cuius in Nou. Test. libris interpretandis vsum proprio libello demonstrauit *Walchius*, Theologus Ienensis Clar. Sed in hac re magna cautio opus est. Atque illud quidem parum est, quod Stoicorum et Epicureorum Athenien-  
sum

sum mentio est in Actis Apost. propter quem locum non est admodum necessarium, dogmata utriusque sectae nosse. Nec philosophiam, quae a Paulo aliquot locis commemoratur, huc pertinere, ante dictum est. In epistolis Paulinis autem vestigia philosophiae cuiusdam orientalis, e qua Gnostici hauserint, deprehendi, sunt, qui existimant. Itaque ex illa ratione multa interpretantur loca: in his *Hammondus*. Sed Gnosticos cum sua progenie acro Apostolico posteriores esse, satis constat: \*) *ψευδῶνυμος γνῶσις* 1 *Tim.* 6. alio trahenda, quam ad Iudaica dogmata. In iis autem, in quibus Apostolos putant dogmata philosophiae illius ante oculos habuisse, valde vereor, ne inscitia sit sermonis et sensus Apostolici: vel ut cum Paulum *Hebr.* 1, 2. verbis, *δι' ἧς καὶ τὰς αἰῶνας ἐποίησε*, aëonas Philosophorum improbasse putant, in quo merus hebraismus est, mundi effectiōnem exprimens, ut omnes olim acceperunt. Itaque cauendum est, ne in hoc genere decipiamur specie doctrinae, quae ut maior est, ita magis suspectam interpretationem facere debet: idque in omni ratione interpretandi imprimis tenendum, videndumque, ne res bona literarum obsit nobis potius in quaerendo vero, quam profit.

\*) Neque

γ) Neque tamen semina huius philosophiae altius repetenda esse, quisquam iure neget. Quamvis enim recte explodantur, qui Platonicae philosophiae semina in N. T. sibi deprehendisse videbantur, occurrunt tamen in eo bene multa, quae siue chaldaicae, siue graecae originis sint. Exempli loco esse potest Pauli doctrina de pleromate, quo Deus primum in naturam I. C. sublimiorem, deinde in ipsam ecclesiam omnem sapientiae copiam transfudisse dicitur: Ephes. I, 20, f. Col. II, 3 — 10. Fuit itaque gnosis ante gnosis et dualismus ante Manichaeismum, simplex tamen verumque et rationis unitate.

---











YB 71893

28259

BS

476

E7

1809

**THE UNIVERSITY OF CALIFORNIA LIBRARY**

